

येरमीया

ब्रेक्ब मुरः एको किताब येरमीयाम ब्रेक्शो बाक्ब। पिप योयाकीमम आ हुकुम पची ना येरमीयामी आ लोत्र नेल्ल आ ब्रेक्ब मुर बारुक कली ब्रेक्पाइक्तु। साइ डोंइती रे यहूदी नु ख्रीस्तीयन नेल्लेम मेको किताब येरमीया आ ब्रेक्शो बाक्ब, दे तुइक्नीम।

गेना ब्रेक्शोः मेना अस्सुर रागी खतम दुम्त। मेदी नु कल्दी डा मुरपुकीमी अस्सुर डा ठेयब सहर निनवे कली लडाइ पा ग्रातेक्म। मिनु मेको रागी आस दातेमी योक्साक्स। ६०९-६०६ बि. सी. मेर पिप नेबुकदनेसरमी इजीप्त कली लडाइ पा ग्रात। नोले डोंइती डा यहूदी आन कली ग्याइशशा लाइक्तीके बाक्त। मेको ६०६ बि. सी.म बाक्त। मेको आ नोले डा ग्याइशशा लाइक्तीक ५९८ बि. सी.म बाक्त। मिनु नेल्ल क्येडा नोले डा ग्याइशशा लाइक्तीके ५८६ बि. सी.म बाक्त।

मारदे ब्रेक्शोः यहूदा डा मुर परमप्रभु गे मलेत्तेम हना, निसाफ पचा पुंइसीनीम। यरूसलेम सहर फ्रुचा पुंइसीब। मिनु नोले थुं बारपाइक्तीके लोत्र शुश ताइब। मिनु इस्राएली मदुम्शो अर्को रागी डा मुर यो मेको नक कबल डा शिशी ताइब दुम्ने चाप्नीम।

येरमीया सु बाक्म

1 एको चढेब हिल्कीयाह आ तौ येरमीया आ लोत्र बाक्ब। मेको बेन्यामीन आ रागी अनाथोथ सहरम बाक्शो बाक्त। येरमीया ११:२१; यहोसु २१:१८; ब्यवस्था ३३:३२

2 यहूदा डा आमोन आ तौ पिप योसीयाहम सासन पवा आ १३ बर्समी परमप्रभु यावेमी येरमीया कली लोत्र पाप्तु। २राजा २१:२४; २राजा २२:१

3 मिनु यहूदा डा योसीयाह आ तौ येहो-याकीम आ पाला नेल्ले नु यहूदा डा योसीयाह आ तौ सिदकीयाहम सासन पवा आ ११ बर्स डा ५ महिनाम परमप्रभु यावेम येरमीया कली लोव्र पना पन बाक्त। मेना यरूसलेम डा मुर ग्याइशशा लाइक्चा पुंइसीशो बाक्तेक्म। २राजा २३:३४; २राजा २४:१७; २राजा २५:२-२१; येरमीया ३९:९

येरमीया कली ब्रेशो

4 मिनु परमप्रभु यावेमी आं कली मार लोव्र पाप्तु देशा हना,

5 “गो इ कली कोव्रजीम जोल्चा क्येडा डोंइती तुइक्ताक्ड। गो इ कली जरमेचा क्येडा डोंइती योव्रशा तिल्लतन। मिनु इ कली रागी रागी डा मुर आन कली आं लोव्र पाइब सेल्लतन” देंत। यसैया ४९:१; गलाती १:१५

6 मिनु गो “परमप्रभु, परमप्रभु यावे, गो दोपा ब्वाक्चा माल्लनुडा, मजोक्नुड। गो आलन बाक्नुड” देंती। प्रस्थान ४:१०; यसैया ६:५-७

7 तन्न परमप्रभु यावेमी आं कली “गो आल बाक्नुड मदेनो। गो इ कली सु सु आन बाक्तीक सोइक्नना, मेकेर लचान माल्लेवे। मिनु गो इ कली मार अरेडा, मेको देंचा माल्लेवे।

8 गे मेको आन क्येडा महिनो। मारदे हना गो इ कली प्रोंइचा कली गे नु बाक्नुड” दे परमप्रभु यावेमी देंत। प्रस्थान ३:१२

9 मिनु नोले परमप्रभु यावेम आ गुइ दिंशा, आं शोव्र थिप्तु। मिनु आं कली “मुल आं लोव्र इ शोव्रम कुर पाता। प्रस्थान ४:१२

10 नेनो, मुलाक्ती गो इ कली रागी रागी नु राज्य आन पर्बम लोव्र पाइब सेल्लतन। तुल्चा नु प्रेत्या कली, खतम पोक्चा, ग्रांग्ये माग्ये पपाइक्चा नु सेल्चा नु खुम्चा कली वोइक्तन” देंत। येरमीया १८:७-१०

11 मिनु परमप्रभु यावेमी आं कली “येरमीया, गे मार, तवी?” देंत। मिनु गो “देसी बदाम रवा आ राशी का ताता” देंती।

12 मिनु परमप्रभु यावेमी “गे ठीक ताप्तीवी। मारदे हना गो आं लोव्र नेल्ल दुम्ल, दे योव्रकी पा बाक्ती” देंत। येरमीया ३१:२८

13 मिनु परमप्रभु यावेमी लेंशा आं कली “गे मार, तवी?” दे हिल्लो पाप्तु। मिनु गो “बुइश्शो मार, मार बाक्शो ग्योंब का उत्तर रे याक्सीशा यिशो ताता” देंती।

14 मिनु परमप्रभु यावेमी आं कली “उत्तर रे एको रागीम बाक्ब मुर नेल्ल आन कली श्येत जाक्ब। येरमीया ४:६; येरमीया ६:१, २२; येरमीया १०:२२; येरमीया २५:९; येरमीया ५०:४१

15 गो उत्तर डा राज्य डा जात जात डा मुर आन कली ब्रेत्नुड। मिनु मेको नेल्ल जाक्शा, यरूसलेम डा ठेयब लाप्चो ओव्रतीक लांमी, एर ओंथ डा गारो नेल्ल नु यहूदा डा सहर आ डोंइती आन पिप आन नित्तीक वोइक्नीम। मेकोपुकी मेको आन पर्बम लडाइ पचा कली जाक्नीम।

16 मेकोपुकीमी आं कली प्रोंइशा, आं अरेशो मटितीके, गो मेको आन पर्बम आं निसाफ नेंपाइक्नुडमी। मेकोपुकीमी अरु देवी देवता आन कली धूप चोम्तेक्म। मिनु आन गुइमी सेल्शो देवी देवता आन कली पूजा पाम्तेक्म।

17 गे चहिं बोक्शा, ठीक दुमो। मिनु गो इ कली मार, मार, अरेडा, मेको आन कली माइक्मी। गे मेको आन क्येडा महिनो। मो पाप्तीवी हना, गो इ कली मेको आन डोंइती हिंपाइक्नन।

18 मुलाक्ती गो इ कली गारो हिरशो बोल्यो सहर, फलाम के थाम नु कांसा के थरपु खोदेंशो सेल्लतन। मोपा गे यहूदा डा पिपी, हुकुम पाइबपुकी, चढेबपुकी नु रागी डा मुर नेल्ले आन मरिम्शो पशो आ पर्बम लोव्र पने चाप्नेवे। येरमीया १५:२०; इजीकीएल ३:८-९

19 मेकोपुकीमी इ कली लडाइ तोइनीम। तन्न इ क्येडा ग्राने मचाप्नीम। मारदे हना इ कली प्रोंइचा कली गो गे नु बाक्नुड” दे परमप्रभु यावेमी देंत।

2

इस्त्राएली आन कली प्रोंइशो

1 मिनु परमप्रभु यावेमी आं कली

2 “लावो, परमप्रभु यावेमी यरूसलेम कली मार देंत देशा हना ‘गे इ ठिटी बाक्ची ना आं कली ग्युम्लीम खोदेशो पा दाक्ताक्यी। गे आं कली मारेइ मशोकशो गोरशो रागीमी आं नोले खोइक्ती। गो मेको मिम्नुड। होसे २:१६; होसे १३:५

3 इस्राएल आंम परमप्रभु यावे कली आ का ला बाक्शो ग्युम्ली खोदेशो बाक्त। मेको, आ गेय डा डोंइती डा फल खोदेशो बाक्त। मेको कली नेक्ब नेल्ल दोस ताइब दुम्तेक्म। मेको श्येत जाम्तेक्म’ देनो” दे माइक्ती। प्रस्थान २८:३६; आमोस ६:१; याकूब १:१८

4 गे याकूब आ खिं डा मुर नु इस्राएल आ खिं डा मुर नेल्ले, परमप्रभु यावे आ लोव्र नेनीन।

5 परमप्रभु यावेमी मार देंत देशा हना “इन किकी पिपीम आं कली मार, दोस गेयीमी? मारदे आं कली प्रोंइशा, डोन लमा? मेकोपुकी शोर गाक्शो मूर्ति आन नोले खोइक्तेक्म। मिनु मेको यो शोर गाक्शो दुम्तेक्म। मीका ६:३

6 मेकोपुकीमी ‘आंइ कली इजीप्त रागी रे गुंडब परमप्रभु यावे ते बाक्बा? मेकोमी आंइ कली गोरशो रागीम लां कोंइशा गाक्पाइक्तु। मेको मुर मबाक्तीक गोरशो रागी नु शुश खाल्टा बाक्शो रागी बाक्त। ब्वाक्कु मबाक्शो नु छिडछिड डा रागी बाक्त। मेको सुइ मगाक्तीक नु सुइ मुर मबाक्तीक रागी बाक्त’ देंतेक्म। ब्यवस्था ८:१५

7 गो इन कली रिम्शो रागीम चाक्तन्नी। मेकेर डा फल नु रिम्शो थोव्रक जपाइक्चा कली चाक्तन्नी। तन्न गेपुकी जाक्शा, आं रागी मरिम्शो सेलतीनी। आं रागी कली ग्रॉग्रा दिशो सेलतीनी। ब्यवस्था १:२५; न्यायाधीस २:१-२

8 चढेबपुकीम “परमप्रभु यावे ते बाक्बा?” मदेंम। आं अरेशो लोव्र शेंबपुकीम आं कली मतुइक्तीमी। सासन पाइबपुकी आं कली ममिम्थु, हेंथे गाक्तेक्म। आं लोव्र पाइबपुकीम बाल देवता आ नेंम नोले दुम्ब लोव्र पाम्तेक्म। मिनु शोर गाक्शो मूर्ति आन नोले खोइक्तेक्म” देंत।

9 मोपतीके परमप्रभु यावेमी “गो इन कली लेंशा दोस गेचा माल्नुड। गो इन चच युइ आन कली दोस गेनुड।

10 कित्तीम माइशो साइप्रस डा समुन्द्र आ नेक्था बाक्ब आन कली कोव्रडीन। केदारमी क्यारी पाइब मुर सोइशशा कोव्रडीन। मार, मेकेर मोदेशो गेय दुम्शो बाक्बा?

11 मार, तेकोइ रागी डा मुरुम आन देवी देवता फाइशो बाक्नीमी डा? मेको परमप्रभु मनम हना यो, मफाइक्नीम। तन्न आं मुरपुकीम आन ठेयब सक्ति पाइशो कली शोर गाक्शो मूर्तिपुकी नु फाइक्तेक्म। रोमी १:२३

12 गे सरीडम बाक्बपुकी एको लोव्र नेंशा हिंशा, छक लाक्कीन। मिनु थाम्पा हिंशा थिर थिर पा खिंखि पने।

13 मारदे हना आं मुरपुकीम निक्शी खेयप मरिम्शो पाम्तेक्म। मेकोपुकीमी, ब्रॉइतीक ब्वाक्कु बुक्तीके, आं कली प्रॉइतेक्म। मिनु आंम कली सोव्रशो रागीमी ब्वाक्कु मदेम्तीक इनार दोम्तेक्म। येरमीया १७:१३; भजन संग्रह ३६:१०; यूहन्ना ७:३८

14 मार, इस्राएल वाइल का बाक्बा? आ होव्रप आ खिंम जरमेशो वाइल का बाक्बा डा? मेको मारदे रोइक्चा पुंइसे?

15 गुप्सपुकी मेको कली तशा ग्रीनीम। ठेयब सेंदा पा ग्रीनीम। मेकोपुकीमी आ रागी कली मुर मबाक्तीके सेल्लेक्म। मेको आ सहर नेल्ल ब्रेत्तेक्म। मिनु मेकेर मुर मबाक्नीम। येरमीया ४:७

16 मेम्फीस नु ताहपनेस डा मुरपुकीम इन पिया डा सिरपेच पुइक्तेक्म। येरमीया ४४:१

17 इन कली लां कोंइब, इन परमप्रभु यावे कली प्रॉइशा, गे मोदेशो श्येत आंमा इन कली मचाक्नी डा?

18 गे मारदे इजीप्त रागी लाइनीनी? नील खोला डा ब्वाक्कु तूथ लाइनीनी? गे अस्सुर रागी लनीनु, मार रिम्शो दुम्बा डा? गे युफ्रेटीस खोला डा ब्वाक्कु तूथ लाइनीनी?

19 इन परमप्रभु यावे आ अरेशो लोव्र मटितीकेमी इन कली सजाइ

गेब। इन प्रोंइशोमी इन कली हुइक्ब। गेपुकीम इन परमप्रभु यावे कली प्रोंइशो थम मरिम्शो नु इन थुं कशो दुम्शो बाक्ब, दे तुइक्तीन। मिनु आं कली मान पा हिंतीके गे नु मबाक्ब” दे परमप्रभु, मुर नेल्ल आन परमप्रभु यावेमी देंत।

20 परमप्रभु यावेमी “साइ डोंइती रे गे इ जुवा जिक्तीवी। मिनु इ डोरी प्रोइक्तीवी। मिनु गे ‘गो इ गेय मपाइनुड’ देंते। गे डांडा नु रवा नेल्ल आन पुंम तेल्लेम पाप्तीवी। यसैया ५७:५५; इजीकीएल ६:१३

21 गो इ कली नेल्ल क्येडा रिम्शो अडगुर बोट खुम्ता। गे दोपा मरिम्शो दुम्शा ब्वाकी डा अडगुर बोट खोदेशो दुमे? भजन संग्रह ८०:९; यसैया ५:१-४

22 गे इ कली मार, मार, हिक्सी नु शुश साबुनम चिक्साक्वे हना यो, इ दोस ततीके लुम्सीशो आं डोंइती बाक्ब” दे परमप्रभु, परमप्रभु यावेमी देंत।

23 मिनु “गे ‘गो ग्रांग्रा मदिशो नड’ दे दोपा देंने चाप्नेवे? ‘गो बाल देवता आ नोले मखोइशो बाक्नुड’ दे गे दोपा देंने चाप्नेवे? गे बेंसीम मार, पवी? मेको मिम्तो। गे थाम्पा एर ओंथ दोरशा गाक्ब दलओंठ बाक्नेवे।

24 गे गोरशो रागीम बाक्चा दाक्ब, फश नाम्शा गाक्ब ब्वाकी डा गधैनी बाक्नेवे। मेको आ डागो माल्तीके सुम तेक्ने चाप्बा डा? सु सुमी मेको कली माल्नीमी, मेको मदाइनीम। मारदे हना ब्वांइसीतीक महिनाम मेको कली थित्नीम।

25 इ खोइल शिश्रा मगाक्को। गे तूतू दाक्शा खिं रे मलावो। तन्न गे ‘एको मोशा बाक्ब। मारदे हना गो अर्को रागी डा देवता आन कली दाक्ताक्ड। मिनु मेको आन नोले खोइक्नुड’ देंते।

26 दोपा खुइ ग्याइक्चा पुंइसेनु, मुने दोक्बा, मोपा इस्राएल आ खिं डा मुरपुकी मुने दोक्नीम। मेकोपुकी, आन पिपी, आन ठेयब मुरपुकी, आन चढेबपुकी नु मेको आन जोल पा परमप्रभु यावे आ लोत्र पाइबपुकी मुने दोक्नीम।

27 मेकोपुकीमी रवा कली 'गे आं आफ नवे' मिनु फुल्लु कली 'गे आं कली जरमेब नवे' देंनीम। मेकोपुकीमी आं कली आन ची हिरशा कोंइशो बाक्नीम। आन कुल ममाइ। मो हना यो मेको श्येत जामे नाक्ती जाक्शा 'आंइ कली प्रोंइकी' देंनीम। येरमीया ७:२४; येरमीया १८:१७; येरमीया ३२:३३

28 तन्न आंम इन सेल्शो देवी देवता ते लाक्गमे? मेकोपुकीमी इन कली प्रोंइने चाप्तेक्म हना, इन श्येत जची ना मेको आन कली जाक्पतीन। मारदे हना यहूदा, गे इ के गिश सहर बाक्मा, मिश देवी देवता बाक्नीम। ब्यवस्था ३२:३७-३८; न्यायाधीस १०:१४; येरमीया ११:१३

29 गेपुकीम मारदे आं कली गन गन पाइनीनी? गे नेल्ल आं कली काइ मटीब दुम्शो बाक्नीनी।

30 गो इन आल आन कली मोशा तुप्तामी। गो मेको आन कली शेंचा दाक्ताक्ड। तन्न मबिस्सम। इन कली सोइशो आं लोव्र पाइब इन तरवारमी साइक्चा पुंइसाक्म। गेपुकी ग्यु दाक्ब गुप्स खोदेंशो बाक्नीनी। यसैया १:५; मत्ती ५:१२; मत्ती २२:६; मत्ती २३:३७; मर्कूस १२:५

31 मिनु गे, मुल डा पाला डा मुरपुकी, परमप्रभु यावे आ लोव्र मिम्तीन। मार, गो इस्राएली आन कली मुर मबाक्शो रागी नु थम छिडछिड डा रागी दुम्डा डा? मारदे आं मुरपुकीम 'गे आंइ कली हिरचा कली सुइम तेक्ने मचाप्ब। गो इन डोंइती गेनायो लेंशा मजाक्नीकी' देंमा?

32 मार, मीश आलम आ सुन चांदी नु ग्युम्लीम आ ग्युंबे पशो दारशो वा प्रेंने चाप्नीमी डा? तन्न आं मुरपुकीम दा आं कली शुश नाक्ती रे प्रेंताक्यीमी।

33 गे दाक्मुतीक मालशा गाक्चा कली शुश जोक्ब बाक्नेवे? मिनु गे परमप्रभु यावे आ अरेशो लोव्र मटीब मीश मुर अरु लां शेंशा गाक्पाइक्तीवी।

34 इ फेक्शो वाम दोस मताइब नु प्रुडग आन हुश लुम्सीशो

बाक्ब। मिनु गेमी मेको आन कली खिं प्रोल्शा खिं ओव्रशो मथिदी। मेको मोदेंशो नेल्ल दुम्ना दुम्न यो, येरमीया २६:२०-२३; प्रस्थान २३:७

35 गे 'गो दोस मताइब बाक्नुड। मेको थमा पा गो नु मगाइक्ब' देंनेवे। मारदे हना गेमी 'गो पाप मपड' देंतीके गो इ कली निसाफ पाइनुड। यसैया ४३:२५-२६

36 गे इ गाक्तीक लां फाइक्ना फाइक्न एर ओंथ पाइक्नेवे? दोपा अस्सुरम इ कली मुने दोक्पदा। मोपान इजीप्तमी यो इ मुने तोक्ब। २राजा २२:३३-३५; यसैया ३०:३

37 गे मेकेर रे यो हिंचा डा पा प्रोक्चा माल्नेवे। मारदे हना परमप्रभु यावेमी थमा सुइक्चा कली योव्रशो आन कली आ नेक्था मजाक्चा डा पा तिल्लु। मेको आन वारच पतीके इ कली शोर गाक्शो बाक्ब" दे परमप्रभुम देंत।

3

नाता खोइश्शो

1 मिनु परमप्रभु यावेमी "वोंइश मुरुमी आ मीश कली प्रोंइशा, छोड पत्र गेप्टु हना, मेको मीश मुर अर्को वोंइश मुर आ मीश दुम्त हना, मेको वोंइश मुरुम लेंशा आ मीश कली चाक्बा को? मो दुम्त हना मेको रागी ग्रांग्रा दिशो मदुम्बा डा? गे चहिं तेल्लेम का खोदेंशो पा शुश आन बाक्तीके जाक्दीश्शो बाक्ते। मिनु मार, गे आं गे लेशशा जाक्नेवे?" दे परमप्रभु यावेमी देंत। ब्यवस्था २४:१-४

2 परमप्रभु यावेम "इर कोव्रडो। गोरशो डांडा मेर कोव्रडो। गे सु नु मइमे? गे मुर मबाक्तीके अराब खोदेंशो पा लांमी बाक्शा, गे नु इप्ब मुर आन कली रिम्ना रिम्न बाक्ते। गे इ तेल्लेम पतीके नु आं अरेशो मटितीकेम मेको रागी ग्रांग्रा दिशो सेल्ल्तीवी। होसे ४:१३

3 मोपतीके रेउ मयिशी बाक्त। मिनु बर्खा डा रेउ मयी। मो हना यो गे मुने मपाइश्शो बाक्नेवे। गे इ मुनेम लल मजिनेवे। येरमीया ३:१९; येरमीया ३१:९; यसैया ६३:१६

4 मार, गे मुल नक आं कली ‘आं आफ, आं ठिटी रे डा वारच, देंते।

5 मार, मेको गेना हना यो गाइक्स डा गाइक्स बाकबा डा? मार, इन गाइक्चा गेना हना यो बाकबा डा?’ दे आं कली ब्रेत्ते। मिनु गे ओदेशो लोत्र पाइनेवे। तन्न मार मरिम्शो बाकमे, मेको नेल्ल पाप्तीवी” दे परमप्रभु यावेमी देंत।

थमा मसुइक्ब इस्राएली

6 योसीयाहम सासन पची ना परमप्रभु यावेमी आं कली “थमा सुइक्ने मचापब इस्राएलम मार, पवा, मतवी? मेकोमी डांडा नेल्ल डोइश्शा, गिगी रवा नेल्ल आन पुंम तेल्लेम पाप्तु। येरमीया २:२०

7 मेकोमी मोदेशो नेल्ल पा आं गे लेपब, दे मिम्ताक्ड। तन्न मेको मले। मिनु मेको नेल्ले जोल पाइब आ लोकब यहूदाम ताप्तु। २कोरिन्थी ७:८-९; इजीकीएल २३:२,४१

8 मेको थमा सुइक्ने मचापब इस्राएल कली आ शुश तेल्लेम पतीके, गो छोड पत्र गेशा, सोइक्ताक्ड, दे तुइश्शो बाक्त। मो हना यो आ लोकब देंखु पशो यहूदामी मेको तशा महिंथु। मेकोमी यो तेल्लेम पाप्तु।

9 इस्राएलमी आ तेल्लेम पतीके थम आइक्च मिम्ताक्व। मेकोमी फुल्लु नु रवापुकी नु यो लशा तेल्लेम पा रागी ग्रांग्रा दिशो सेल्लु।

10 मेको नेल्ल दुम्त हना यो, मेको आ लोकब देंखु पशो यहूदा आ थुं नेल्लेमी आं गे मले। आं गे लेशशो खोदेशो ला पखु पाप्तु” दे परमप्रभु यावेम देंत।

11 मिनु नोले परमप्रभु यावेमी आं कली “थमा सुइक्ने मचापब इस्राएल, जोल पा मरिम्शो पाइब यहूदा क्येडा ठीक पाइब दुम्त।

12 ‘गे लावो। मिनु एको लोत्र उत्तर गे शेंदीमी। थमा सुइक्ने मचापब इस्राएल, परमप्रभु यावेम लेतो। गो इ कली तशा मगाइक्नुड। मारदे हना गो शिशी पाइब नड। गो गेना हना यो मगाइक्नुड’। प्रस्थान ३४:६;

13 गे 'गो पापी नड। गो आं परमप्रभु यावे कली काइ मटीब दुम्ती। मिनु गिगी रवा नेल्ल आन पुंमी अरु देवी देवता आन कली दाक्ताक्ड' देंते। मिनु आं देंशो मटिवी। इ पाप शोत्रडो, दे मतो" देंत।

14 मिनु परमप्रभु यावेम मेको आन कली "लेतीन। थमा सुइक्ने मचाप्ब आलपुकी लेतीन। मारदे हना गो इन होत्रप नड। गो सहर रे मुर का कली नु खिं रे मुर निक्शी आस कली योत्रनुडमी। मिनु इन कली सियोनम चाक्नन्नी। यसैया ६:१३

15 मिनु गो इन कली आं थुं नु गारब गोठलापुकी गेनुड। मिनु मेको जोक्ब नु रूप्ब दुम्शा, इन कली थुल्नीम। येरमीया २३:३-४; यसैया ४४:२८; इजीकीएल ३४:२३

16 गे रागीम सोशा बोशा शुश दुम्तीनी हना, मुरपुकीम गेनायो 'परमप्रभु यावे आ कबल पशो सन्दोस' मदेनीम" देंत। मिनु परमप्रभु यावेम "मेकोपुकीमी मेको कली ममिन्नीम। मेको कली सुइमी ममाल्नीम। मेको खोदेंशो लेंशा अर्को यो मसेल्नीम। गन्ती १०:३३-३६; २राजा २५:८-९; हिब्रू ४:१४-१६

17 मेना यरूसलेम कली 'परमप्रभु यावे आ ठेयब नित्तीके' देंनीम। मिनु रागी रागी डा मुर नेल्ल मेकेर देल्नीम। मुर नेल्ल परमप्रभु यावे आ नेक्था यरूसलेमम देल्नीम। मेना रे आन थुं डा मरिम्शो लोत्र मपाइनीम। प्रस्थान १७:१६; यसैया २:२-४; मत्ती ४:२

18 मेको नाक्ती यहूदा आ खिं डा मुर, इस्राएल आ खिं डा मुरपुकी नु गारनीम। मिनु मेकोपुकी कालेम उत्तर रे पा इन किकी पिपी आन कली गेशो रागीम जाक्नीम। यसैया १:१-१३

19 मिनु गो इन कली आंम आल आन दातेमी बाक्चा गेनुड। गो इन कली रिम्शो रागी का गेनुड। मेको रागी नेल्ल आन दाते डा नेल्ल क्येडा दारशो रिम्शो रागी बाक्ब। मिनु गे आं कली 'आं आफ' देंनीनी। गे नोले मशोइक्ब दुम्नीनी, दे मिम्ताक्ड। ब्यवस्था ७:६; ब्यवस्था ३२:६; ब्यवस्था ८:७; येरमीया ३:४

20 तन्न दोपा थमा सुइक्ने मचाप्ब मीश मुरुम आ वोंइश कली प्रोंइबा, मोपा गे थमा सुइक्ने मचाप्ब, इस्राएल, गे आं कली प्रोंइती” दे परमप्रभु यावेम देंत।

21 गोरशो डांडाम वाइ ब्रेशो सेंदा का नेंसीब। मेको इस्राएल आ आल आन शुश डाक्शो सेंदा बाक्ब। मारदे हना मेकोपुकी दूली लांम गाक्शो बाक्तेक्म। मेकोपुकीमी परमप्रभु यावे, आन परमप्रभु कली प्रेंशो बाक्तेक्म। येस्मीया ३:२

22 मिनु मेकोमी “थमा सुइक्ने मचाप्ब आलपुकी लेतीन। इन थमा सुइक्ने मचाप्तीके सापाइक्नन्नी” देंत। मिनु मेकोपुकीमी “दुम्ब, गो इन गे लेशशा, जाक्नीकी। मारदे हना गे परमप्रभु यावे, आंइ परमप्रभु बाक्नीनी।

23 थमा पा, पहाड डा देवी देवता आन थान जोल बाक्नीम। डांडा मेर ठेयब चाड सेलतीके नेल्ल जोल बाक्नीम। थमा पा परमप्रभु यावे, आंइ परमप्रभु इस्राएल कली पाप रे प्रोंइब बाक्ब।

24 गोपुकी आंइ ठिटा ठिटी रेन मेको मुने तोक्ब गेयमी आंइ किकी पिपी रे श्येत पा गेय पशो नेल्ल नेक्तु। मेको आन क्यारश भेडा, आन बी ब्यफ नु आन तमी तौ आन कली नेक्तु।

25 मुल गो इं मुनेम गुम्य। मिनु इं दोस ततीकेमी इं कली सुमल। मारदे हना गो परमप्रभु यावे, इं परमप्रभु कली पाप पाइतय। इं किकी पिपी नु गो इं ठिटा ठिटी रेन मुल सम्म परमप्रभु यावे, इं परमप्रभु आ देशो मटिशो बाक्तय” देंतेक्म। येस्मीया १४:७,२०

4

परमप्रभुमी इस्राएल कली ब्रेशो

1 परमप्रभु यावेम “गे इस्राएलीपुकी, आं गे लेशशा जाक्तीनी हना, गेपुकीम इन ग्रांग्रा दिशो थोव्रक आं डोंइती रे ताइक्ताक्नी हना, गेपुकी हेंथे मगाक्ब दुम्नीनी।

2 कसम जची ना गेपुकीम ‘परमप्रभु यावे ब्रोंइशा बाक्शो खोदेशो पा’ दे कसम जाइतीनी हना, गे थमा लोत्र पा, ठीक निसाफ पाइब

नु रिम्शो थुं पाइब मुर दुम्तीनी हना, रागी रागी डा मुर परमप्रभु आ नें थिशा आसीक पमुइनीम। मिनु मेकोपुकी आ आल दुम्तीके ग्येरसीनीम” देंत। ब्यवस्था १०:२०; यसैया ६५:१६

3 मिनु परमप्रभु यावेमी यहूदा डा मुर नु यरूसलेमम बाक्ब आन कली “इन कोक्त रूमी डल्ला थोक्तीन। चू आन दातेमी मशोक्कीन। इजीकीएल १०:१२

4 परमप्रभु यावे आ पबर्म खोइक्तीक चिनु खोंइसीन। तन्न इन थुंम खोइक्तीक चिनु खोंइसीन। गे यहूदा डा मुरपुकी नु यरूसलेममी बाक्ब वोंइशमुरपुकी, मो मपाइतीनी हना, इन मरिम्शो पतीके आं गाइक्चा मी खोदेंशो पा ब्रशा मूब। मिनु सुइम काप्ने मचाप्चा डा पा मेकोमी जेप्ब” देंत। येरमीया ९:२५; ब्यवस्था १०:१६; रोमी २:२९; कलस्सी २:११; येरमीया ६:७,१०

उत्तर रे श्येत जाक्शो

5 परमप्रभु यावेमी “यहूदामी शेंदीन। मिनु यरूसलेमम उरदी पने। गे रागी नेल्लेमी तुराही तपीन। ठेयब सेंदा पा ‘नेल्ल ग्रुम्य। मिनु गो ठेयब गारो हिरशो सहरमी प्रोक्य’

6 सियोन गे लचा कली छेदर क्युक्कीन। ब्रोंइचा आ पबर्म देश मपथु रीब पा प्रोकशा लने। मारदे हना गो उत्तर रे ठेयब श्येत नु खतम दुम्तीके चाक्नुड। येरमीया १:१४

7 गुप्स का आ पुक्खी रे गूशा, जाक्शो बाक्ब। रागी रागी कली खतम पोक्ब का मूब। मेको आ बाक्तीक रे गूशा, इन रागी कली मुर मबाक्तीके सेल्ब। इन सहर डा खिं नेल्ल ब्रेत्नीम। मेकेर मुर बाक्ने मचाप्नीम। येरमीया २:१५; येरमीया ५:६; येरमीया २५:३८; येरमीया ४९:१९; येरमीया ५०:४४

8 मोपतीके अरन्डी फेक्शा रोंका पने। मिनु डाक्कीन” देंत। मारदे हना परमप्रभु यावे आ हिंचा डा पा गाइशो इं रे मयाक्सीशो बाक्ब। येरमीया ६:२६

9 मिनु परमप्रभु यावेम “मेको नाक्ती पिप नु हुकुम पाइब नेल्ल आन थुं लुकच लाइब। चढेबपुकी हिंशा ग्येत्थ लुकच दुम्नीम। मिनु परमप्रभु यावे आ लोत्र पाइबपुकी ग्रीचोक पा हिंनीम” देंत।

10 मिनु गो “परमप्रभु, ए परमप्रभु यावे, गो आंइ शुरमी तरवार जाक्मेनु यो, गे ‘इन थुं नाइशशा बाक्कीन’ दे गे एको मुर नु यरूसलेम कली मरिम्शो पा जोल पाइशशो बाक्तीनी” देंती। येरमीया ६:१४

11 परमप्रभुमी “मेना मार लोत्र पाइनीम देंशा हना ‘एको मुर नु यरूसलेम कली गोरशो रागी डा डांडा रे होश फश आं प्रुडग मुर आन बाक्तीक जाक्ब। तन्न मेको फशेम क्राप्चा यो मदुम्ब, हारचा यो मदुम्ब।

12 मेको फशेम मेको पने मचाप्ब। मारदे हना मेको शुश बोल्यो फश गिवार बाक्ब। मिनु गो मेको आन कली निसाफ पतीक लोत्र पाइनुडमी।

13 कोव्रडीन, मेको गोस्स खोदेशो पा गाक्शो बाक्ब। मेको आ बग्गी फश गिवार खोदेशो पा जाक्नीम। मेको आ शारा ककाकुली आन क्येडा रीब पा दोरनीम। आबी, गो खतम दुम्तय’ दे लोत्र पाइनीमी” देंत।

14 मिनु परमप्रभु यावेम “ए यरूसलेम, गे पाप रे ब्रोंइचा तचा कली इ थुं इ परमप्रभु यावे कली मटितीके रे चिक्सो। गेना सम्म इ मरिम्शो मिम्तीक इ थुंम बाक्चा गेनेवे? येरमीया ६:८; यसैया १:१४

15 दान रे सेंदा कामी ‘एफ्राइम डांडा रे खतम दुम्तीके जाक्ब’।

16 रागी रागी डा मुर आन कली एको लोत्र पावो। एक जाक्तेकम। यरूसलेम कली डोन रागी रे सहर पुम्चा कली लडाइ पाइब जाक्शो बाक्नीम। मिनु यहूदा डा सहर आन पबर्म लडाइ पा ग्रीनीमी।

17 मेकोपुकी रू खाल पाइक्बपुकी खोदेशो पा, एर ओंथ नेल्ल हिरशा बाक्शो बाक्नीम। मारदे हना मेकेर डा मुरपुकी आं कली काइ मटीब बाक्नीम” दे परमप्रभु यावेमी देंत। येरमीया १:१५; येरमीया ६:३

18 मिनु परमप्रभु यावेमी “इ दूली लां गाक्तीके नु इ पतीके इ कली मोदेशो दुम्शो बाक्त। इ सजाइ मेकोन बाक्ब। मेको शुश कशो बाक्ब। मिनु मेकोमी इ थुं खाइक्पाइक्तु” देंत।

19 मिनु गो हिंती, हिंती। गो श्येत जशा हुकयी पाइनुड। आं लुडगीर खाइश्शा, तुक तुक पाप्तु। गो सिक्सी पा बाक्ने मचाप्नुड। मारदे हना गो तुराही ताप्शो नेंता। मेको लडाइ डा रेयके बाक्ब।

20 खतम दुम्तीक तार खतम दुम्तीक जाक्ब। रागी नेल्ल मुर मबाक्तीक दुम्त। आं ताम्बु नु फारतीक वा नेल्ल याम काम खतम दुम्तेक्म।

21 गो गेना सम्म लडाइ डा छेदर तचा माल्नुडा? मिनु गेना सम्म तुराही ताप्शो नेंचा माल्नुडा?

22 आं मुर मूर्ख बाक्नीम। मेकोपुकीमी आं कली मतुइक्नीम। मेको निप्स मपाइश्शो आल बाक्नीम। मेको आन के रुप्तीक मबाक्ब। मेको मरिम्शो पचा कली जोक्ब बाक्नीम। तन्न रिम्शो पस मजोक्नीम। यसैया २७:११

23 मिनु “गो रागी कली कोव्रता। मेको मारेइ मबा। मिनु मेकेर नेल्ल श्येत्थ बाक्त। मिनु सरीड गे कोव्रडुनु, मेकेर मारेइ छेडछेड मबाक्म। उत्पत्ती १:२

24 मिनु गो डांडा आन कली कोव्रडुनु, मेकोपुकी खिंखि पशो बाक्तेक्म। पहाड नेल्ल एर ओंथ हिम्सीशो बाक्तेक्म।

25 मिनु गो कोव्रडुनु, सुइ मबाक्शो बाक्त। सरीड डा चिक्ब नेल्ल बेरशा प्रोक्ने थुम्शो बाक्तेक्म।

26 मिनु कोव्रडुनु, रिम्शो खप बाक्शो रू नेल्ल गोरशो रागी दुम्तेक्म। मिनु मेकेर डा सहर नेल्ल ब्रेश्शो बाक्तेक्म। मोदेशो पा परमप्रभु यावेमी आ शुश गाइक्तीकेमी पाप्तु” देंती।

27 मिनु परमप्रभु यावेम मार, देंत देंशा हना “रागी नेल्ल मुर मबाक्तीके दुम्त हना यो, गो मेको नेल्ल मक्याम्नुडमी। येरमीया ५:१८; येरमीया १०:२४; येरमीया १८:३-८; आमोस ९:८

28 मोपतीके रागीम रोंका पचा माल्ब। मिनु सरीड छिडछिड दुम्या माल्ब। मारदे हना गो लोव्र पाता। गो डोंइती मिम्ताकड। आं थुं मलेप्ब। आं थुं महिरब।

29 शारा डोइक्बपुकी नु लिब्रा आप्ब आन सेंदा नेंशा, सहर नेल्ल डा मुरपुकी प्रोक्शो बाक्नीम। मिनु मेको ब्वाकीम प्रोक्शा खुइक्नीम। का निक्शी फुल्लु तार डोइशशा लाइनीम। सहर नेल्ल प्रोइशो बाक्नीम। मेकेर सुइ मबाक्नीम।

30 गे गोरशो सेल्चा पुंइसीशो रागी मार, पना पन बाक्डे? गे लल वाम ग्योम्सीशा, सुन के गहना पांइसीशा, आंम कली ग्योम्सीशा आ अर्थ मार, बाक्बा? गे मारदे गाजल खेक्सीशा इ मिक्च ठेयब सेल्नेवे? आंम कली दारशो सेल्चा मोशान बाक्ब। इ कली दाक्ब मुरपुकीम इ कली ग्रांग्रा दिशो बाक्नीम। इ कली साइक्चा माल्शो बाक्नीम।

31 गो सुत्केरी रोइ पशो मीश मुर आ सेंदा खोदेंशो नेंता। मेको डोंइती डा आल थिचा चिक्शो मीश मुर आ सेंदा खोदेंशो बाक्त। सियोन आ तमीमी आ गुइ दिशा आ सास कीशा ‘आबी, आं कली साइक्ब आन डोंइती थाइनुड’ देंत” दे परमप्रभु देंत।

5

मुर का यो रिम्शो मबाक्नीम देंशो

1 परमप्रभुमी “यरूसलेम डा लां आ एर ओथ कोव्रशा गाक्को। नेल्ल कोव्रशा इ तशो नेल्ल ब्रेक्तो। आ लाडगा मेर माल्शा कोव्रडो। मिनु मेकेर ठीक गेय पाइब नु थमा लोव्र माल्ब मुर का यो थित्तीवी हना, गो यरूसलेम कली माफ गेनुड। उत्पत्ती १८:२२-३२

2 मेकोपुकीमी ‘परमप्रभु यावे ब्रोंइशा बाक्शो खोदेंशो पा’ दे कसम जाइनीम। मो हना यो मेकोपुकीमी जोल लोव्र पाइनीम” देंत। येरमीया ४:२

3 मिनु “परमप्रभु यावे, गे थमा लोव्र तचा ममाल्नीनी डा? गे मेको आन कली तुप्तीनी। तन्न मेकोपुकी मखाइक्म। गे मेको आन

कली खतम सेलतीनी। तन्न मेकोपुकीमी इन देशो पचा मबिल्तीम। मेकोपुकीम आन कुल फुल्लु क्येडा यो खकटा सेल्लेक्म। मेकोपुकी लेशशा जाक्ने मबिस्सम। येरमीया २:३०; येरमीया७:२८; येरमीया ९:२; यसैया ४८:४

4 मेकोपुकी दा पुडुग ला बाक्नीम। मेकोपुकी मूर्ख बाक्नीम। मारदे हना मेकोपुकीम परमप्रभु यावे आ लां मतुइक्नीम। आन परमप्रभु आ अरेशो मतुइक्नीम।

5 गो शुश क्येट थीब मुर आन बाक्तीके लशा, मेको आन कली लोत्र पाइनुड। मेकोपुकीम थमा पा परमप्रभु यावे आ लां, आन परमप्रभु आ अरेशो यो तुइक्नीम” देंती। तन्न मेकोपुकी खाल का डा दुम्शा, जुवा जिक्शो बाक्तेक्म। मिनु डोरी यो प्रोइशो बाक्तेक्म। येरमीया २:२०

6 मोपतीके परमप्रभुमी “ब्वाकी डा गुप्स कामी मेको आन कली ग्राम्शा साइक्ब। गोरशो रागी डा फर कामी मेको आन कली खतम सेल्ब। जोइ का मेको आन सहर कोत्रना कोत्रन बाक्शो बाक्ब। सु मेकेर रे गूबा, मेकोमी मेको कली क्राइशशा चौकटा लाम्टा सेल्ब। मारदे हना मेकोपुकी शुश हेंथे गाक्ब बाक्नीम। मेको आन मटितीके ठेयब बाक्ब” देंत। येरमीया ४:७

7 मिनु परमप्रभु यावेम “गो इन कली दोपा माफ गेने चाप्नुडा डा? इन आलपुकीम आं कली प्रोंइतेक्म। मिनु परमप्रभु आ नेंम ममाइ, अर्को देवी देवता आन नेंमी कसम जाम्तेक्म। गो मेको आन मालशो नेल्ल खाप्ता हना यो, मेकोपुकीम तेल्लेम पाम्तेक्म। मिनु तेल्लेम आन खिंम क्राक्थ्री चोक्थ्री दुम्तेक्म।

8 मेकोपुकी थाम्पा दोम्शो, गेय मपाइब शारा खोदेशो बाक्नीम। मेको आंम नेक्था डा मुर आन मीश आन पर्बम ग्रीनीम। इजीकीएल २२:११

9 मार, गो एको आ पर्बम मेको आन कली सजाइ मगेनुडमी डा? मार, गो ओदेशो रागी डा मुर आन कली क्येक्क मलेत्नुडमी?” दे परमप्रभु यावेम देंत। येरमीया ५:२९; येरमीया ९:८

10 परमप्रभु यावेम आं कली “गे मेको आन अडगुर बोट दिम्शा ताइश्शा पावो। तन्न नेल्ल श्येत्थ मपोक्को। मेको आ राशी इत्तो। मारदे हना मेको परमप्रभु यावे आ मुर मनम।

11 मारदे हना इस्राएल नु यहूदा डा मुरपुकीम थमा पा प्रोंइतीमी” देंत।

12 मेकोपुकीमी परमप्रभु यावे आ पबर्म “मेको मतुइक्नीकी। मेकोमी मारेइ मपाइब। गो मारेइ मरिम्शो मताइनीक। गो लडाइ नु अन्काल मताइनीक।

13 परमप्रभु यावे आ लोत्र पाइबपुकी फश बाक्नीम। मारदे हना परमप्रभु यावे आ लोत्र मेकोपुकी नु मबा। तन्न मेको लोत्र मेको मो देंब आन कली दुम्ब” देंतेक्म।

14 मोपतीके परमप्रभु यावे, मुर नेल्ल आन परमप्रभुमी मार देंत देंशा हना “मेकोपुकीमी मोदेशो लोत्र पतीके, गो आं लोत्र इ शोत्रम मी खोदेशो सेल्लुड। मेको मुर आन कली शी सेल्लुड। मिनु मेको मीम नेल्ल आन कली दाक्ब सेल्लुडमी।

15 ए इस्राएल, इन कली खतम सेल्चा कली डोन रागी डा मुर चाक्नुड। मेको रागी डा मुरपुकी शुश बोल पाइश्शो बाक्नीम। आन रागी साइ डोंइती डा बाक्ब। गे मेको मुर आन लोत्र मतुइक्नीनी। आन ब्वाक्शो मरुप्नीनी। येरमीया ६:२२; यसैया २८:१

16 मेको आन ब्रा कुरतीके रोक्शो तुरस खोदेशो बाक्नीम। मेको मुर नेल्ल थम सक्ति पाइश्शो लडाइ पाइब बाक्नीम।

17 मेकोपुकीमी इन खुप्शो अन्न नु जचा थोत्रक नेल्ल नेक्नीम। मिनु इन तमी तौ नेल्ल आन कली यो लाइक्नीम। मेकोपुकीमी इन क्यारश भेडा नु बी ब्यफ नेल्ल नेक्नीम। मेकोपुकीमी इन अडगुर नु फोत्रशी नेल्ल नेक्नीम। मिनु इन थमा सुइश्शो बोल्यो गारो हिरशो सहर नेल्ल तरवारम क्याम्नीम।

18 मो हना यो, गो मेको नाक्ती इन कली नेल्ल मसाइक्पाइक्नुड। येरमीया ४:२७

19 मिनु इन मुरपुकीम 'मारदे इं परमप्रभु यावे, इं परमप्रभुमी इं कली ओदेशो पवा?' दे हिलो पाम्तेक्म हना, गे मेको आन कली 'गेपुकीम दोपा आं कली प्रोइशा, आंम रागीम अरु देवी देवता आन कली पूजा पनी, मोपा मुल गेपुकीम इन मतुइशो रागीम अर्को रागी डा मुर आन गेय पाइनीनी' देशो बाक्ब माइक्मी। येरमीया १६:१०-१४

20 याकूब आ मुर आन कली एको लोत्र माइक्मी। यहूदामी एको लोत्र ठेयब सेंदा पा नेल्ल आन कली नेंपाइक्मी। यसैया ६:९-१०; मत्ती ८:१८

21 गे मूर्ख नु मिम्तीक मपाइशो मुरपुकी, एको लोत्र नेनीन। इन मिक्ची बाक्ब, तन्न मताइनीनी। इन नोफा बाक्ब, तन्न मनेनीनी।

22 मार, गे आं कली मान पा हिंचा ममाल्नीनी डा? गे आं डोंइती खिंखि मपाइनीनी? गो समुन्द्र आ सांद कली बाल्वा वोइक्ता। आ छाल बोक्तेक्म हना यो, मेको कली खाक्ने मचाप्नीम। मेकोपुकी शुश बोल पाम्तेक्म हना यो, मेको कली लाक्ने मचाप्नीम। ठेयब रेयके पाम्तेक्म हना यो, लाक्ने मचाप्नीम। बजन संग्रह १०४:९

23 तन्न मेको मुर आन थुं खकटा नु काइ मटीब बाक्ब। मेकोपुकी हिरशा लाम्तेक्म।

24 मेकोपुकीमी 'गेपुकी परमप्रभु यावे, इं परमप्रभु कली मान पा हिंय। मेकोमी माल्ची ना रेउ गेब। मेकोम बर्खा नु हिंउद डा रेउ गेब। मिनु अन्न रिक्शा खुप्ची ना डा नाक्ती गेब' मदेंम" देंत। ब्यवस्था ११:१४

25 परमप्रभु यावेमी "इन मरिम्शो पशोम एको नेल्ल मरिम्शो दुम्त। इन पाप आ पर्बम गे मेको रिम्शो मताइनीनी। यसैया ५९:२

26 आं मुर आन दातेमी मरिम्शो पाइब मुर बाक्नीम। मेकोपुकी चिक्ब साइक्ब मुर खोदेशो पा, बाप्शा बाक्शो बाक्नीम। मेकोपुकीम मुर आन कली ग्याइक्चा कली ब्वारद दाइक्नीम।

27 चिक्बीम ब्रीशो ओगील खोदेशो पा, मेको आन खिं खुइ पशो थोत्रकम ब्रीशो बाक्ब। मोपतीके मेको ठेयब मुर नु शुश क्येट थीब

दुम्तेक्म।

28 मेकोपुकी दोम्शा लल जिशो नु शोंप पाइश्शो दुम्शो बाक्नीम। मेको आन परमप्रभु यावे आ अरेशो मटितीके कली तेक्तीक मारेइ मबाक्ब। मेकोपुकीम रोम रोइक्च आन कली रिम्शो दुम्ल, दे मेको आन कली ठीक निसाफ मगेनीम। मेकोपुकीमी क्येट मथीब आन कली वारच पा ठीक निसाफ मपाइनीम। प्रस्थान २२:२१; यसैया १:१७

29 मार, एको आ पर्बम, गो मेको आन कली सजाइ मगेनुडमी? मिनु गो एको रागी डा मुर आन कली क्येक्क मलेत्नुडमी?” दे परमप्रभु यावेमी देंत। येरमीया ५:९

30 मिनु परमप्रभु यावेम “एको रागीम ग्रंग्रा दिचा डा नु शुश हिंचा डा श्येत दुम्त।

31 परमप्रभु यावे आ लोव्र पाइबपुकीम जोल पा लोव्र पाइनीम। दोपा परमप्रभु यावे आ लोव्र पाइबपुकीम जोल पा लोव्र पाइनीमी, मोपा चढेबपुकीम मुर आन कली हुकुम पाइनीम। मिनु आं मुरपुकी चहिं मोदेशो नु दुम्चा दाक्नीम। तन्न नोले डा नाक्ती मार, पाइनीनी?” देंत। इजीकीएल १३:६

6

यरूसलेम कली पुम्शो

1 परमप्रभु यावेमी “बेन्यामीन आ आलपुकी ब्रोंइशा बाक्चा कली यरूसलेम रे प्रोक्कीन। तेकोहा सहरमी तुराही ताप्पीन। बेथ-हक्केरेम तार चिन्ड कोइशा वोतीन। मारदे हना उत्तर रे मरिम्शो पतीक नु खतम दुम्तीके यिशो बाक्ब। आमोस १:१; येरमीया १:१४

2 सियोन सहर दारशो योव्रतीके खोदेशो बाक्ब। तन्न सियोन आ तमी क्याम्चा पुंइसीब।

3 गोठला आन हुल सुन्दा मेको नु लडाइ पचा कली जाक्नीम। मेकोपुकीमी आन ताम्बु आ एर ओथ कीनीम। मिनु नेल्लेम मेको आन हुल योत्रशा खतम सेल्नीम” देंशो बाक्ब। येरमीया ४:१७

4 मिनु मेकोपुकीम “मेको नु लडाइ पचा कली ठीक दुमीन। बोक्कीन। गोपुकीम नाक्त उइक्थ दुम्मेनु, मेको कली लडाइ तोय। नाक्ती लाक्ना लाक्न बाक्ब। नाक्दो डा वांकु लाइशो दुम्ना दुम्न बाक्ब।

5 बोक्कीन। गो नाक्दो मेको कली लडाइ तोय। मिनु मेको आ दरवार प्रेय्य” देंनीम।

6 मुर नेल्ल आन परमप्रभु यावेम “मेको आ रवापुकी क्योरशा तिमीन। मिनु यरूसलेम डा गारो डोइक्तीक सेलीन। मेको सहर कली सजाइ गेचा माल्ब। मेको सहर मरिम्शो पतीकेम ब्रीशो बाक्ब।

7 इनारम दोपा आ ब्वाक्कु बारपाइक्बा, मोपा मेकोमी आ परमप्रभु यावे आ अरेशो मटितीके बारपाइक्ब। मेको आ आगाम काइ मरिम्शो पतीक नु मारेइ मारेइ खतम पोक्तीक आ पर्बम लोत्र नेंसीब। मेको आ रोइ नु आ सेल्शो गार गेना हना यो आं डोंइती बाक्नीम।

8 गे यरूसलेम, एको इ कली अरेशो मपाप्तीवी हना, गो इ कली तशा ग्रांग्रा दिशा प्रॉइनुड। गो इ कली गोरशो नु मुर मबाक्शो सेल्नुड” देंत।

9 मुर नेल्ल आन परमप्रभु यावेमी मार देंत, देंशा हना “गे अडगुर रिम्शो पा सिला पशो खोदेंशो पा इस्राएल डा लीशो मुर आन कली सिला पने। अडगुर सेक्ब मुर खोदेंशो पा राशी ग्याइशशा, फल सिला पने।

10 गो सु कली लोत्र पा हिंच कोइदु? आं लोत्र सुम नेंबा? मेकोपुकीम नेंने मचाप्नीम। मेको आन नोफा सुशो बाक्नीम। परमप्रभु यावे आ लोत्र आ पर्बम गाइक्नीम। मेको नेंचा मदाक्नीम” देंत। येरमीया ४:४; प्रेरित ७:५१

11 तन्न गो परमप्रभु यावे आ गाइक्तीकेम ब्रीशो बाक्नुड। गो मेको हेरा तेक्ने मचाप्नुड। मिनु मेकोमी “मेको लां मेर गाक्ब आल आन तार मोतो। बुक्शा बाक्शो ठिटा आन तार मोतो। मीश वोंइश निम्फा लाइक्चा पुंइसीनीस। खाल्पा नु खूशो लाइक्चा पुंइसीनीम।

12 मारदे हना गो आं गुइ मेको रागीम बाक्ब आन तार दिनुड, मेको आन खिं अर्को आन के दुम्नीम। आन रू नु आन मीश यो अरु आन के दुम्नीम” दे परमप्रभु यावेम देंत।

13 परमप्रभु यावेमी “नेल्ल क्येडा आइक्च मुर रे नेल्ल क्येडा ठेयब सम्म ठीक पा मचेम्शो क्येट तचा कली शिम दुम्शो बाक्नीम। परमप्रभु यावे आ लोत्र पाइब रे चढेब सम्म नेल्ल जोल पाइब दुम्शो बाक्नीम। येरमीया ८:१०-१२; इजीकीएल १३:१०-१६; १थिस्सलोनिकी ५:३

14 मेकोपुकीमी आं मुर आन कली ममिम्शु, आन गार सापाइक्खु पशो बाक्नीम। मेकोपुकीमी थुं नाइक्तीक मबाक्त हना यो ‘नांइसीन, नांइसीन’ देंनीम।

15 मेकोपुकीमी मुने दोक्चा डा गेय पाम्तेक्म। ग्रान्गा दिशो गेय पाम्तेक्म। तन्न मेकोपुकी मुने मदोक्म। मुनेम लल जिचा देंशो मार, बाक्बा, दे मतुइक्तेम। मोपतीके साइक्चा पुंइसीशो आन दातेमी साइक्चा पुंइसीनीम। गो मेको आन कली सजाइ गेडानु, मेको खतम दुम्नीम” दे परमप्रभु यावेमी देंत।

16 मिनु परमप्रभु यावेम मार, देंत देंशा हना “लां ब्रातीकेम राप्शा कोव्रडीन। माइत लां आ पबर्म हिल्लो पने। मेको रिम्शो लां ते बाक्बा, दे हिल्लो पने। मिनु मेको लांमीन गाक्कीन। मिनु इन थुं नाइक्चा ताइनीनी। तन्न मेकोपुकीम ‘गो मेक मगाक्नीकी’ देंनीम। मत्ती ११:२९

17 गो इन कली खाल पाइबपुकी योव्रतामी। मिनु गो इन कली ‘तुराही ताप्शो नोफा दाइश्शा नेनीन’ देंती। तन्न मेकोपुकीम ‘गो मनेनीकी’ देंतेक्म।

18 मोपतीके गो रागी रागी डा मुर नेनीन। बुक्तीक डा मुर नेल्लेमी मेको आन कली मार, दुम्बा, दे तुइक्तीन।

19 रागी नेल्ल नेनीन। गो एको मुर आन कली ठेयब श्येत चाक्नुड। मेको श्येत आन पशो आ पा डा बाक्ब। मारदे हना मेकोपुकीमी आं पचा देशो लोव्र मपामे। मिनु आं शेंशो लोव्र काइ मटीम। यसैया १:२

20 गो शेबा रे चाक्शो धूप ममाल्नुड। डोन रागी रे चाक्शो बिक्च यो ममाल्नुड। गो इन चोशा चदेशो मब्राइनुड। गो इन क्योरशा चदेशोम मग्येरनुड” देंत। भजन संग्रह ४०:७; यसैया १:११-१५

21 मोपतीके परमप्रभु यावेम मार, देंत देंशा हना “कोव्रडीन, गो एको मुर आन डोंइती दाइल पाइक्तीके थोव्रक वोइक्नुड। मिनु आम आफ, आलपुकी कालेम नु आन नेक्था डा मुर नु आन वारच कालेम खतम दुम्नीम” देंत।

22 परमप्रभु यावेमी “कोव्रडीन, उत्तर डा रागी रे हुल का मुर जाक्नीम। रागी आ सुर रे ठेयब रागी डा मुर बारशा जाक्नीम। येरमीया ५:१५; ब्यवस्था २८:४९

23 मेकोपुकी लिब्रा नु तरवार शेशा ठीक दुम्शो बाक्नीम। मेकोपुकी मरिम्शो पाइब नु काइ शिशी मपाइब बाक्नीम। आन रेयके समुन्द्र ग्रीशो खोदेशो बाक्ब। मेकोपुकी शारा डोइशशा सियोन आ तमी, इ कली लडाइ तोचा कली ठीक दुम्शो बाक्नीम” देंत। येरमीया ५०:४२

24 गोपुकीम मेको आन पर्बम मारेइ मारेइ लोव्र नेतक। मिनु आंइ गुइ खोइली योक्त। गो शुश हितक। गो सुत्केरी रोइ पशो मीश मुर खोदेशो दुम्तक।

25 “रू मेर मलने। लां मेर मगाक्कीन। मारदे हना इन जोरी सत्रु आन गुइमी तरवार बाक्ब। मिनु एर ओंथ नेल्ल शुश हिंतीक बाक्ब” देशो नेतक। येरमीया २०:३

26 मिनु “आं श्येत जाइब मुरपुकी अरन्डी फेक्सीन। मिनु इन पिया तारी पुलु फुंडसीन। का ला बाक्शो आल बेक्शो आ पर्बम खोदेंशो पा रोंका पने। मारदे हना आंइ कली साइक्ब याम काम जाक्ब” देंत। येरमीया ४:८; आमोस ८:१०

27 परमप्रभु यावेमी “गो इ कली आं मुर आन पशो नाक्ब नु रिम्शो सेल्ब सेलतन। मोपा गे मेको आन पशो तुइश्शा, मार, पाइनीमी, दे नाक्ने चाप्नेवे।

28 मेको नेल्ल आन थुं खकटा बाक्शा, काइ मटीब बाक्नीम। मेकोपुकी जोल पा सांकछी बाक्ब नु गाक्नीमी। मेकोपुकी कांसा नु फलाम खोदेंशो खकटा बाक्नीम। मेको नेल्ल मरिम्शो बाक्नीम। इजीकीएल २२:१८

29 मुरुमी यपाइक्चा कली भाटी कीना कीन मी ठेयब सेल्नीम। तन्न यपाइक्तीक गेय मोशा दुम्त। मारदे हना परमप्रभु यावे आ अरेशो मटीब आन कली तिल्शो बाक्नीम।

30 तन्न मेको आन कली मरिम्शो तिल्शो चांदी, दे नें वोइक्नीम। मारदे हना परमप्रभु यावेम मेको आन कली तिल्शो बाक्त” देंत। १राजा ९:७

7

येरमीया कली लोत्र पपाइश्शो

येरमीया २६:-

1 परमप्रभु यावेम येरमीया कली,

2 “गे आं खिं डा लाप्चोम राप्शा ‘गे यहूदा डा मुर नेल्ल परमप्रभु यावे आ लोत्र नेनीन। गे परमप्रभु यावे कली ठेयब सेल्चा कली एक जाक्ब यहूदा डा मुर परमप्रभु यावे आ लोत्र नेनीन’ देनो” देंत।

3 मुर नेल्ल परमप्रभु यावे, इस्राएली आन परमप्रभुमी मार, देंत देंशा हना “इन गाक्तीक लां नु इन पशो नेल्ल रिम्शो सेलीन। मो पाइतीनी हना, गो गेपुकी नु एकेर बाक्नुड। येरमीया १८:११; येरमीया २५:५; येरमीया २६:१३; यसैया १:१६

4 मिनु 'एको परमप्रभु यावे आ खिं बाक्ब। एको परमप्रभु यावे आ खिं बाक्ब। एको परमप्रभु यावे आ खिं बाक्ब' देशो जोल लोव्र थमा मसुतीन।

5 गेपुकीम थमा पा इन गाक्तीक लां नु इन पशो रिम्शो सेल्टीनी हना, गे थमा पा अरु मुर आन कली ठीक नु रिम्शो पाइतीनी हना,

6 गेपुकीमी अर्को रागी डा मुर आन कली, रोम रोइक्च नु आन वोंइश बेक्शो मीश मुर आन कली मदिप्तीनी हना, दोस मताइब मुर आन कली मसाइक्तीनी हना नु आंम इन कली श्येत सेल्चा, दे देवी देवता आन नोले मखोइक्तीनी हना, येरमीया ५:२८

7 गो गेपुकी नु एक बाक्नुड। साइ डोंइती इन किकी पिपी आन कली गेशो रागीम गेना हना यो गेपुकी नु बाक्नुड।

8 तन्न गेपुकी दा जोल लोव्र कली थमा सुइक्नीनी। मेको नेल्ल मोशा बाक्नीम।

9 गेपुकीम खुइ पाइनीनी, मुर साइक्नीनी, मुर आन मीश नु इप्नीनी, जोल पा कसम जाइनीनी, बाल देवता कली पूजा पाइनीनी नु इन मतुइशो देवी देवता आन नोले खोइक्नीनी। होसे ४:२

10 मो हना यो आं डोंइती आं नें बाक्शो खिंम राप्शा बाक्नीनी। आं डोंइती राप्शा 'गो रिम्शो बाक्नीकी' देंनीनी। मेकेर रे लेशशा इन ग्रांग्रा दिचा डा गेय लेंशा पाइनीनी।

11 मार, आं नेंमी बाक्शो आं खिं इन डोंइती रोइक्ब आन बाक्तीक खिं दुम्मे? गो यो इन कली कोव्रना कोव्रन बाक्नुड। मत्ती २१:१३

12 मुल आं बाक्तीक शिलो लने। गो मेकेर डोंइती आं नेंमी बाक्तीक सेल्शो नड। मिनु गो इस्राएल डा मुर आन कली आं अरेशो मटितीके मार पदु? मेकेर लशा कोव्रडीन। यहोसु १८:१; १सामुएल ४:४, १२; भजन संग्रह ७८:६०

13 मिनु गेपुकीम एको नेल्ल पना पन बाक्नीनु, गो इन कली गेना हना यो लोव्र पाता। तन्न गेपुकीम मनेनी। गो इन कली ब्रेत्ताक्नीनी, तन्न गेपुकीम लोव्र मलेत्तीनी। येरमीया २५:३; यसैया ६५:१२

14 मोपतीके गो मेको आं नेम सेल्शो खिं कली नु इन किकी पिपी नु इन कली गेशो रागी कली शिलो खोदेशो सेल्नुड। गे मेको खिं कली थमा सुइक्तीनी।

15 मिनु गो इन कली आं डोंइती रे ग्रुंडनन्नी। गो इन कली, इन लोक्ब एफ्राइम आ आल नेल्ल आन कली खोदेशो पा खेरनन्नी” दे परमप्रभु यावेमी देंत। २राजा १७:१८, २०, २३

16 परमप्रभु यावेम आं कली “गे मेको मुर आन पर्वम मपुनो। मेको मुर आन पर्वम मारेइ मपुनो। मेको आन पर्वम आं कली लोत्र मपावो। मारदे हना गो इ पुंइशो मनेनुड। येरमीया ११:१४; येरमीया १४:११; येरमीया ३७:३; येरमीया ४२:२; प्रस्थान ३२:१-११; १सामुएल १२:२३

17 गे मेको यहूदा डा सहर नु यरूसलेम डा लां मेर पशो मतवी? येरमीया १९:१३; येरमीया ४४:१७-१९; यसैया ६:५, ११

18 मेको आन आलपुकीम शी खुप्नीम। आन आफपुकीम मी मुइक्नीम। मिनु मीश मुरपुकीम सरीड डा पिपीम कली बटुक चोचा कली फस नीनीम। अरु देवी देवता आन कली तूचा थोत्रक चढेनीम। आं कली गाइक्पाइक्चा कली मो पाइनीम।

19 मिनु मार, मेकोपुकीमी आं कली गाइक्पाइक्चा कली मो पशो मनमी डा? मिनु मार, मेकोपुकीमी श्येत जचा कली मो पशो मनमी डा?” देंत

20 मोपतीके परमप्रभु, परमप्रभु यावेम “आं गाइशो नु आं चुरशो मेकेर मोइक्चा माल्ब। मुर, बी ब्यफ, क्यारश भेडा, रू डा रवा नु रागी डा मारेइ मारेइ आन तारी मोइक्चा माल्ब। मेको मकाप्ब मीम नेल्ल दाक्ब” दे परमप्रभु यावेमी देंत।

21 मिनु मुर नेल्ल आन परमप्रभु यावे, इस्राएली आन परमप्रभुमी मार देंत देंशा हना “इन चोशा चढेतीकेम क्योरशा चढेतीके तेम्दीन। मिनु मेको श्ये व्वने। १सामुएल १५:२२; भजन संग्रह ५०:७-१५; होसे ८:१३; मीका ६:६-८

22 मारदे हना इन किकी पिपी आन कली इजीप्त रे गुंइशा चाक्शो नाक्ती, गो मेको आन कली चोशा चढ़ेतीक नु क्योरशा चढ़ेतीक आ पबर्म लोत्र मपड। मिनु मेको आन कली मअरेडमी।

23 तन्न गो मेको आन कली मार अरेतीक का गेतामी देशा हना 'आं देशो टिने। मिनु गो इन परमप्रभु नड। मिनु गे आं मुर दुम्नीनी। गो इन कली तेको लां लचा, दे अरेनुडा, मेको लां गाक्कीन। मो पाइतीनी हना, इन कली रिम्शो दुम्ब' देंती। येरमीया ११:४; येरमीया २४:७; येरमीया ३०:२२; येरमीया ३१:१, ३३; येरमीया ३२:३८; लेवी २६:१२; इजीकीएल ११:२०; इजीकीएल १४:११; इजीकीएल ३४:३०; इजीकीएल ३७:२७

24 तन्न मेकोपुकीमी आं अरेशो मटीम। आं लोत्र मनेनेम। मेको आन खकटा थुं डा मरिम्शो पतीकेमी आंम दला दाक्स पाम्तेक्म। आन ची हिरताक्म, आं कुल गे मकोत्रयीमी। येरमीया ११:८; यसैया ६५:२

25 इन किकी पिपी इजीप्त रे गूशा जाक्मा रे मुल सम्म नाक्त किंत किंत आं गेय पाइब, आं लोत्र पाइब नेल्ल आन कली मेको आन बाक्तीके सोइक्ताक्डमी। येरमीया २५:४

26 तन्न मेकोपुकीमी आं लोत्र मनेनेम। आं लोत्रमी आन नोफा मदाइक्तेम। मटीब ला दुम्तेक्म। मिनु मेकोपुकीमी आन किकी पिपी आन क्येडा यो शुश मरिम्शो पाम्तेक्म। येरमीया १६:१२

27 मिनु गे मेको आन कली एको लोत्र नेल्ल देंचा माल्नेवे। तन्न मेकोपुकीमी इ लोत्र मनेनीम। गे मेको आन कली ब्रेत्तीनु, यो मेकोपुकीमी इ लोत्र मलेत्नीम।

28 गे मेको आन कली 'एको परमप्रभु यावे, आन परमप्रभु आ लोत्र मटीब रागी डा मुर बाक्नीम। सजाइ ताम्तेक्म हना यो, मरुबेम। मिनु मेको आ पचा माल्ब देशो मपामे। थमा लोत्र जाम्त। मेकोपुकीम जोल ला पाइनीम। येरमीया ५:१

29 गे इ चां प्रेक्शा ताइक्तो। मिनु गोरशो डांडा मेर रोंका पा गाक्को। मारदे हना परमप्रभु यावेमी आ कली गाइक्पाइक्ब आन

पाला डा मुर आन कली प्रोंइशा तिल्तु' देनो" देंत। मीका १:३६

मुर साइक्तीक बेंसी

30 परमप्रभु यावेम "यहूदा डा मुरपुकीम आं डोंइती मरिम्शो पशो बाक्नीम। मेकोपुकीमी आं नेम सेल्शो खिंम आन ग्रांग्रा दिशो थोत्रक वोइक्तेक्म। मोपा आं खिं ग्रांग्रा दिशो दुम्त। येरमीया ३४:३२; २राजा २१:४-५

31 मिनु मेकोपुकीमी तोफेथम आन थान सेल्लेक्म। मेको हिन्नोम आ तौ आ बेंसी बाक्ब। मेकेर आंम तमी तौ आन कली मीम चोशा चढेम्तेक्म। गो मोदेशो गेनायो ममिम्तु, मेको आन कली यो मअरेडमी। येरमीया १९:५-७; येरमीया ३२:३६; लेवी १८:२१

32 मोपतीके होस पा बाक्कीन। मेको बेंसी कली तोफेथ नु हिन्नोम आ तौ आ बेंसी देंचा प्रोंइनीम। शुश नाक्त रिम्चा ममाल्नीनी। तन्न मुर साइक्तीक बेंसी, दे नें वोइक्नीम। मारदे हना तोफेथमी आन बेक्शो मुर मरिक्थ्री थिम्नीम। येरमीया १९:६

33 मिनु मेको मुर आन बेक्शो रां सरीड डा चिक्बपुकी नु रागी डा जन्तु आन कली ब्वतीक दुम्ब। मेको आन कली हिंच कोंइशा, प्रोकपाइक्ब सुइ मबाक्नीम। येरमीया ९:२१

34 मिनु गो यहूदा डा सहर नु यरूसलेम डा लां रे थुं नाइशशा बाक्तीक, ग्येरशो सेंदा नु ग्युम्ली ग्युम्ले आन सेंदा क्याम्नुड। मारदे हना रागी मुर मबाक्तीके दुम्ब" दे परमप्रभु यावेमी देंत। येरमीया १६:९; येरमीया २५:१०; येरमीया ३३:११

8

"मारेइ मारेइ मोशा दुम्नीम" देशो

1 परमप्रभु यावेम "मेना यहूदा डा पिप आन रुश, सरकार आ गेय पाइब आन रुश, चढेब आन रुश, परमप्रभु यावे आ लोत्र पाइब आन रुश नु यरूसलेममी बाक्ब मुर आन रुश मेको आन तुरस रे याक्नीम।

2 मिनु मेको रुश नेल्ल, नां, तास्ला नु सोरुल आन डोंइती फ्रचा माल्नीम। मारदे हना मेको मुरपुकीमी मेको आन कली गेय पा शुश दाक्ताक्म। मेको आन नोले खोइक्ब दुम्तेक्म। मेको आन कली लां कोंइब सेल्शा पूजा पाम्तेक्म। मेको रुश आन कली खुप्शा थिम्चा मदुम्ब। मेको खप कली मोवल दुम्चा माल्नीम। ब्यवस्था ४:१९

3 एको मरिम्शो खिं डा लीशो मुर नेल्लेमी, ते प्रोक्पाइक्तामी हना यो, मार देंनीम देंशा हना 'गो ब्रोंइचा क्येडा यो बेक्चा दाक्नीकी' देंनीम" दे मुर नेल्ल आन परमप्रभु यावेमी देंत।

पाप कली सजाइ

4 गे मेको आन कली परमप्रभु यावेमी मार देंत, देंशा हना "मुरपुकी गोल्नीमी। मिनु मार, मेको लेंशा मबोक्नीमी डा? मिनु सुइ लां जाम्शा ग्युरा पेरा गे लमानु, मेकोपुकी लेशशा मजाक्नीमी डा?

5 मो हना यो एको मुरपुकी मारदे ची हिरशा गाक्मा? मारदे मेको नोले शोंइसीना सीन बाक्नीमी? आन मरिम्शो पतीके मप्रोंइथु, लेशशा जाक्ने मबित्नीम।

6 गो, आं नोफा दाइशशा नेंनुनु, मेकोपुकीम आं कली ठीक लोत्र मपाइनीम। आन मटिशो आ पबंम माफ मपुंइनीम। मेकोपुकीमी 'गो मरिम्शो पाता' मदेंनीम। नेल्ल आन दला दाक्स पाइनीम। मेकोपुकी शारा खोदेशो पा लडाइम दोरनीम।

7 सरीडम बेरब सारसम आ लची ना नु लेत्ची ना तुइक्ब। मिनु दुकुर, बेल्लुम नु बोकुला आन लची ना नु लेत्ची ना तुइक्नीम। तन्न आं मुरपुकीमी आंम परमप्रभु यावे आ देंशो पतीक लोत्र मतुइक्नीम। यसैया १:३

8 मिनु गेपुकीम दोपा 'गो जोक्ब तुइक्ब बाक्नीकी। मिनु परमप्रभु यावे आ अरेशो लोत्र गो नु बाक्ब' देंने चाप्नीनी? थमा पा देंशा हना, सास्त्री आन जोल पा ब्रेक्शोम मेको आन कली जोल सेल्शो बाक्ब। सास्त्री ब्रेक्चा जोक्ब मुर बाक्नीम

9 जोक्ब तुइक्ब मुरपुकी मुने तोक्चा पुंइसीनीम। मेकोपुकी हिंनीम। मेकोपुकी लाइक्चा पुंइसीनीम। मारदे हना मेकोपुकी परमप्रभु यावे आ लोव्र मटीनीम। मेको आन जोक्तीक तुइक्तीक मार बाक्म माइ?

10 मोपतीके गो मेको आन मीश अरु आन कली नु मेको आन रू लडाइ ग्राब आन कली गेनुडमी। नेल्ल क्येडा आइक्च मुर रे नेल्ल क्येडा ठेयब सम्म ठीक पा मचेम्शो क्येट तचा कली शिम बाक्नीम। परमप्रभु यावे आ लोव्र पाइब रे चढेब सम्म नेल्ल जोल पाइब दुम्शो बाक्नीम। येरमीया ६:१३-१५; यसैया ५६:११

11 मेकोपुकीमी आं मुर आन कली ममिम्थु, आन गार सापाइक्खु पशो बाक्नीम। मेकोपुकीमी थुं नाइक्तीक मबाक्त हना यो 'नांइसीन, नांइसीन' देंनीम।

12 मेकोपुकीमी मुने दोक्चा डा गेय पाम्तेक्म। ग्रांग्रा दिशो गेय पाम्तेक्म। तन्न मेकोपुकी मुने मदोक्म। मुनेम लल जिचा देशो मार, बाक्बा, दे मतुइक्तेम। मोपतीके साइक्चा पुंइसीशो आन दातेमी साइक्चा पुंइसीनीम। गो मेको आन कली सजाइ गेनुड। मिनु मेको खतम दुम्नीम” दे परमप्रभु यावेमी देंत।

13 परमप्रभु यावेम “गो, अडगुर सेक्नुड देंडानु बोटम अडगुर मबाक्म। फोव्रशी रवाम फोव्रशी मबाक्म। मेको आन सफा यो सोव्रतेक्म। मेकोपुकी आं गेशो यो रोइक्चा पुंइसीनीम” दे परमप्रभु यावेमी देंत।

14 मुरुमी “गो मारदे एकेर निशशा बाक्या। मुर आन कली पुक्शा, गो गारो हिरशो सहर आ आगा मेर प्रोक्य। मिनु मेकेरेन बेक्य। मारदे हना परमप्रभु इं परमप्रभु यावेम इं कली बेक्पाइक्चा कली सोइशशो बाक्ब। मिनु इं कली बीस ब्वाइशशो ब्वाक्कु तूचा गेप्टु। मारदे हना गो परमप्रभु यावे कली पाप पाइतय। येरमीया ९:१४

15 गोपुकीम थुं नाइशशा बाक्तीक आस पाइतय। तन्न मारेइ रिम्शो मदुम। साचा आ पर्बम रिम्ताक्य। तन्न शुश हिंतीक ला दुम्त” देंतेक्म। येरमीया १४:१९

16 मिनु “दान रे जोरी सत्रु आन शारा आन सोंव सोंव पशो नेंसाक्व। मेको आन शारा आन ग्रीशो आ पबर्म रागी नेल्ल खिंखि पाइब। मेकोपुकी रागी नु मेकेर बाक्शो मारेइ मारेइ, सहर नु मेकेर बाक्ब नेल्ल आन कली दाक्चा कली जाक्शो बाक्नीम। येरमीया ४:१५

17 कोव्रडीन, गो इन दातेम बीस पाइश्शो बुस्सपुकी सोइक्नुडमी। मेको बुस्स आन कली मारेइ मन्तर तन्तर मराइब। मिनु मेकोपुकीमी इन कली कोक्नीम” दे परमप्रभु यावेम देंत।

18 मिनु “गो आं ग्येरसीतीक नेल्ल जाम्त। गो आं थुं खाइक्ती। येरमीया ४:१९

19 श्येत जशो आं मुर आन डाक्शो नेनीन। डोन रागी रे नेनीन। मार, परमप्रभु यावे सियोनम मबाक्शो बाक्बा डा? मेको आ पिप मेकेर मबाक्शो बाक्बा? मारदे मेकोपुकीमी आं कली आन मूर्ति नु आन शोर गाक्शो अर्को रागी डा देवी देवता आन पबर्म गाइक्पाइय्यीमी?

20 बाली नाली रिक्ची ना लाक्तु। बर्खा नुप्त। मो हना यो इं श्येत रे ब्रोंइची ना मजा।

21 आं श्येत जशो मुर आ पबर्म गो रोंका पा थुं खाइक्ती।

22 मिनु गिलादमी मारेइ खेक्तीक मबाक्बा? मार, मेकेर इ कली ओरुती पाइब मबाक्बा? मारदे आं श्येत जशो मुर मसामा?” देंत। येरमीया ४६:११

9

परमप्रभुमी लोत्र पशो

1 परमप्रभुमी “आं पिया ब्वाक्कु बुक्तीक दुम्शो हना, नु आं मिक्ची प्रेक्कु बुक्तीक दुम्शो हना, गो नाक्दो नाक्ती डाक्ड वा। श्येत जशो साइश्शो आं मुर आन पबर्म डाक्ड वा। येरमीया १३:१७; लूका १९:४१

2 गोरशो रागीम मुर आन कली बास बाक्तीक बाक्शो हना, गो आं मुर आन कली प्रॉइशा, मेकेर लशा बाक्ड वा। मिनु मेको आन रे डोन लड वा। मारदे हना मेको नेल्ल आन नाता खोइशशा अरु नु इप्नीम। मेको नेल्ल मरिम्शो हुल का बाक्नीम।

3 मेकोपुकीम जोल पस ला जोक्नीम। मोपा जोल पतीकेमी रागी डा ठेयब मुर दुम्तेक्म। थमा लोत्र पतीकेमी ममाइ। मेकोपुकी मरिम्शो पशो का रे अर्को मरिम्शो पाइनीम। मिनु आं कली मतुइक्नीम। येरमीया ५:१

4 आंम नेक्था डा मुरपुकी रे होस पा बाक्कीन। आंम लोक्ब आन कली यो थमा मसुतीन। मारदे हना इन लोक्ब नेल्ल मिक्च सिल्ल बाक्नीम। मिनु इन नेक्था डा मुरपुकी हिरशा, इन पर्बम जोल पा दोस गेना गेन बाक्नीम। येरमीया १२:६; भजन संग्रह ४१:१०; मीका ७:५-६

5 मेको नेल्लेम आन नेक्था डा मुर आन कली जोल पाइनीम। सुइमी थमा लोत्र मपाइनीम। मेकोपुकीम जोल पचा शेंसीशो बाक्नीम। मेकोपुकीम मरिम्शो ला पाइनीम।

6 मेकेर दिम्मुतीके नु जोल पमुतीके ला बाक्ब। मेकोपुकीमी आं कली तुइक्चा मदाक्नीम” दे परमप्रभुमी यावे, मुर नेल्ल आन परमप्रभुमी देंत।

7 मोपतीके मुर नेल्ल आन परमप्रभु यावेम “गो मेको आन कली यपाइशशा नाक्नुडमी। पाप पाइब आं मुर आन कली गो अरु मार पने चाप्नुडा डा?

8 मेको आन लें बीस पाइशशो ब्रा खोदेशो बाक्ब। मेकोपुकीम जोल लोत्र ला पाइनीम। मुर नेल्लेम आन नेक्था डा मुर नु रिम्शो लोत्र पखु पाइनीम। तन्न आन थुंमी दोपा मेको कली ब्वारद दाइक्चा, दे मिम्नीम। बजन संग्रह १२:३

9 मार, मोदेशो पशो आ पर्बम गो मेको आन कली सजाइ मगेनुडमी? ओदेशो रागी डा मुर आन कली गो सजाइ गेचा

माल्नुड” दे परमप्रभु यावेम देंत। येरमीया ५:९, २९

10 गो डांडा आन पर्बम डाक्शा रोंका पने। मिनु गोरशो रागी डा योव्रतीक आन पर्बम बिलाना पने। मेको गोरशो सेल्शो बाक्नीम। मेकेर सुइ मगाक्नीम। मिनु मेकेर बी ब्यफ क्यारश भेडा आन ग्रीशो मनेंसीब। सरीड डा चिक्ब नु जन्तु नेल्ल प्रोक्शा लाम्तेक्म। येरमीया ४:२५; येरमीया १२:४

11 गो यरूसलेम कली खिं ब्रेशशा देल्टीके सेल्नुड। सिवार आन बाक्तीके सेल्नुड। गो यहूदा डा सहर आन कली मुर मबाक्तीके सेल्नुडमी। मिनु मेकेर सुइ मबाक्नीम। येरमीया २६:१८

12 मेको लोव्र रुप्चा कली जोक्ब तुइक्ब सु बाक्बा डा? परमप्रभु यावेम सु कली लोव्र पवा, मेकोमी एको शेने चाप्ब। मारदे मेको रागीम ब्रेशशो खिं ला बाक्नीमी? मारदे मेको मुर मबाक्तीके खोदेंशो दुम्शा, सुइ लने मचाप्चा डा पा, श्येत्थ दुम्शो बाक्बा? लूका १९:४२

13 मारदे हना मेकोपुकीमी आन डोंइती वोइश्शो आं अरेशो लोव्र प्रोंइतेक्म। आं देशो मटिथु आन दला दाक्स पाम्तेक्म।

14 मेको आन खकटा थुंमी आन दला दाक्स पा बाल देवता आ नोले खोइक्तेक्म। मेको आन किकी पिपी शेंशो लांम गाक्तेक्म। येरमीया ७:२४

15 मोपतीके परमप्रभु यावे, मुर नेल्ल आन परमप्रभु, इस्राएली आन परमप्रभुमी “गो एको मुर आन कली कशो थोव्रक उम्नुडमी। मिनु तूचा कली बीस ब्वाइश्शो ब्वाक्कु तूपाइक्नुडमी। येरमीया २३:१५; येरमीया ८:१४

16 गो मेको आन कली रागी रागी डा मुर आन दातेमी फ्राइनुडमी। मेकेर आन मतुइश्शो नु आन किकी पिपी आन मतुइश्शो मुर बाक्नीम। मिनु गो मेको आन कली मसदुमी सम्म मेको आन नोनोले तरवार सोइक्नुड” देंत। लेवी २६:३३

17 मिनु मुर नेल्ल आन परमप्रभु यावेमी “मुल मिम्तीन। रोंका पाइब मीश मुर आन कली ब्रेत्तीन। मेको आन दाते डा नेल्ल क्येडा

रोंका पस जोक्ब कली ब्रेथ सोइक्तीन” देंत

18 मेकोपुकीमी “रीब पा जाक्मल। मिनु आंइ पर्बम रोंका पामेक्ल। इं मिक्च नेल्ल प्रेक्कु मदुम सम्म नु इं मिक्च आ पारला रे ब्वाक्कु खोदेशो पा प्रेक्कु मदोक्म सम्म, मेकोपुकीमी रोंका पामेक्ल।

19 सियोन रे रोंका पशो नेंसाक्व। गोपुकी खतम दुम्तय। गोपुकी मुनेम सुम्सीशो बाक्नय। गोपुकीम आंइ रागी प्रोंइचा माल्नीकी। मारदे हना मेकोपुकीम आंइ खिं प्रेत्तेक्म” देंतेक्म।

20 मिनु गे मीश मुरपुकी परमप्रभु यावे आ लोव्र नेनीन। मेको आ लोव्र नेंचा कली इन नोफा दाइक्तीन। इन तमी आन कली रोंका पचा शेंदीन। आंम नेक्था डा मुर नु रोंका पतीक शेंमुने।

21 बेक्पाइक्ब झेल रे डोइश्शा आंइ बाक्तीकेम ओव्रत। मेको आंइ आल आन कली लां रे नु आंइ ठिटा आन कली बुक्शा बाक्तीक रे साइक्चा कली जाक्त।

22 परमप्रभु यावेमी “गे मुर आन कली मोदेशो लोव्र पावो ‘मुर आन बेक्शो रां रूम मोव्रल खोदेशो पा दोक्नीम। अन्न खुप्ब मुर आन नोले प्रोंइशो अन्न खोदेशो पा, गोल्शा लीशो बाक्नीम। मिनु मेको आन कली सुइम सिला मपाइनीम’ देनो” देंत। येरमीया ७:३३; येरमीया १४:१६; येरमीया १६:४; येरमीया २५:३३; भजन संग्रह ७९:२

मार आ पर्बम नें बोरपाइक्चा

23 परमप्रभु यावेम “जोक्ब तुइक्ब मुरपुकी आन जोक्तीक तुइक्तीक आ पर्बम ठेयब मलेम्मल। सक्ति पाइश्शो मुरपुकी आन सक्ति आ पर्बम ठेयब मलेम्मल। शुश शोंप पाइश्शो मुरपुकी आन शुश शोंपोम ठेयब मलेम्मल।

24 तन्न सु ठेयब लेत्नीमी, मेकोपुकीम ‘गो परमप्रभु यावे कली तुइक्नुड’ देंमल ‘मेको थमा पा परमप्रभु यावे बाक्ब, दे तुइक्नुड, दे नें बोरपाइक्चे चाप्नीम। परमप्रभु यावेमी रागी कली शिशी पाइब, ठीक निसाफ नु ठीक पाइब बाक्ब’ देंमल। मारदे हना मेको आं

दाक्शो बाक्ब, दे ग्येरसीनुड” दे परमप्रभु यावेम देंत। १कोरिन्थी १:३१; २कोरिन्थी १०:१७

चिनु मख्रोइश्शो खोदेशो दुम्शो

25 परमप्रभु यावेम “राम ला ख्रोइक्तीक चिनु ख्रोइश्शो मुर आन गुम्तीक नाक्ती थमा पा जाक्ब।

26 गो इजीप्त, यहूदा, एदोम, अम्मोन, मोआब नु गोरशो रागीम बाक्ब, आन चां एर ओंथ ख्रोइक्ब मुर नेल्ल आन कली गुम्नुड। मारदे हना मेको नेल्ल ख्रोइक्तीक चिनु मख्रोइश्शो बाक्नीम। मिनु इस्राएल आ खिं डा मुर नेल्ल यो आन थुंम ख्रोइक्तीक चिनु मख्रोइश्शो बाक्नीम” देंत। लेवी १९:२७; येरमीया ४:४; लेवी २६:४१; ब्यवस्था ३०:६

10

परमप्रभु नु मूर्ति

1 गो इस्राएल आ खिं डा मुरपुकी, परमप्रभु यावेम इन कली मार, देंमे, मेको नेनीन।

2 परमप्रभु यावेम “रागी रागी डा मुर आन पतीक मशेंसीने। सरीड डा चिन्ड तशा, महिनीन। रागी रागी डा मुरपुकी मेको तशा हिंनीम। प्रस्थान २३:२४; २राजा २१:६

3 मारदे हना जात जात डा मुर आन पतीक जोल बाक्ब। मेकोपुकीमी ब्वाकी डा रवा का तिम्नीम। मिनु शी के मार, मार, सेल्ब जोक्बमी मुशा मूर्ति सेल्नीम। यसैया ४४:१३-१७

4 मिनु मुरपुकीमी, मेको कली सुन नु चांदीम गिल्लीम। मिनु मेको महिम्सेक्ल दे घनमी कांटी थोक्नीम। मिनु मेको महिम्सीब।

5 मेको आन मूर्ति वोबीस रूम वोइश्शो खेरच खोदेशो बाक्नीम। मेको ब्वाक्ने मचाप्नीम। मेको आन कली कुरचा माल्लीम। मारदे हना मेकोपुकी गाक्ने मचाप्नीम। मेको तशा महिनीन। मारदे हना

मेकोपुकीमी मारेइ मरिम्शो पने मचाप्नीम। मारेइ रिम्शो यो पने मचाप्नीम” देंत। भजन संग्रह ११५:७; यसैया ४६:७

6 परमप्रभु यावे, इन खोदेशो सुइ मबाक्नीम। गे ठेयब बाक्नीनी। मिनु इन सक्तिमी इन नें ठेयब सेल्लतीनी। भजन संग्रह ८६:८

7 गे रागी रागी डा पिप, इन कली सुम मान पा महिनीमी डा? गे मान पाइक्चा शिरशो बाक्नीनी। रागी रागी डा मुर आन जोक्ब तुइक्ब नु मेको आन राज्य नेल्लेमी इन खोदेशो सुइ मबाक्नीम।

8 मूर्ति आन शेंतीक निप्स मपाइशो नु मूर्ख लोत्र बाक्ब। मेको शी क्येडा रिम्शो मबाक्ब।

9 टारशीश रे तुप्शो चांदी चाक्नीम। मिनु उफाज रागी रे सुन चाक्नीम। मेको मार मार सेल्स जोक्ब नु सुन चेम्बपुकी आन गेय बाक्ब। मिनु मेको आन कली नीलो नु प्याजी रड डा वा फेक्पाइक्नीम। मेको नेल्ल मार मार सेल्स जोक्ब मुर आन गेय बाक्नीम।

10 तन्न परमप्रभु यावे थमा डा परमप्रभु बाक्ब। मेको ब्रोंइशा बाक्ब परमप्रभु नु गेना हना यो लीब पिप बाक्ब। मेको गाइकतानु, रागीम खिनु कुइब। मिनु रागी रागी डा मुरपुकीम मेको आ गाइशो फाल्ने मचाप्नीम। येरमीया ५:२

11 गे मेको आन कली “मेको सरीड नु रागी मसेल्ब देवी देवता रागी नु सरीड आगा रे क्याम्चा पुंइसीनीम।

12 तन्न मेकोमी आ सक्तिमी रागी सेल्लतु। मेकोमी आ जोक्तीक तुइक्तीकेमी रागी रागी कली वोइक्तु। मिनु मेकोमी आ रुप्तीकेम सरीड प्राक्तु। येरमीया ५१:१५-१९

13 मेकोमी लोत्र पवानु, सरीड रे रेउ यीब। मेकोमी रागी आ सुर रे गोस्स आन कली पोक्ब। मेकोमी रेउ नु चिला पपाइक्ब। मिनु फश आ बाक्तीक रे फश पपाइक्ब। भजन संग्रह १३५:७

14 मुर नेल्ल निप्स मपाइशो नु मारेइ मतुइक्ब बाक्नीम। सुन चेम्ब नेल्ल आन मूर्तिम पतीके मुने दोक्नीम। मेको आन मूर्तिपुकी जोल बाक्नीम। मेको आन के सोक्त मबाक्ब। यसैया ४५:१६

15 मेको शोर गाक्शो ला बाक्नीम। मुर आन मिम्शो ला बाक्नीम। मेको आन कली सजाइ गेशोनु, जाम्नीम।

16 परमप्रभु यावे, याकूब आ भाग बाक्ब। मेको मारेइ मारेइ सेल्ब बाक्ब। मिनु इस्राएल मेको आ शोंप बाक्ब। मेको आ नें मुर नेल्ल आन परमप्रभु यावे बाक्ब” देनो। ब्यवस्था ३२:९

सजाइ जाक्ब देशो

17 गे पुम्चा पुंइसीशो सहर इ कुम्लो खप रे गुपो।

18 मारदे हना परमप्रभु यावेम “गो मेको रागी डा मुर आन कली ताइक्नुडमी। मेको आन कली शुश श्येत गेनुडमी। मिनु मेकोपुकीम तुइक्नीम” देंत।

19 आबी, तन्न आं गार आ पर्बम हिंती। आं गार मसाब। तन्न गो आंम कली “थमा पा, एको आं सजाइ बाक्ब। गो एको फाल्चा माल्नुड” देंती।

20 आं ताम्बु ब्रेत्त। मेको आ डोरी नेल्ल ब्रोइक्तेक्म। आं आलपुकी गाक्तेक्म। मुल मेकोपुकी मबाक्नीम। मुल आं ताम्बु कीशा गेब नु आं बाक्तीकेम फारतीक वा वोइश्शा गेब सुइ मबाक्नीम।

21 गोठलापुकी निप्स मपाइश्शो बाक्नीम। मेकोपुकीमी परमप्रभु यावे कली हिल्लो मपाइनीम। मोपतीके मेकोपुकी रिम्शो मदुम्नीम। मेको आन क्यारश भेडा नेल्ल ब्राम्तेक्म। येरमीया २३:१

22 रेयके का जाक्शो बाक्ब। मेको नेनीन। उत्तर रागी रे ठेयब ग्रांग्ये माग्ये दुम्शो बाक्ब। मेकोमी यहूदा इन सहरपुकी मुर मबाक्तीके सेल्ब। मेको सिवार आन बाक्तीक दुम्नीम। येरमीया १:१४

येरमीया आ पुंइशो लोत्र

23 परमप्रभु यावे, मुर आन ब्रोंइतीक आंम आन गुइम मबाक्ब, गो मेको तुइक्नुड। बेक्शा लाइब मुरपुकीम आंम लां आंमा सेल्ने मचाप्नीम। हितोपदेस १६:९

24 परमप्रभु यावे, आं कली रिम्शो सेल्यीनी। तन्न ठीक निसाफ पतीकेम ला रिम्शो सेल्यीनी। इन गाइक्तीकेम ममाइ। मो दुम्त हना, गे आं कली साइक्नीनी। येरमीया ३०:११; येरमीया ४६:२८; भजन संग्रह ६:२; हबकुक १:१२

25 इन कली मतुइक्ब रागी रागी डा मुर नु इन नें थिचा मदाक्ब जात जात डा मुर आन तार इन गाइक्तीक मोतीन। मारदे हना मेकोपुकीमी याकूब कली नेक्शा दाक्शा पशो बाक्नीम। मेकोपुकीमी मेको कली थमा पा दाक्शो बाक्नीम। मिनु मेको आ बाक्तीक मुर मबाक्तीके सेल्शो बाक्नीम।

11

कबल क्याम्शो

1 परमप्रभु यावेम येरमीया कली,

2 “गे एको कबल डा लोव्र नेनो। मिनु यहूदा डा मुरपुकी नु यरूसलेममी बाक्ब आन कली लोव्र पावो।

3 गे मेको आन कली ‘इस्राएली आन परमप्रभु यावेम मार देंत देंशा हना, सु सुमी एको कबल मखाप्नीमी, मेको सराप राइनीम। ब्यवस्था २७:२६;

4 गो मेको कबल डा पचा माल्शो गेय इन किकी पिपी आन कली श्येत जतीक इजीप्त रागी रे गुंइची ना अरेशो नडमी। गो मेको आन कली आं अरेशो यो टिने। इन कली अरेशो लोव्र नेल्ल पा आं मुर दुम्नीनी। मिनु गो इन परमप्रभु दुम्नुड। येरमीया ७:२३

5 गो इन किकी पिपी आन कली दूध नु खुदो शुश बाक्शो रागी का गेनन्नी, दे कसम जशो खाप्नुड। मिनु मेको रागी मुल इन अधिकारम बाक्ब’ देनो” देंत। मिनु गो “परमप्रभु यावे, मोदेंशो दुम्ल” दे लोव्र लेत्ताक्ड। प्रस्थान ३:८

6 मिनु परमप्रभु यावेम आं कली “यहूदा डा सहर नेल्लेम नु यरूसलेम डा लां मेर एको कबल डा लोव्र उरदी पा, मेको कबल डा लोव्र नेंशा पने।

7 गो इन किकी पिपी आन कली इजीप्त रे प्रोंइशा चाक्गुमी रे मुल सम्म 'आं लोव्र टिने' दे अरेना अरेन बाक्ती। येरमीया २५:४

8 तन्न मेकोपुकीमी आन नोफा मदाइक्तेम। आं देंशो लोव्र मटीमे। मेको आ पा डा मेकोपुकीमी आन खकटा थुंमी मरिम्शो पा काइ मटीमे। गो मेको आन कली आं कबल डा लोव्र नेल्ल पने, दे अरेता। तन्न मेको पने मबिस्सम” देंत। येरमीया ३:१७; येरमीया ७:२६; येरमीया १३:१०; येरमीया १८:१२; ब्यवस्था २८:१५-६८

9 मिनु परमप्रभु यावेम आं कली “यहूदा डा मुरपुकी नु यरूसलेममी बाक्बपुकीम मरिम्शो पचा मिन्मीम।

10 मेको आन किकी पिपी आन मरिम्शो पतीक गे लेशशा लाम्तेक्म। आं अरेशो मटीम। पाप गे लेशशा लाम्तेक्म। अरु देवी देवता आन कली पूजा पा, मेको आन नोले खोइक्तेक्म। गो मेको आन किकी पिपी नु पशो कबल इस्राएल आ खिं डा मुर नु यहूदा आ खिं डा मुर नेल्लेमी क्याम्ताक्म” देंत।

11 मोपतीके परमप्रभु यावेमी “गो थमा पा, मेको आन कली ठेयब श्येत गेनुडमी। मिनु मेको रे प्रोक्ने मचाप्नीम। आं कली पुंडतेक्म हना यो, गो मेको आन लोव्र मनेनुड। भजन संग्रह १८:४२; यसैया १:१५; इजीकीएल ८:१८

12 मिनु नोले यहूदा सहर डा मुरपुकी नु यरूसलेमम बाक्ब मुरपुकीमी लशा, मेको आन पूजा पशो देवी देवता आन कली पुंडनीम। तन्न मेकोपुकीमी मेको आन कली आन श्येत रे गेनायो मप्रोंइनीम। येरमीया २:२८; ब्यवस्था ३२:३७-३८

13 यहूदा, इ के दोशो सहर बाक्मा, मोशो इ देवी देवता दुम्तेक्म। यरूसलेममी गिश लां बाक्मा, मीश मुने दोक्तीक बाल देवता कली चढ़ेतीक सेल्लेक्म।

14 येरमीया, गे मेको जात डा मुर आन पबर्म मपुनो। मेको आन पबर्म डाक्शा प्रार्थना पा मपुनो। मारदे हना मेकोपुकी श्येत जामे ना मेको आन पुंडशो मनेनुड। येरमीया ७:१६

15 आं दाक्शो मुरपुकी आं खिं ओव्रचा मार अधिकार बाक्बा?

मेको नेल्ल मरिम्शो पाइब बाक्नीम। आं कली चढेशो श्येम इन कली सजाइ गेतीक रे तेक्ने चाप्बा डा? मिनु गे ग्येरने चाप्नीनी” दे परमप्रभु यावेमी देंत। रोमी ११:२८; होसे ८:१३

16 परमप्रभु यावेम इन कली रिम्शो फल सिप्ब दारशो गिगी तेल रवा, दे नें वोइक्तु। तन्न मेकोम ठेयब फश गिवार पपाइश्शा, मेको कली मी सुइक्ब। मिनु मेकोम आ राशी आन कली दाक्ब।

17 मुर नेल्ल आन परमप्रभु यावेम इन कली खुम्तु। मिनु मेकोमी इन कली मरिम्शो पचशो बाक्ब। मारदे हना इस्राएल आ खिं डा मुर नु यहूदा आ खिं डा मुरुम मरिम्शो पाम्तेक्म। परमप्रभुमी “मेकोपुकीमी बाल देवता कली मार मार चढेशा आं कली गाइक्पाइक्तीमी” देंत।

येरमीया कली साइक्चा माल्शो

18 परमप्रभु यावेम आं कली मेको मुरपुकीम मार पचा माल्शो बाक्मा, मेको कोइशा तुइक्पाइक्ती। गे आं कली, आन मरिम्शो पचशो कोइताक्यीनी।

19 गो साइक्चा कली लाइश्शो मारेइ पने मचाप्ब पाठा का खोदेंशो बाक्ती। मेकोपुकीमी आं पर्बम “एको रवा कली आ फल सुन्दा तिम्य। एको कली ब्रोंइशा बाक्ब आन रागी रे क्योरशा ताइक्तय। मिनु एको आ नें गेनायो ममिम्सेक्ल” देंशा मरिम्शो पशो गो मतुइक्तु। यसैया ५३:७

20 तन्न गे, मुर नेल्ल आन परमप्रभु यावे, ठीक पा निसाफ पाइनीनी। मिनु थुं नु सोक्त नाक्शा कोव्रनीनी। गेमी मेको आन कली क्येक्क लेशो गो कोव्रचा तडल। मारदे हना गो इन कली आं निसाफ पतीक जिम्मा गेशो बाक्नुड। भजन संग्रह ७:१०; येरमीया १७:१०; येरमीया २०:१२

21 मोपतीके आं कली साइक्चा माल्ब अनाथोथ डा मुर आन पर्बम परमप्रभु यावेम “मेको मुरपुकीम इ कली ‘परमप्रभु यावे आ

नेमी लोव्र मपावो। लोव्र पाप्तीवी हना, गे आंइ गुइ रे बेक्नेवे' देंनीम।
येरमीया १:१

22 मोपतीके मुर नेल्ल आन परमप्रभु यावेम 'गो मेको आन कली सजाइ गेनुडमी। मेको आन ठिटा मुरपुकी तरवारम क्योरशा साइक्चा पुंइसीनीम। मिनु मेको आन तमी तौ चहिं अन्कालम बेक्नीम।

23 मेकोपुकी सुइ मब्रोंइनीम। मारदे हना मेको आन कली सजाइ गेतीक बर्सम गो अनाथोथ डा मुर आन तार ठेयब श्येत चाक्नुड' ” देशो बाक्ब।

12

येरमीयामी लोव्र पशो

1 परमप्रभु यावे, गो इन कली दोस गेता हना, गे ठीक पाइब बाक्नीनी। तन्न गो आं निसाफ इन डोंइती वोइक्नुड। दोस ताइबपुकी मारदे सोशा बोशा लाइनीमी? थमा मसुइक्ब मुर मारदे रिम्शो दुम्ना दुम्न बाक्नीमी? भजन संग्रह ७३:३

2 गे मेको आन कली खुम्तीनी। मिनु मेकोपुकीमी शाक्श थोक्शा, बारशा, फल गेनीम। मेको आन लोव्रम ला इन नेक्था बाक्नीम। तन्न मेको आन थुंमी इन क्येडा डोन बाक्नीम।

3 मो हना यो परमप्रभु यावे, गे आं कली तुइक्नीनी। गे आं कली कोव्रशा, नाक्नीनी। आं थुं गे नु बाक्ब। मेको आन कली साइक्चा कली लाइशो भेडा खोदेशो पा, कीशा लतीन। मिनु साइक्तीक नाक्त कली तिल्शा वोतीन। भजन संग्रह १३९:१

4 रागीम गेना सम्म रोंका पाइबा? मिनु रू डा घांस गेना सम्म सोल सुल बेक्नीमी? मेकेर बाक्बपुकीम परमप्रभु यावे आ अरेशो लोव्र मटितीके, मेकेर डा जन्तु नु चिक्ब नेल्ल बेक्तेक्म। मोपा मेकोपुकीमी “आंइ कली मार, दुम्शो बाक्बा, मेकोमी मारेइ मतुइक्ब” देंनीम। येरमीया ९:९

परमप्रभुम लोत्र लेशशो

5 परमप्रभु यावेम “गे दोरब मुरपुकी नु दोरते हना, मेकोपुकीमी इ कली दपाइक्तेक्मी हना, गे शारा नु दोपा दोरने चाप्नेवे? गे मारेइ मदुम्तीकेमी गोल्ते हना, यर्दन खोला डा ब्वाकीम मार पाइनेवे?

6 इ लोकबपुकी नु इ खिं डा मुरपुकीमी इ कली मरिम्शो पाप्तेक्म हना, मेकोपुकी इ पर्वम ठेयब सेंदा पा रेयके पा जाक्नीम। मेकोपुकीमी गे नु रिम्शो लोत्र पाप्तेक्म हना यो, मेको आन कली थमा मसुइक्मी।

7 गो आं खिं प्रोंइता। आं थेरशो रू प्रोंइता। मिनु आं दाक्शो कली आ जोरी सत्रु आन गुइमी गेता।

8 आ थेरशो रू ब्वाकी डा गुप्स खोदेशो दुम्त। मेको आं कली कोव्रशा ग्रीब। मोपतीके गो मेको कली काइ मदाक्नुड।

9 मार, मेको सिवार आं थेरशो रू तशा गेहे पाइबा डा? आं डोंइती छिर छिर पाइशो सिखारी चिक्ब खोदेशो मदुम डा? मेको कली अर्को सिखारी चिक्बपुकीम पुम्शा राम्शी तोव्रमेक्ल। लावो, लशा ब्वाकी डा जन्तु नेल्ल आन कली पुक्मी। मिनु मेको कली ब्वपाइक्चा कली चाक्मी। यसैया ५६:९

10 शुश गोठलापुकीम आं अङ्गुर रू खतम सेल्लेक्म। मेकोपुकीमी आं भाग दिम्शा ताइशशा पाप्तेक्म। मेकोपुकीमी आं दारशो भाग कली गोरशो रागी खोदेशो पा मुर मबाक्तीक सेल्लेक्म। येरमीया ६:३

11 मेकोपुकीम रागी गोरशो सेल्लेक्म। मेको रागी कली आं डोंइती सोव्रशो नु सुइ मबाक्तीक सेल्लेक्म। रागी नेल्ल गोरशो सेल्लेक्म। मिनु सुइ आन थुं मखाइ” देंत।

12 गोरशो रागी डा डांडा मेर नेल्ल श्येत्य पोक्बपुकी क्राक्थ्री चौक्थ्री पा जाक्शो बाक्नीम। मारदे हना परमप्रभु यावे आ तरवारम रागी आ सुर का रे अर्को सुर सम्म क्योरब। मिनु सुइ मब्रोंइनीम।

13 मेकोपुकीमी चेरब शोक्नीम। मिनु चू सिप्पाइक्नीम।

मेकोपुकीमी श्येत पा गेय पाइनीम, तन्न नेल्ल शोर गाक्ब। मोपतीके मेको आन खुम्शा मुने दोक्शो आंमा फाल्मेक्ल। मारदे हना परमप्रभु यावे आ ठेयब पा गाइश्शो इन तार जुक्शो बाक्ब। होसे ८:७

14 परमप्रभु यावेमी आं कली मरिम्शो पाइब आं नेक्था डा मुर आन पर्बम “गो आं मुर इस्त्राएली आन कली गेशो, मेको आन किकी पिपी आन शोंप रोइश्शो बाक्नीम। मोपतीके गो मेको आन कली आन रागी रे तुल्शा ताइक्नुडमी। मिनु गो यहूदा आ खिं डा आ मुर आन कली मेको आन दाते रे तिल्नुडमी।

15 तन्न गो मेको आन कली तुलुमी नोले लेंशा शिशी पाइक्नुडमी। मिनु मेको नेल्ल आन कली आन आन किकी पिपी आन शोंप गेशा, आन रागीम लेंशा चाक्नुडमी।

16 मिनु मेकोपुकीमी मोपा बाल आ नेंम कसम जाम्तेक्म, मोपा आं मुर आन लां थमा पा शेंताक्म हना, मेकोपुकीम परमप्रभु यावे ब्रोंइशा बाक्शो खोदेंशो पा, आं नेंम कसम जाइनीम। आं मुर आन पतीके रिम्शो पा शेंसाक्म हना, मेकोपुकी आं मुर आन दातेमी बाक्चा ताइनीम। ब्यवस्था ६:१८; येरमीया ४:२

17 तन्न तेकोइ जात डा मुरुम मेको लोत्र मनेंतेक्म हना, गो मेको आन कली तुल्शा ताइक्नुडमी” दे परमप्रभु यावेम देंशो बाक्ब।

13

सुती के धोती

1 परमप्रभु यावेम आं कली “लशा सुती के धोती का ग्यापो। मिनु मेको पांइसो। तन्न मेको कली ब्वाक्कुम जित्चा मगेवो” दे माइक्ती।

2 मोपतीके गो परमप्रभु यावेम देंशो खोदेंशो पा, सुती के धोती का ग्याप्शा पांइसाक्यी।

3 मिनु लेंशा परमप्रभु यावेम आं कली

4 “बोक्को, इ ग्याप्शा पांइसीशो धोती कुरशा मुल युफ्रेटीस लावो। मिनु सेरथे फुल्लु आ आगाम बाक्शो जेशो फुल्लुम मेको खुइशशा वोतो” दे माइक्ती।

5 मोपतीके गो परमप्रभु यावेम देशो खोदेशो पा, मेको युफ्रेटीसम खुइशशा वोइक्ता।

6 मिनु शुश नाक्त नोले परमप्रभु यावेम आं कली “बोक्को, युफ्रेटीस लावो। मिनु मेकेर गो डोंइती इ कली खुइशशा वोतो देशो धोती चाक्को” दे माइक्ती।

7 मिनु गो युफ्रेटीसम लती। मिनु आं खुइशशा वोइक्तीक रे मेको धोती दोशा गुंइताक्ड। तन्न मेको धोती नेल्ल मुक्ने थुमा बाक्त। मेको थमा पा, शोर गाक्शो दुम्माक्त।

8 मिनु परमप्रभु यावेम आं कली मार देंत देशा हना,

9 “ओदेशो पा गो यहूदा आ ठेयब लेत्तीक नु यरूसलेम आ थाम्पा ठेयब लेत्तीक खतम पोक्नुड।

10 मेको मरिम्शो पाइब मुरपुकीम आं लोव्र नेने मबिस्सम। मेकोपुकीमी आन खकटा थुंमी आन दला दाक्स पतीकेमी अरु देवी देवता आन कली पूजा पचा कली नु मेको आन गेय पचा कली लाम्तेक्म। मिनु मेकोपुकी एको धोती खोदेशो दुम्नीम। मेको थमा पा शोर गाक्शो बाक्ब। येरमीया ११:८

11 मारदे हना दोपा मुरुम आ धोती रांम पांइसीशो बाक्बा, मोपा गो इस्राएल आ खिं डा मुर नेल्ल नु यहूदा आ खिं डा मुर नेल्ल आन कली आं मुर दुम्मल, दे आं नेक्था वोइक्तामी। आं कली मान पामेक्ल, आं कली ठेयब सेल्मेक्ल, आं दारसम ग्योम्सीमल, दे पांइसाक्यी। तन्न मेकोपुकीमी आं देशो लोव्र आन नोफा मदाइक्तेम” दे परमप्रभु यावेम देंत।

अडगुर शांबुम ब्रीशो गर

12 परमप्रभु यावे, इस्राएली आन परमप्रभुमी “गर नेल्ल अडगुर शांबुम ब्रीचा माल्नीम देशो बाक्ब” दे माइक्मी। मिनु मेकोपुकीम

“गर नेल्ल अडगुर शांबुम ब्रीचा माल्ब, दे गो मतुइक्नीकी डा?”
देंतेक्म हना,

13 गे मेको आन कली परमप्रभु यावेम इन कली मार दंत देशा हना “गो एको रागी नेल्ल डा मुर आन कली, दाऊद पिप आ बाक्तीकेम बाक्ब पिप आन कली, चढेबपुकी, परमप्रभु यावे आ लोत्र पाइबपुकी नु यरूसलेममी बाक्ब नेल्ल आन कली दुक्पाइक्नुडमी। येरमीया २५:१५-२८; यसैया ५१:१७

14 गो मुर आन कली जिपाइक्नुडमी। गो आम आफ नु आन तमी तौ आन दातेमी जिपाइक्नुडमी। गो मेको आन कली दाक्शा, शिशी पा साइक्तीक रे आं थुं मलेत्नुड, दे परमप्रभु यावेम” दंत।

15 नोफा दाइश्शा नेनीन। ठेयब लेशशो मदुमीन। मारदे हना परमप्रभु यावेम लोत्र पाप्तु।

16 मिनु “गे परमप्रभु यावे, इन परमप्रभुम छिडछिड चाक्चा क्येडा डोंइती मेको कली ‘ठेयब सेलीन’। नां रिक्चा क्येडा डोंइती डांडा मेर इन खोइल दाइल पाइक्चा क्येडा डोंइती मेको कली ‘परमप्रभु यावे ठेयब बाक्ब’ देनीन। गे हाम्सो आस पाइनीनी, तन्न मेकोमी छिडछिड सेल्शा थम क्येर सेल्ब।

17 तन्न गेपुकीम मेको मनेंतीनी हना, गो इन ठेयब लेशशो आ पतीके, गो आं थुंम सुइ आन मतुइक्चा डा पा डाक्नुड। परमप्रभु यावे आ हुल ग्याइश्शा लाइक्चा पुंइसीतीके गो हुइ हुइ पा डाक्नुड। मिनु आं मिक्च रे प्रेक्कु दोक्ब। येरमीया ८:२३; येरमीया १४:१७; लूका १९:४१

18 पिप नु पिप आ ममा आस कली ‘इन नित्तीक रे उइ तोंइसीन। मारदे हना इन पिया रे इन ठेयब दुम्तीक सिरपेच दोक्ब’ माइक्सी”
दंत। २राजा २४:१-१६; यसैया ६२:३; बिलाप ५:१६

19 नेगेब रागी डा सहर आन लाप्चो चोक्सीनीम। मिनु मेको आन कली रोक्ब सुइ मबाक्नीम। यहूदा डा मुर नेल्ल ग्याइश्शा लाइक्चा पुंइसीशो बाक्नीम। मेको आन कली थमा पा ग्याइश्शा लाइक्तेक्म।

20 ए यरूसलेम, उत्तर रे जाक्ब जोरी सत्रु आन कली कोव्रडो। इ कली गेशो बगाल, इ दारशो भेडा ते बाक्नीमी?

21 गेमी आंम मुर सेल्चा कली इ लेम्शो मुर आन कली परमप्रभु यावेम इ कली हुकुम पाइब सेल्ब। मिनु गे मार, देंनेवे? मार, सुत्केरी दुम्चशो मीश मुर खोदेंशो पा, इ कली श्येत मदुम्बा डा?

22 “मिनु गे इ थुंम ‘आं कली मारदे ओदेंशो श्येत दुम्मे’ देंनेवे। गेमी शुश मरिम्शो पतीके इ गुने क्युकसाक्वे। मिनु इ रांमी मरिम्शो पाइक्चा पुंडसाक्वे। यसैया ४७:२-३; इजीकीएल १६:३७

23 मार, एथीयोपीयामी आ कुशुल डा रड फाइक्ने चाप्बा डा? मार, जोइमी आ चां डा थोप्ला फाइक्ने चाप्बा डा? गे मरिम्शो पचा बानी दुम्तीके रिम्शो पने मचाप्नेवे।

24 गो इ कली गोरशो रागी रे जाक्शो फशेम योल्शो भूस खोदेंशो पा फ्राइनन।

25 इ कली वोइश्शो आं गेशो भाग मेकोन बाक्ब” देंशो बाक्ब। परमप्रभु यावेम “गेमी आं कली प्रेंशो बाक्नेवे। मिनु जोल आन कली थमा सुइश्शो बाक्नेवे।

26 गो आंमा इ गुने इ शोत्र सम्मन क्युकनुड। मिनु मोपा इ मुने नेल्ल तांइसीब।

27 गो पहाडीम नु रू मेर इ पशो ग्रांग्रा दिशो गेय ताता। इ मुरपुकी नु इप्शो, इ रेयके पशो नु इ मुने मपथु, तेल्लेम दुम्शो तशो बाक्नुड। आबी आबी, यरूसलेम गे ग्रांग्रा दिशो दुम्नेवे। गेना सम्म मोदेंशो बाक्नेवे?” देंत।

14

रागी नेल्ल सोव्रशो

1 परमप्रभु यावेमी रेउ मयिचा आ पबर्म येरमीया कली मार, लोव्र पाप्तु देंशा हना,

2 “यहूदा रोंका पाइब। मेको आ सहर डा ठेयब लाप्चोपुकी सक्ति मपाइशो दुम्शो बाक्नीम। मेकोपुकी रू आ पर्बम सुर्ता पाइनीम। मिनु यरूसलेम आ वाइ ब्रेशो सरीड सम्म जाक्दीशो बाक्ब।

3 मेकेर डा ठेयब मुरपुकीम आन वाइल आन कली ब्वाक्कु ब्रथ सोइक्नीम। मिनु मेकोपुकी कुवाम लमानु ब्वाक्कु मथित्नीम। मिनु मेकोपुकी श्येत्य ग्योंब कुरशा लेशशा जाक्नीम। मिनु मेकोपुकी मुने दोक्शा मारेइ पने मचाप्ब दुम्शा, आमाइ, दे हिंशा आन पिया सुम्सीनीम।

4 रागीम रेउ मयित्तीके रागी नेल्ल सोव्रशा जेशो बाक्ब। रू डा गेय पाइबपुकी मारेइ पने मचाप्ब दुम्शा, आमाइ, दे आन कुल सुम्सीनीम। योएल १:११

5 घांस मबाक्तीके ब्वाकी डा किशेमी यो आ नक जरमेशो पाठा प्रोंइशा गाक्ब।

6 ब्वाकी डा गधापुकी गोरशो डांडाम राप्शा सिवार खोदेशो पा ग्रीनीम। गिगी जोतीक ठाउं मबाक्तीके मेको आन मिक्ची ब्रा ब्रा दुम्नीम।

7 मिनु आंइ मरिम्शो पशोम आंइ पर्बम सांकछी गेम्तेक्म हना, परमप्रभु यावे, गे इन नें आ पर्बम शिशी पने। मारदे हना गो इन कली प्रोंइशा, थम मरिम्शो दुम्तक। गोपुकीम इन पर्बम पाप पशो बाक्तक। दानीएल ९:४-९

8 ए इस्राएल आ आस पतीके, श्येत जवानु मेको कली प्रोंइब, गे एको रागीम मारदे अर्को रागी डा मुर खोदेशो दुम्नीनी? गे मारदे नाक्दो का ला बाक्ब, लां गाक्ब मुर खोदेशो दुम्नीनी?

9 गे मारदे इन थुं ग्येत्य लुकच दुम्शा बाक्शो मुर खोदेशो दुम्नीनी? मारदे प्रोंइने मचाप्ब सक्ति मबाक्शो लडाइ पाइब खोदेशो दुम्नीनी? परमप्रभु यावे, गे आंइ दातेम बाक्शो बाक्नीनी। गो इन नेंमी ब्रेत्या पुंइसीशो बाक्नीकी। आंइ कली मप्रोनीन” देंनीम। येरमीया १५:१६; यसैया ४३:७

10 परमप्रभु यावेमी मेको मुर आन पर्बम “मेकोपुकी थमा पा

हिरना हिरन बाक्नीम। हेंथे गाक्चा दाक्नीमी। थमा पा ठीक लां मगाक्नीम। मोपतीके परमप्रभु यावेम मेको आन कली मब्राइब। मुल मेकोमी आन मरिम्शो पशो आ पर्वम मिम्ब। मिनु मेको आन कली आन पाप आ पर्वम सजाइ गोब” देंत।

11 मिनु परमप्रभु यावेम आं कली “एको जात डा मुर आन कली रिम्शो दुम्पाइक्चा कली मपुनो। येरमीया ११:१४; येरमीया ७:१६

12 मेकोपुकी माइजा बाक्तेक्म हना यो, गो मेको आन पुंइशो मनेनुड। मेकोपुकीमी चोशा चढेतीके, अन्न चढेतीके चढेम्तेक्म हना यो, गो मेको आन कली मब्राइनुडमी। मेको आ पा डा गो मेको आन कली, तरवार, अन्काल नु बेक्तीक रोइम साइक्नुडमी” दे माइक्ती। यसैया ५८:३; येरमीया ६:२०

परमप्रभु आ लोव्र जोल पाइबपुकी

13 मिनु गो “परमप्रभु यावे, कोव्रडीन। इन लोव्र पाइबपुकीम दा मेको आन कली ‘गे तरवारम साइक्चा मपुंडसीनीनी। अन्काल मपाइनीनी। मिनु शुश नाक्ती सम्म एको रागीम थुं नाइश्शा बाक्चा ताइनीनी’ देंशो बाक्नीम” देंती।

14 मिनु परमप्रभु यावेम आं कली “आं लोव्र पाइबपुकीम दा आं नेम जोल पा लोव्र पशो बाक्नीम। गो मेको आन कली मसोइक्तुमी। गो मेको आन कली लोव्र मपड। मेकोपुकीमी इन कली जोल पा, लिंक्चु कोव्रशा, फश लोव्र पाइनीम। आन थुं डा जोल लोव्र पाइनीम। येरमीया २३:२१-२२; येरमीया २७:९, १४, १५; येरमीया २९:८-९; इजीकीएल १३:६

15 मोपतीके परमप्रभु यावेम मेको आ लोव्र पाइब आन पर्वम, सुम आ नेम लोव्र पाइनीमी, मेको आन कली सोइश्शो मनड। मो हना यो मेकोपुकीम ‘तरवार नु अन्कालम एको रागी कली मताइब’ देंशो बाक्नीम। मुल तरवार नु अन्कालमीन जोल पा आं लोव्र पाइबपुकी साइक्चा पुंइसीनीम। ब्यवस्था १८:२०

16 मिनु जोल पा आं लोव्र नेंपाइक्चा पुंडसीबपुकी चहिं तरवार नु अन्कालम पतीके यरूसलेम डा लां मेर ताइक्चा पुंडसीनीम। मेको, मेको आन मीश नु मेको आन तमी तौ आन कली थिम्ब सुइ मबाक्नीम। मारदे हना गो मेको आन तचा डा श्येत मेको आन तारी मोइक्नुड” दे माइक्ती। येरमीया ९:२१

17 गे मेको आन कली “आं मिक्च रे नाक्दो नाक्ती प्रेक्कु यिशा बाक्ल। मारदे हना आं मुर, ग्युंभे मपशो तमी थाम्पा श्येत जशो बाक्ब। ठेयब गार दुम्चा डा पा मेको तुप्चा पुंडसीशो बाक्ब। येरमीया १३:१७

18 गो मेको रागी लती हना, तरवारम साइक्चा पुंडसीशोपुकी ताइक्नुडमी। गो मेकेर डा सहरम ओव्रती हना, मेकेर अन्काल पशो मुरपुकी ताइक्नुडमी। परमप्रभु यावे आ लोव्र पाइबपुकी नु चढेब नेल्ल मारेइ मतुइक्थु, आन गेय पना पन बाक्नीम” दे माइक्ती।

19 मिनु गो “मार, गे यहूदा कली थमा पा प्रॉइने थुम्शो बाक्नीनी? मार, गे सियोन कली ग्रॉग्रा दिशो बाक्नीनी? गे आंइ कली मारदे मसापाइक्चा डा पा तुप्नी? गोपुकी थुं नाइशशा बाक्तीक आस पाइतक, तन्न मारेइ रिम्शो मदुम। सानीकी कों दे आंस पाइतक, तन्न हिंतीक कका जाक्त। येरमीया ८:१५

20 परमप्रभु यावे, गोपुकीम इन अरेशो लोव्र मटिशो नु आंइ किकी पिपी आन मरिम्शो पशो शोव्रनीकी। गोपुकीम थमा पा इन डोंइती पाप पशो बाक्नीकी। येरमीया ३:२५; भजन संग्रह ५१:५-७; भजन संग्रह १०६:६

21 इन नें आ पर्बम आंइ कली शोर गाक्शो ममिम्तीन। गो इन सक्ति पाइशो नित्तीक कली आइक्च मसेल्पाइक्नीकी। इन पशो कबल मिम्तीन। गे मेको मक्याम्दीन।

22 रागी रागी डा मुर आन देवी देवता आन दाते डा तेकोइमी रेउ यिपाइक्ने चाप्नीमी डा? मार, सरीड आमा रेउ यिपाइक्ने चाप्बा डा? मेको पाइब गे परमप्रभु यावे, आंइ परमप्रभु मननी डा? मोपतीके गो इन कली आस पाइनीकी। मारदे हना गे ला एको नेल्ल

पने चाप्नीनी” देंती।

15

परमप्रभुम लोव्र लेशशो

1 मिनु परमप्रभु यावेमी आं कली “मोसा नु सामुएलमी आं डोंइती जाक्शा पुंइताक्स हना यो, आं थुं एको जात डा मुर आन गे मलेप्ब। मेको आन कली आं डोंइती रे गुंइदीमी। मेको आन कली लचा गेमी। प्रस्थान ३२:११; १सामुएल ७:९; इजीकीएल १४:१४

2 मिनु मेकोपुकीमी ‘गो ते लाइनीकी?’ दे इ कली हिल्लो पाम्तेक्म हना, गे मेको आन कली परमप्रभु यावेमी ‘बेक्तीक रोइ पा बेक्चा ब्रेक्सीशो बाक्तीनी हना, बेक्तीक गेन लने। तरवारम साइक्चा पुंइसीचा ब्रेक्सीशो बाक्तीनी हना, तरवार गेन लने। शोव्रलुम बेक्चा ब्रेक्सीशो बाक्तीनी हना, शोव्रलुमीन बेक्कीन। ग्याइशशा लाइक्चा पुंइसीचा ब्रेक्सीशो बाक्तीनी हना, ग्याइशशा लाइक्चा पुंइसीन’ देनो। येरमीया ४३:११; जकरिया ११:९

3 गो मेको आन कली ४ ओटा साइक्तीक श्येत सोइक्नुडमी। गो साइक्चा कली तरवार, कीशा लाइक्चा कली कुचुम, दाक्पाइक्चा कली नु खतम सेल्चा कली सरीड डा चिक्ब नु रागी डा जन्तु सोइक्नुडमी। इजीकीएल १४:२१; येरमीया ७:३३

4 यहूदा डा पिप हिज्कीयाह आ तौ मनस्सेम यरूसलेममी मार पशो बाक्मे, मेको आ पर्वम गो मेको कली खतम पोक्नुड। मिनु मेको तशा रागी डा राज्य नेल्लेम ‘आबी, आबी’ दे हिंनीम। २राजा २१:११-१६; २राजा २३:२६

5 गे यरूसलेम, सुमी इ कली शिशी पाइबा? इ पर्वम सुम रोंका पाइबा? गे दोदेशो बाक्नी? दे हिल्लो पचा कली सु दिक्बा?

6 गे आं कली प्रॉइशो बाक्नेवे। गे नोले शॉइसीन सीन बाक्नेवे। मोपतीके गो आं गुइ क्युक्शा इ कली साइक्नुड। मुल गो आं गाइशशो मतेक्नुड।

7 गो मेको आन कली राज्य डा सहर डा ठेयब लाप्चोमी ग्योलोम हारशो खोदेशो हारताकड। गो आं मुर आन कली शुश श्येत गेशा खतम सेल्ला। मारदे हना मेको आन मरिम्शो पतीक रे मलेम्म। मत्ती ३:१२

8 मेको आन वोंइश बेक्शो मीश मुरपुकी समुन्द्र डा बाल्वा क्येडा शुश दुम्तेकम। नाक्ती उइक्थ दुम्मेनु, तौ नु आन ममा आन पर्बम साइकब का चाक्नुड। गो कालेम मेको आन तार सुर्ता पतीक नु ग्रीचोक पा हिंतीके चाक्नुड।

9 मिनु ७ जना बेक्शो तौ आन ममा थत। नाक्ती बाक्ना बाक्न मेको आ नां लाक्तु। मिनु मेको मुने दोक्शा शुक्शी पाइक्चा पुंइसाक्व। मेको क्येडा यो ब्रोंइशो आन कली आन जोरी सत्रुम तरवारम क्योरपाइश्शा, साइक्पाइक्नुडमी” दे परमप्रभु यावेम देंत। आमोस ८:९

10 आं ममा, मारदे आं कली जरमेनी। गो आं कली रागी नेल्लेम सुइ सुइम जिचा पोक्शा, गो नु सुइ मदुइनीम। गो मेको आन कली ना जेर गेशो बाक्नुडा, ना मेको आन रे जेर जशो बाक्नुडा। मो हना यो मुर नेल्लेम आं कली सराप पाइनीम। येरमीया २०:१४

11 परमप्रभु यावेम आं कली “थमा पा, गो इ कली रिम्शो पा, प्रोंइनन। गो थमा पा श्येत नु मरिम्शो दुम्मेनु इ जोरी सत्रु आन कली, इ गेय पपाइक्नुडमी।

12 मार, मुरुमी उत्तर डा फलाम नु कांसा जिकने चाप्बा डा?

13 इन पापम पतीके इन रागी नेल्लेम इन शोंप नु इन मारेइ मारेइ गो मोशान रोइश्शो मार मार खोदेशो पा योक्शा गेनुडमी। येरमीया १७:३

14 गो इन कली आंम इन मतुइश्शो रागीम इन जोरी सत्रु आन वाइल सेल्लुड। मारदे हना आं गाइश्शोम मी का जेप्ब। मेको गेना हना यो ब्रशा बाक्ब” दे परमप्रभु यावेमी देंत।

15 मिनु गो “परमप्रभु यावे, गे नेल्ल तुइश्शो बाक्नीनी। आं कली मिम्तीन। मिनु आं कली कोव्रडीन। आं कली श्येत गेब आन कली

क्येकक लेत्तीन। गे मेको आन पबर्म शुश फाल्शा बाकनीनी। आं कली मसाइय्यीनी। गो इन पबर्म शुक्शी पाइक्चा पुंडसाक्यी, गे मेको तुइक्नीनी।

16 इन लोव्र बाक्त हना, गो नोफा दाइश्शा नेंता। मेको आं कली ग्येरतीक नु आं थुं कली नाइक्पाइक्ब दुम्त। मारदे हना परमप्रभु यावे, मुर नेल्ल आन परमप्रभु, गो इन के नड। ब्यवस्था ८:३; ब्यवस्था ३२:४६-४७; इजीकीएल ३:१-३; प्रकाश १०:८-९

17 गो दला दाक्स पा बाक्ब आन हुलम गेनायो मलड। गो मेकोपुकी नु मग्येरसीड। गो आं कान बाक्ती। मारदे हना इन गुइ आं तार बाक्त। मिनु गे आं कली गाइक्तीकेम प्रिंशो बाक्तीनी।

18 आं श्येत जतीक मारदे मनुम्मे? मिनु आं गार मारदे मसाब दुम्मे? गे आं कली मरिम्शो नु ब्वाक्कु मबाक्शो खोला खोदेशो दुम्तीनी” देंती।

19 मोपतीके परमप्रभु यावेम “गे थमा पा लेत्ते हना, गो इ कली लेंशा ब्राइनुड। गे आं डोंइती रपो। रिम्शो लोव्र ला पाप्तीवी हना नु फश लोव्र मपाप्तीवी हना, गे आं लोव्र पाइब दुम्नेवे। मिनु एको मुरपुकी इ गे लेत्तीम। तन्न गे मेको आन गे मलेतो।

20 गो इ कली, एको मुर आन डोंइती कांसा के बोल्यो गारो सेलनन। मेकोपुकीमी इ कली लडाइ तोइनीम। तन्न इ क्येडा मग्रानीम। मारदे हना गो इ कली प्रोंइचा कली नु वारच पाइक्चा कली गे नु बाक्नुड। येरमीया १:१८-१९

21 गो इ कली आं अरेशो मटीब आन गुइ रे प्रोंइनन। मिनु शिशी मपाइक्ब आन गुइ रे यो प्रोंइनन” दे परमप्रभु यावेमी देंत।

16

परमप्रभुम निसाफ पशो

1 मिनु परमप्रभु यावेमी आं कली मार देंत देशा हना

2 “गेमी एको रागीम ग्युंवे पचा नु तमी तौ थिचा मदुम्नेवे” देंत।

3 मारदे हना एको रागीम जरमेशो तमी तौपुकी नु आन आंम आफ आन पर्बम परमप्रभु यावेम

4 “मेकोपुकी मसाब रोइम बेक्नीम। मेको आन पर्बम सुइम रोंका मपाइनीम। मेको आन कली सुइम मथिम्नीम। मेकोपुकी खपीम मोव्रल खोदेशो पा बाक्नीम। मेको तरवार नु अन्कालम बेक्नीम। आन बेक्शो रां सरीड डा चिक्ब नु रागी डा जन्तु आन ब्वतीक थोव्रक दुम्नीम” देंत। येरमीया ९:२१

5 मारदे हना परमप्रभु यावेम “गे मुर बेक्शो खिंमी रोंका पथ नु रोंका पाइब आन कली लेम्थ मलावो। मारदे हना गो मेको जात डा मुर रे थुं नाइक्तीक, गेना हना यो दाक्तीके नु शिशी पतीके लाइक्ने थुम्ता।

6 एको रागीम आइक्च नु ठेयब नेल्ल बेक्नीम। मेको आन कली सुइम मथिम्नीम। मेको आन पर्बम सुइम रोंका मपाइनीम। आंम रां रिक्सीब नु चां प्रेक्ब सुइ मबाक्नीम। येरमीया ४१:५; येरमीया ४७:५; येरमीया ४८:३७८; लेवी १९:२७-२८; ब्यवस्था १४:१

7 मिनु बेक्ब आन पर्बम रोंका पाइब नु आम आफ आस कली लेम्चा कली सुइम तूचा थोव्रक मगेनीम।

8 गे भोज पशो खिंम मओव्रडो। मिनु मेकोपुकी नु जचा तूचा कली मनिस्सो।

9 मारदे हना मुर नेल्ल आन परमप्रभु यावे, इस्त्राएली आन परमप्रभुमी ‘गो एको रागी रे इन पालाम, इन डोंइती रे थुं नाइश्शा बाक्तीक, ग्येरशो सेंदा नु ग्युम्ली ग्युम्ले आस सेंदा क्याम्नुड’। येरमीया ७:३४

10 मिनु गे एको मुर आन कली एको लोव्र नेल्ल देनेनु, मेकोपुकीमी इ कली ‘मारदे परमप्रभु यावेम आंइ कली ओदेशो ठेयब मरिम्शो दुम्तीक देंमे? आंइ मरिम्शो पशो मार बाक्बा? गो परमप्रभु यावे, आंइ परमप्रभु कली मार पाप पका डा?’ देंनीम। येरमीया ५:१९

11 मिनु गे मेको आन कली ‘इन किकी पिपीमी आं कली प्रोंइशा,

देवी देवता आन नोले खोइशशा, मेको आन कली पूजा पा ठेयब सेल्लेक्म। मोपा आं कली प्रोंइशा आं अरेशो मपामे।

12 गेपुकीमी इन किकी पिपी आन क्येडा शुश मरिम्शो पाइतीनी। नेनीन, गे एकेर बाक्ब नेल्लेमी इन खकटा थुंमी इन दला दाक्स पाइनीनी। मिनु गे आं लोत्र नेंचा मदाक्नीनी। येरमीया ७:२६

13 मोपतीके गो इन कली इन मतुइशशो रागी नु इन किकी पिपी आन मतुइशशो रागीम ताइक्नन्नी। मिनु गेपुकीम मेकेर नाक्दो नाक्ती देवी देवता आन कली पूजा पाइनीनी। मारदे हना गो इन कली शिशी मपाइनुड' देनो" दे परमप्रभुमी आं कली देंत। ब्यवस्था २८:६४

14 मिनु परमप्रभु यावेमी "परमप्रभु यावे ब्रोंइशा बाक्शो नु मुर आन कली इजीप्त रागी रे गुंइशा एक चाक्शो खोदेंशो पा मदेंतीक नाक्ती थमा पा जाक्नीम।

15 तन्न मार देंनीम देंशा हना, मेकोपुकीमी 'परमप्रभु यावे ब्रोंइशा बाक्शो नु इस्राएली आन कली उत्तर डा रागी नु तेको तेको रागी रे चाक्शो खोदेंशो पा' देंनीम। मारदे हना गो मेको आन कली आन किकी पिपी आन कली गेशो रागीम चाक्नुडमी। येरमीया २३:७-८

16 मुल गो शुश ग्याइल आप्ब आन कली ब्रेशशा सोइक्नुडमी। मिनु मेकोपुकीमी मेको आन कली ग्याइक्नीम। नोले गो लेंशा शुश सिखारी आन कली ब्रेशशा सोइक्नुडमी। मिनु मेकोपुकीमी, मेको आन कली तेकोइ डांडा नु तेकोइ पहाड नु सेरथे फुल्लु डा काक्पे रे माल्शा गुंइनीम।

17 मारदे हना गो मेको आन लां नेल्ल तुइक्नुड। मेको आं डोंइती मखुइशशो बाक्नीम। मेको आन मरिम्शो पशो यो आं डोंइती मखुइशशो बाक्ब। अय्युब ३४:२१

18 गो मेको आन मरिम्शो पशो नु आन पाप आ पबर्म मेको आन कली निक्शी खेयप सजाइ गेनुडमी। मारदे हना मेकोपुकीमी सोक्ती मपाइशशो मूर्तिपुकीम आं रागी ग्रांग्रा दिशो सेल्लेक्म। मिनु आं थेरशो रू आन ग्रांग्रा दिशो देवी देवताम प्रिताक्म" देंत। यसैया ४०:२

19 मिनु मेकोपुकीमी “परमप्रभु यावे, गे आं सक्ति नु आं खुइशशा, ब्रोंइशा बाक्तीक बाक्नीनी। गे श्येत जची ना आं खुइक्तीके बाक्नीनी। रागी रागी डा मुर रागी डा सुर रे इन डोंइती जाक्नीम। मिनु मेकोपुकीमी ‘आंइ किकी पिपी आन देवी देवता जोल ला बाक्तेक्म। मेको शोर गाक्शो बाक्तेक्म। भजन संग्रह ३६:७

20 मार, बेक्शा लाइब मुरपुकीम आंम देवी देवता सेल्ने चाप्नीमी डा? तन्न मेकोपुकी देवी देवता मनम’ देंनीम।

21 मोपतीके गो मेको आन कली थमा पा रुप्पाइक्नुडमी। गो मेको आन कली आं सक्ति नु आं ठेयब दुम्तीके आ पबर्म शेनुडमी। मिनु मेकोपुकीमी आं नें यावे बाक्ब, दे तुइक्नीम” दे परमप्रभु यावेमी देंत। प्रस्थान ३:१२

17

पाप रे प्रोंइतीके नु निसाफ

1 परमप्रभु यावेमी “यहूदा आ पाप फलाम के मुतीकेम मुशा ब्रेक्शो बाक्ब। मेको हीरा पाइशो मुतीकेमी आन थुं नु आन चढ़ेतीक डा थोत्रपुकीम मुशा ब्रेक्शो बाक्ब। २राजा २३:४-१८

2 मेको आन आलपुकीमी यो आन चढ़ेतीक नु आन मूर्ति पाइशो थाम आन कली मिम्नीम। मेको नेल्ल गिगी रवा आन पुंम नु लाइशो पहाड तार बाक्तेक्म।

3 मेको डांडा तार नु रूम बाक्तेक्म। मिनु इन रागी डा शोंप नु इन रिम्शो मारेइ मारेइ थोत्रक नेल्ल इन पाप पतीकेम रोइक्पाइक्नुड। येरमीया १५:१३

4 इन पाप पतीकेम गो इन कली गेशो, इन थेरशो रू साम्नीनी। मिनु गो इन कली इन मतुइशो रागीम इन जोरी सत्रु आन वाइल दुम्पाइक्नन्नी। मारदे हना आं गाइक्तीके मी ब्रशो खोदेशो बाक्ब। मिनु मेको गेना हना यो ब्रस डा ब्रस बाक्ब” देंत।

5 परमप्रभु यावेम मार देंत देशा हना “सु सुमी मुर आन कली थमा सुइक्बनीमी, मेको सराप राइनीम। आन रां डा सक्तिम थमा सुइक्ब यो सराप राइनीम। मारदे हना मेको आन थुं परमप्रभु यावे रे डोन लशो बाक्ब। भजन संग्रह ११८:८; भजन संग्रह १४६:३; २इतिहास ३२:८

6 मेको गोरशो रागी डा पोथ्रा रवा खोदेशो बाक्नीम। मेकोमी रिम्शो दुम्मेनु यो, मारेइ मताइनीम। मेको मुर मबाक्तीक रागी डा नेल्ल क्येडा सोव्रशो खपीम नु हिक्सी बाक्शो रागीम बाक्नीम। येरमीया ४८:६

7 परमप्रभु यावे कली थमा सुइक्ब मुर आसीक रशो बाक्नीम। मेकोपुकीम परमप्रभु यावे कली आस पशो बाक्नीम। बजन संग्रह १४६:५

8 मेको ब्वाक्कु आ नेक्था खुम्शो रवा खोदेशो बाक्नीम। मेकोमी आन शाक्श खोला आ सुर सम्म चाक्दीत्नीम। मेको हुप्तानु, महिनीम। मेको आन सफापुकी गेना हना यो गिगी बाक्नीम। नां पवानु मेको मारेइ सुर्ता मपाइनीम। मेको गेना हना यो फल सिप्ब बाक्नीम” देंत। भजन संग्रह १:३

9 मुर आन थुं नेल्ल क्येडा जोल पाइब बाक्ब। गेना हना यो दूली पाइब बाक्ब। मेको कली सुम रुप्ने चाप्बा डा? १सामुएल १६:७; बजन संग्रह ७:१०; हितोपदेस १५:११; रोमी २:६

10 गो, परमप्रभु यावेमी मुर आन कली नाक्नुड। आन थुंम मार बाक्मे, मेको कोव्रनुड। आन गाक्शो लां नु आन पशो कोव्रशा, इनाम गेनुडमी।

11 मुर, आंम आ मपशो ब्बोफु पुप्ब क्येन्ने खोदेशो बाक्ब। मेकोमी हेंथे पा शोंप चेम्ब। मेको आ ब्रोंइतीक नाक्ती उइक्थ दुम्मेनु, मेको आ शोंपोम मेको मुर कली प्रोंइब। मिनु आ बेक्ची ना मेको कली मूर्ख मिम्सीब। लूका १२:२०

12 डोंइती रे मान तशा बाक्शो इन सक्ति पाइश्शो नित्तीके आंइ ब्रोंइशा बाक्तीक बाक्ब। येरमीया ३:१७

13 गे इस्राएली आन आस पशो परमप्रभु यावे, इन कली प्रोंइब नेल्ल मुने दोक्नीम। इन कली प्रोंइशा गाक्ब मुर नेल्ल फुरकुम नें ब्रेक्शो खोदेंशो ला बाक्नीम। मारदे हना मेकोपुकीमी गेना हना यो ब्रोंइचा गेब ब्वाक्कु, परमप्रभु यावे कली प्रोंइशो बाक्नीम। येरमीया २:१३

येरमीया आ पुंइशो

14 मिनु गो “परमप्रभु यावे आं कली सापाइय्यीनी। मिनु गो सानुड। आं कली प्रोंइयीनी। मिनु गो ब्रोंइनुड। मारदे हना गे आं सक्ति बाक्नीनी। प्रस्थान १५:२६; बजन संग्रह ६:३

15 मेकोपुकीमी आं कली ‘परमप्रभु यावे आ लोव्र ते बाक्म? मुल मेको नेल्ल गाप्ल’ देंतेक्म। बजन संग्रह ५:१९

16 तन्न गो इन गोठला दुम्तीक रे मप्रोक्ड। गे तुइक्नीनी। गो नोले डा नाक्ती सुर्ता पचा ममाल्नुड, दे मिम्शो बाक्नुड। गो मार देंडा, मेको इन डोंइती बाक्ब।

17 गे आं कली हिंपाइक्ब मदुमीन। गो खतम दुम्चा डा नाक्ती गेन आं खुंइसीतीके बाक्नीनी।

18 आं कली खेदा पाइब आन कली मुने तोक्कीन। तन्न आं कली चहिं मुने मतोक्यीनी। मेकोपुकी हिंमल। तन्न आं कली चहिं हिंतीक रे प्रोंइयीनी। मेको आन ठेयब श्येत डा नाक्त चाक्कीन। मेको आन कली निक्शी खेयप डा श्येतम सतीन” देंती। बजन संग्रह ३५:४

नाइक्तीक नाक्त आ पर्बम लोव्र

19 परमप्रभु यावेम आं कली “गे मुर आन ओव्रतीक ठेयब लाप्यो आ नेक्था रपो। मेको लाप्यो रे यहूदा डा पिप लाडगा खिंडगा पाइब। यरूसलेम डा गारो डा लाप्यो नेल्ल आन डोंइती लशा रपो। नेहेम्याह १३:१५-२२

20 मिनु मेको आन कली ‘एको ठेयब लाप्यो रे पा आगा ओव्रब यहूदा डा पिप, मेकेर डा मुर नेल्ल नु यरूसलेममी बाक्ब मुर नेल्ल परमप्रभु यावे आ लोव्र नेनीन’ देनो” देंत।

21 परमप्रभु यावेमी “गेपुकी होस पा बाक्कीन। मिनु गे नाइक्तीक नाक्त ठेयब लापचो आगाम मारेइ भारी मकुरीन। यरूसलेम डा गारो डा ठेयब लापचो रे पा आगा मारेइ मओंइदीन। प्रस्थान २०:८-१०

22 ‘गेपुकी नाइक्तीक नाक्ती इन खिं रे भारी मकुरीन। मेको नाक्ती मारेइ गेय मपने। गो इन किकी पिपी आन कली शेंशो खोदेंशो पा नाइक्तीक नाक्त कली अरु नाक्ती खोदेंशो मपने। मारदे हना मेको आं नाक्त बाक्ब’ देंती। यसैया ५६:२

23 तन्न मेकोपुकीमी मनेनेम। आन नोफा मदाइक्तेम। मिनु मेको आन थुं खकटा दुम्तीके मटीमे नु शेंशो नेंने मबिस्सम। येरमीया ११:८

24 तन्न गेपुकीम आं लोव्र नेंतीनी हना, नाइक्तीक नाक्ती सहर नु ठेयब लापचो रे मारेइ भारी आगा मओंइताक्नी हना नु नाइक्तीक नाक्त आं नाक्त मिम्शा, मारेइ गेय मपाइतीनी हना,

25 दाऊद आ नित्तीकेम निपब पिप, आन गेय पाइब मुरपुकी एको सहर डा ठेयब लापचो रे शाराम कीशो बग्गीम डोइशशा ओव्रनीम। यहूदा डा मुर नु यरूसलेममी बाक्ब जाक्नीम। मिनु एको सहरमी गेना हना यो मुर शुश बाक्नीम। येरमीया २२:४

26 मिनु यहूदा डा सहर रे नु यरूसलेम आ एर ओंथ डा गाउं रे, बेन्यामीन आ रागी रे, शेफेलाह डा दिंम रे, पहाड रे नु नेगेब रे चोशा चढेतीके, क्योरशा चढेतीके, अन्न चढेतीके, धूप चढेतीक नु ‘गे रिम्शो पाइब बाक्नीनी’ दे चढेतीके चाक्शा, परमप्रभु यावे आ खिंम जाक्नीम।

27 तन्न गेपुकीम आं लोव्र मनेतीनी हना, नाइक्तीक नाक्ती आं नाक्त बाक्ब, दे ममिम्ताक्नी हना नु नाइक्तीक नाक्त भारी कुरशा यरूसलेम डा ठेयब लापचो आगा ओव्रतीनी हना, आं देंशो मबिस्साक्नी हना, गो यरूसलेम डा ठेयब लापचोमी गेनायो मकापब मी जेतनुड। मिनु मेकोमी यरूसलेम डा दरवार दाक्ब” दे परमप्रभु यावेमी देंत। इजीकीएल २०:१२-१३

खप के ग्योंब सेल्ब

- 1 परमप्रभु यावेमी आं कली मार लोत्र पाप्तु देंशा हना
- 2 मेकोमी “उइ खप के ग्योंब सेल्ब आ खिं लावो। मिनु गो इ कली आं लोत्र नेंपाइक्नुड” देंत।
- 3 मोपतीके गो उइ खप के ग्योंब सेल्ब आ खिं लती। मिनु मेकेर मेकोमी आ गुगील हिरशा गेय पाप्तु।
- 4 मिनु मेको आ सेल्शो खप के ग्योंब आ गुइम वारसाक्व। मिनु मेकोमी मेको खप के आ दाक्शो अर्को ग्योंब का सेल्लु।
- 5 मिनु परमप्रभु यावेमी आं कली
- 6 “इस्त्राएल आ खिं डा मुर, एको खप के ग्योंब सेल्बमी खोदेंशो पा गो इन कली पाइक्ने मचाप्नुडा डा? इस्त्राएल आ खिं डा मुर, मेको खप के ग्योंब सेल्ब आ गुइम खप बाक्शो खोदेंशो पा, गे यो आं गुइम खप खोदेंशो बाक्नीनी। यसैया ४५:९; रोमी ९:२१
- 7 गो याम कामीन तेकोइ रागी, तेकोइ राज्य आन कली तुल्शा ताइश्शा, जिक्शा खतम सेल्लुड। गो मेको पने चाप्नुड। येरमीया १:१०
- 8 तन्न मेको आ देंशो रागी डा मुर आन मरिम्शो पतीक रे आं गे लेत्तेक्म हना, गो आं मिम्शो मेको आन कली ठेयब श्येत गेतीक रे फाइक्नुड। श्येत मगेनुडमी। येरमीया २६:३; इजीकीएल ३३:११; जोना ३:१०
- 9 मिनु अर्को याम काम गो तेकोइ रागी, तेकोइ राज्य आन कली सेल्शा वोइक्ने चाप्नुड।
- 10 तन्न मेकोपुकीम आं लोत्र मनेथु, आं डोंइती मरिम्शो पाप्तेक्म हना, गो मेको आन कली रिम्शो मसेल्लुडमी।
- 11 मोपतीके गे यहूदा डा मुर आन कली नु यरूसलेममी बाक्ब मुर आन कली परमप्रभु यावेम इन कली मार देंत देंशा हना ‘नेनीन, गो इन कली मरिम्शो पाइनुड। गो इन कली श्येत गेनुड। मोपतीके गे इन मरिम्शो लां रे लेतीन। मिनु इन लां नु इन पतीके रिम्शो सेलीन’

देंनो। येरमीया ७:३

12 तन्न मेकोपुकीमी ‘मो पचा मोशा बाक्ब। गो आंइ मिम्शो पाइनीकी। गो आंइ थुं खकटा सेल्नीकी, दे लोव्र लेत्ताक्म’ देंनीम” देंत। येरमीया ६:६; येरमीया ११:८

13 मोपतीके परमप्रभु यावेम “रागी रागी डा मुर आन दातेम लशा हिल्लो पावो। ओदेंशो लोव्र सुम नेंशो बाक्नीमी? ग्युंवे मपशो मीश आल इस्राएलम थम ग्रांग्रा दिशो गेय पशो बाक्ब।

14 मार, लेबानोन डा फुं सिरीयोन रोंगु आ काक्पे रे जाम्बा?। मार, आ बुक्तीके पहाड रे गूशा यिशो खोला डा शाइशो ब्वाक्कु सोव्रबा डा?।

15 तन्न आं मुरपुकीम आं कली प्रेंताक्म। मेकोपुकीमी शोर गाक्शो मूर्ति आन कली चोशा चढेम्तेक्म। मेको माइत लांम दाइल पपांइसाक्म। मिनु मेकोपुकी मेको माइत ठेयब लां प्रोंइशा, आइक्च लां मेर गाक्तेक्म।

16 मेकोपुकीम आन रागी हिंचा डा सेल्लेक्म। मिनु मेको रागी गेना हना यो शुक्शी पतीक दुम्त। मेकेर रे सु सु गाक्मा मेको ग्रीचोक पा हिंनीम। मिनु ‘आबी, आबी’ देंनीम। येरमीया १९:८

17 गो मेको आन कली पूर्व डा फशेम खोदेंशो पा आन जोरी सत्रु आन डोंइती एर ओंथ ब्रपाइक्नुडमी। मेको आन हिंचा डा नाक्ती गो मेको आन कली आं ची कोंइनुडमी। आं कुल मकोंइनुडमी” देंत। येरमीया २:२७

18 मिनु मेकोपुकीम “मुल गोपुकीम येरमीया कली दोस गेय। मारदे हना चढेब आन शेंशो लोव्र मग्याम्ब। जोक्ब तुइक्ब आन अर्ती यो मग्याम्ब। मिनु परमप्रभु यावे आ लोव्र पाइब आन देंशो लोव्र यो मजाम्ब। मोपतीके मुल गो येरमीया कली दोस गेय। मिनु मेको आ देंशो तेकोइ लोव्र मनंय” देंतेक्म।

19 मिनु येरमीयामी “परमप्रभु यावे आं लोव्र नेनीन। आं कली दोस गेबपुकीम मार देंनीमी, मेको नेनीन।

20 मार, रिम्शो आ पा डा मरिम्शो पांइसीबा डा? मो हना यो आं कली खाल्टा दोशो बाक्तेक्म। गो मेको आन पर्बम पुंइना पुंइन बाक्ती, मेको मिम्तीन। मेको आन कली वारच पचा कली नु इन गाइश्शो तेक्चा कली पुंइता।

21 मोपतीके मेको आन आल आन कली अन्काल पपतीन। मेको आन कली तरवारम साइक्पतीन। मेको आन मीश आल मबाक्शो नु आन वोंइश बेक्शो मीश मुर दुम्मल। मेको आन वोंइश मुर बेक्तीक रोइम बेक्मल। मेको आन ठिटा वोंइश मुरपुकी लडाइम तरवारम साइक्चा पुंइसमल।

22 गेमी मेको आन कली आन मतुइक्थु साइक्ब चाक्नीनु, मेको आन खिं रे डाक्शो ब्रेश्शो नेंसेक्ल। मारदे हना मेकोपुकीमी आं कली ग्याइक्चा कली खाल्टा दोशो बाक्तेक्म। मिनु आं खोइल फ्रिम्चा कली खुइश्शा ब्वारद दाइश्शो बाक्तेक्म।

23 मिनु परमप्रभु यावे, आं कली साइक्चा माल्शो नु मरिम्शो पाइब नेल्ल आन कली तुइक्ताक्नी। मेको आन मरिम्शो पशो माफ मगेने। इन डोंइती रे मेको आन पाप मतिलीन। मेको इन डोंइती दाइल पांइसीमल। गे गाइक्तीनीनु, मेको आन कली मार पचा माल्बा, मेको पने” देंत। मत्ती ६:१५

19

ब्रोल्लोशो गर

1 परमप्रभु यावेमी “लशा खप के ग्योंब सेल्ब रे ब्वाक्कु कुर पतीक ग्योंब का ग्यापो। मिनु का निक्शी मुर आन दाते डा खाल्पा नु का निक्शी चढेब आन कली लाइक्मी।

2 मिनु गे हिन्नोम आ तौ आ बेसीम बाक्शो गम्टे लाप्चोम लावो। गो इ कली मार शेंदु, मेको लोत्र मेकेर ठेयब सेंदा पा नेंपाइक्मी। येरमीया ७:३१

3 यहूदा डा पिप नु यरूसलेमम बाक्ब मुरपुकी परमप्रभु यावे आ लोत्र नेनीन। मुर नेल्ल आन परमप्रभु यावे, इस्राएली आन परमप्रभुमी

‘आं लोव्र नेनीन। गो एको रागीम थम मरिम्शो दुम्पाइक्नुड’ मेको आ पर्वम लोव्र नेंब नेल्ल आन नोफा दाइक्नीम। २राजा २१:१२

4 मेको मुरपुकीमी आं कली प्रोंइतीमी। मिनु एकेर अर्को रागी डा देवी देवता आन कली चढ़ेशा, एको रागी ग्रांग्रा दिशो सेल्लेक्म। मेको देवी देवता आन किकी पिपी नु यहूदा डा पिपम यो मतुइश्शो बाक्तेक्म। मिनु मेकोपुकीम रागी कली दोस मताइब आन हुशेम प्रिंताक्म।

5 मेकोपुकीमी आंम आल आन कली बाल देवता कली मीम चोशा चढ़ेचा कली डांडाम थान सेल्ला सेल्ल बाक्तेक्म। मेको मो पन, दे गो मअरेडमी। गो मेको मशेंदुमी। मोदेशो गेनायो ममिम्तु। येरमीया ७:३१-३३; लेवी १८:२१

6 मोपतीके होस पा बाक्कीन। मेको बेंसी कली तोफेथ नु हिन्नोम आ तौ आ बेंसी, दे वोइश्शो नें प्रोंइनीम। मेको शुश नाक्त रिम्चा ममाल्नीनी। तन्न मेको कली मुर साइक्तीक बेंसी, दे नें वोइक्नीम। येरमीया ७:३२

7 गो एको रागीमी यहूदा नु यरूसलेम आस मिम्शो मदुम्पाइक्नुड। गो मेको आन कली आन जोरी सत्रु आन डोंइती तरवारम साइक्पाइक्नुडमी। सु सुम मेको आन कली साइक्चा दाक्नीमी, मेको आन गुइम गेनुडमी। आन बेक्शो रां चहिं सरीड डा चिक्ब नु रागीम बाक्ब ब्वाकी डा जन्तु आन कली ब्वचा गेनुडमी।

8 मिनु गो मेको सहर कली हिंचा डा सेल्लुड। मिनु मेको सहर गेना हना यो शुक्शी पतीक दुम्ब। मेकेर रे सु सु गाक्मा, मेको ग्रीचोक पा हिंनीम। मिनु आ खतम दुम्तीके आ पर्वम आबी, आबी देंनीम। येरमीया १८:१६

9 मेको आन कली आन तमी तौ आन श्ये ब्वपाइक्नुडमी। सहर पुम्तीके मुर नेल्ल आन नेक्था डा मुर आन श्ये ब्वाइनीम। आन जोरी सत्रु नु मेको आन कली साइक्चा माल्ब आन गेशो श्येतम मोदेशो

पाइनीम। लेवी २६:२९; ब्यवस्था २८:५३

10 मिनु नोले गे मेको ब्वाक्कु कुर पतीक खप के ग्योंब, गे नु लाइब आन डोंइती प्रोलो।

11 मिनु गे मेको आन कली मुर नेल्ल आन परमप्रभु यावेमी 'दोपा खप के ग्योंब सेल्ब आ ग्योंब गेनायो मबोंइसीचा डा पा ब्रोल्मे, मोपा गो मेको मुर आन कली नु एको सहर आन कली प्रोलनुड। तोफेथमी मुर थिम्तीक मनुम्म सम्म बेक्शो मुर थिम्नीम। यसैया ३०:१२-१४; येरमीया ७:३२

12 गो एको सहर नु एकेर बाक्ब मुर आन कली मो पाइक्नुडमी। गो एको सहर कली तोफेथ खोदेशो सेल्लुड।

13 यरूसलेम डा खिंपुकी नु यहूदा डा पिप आन खिंपुकी तोफेथ खोदेशो पा ग्रांग्रा दिचा डा दुम्नीम। तेको तेको खिं तारी सरीड डा नां, तास्ला नु सोरुल आन कली चढेशा, अरु देवी देवता आन कली तूचा थोत्रक चढेमे, मेको खिं नेल्ल ग्रांग्रा दिचा डा दुम्नीम' देनो" दे परमप्रभु यावेमी देंत। येरमीया ३२:२९; २राजा २३:१२; सेफन्याह १:३

14 मिनु परमप्रभु यावेमी येरमीया कली लोत्र पथ, तोफेथ सोइक्ताक्व। मिनु येरमीया मेकेर रे जाक्शा, परमप्रभु यावे आ खिं डा लाडगाम बाक्शा, मुर नेल्ल आन कली

15 मुर नेल्ल आन परमप्रभु यावे, इस्राएली आन परमप्रभुमी मार देंत देंशा हना "गो एको सहर नु आ नेक्था डा सहर डा मुर नेल्ल आन कली आं डोंइती देंशो ठेयब श्येत जपाइक्नुडमी। मारदे हना मेको आन थुं खकटा बाक्ब। मिनु आं लोत्र नेंचा मदाक्नीम" दे माइक्तीमी।

20

येरमीया नु चढेब पशहुर

1 मिनु इम्मेर आ तौ चढेब पशहुर परमप्रभु यावे आ खिंम गेय पाइब आन ठेयब मुर बाक्त। मेकोमी येरमीया आ लोत्र पशो नेंतु।

2 मिनु पशहुरमी परमप्रभु यावे आ लोव्र पाइब येरमीया कली तुप्तु। मिनु परमप्रभु यावे आ खिंम बाक्शो बेन्यामीन आ इर तला डा लाप्चोम बाक्शो ठेंडरो थोक्ताक्व। प्रेरित १६:२४

3 मिनु आ दीसा पशहुरमी येरमीया कली ठेंडरो रे गुंडदानु, येरमीयामी मेको कली “परमप्रभु यावेम इ नें पशहुर मवोइक्थु ‘एर ओंथ नेल्ल रे हिंतीक’ दे इ नें वोइक्तु। येरमीया २०:१०; येरमीया ६:२५; येरमीया ४६:५; येरमीया ४९:२९; बजन संग्रह ३१:१४

4 मारदे हना परमप्रभु यावेमी गो इ कली नु इ वारच नेल्ल आन कली शुश हिंचा डा सेल्लुड। मेकोपुकी इ डोंइती आन जोरी सत्रु आन तरवारम साइक्चा पुंडसीनीम। गो यहूदा नु मेको आ मुर नेल्ल आन कली बेबीलोन डा पिप आ गुडम गेनुडमी। मेकोमी मेको आन कली ग्याइश्शा बेबीलोन लाइक्ब। मिनु तरवारम साइक्ब।

5 गो एको सहर डा शोंप नेल्ल, आ चेम्शो क्येट नेल्ल, आ शुश क्येट लाइब थोव्रक नेल्ल नु यहूदा डा पिप आन शोंप नेल्ल आन जोरी सत्रु आन कली गेनुडमी। मेकोपुकीमी आन मारेइ मारेइ रोइश्शा, मेको आन कली ग्याइश्शा बेबीलोन लाइक्नीम। यहोसु ३९:६

6 पशहुर, गे नु इ खिंम बाक्ब नेल्ल ग्याइक्चा पुंडसीशा बेबीलोनम लाइनीनी। गे बेबीलोन लशा, मेकेर बेक्नीनी। इन कली मेकेर थिम्नीम। गे परमप्रभु आ लोव्र दूली सेल्शा, शेंताक्वी। इ लोव्र नेंब इ वारच नेल्ल इ खोदेंशो पा थिम्चा पुंडसीनीम” देंत।

येरमीयाम उजुर पशो

7 मिनु येरमीयाम “परमप्रभु यावे, गे आं कली लेम्शा, इन लोव्र पाइब सेल्लतीनी। मिनु गो इन लेम्शो लोव्र नेंशा बिस्साक्वी। इन सक्तिमी आं कली ग्रातीनी। मुल नाक्त रेन मुरुम आं कली शुक्शी पाइनीम। मुर नेल्लेमी आं कली शुक्शी पाइनीमी। येरमीया १:५-७

8 गो लोव्र पची ना ठेयब सेंदा पा लोव्र पचा माल्लुड। गो हुश ख्राक्श बोक्चा नु खतम दुम्चा आ पर्बम ला ग्रीनुड। परमप्रभु यावे आ

लोव्र नाक्त रेन आं कली शुक्शी पाइक्तीक नु मरिम्शो पाइक्तीके दुम्त।

9 गो मेको आ पर्वम लोव्र मपाइनुड। आ नें थिशा लेंशा लोव्र मपाइनुड देंती हना यो, आ थुंमी ब्रशो मी खोदेशो दुम्त। आं रुशपुकीम तेक्शा वोदुनु, मी खोदेशो दुम्त। गो मेको कली तेक्शा दती। गो थमा पा, मेको कली तेक्ने मचाप्नुड। १कोरिन्थी ९:१६

10 गो शुश मुरपुकीम नोफा मुइक्मुशा लोव्र पशो नेंता। मेकोपुकीमी ‘एर ओथ नेल्ल हिंचा डा श्येत बाक्ब। येरमीया कली दोस गेय। मेको आ पर्वम उजुर पय’ देंनीम। आं नेक्था डा वारच नेल्लेमी ‘गेना दाइल पांइसीबा’ दे आं कली कोव्रनीम। मिनु लेंशा ‘गो मेको आ पर्वम लोव्र पा मेको कली ग्राने चाप्नीकी। गो मेको क्येडा ग्राशा क्येक्क लेत्नय’ देंतेक्म” देंत। येरमीया २०:३; येरमीया १८:१८

11 तन्न परमप्रभु यावे बोल्यो लडाइ पाइब का खोदेशो पा गो नु बाक्ब। मोपतीके आं कली खेदा पाइबपुकी दाइल पांइसीशा, गोल्नीम। मिनु मेकोपुकीम आं कली मग्रानीम। मेको थाम्पा मुने दोक्नीम। मारदे हना मेको आन मरिम्शो पशो गेनायो मप्रेंसीब। येरमीया १:८, १९

12 मुर नेल्ल आन परमप्रभु यावे, गे ठीक पाइब आन कली नाक्शा कोव्रनीनी। गे मुर आन थुं नु आन मिम्तीके कोव्रनीनी। आं कली मेको आन कली क्येक्क लेशो तचा गेयीनी। मारदे हना गो आं निसाफ पतीके इन कली जिम्मा गेता। येरमीया ११:२०

13 मिनु “परमप्रभु यावे कली कुम्सो पने। परमप्रभु यावे ठेयब बाक्ब” दे कुम्सो पने। मेकोमी क्येट मथीब आन कली मरिम्शो पाइब आन गुइ रे प्रोंइतु।

14 गो आं जरमेशो नाक्त सराप रल। आं ममाम आं कली जरमेशो नाक्त आसीक मतवल। येरमीया १५:१०; अय्युब ३:३-११; अय्युब १०:१८

15 आं आफ कली “इ के आल का जरमेसाक्व। तौ का जरमेसाक्व” दे लोव्र शेंब सराप रल। मेकोमी आं आफ कली

ग्येरपाइव्तु।

16 परमप्रभु यावेमी मेको मुर कली शिशी मपथु, मेको मुर खतम पोक्शो सहर खोदेशो दुम्ल। मेकोमी सुनी डाक्शो ब्रेशो नु नाक्ती लडाइ डा तुराही ताप्शो नेनल। उत्पत्ती १९:२४-२८

17 मारदे हना मेकोमी आं कली आं ममा आ कोव्रज उइ मसाइय्यी। मो दुम्लो हना, आं ममा, आं तुरस दुम वा। मिनु आ कोव्रज गेना हना यो ठेयब दुम वा।

18 गो मारदे कोव्रज रे गूडा? गो शुश गेय नु सुर्ता पचा कली जरमेसाक्यी। मिनु नाक्त किंत किंत मुने दोक्चा कली जरमेसाक्यी।

21

पिप सिदकीयाह आ पुंइशो मनेशो

1 मिनु पिप सिदकीयाहम माल्कीयाह आ तौ पशहुर नु मासेयाह आ तौ चढेब सेफन्याह आस कली लोव्र कुर पा येरमीया आ बाक्तीकेम सोइक्ताक्सी। मेना परमप्रभु यावेमी येरमीया कली लोव्र पाप्तु। येरमीया ३९:१-१०; येरमीया २९:२५-२६; येरमीया ३७:३; येरमीया ५२:२४

2 मेको निक्शीमी “हजुर, परमप्रभु यावे कली आंइ पर्बम हिल्लो पने। मारदे हना बेबीलोन डा पिप नेबुकदरेसरमी आंइ कली लडाइ तोन तोन बाक्ब। साइ डोंइती शुश खेयप पशो खोदेशो पा परमप्रभु यावेमी आंइ पर्बम छक लाक्चा डा गेय पाइबा कों? मिनु मोपा मेकोपुकी आंइ रे पा लेशशा लाइनीमी कों?” देंताक्से।

3 मिनु येरमीयामी मेको आस कली

4 “परमप्रभु यावे, इस्राएली आन परमप्रभुमी मार लोव्र पाप्तु देशा हना, गे सिदकीयाह कली ‘गारो आ लाडगाम बाक्शो इन कली पुम्ब बेबीलोन डा पिप नु कल्दी नु लडाइ पशो इन गुइ डा यापुकी इन गे लेप्पाइक्नुड। मिनु गो मेको आन कली खुप्शा, एको सहर आगाम ओंइनुडमी।

5 गो आं दिंशो गुड, सक्ति नु आं थाम्पा गाइश्शा, चुरशा नु ग्युश्रा बोक्शा, गे नु लडाइ पाइनुड।

6 गो एको सहरम बाक्ब मुर नु बस्तु भाव नेल्ल आन कली साइक्नुडमी। मिनु मेकोपुकी ठेयब बेक्तीक रोइम बेक्नीम' देंत, दे मतीस।

7 मिनु नोले परमप्रभु यावेमी 'गो यहूदा डा पिप सिदकीयाह, मेको आ गेय पाइबपुकी नु मेको सहर डा बेक्तीक रोइ, तरवार नु अन्काल रे ब्रोंइशो मुर आन कली बेबीलोन डा पिप नेबुकदरेसर आ गुइम गेनुडमी। गो मेको आन कली साइक्चा माल्ब आन जोरी सत्रु आन गुइम जिम्मा गेनुडमी। मिनु मेकोमी मेको आन कली तरवारम साइक्पाइक्ब। मेकोमी मेको आन कली शिशी मपथु, मप्रोंइब नु दाक्तीके मकोंइथु, साइक्पाइक्ब' मतीस" दे माइक्तीम्सी।

8 मेकोमी "गेमी मेको मुर आन कली 'परमप्रभु यावेमी "गो इन डोंइती ब्रोंइशा बाक्तीक नु बेक्तीक लां वोइक्ता। ब्यवस्था ३०:१५

9 मेको सहरम बाक्ब मुर तरवार, अन्काल नु मुर बेक्तीक रोइम बेक्चा माल्नीम। तन्न सु लाडगा गूशा, इन कली पुम्ब कल्दी आन कली जिम्मा गेंसीबा, मेको ब्रोंइब। मेकोम आ सोक्त ला प्रोंइब। येरमीया ३८:२

10 गो एको सहर कली थमा पा क्याम्नुड। रिम्शो पचा कली ममिम्नुड। एको सहर बेबीलोन डा पिप आ गुइम गेनुड। मेकोमी एको सहर कली मीम क्रोइक्ब" देंत' देनो" देंत। येरमीया ३४:२

11 परमप्रभु यावेम "यहूदा डा पिप आ खिं डा मुर आन कली 'परमप्रभु यावे आ लोत्र नेनीन।

12 गे दाऊद आ खिं डा मुर सुनी कुस कुस ठीक निसाफ पने। रोइक्चा पुंइसीशो आन कली मरिम्शो पाइब आन गुइ रे प्रोनीन। मो मपाइतीनी हना, इन मरिम्शो पतीके आं गाइक्तीके मी खोदेंशो पा ब्राइब। मेको सुइम काप्ने मचाप्चा डा पा ब्राइब। येरमीया २२:३; येरमीया ७:२०

13 एको दिंमम बाक्बपुकी रोंगु तार सेल्शो सहर गो इन कली लडाइ तोइनुड। गे आंइ कली जाक्शा, सुम लडाइ तोइबा डा? “आंइ खुइक्तीके सु ओव्रने चाप्बा डा? आंइ बाक्तीकेम सु ओव्रने चाप्बा डा?” देंनीनी।

14 गो इन कली इन पशो खोदेंशो पा कोव्रशा, सजाइ गेनन्नी। गो इन ब्वाकीम मी सुइक्नुड। मिनु मेकोमी इन एर ओंथ बाक्शो मारेइ मारेइ नेक्ब, दे परमप्रभु यावेमी देंत’ देनो” देंत। गलाती ६:७; इजीकीएल २१:३

22

पिप शाल्लुम येहो-याकीम नु कोन्याह

1 परमप्रभु यावेम “उइ यहूदा डा पिप आ दरवारम लशा, मेकेर मार लोव्र पचा माल्नेवे देंशा हना,

2 ‘दाऊद आ नित्तीकेम निप्ब, यहूदा डा पिप, इन गेय पाइबपुकी नु मेको ठेयब लाप्चो रे ओव्रबपुकी परमप्रभु यावे आ लोव्र नेनीन।

3 परमप्रभु यावेमी मार देंत देंशा हना “गे ठीक निसाफ पने। ठीक गेय पने। रोइक्चा पुंइसीशो आन कली मरिम्शो पाइब आन गुइ रे प्रोनीन। अर्को रागी डा मुर, रोम रोइक्च नु आन वोइश बेक्शो मीश मुर आन कली मरिम्शो मपने। मिनु एको रागीम मारेइ दोस मताइब आन हुश मशाइक्पतीन। येरमीया २१:१२

4 मारदे हना गेपुकीम थमा पा एको आं लोव्र पाइतीनी हना, एको दरवार डा ठेयब लाप्चो रे पा ओव्रशा, दाऊद आ नित्तीकेम निप्ब पिप गेना हना यो बाक्ब। मेको बग्गी नु शाराम जाक्शा, मेको आ गेय पाइब मुरपुकी नु अरु मुरपुकी नु ओव्रब”। येरमीया १७:२३

5 तन्न गेपुकीम एको आं लोव्र मपाइतीनी हना, परमप्रभु यावेम “गो आं नेमी कसम जशा, एको दरवार क्याम्नुड” दे मतो” देंत। १राजा ९:८

6 मारदे हना यहूदा डा पिप आ दरवार आ पबर्म परमप्रभु यावेमी “गे आं कली गिलाद नु लेबानोन डा डांडा खोदेंशो बाक्नेवे। गो इ

कली गोरशो रागी नु मुर मबाक्शो सहर खोदेशो सेल्लुड, दे कसम जाता।

7 गो इ कली या कुरशा, खतम सेल्ब आन कली ठीक पाइनुड। मेकोपुकीम इ नेल्ल क्येडा रिम्शो लाइशो लेबानोन डा रवा तिम्नीम। मिनु मीम हुम्नीम।

8 मिनु शुश रागी रागी डा मुरपुकी एको सहर रे पा लाइनीम। मिनु मेको नेल्लेमी ‘परमप्रभु यावेम, मारदे एको ठेयब सहर कली ओदेशो पवा?’ देंमुइनीम।

9 मिनु मेको आन कली ‘मारदे हना मेकोपुकीमी परमप्रभु यावे, आन परमप्रभु आ कबल पशो प्रोंइशा, देवी देवता आन कली पूजा पा, मेको आन कली गेय पाम्तेक्म’ देशा लोत्र लेत्चा पुंइसीनी” देंनीम।

10 बेक्शा लशो आन पर्बम मडाक्कीन। मेको आन पर्बम रोंका मपने। मेको क्येडा यो ग्याइशशा लाइशो मुर आन पर्बम डाक्कीन। मारदे हना मेको गेनायो मलेप्ब। मेकोमी आ रागी गेनायो मताइब। २राजा २३:२९-३४

पिप शाल्लुम आ पर्बम लोत्र

11 परमप्रभु यावेम यहूदा डा पिप योसीयाह आ तौ शाल्लुम आ पर्बम लोत्र पाइब। मेको आ आफ आ पा डा यहूदा डा पिप दुम्त। मिनु मुल मेको एक रे लत। मेको एक लेशशा मजाक्ब। शाल्लुम कली योआहास यो देंनीम। १इतिहास ३:१५; २इतिहास ३६:१-४

12 मेको कली तेको रागीम ग्याइशशा लदमे। मेको मेक उइ बेक्ब। मेकोमी एको रागी लेशा गेनायो मताइब।

13 “आबी, आबी, सुमी पाप पतीकेमी आ खिं सेल्बा, सुम आ खिं डा आइक्था डा कोठा ठीक मपतीकेमी सेल्बा, मेकोमी आ नेक्था डा मुर आन कली मोशा गेय पपाइक्ब। मिनु मेको आन कली आन गेय पशो डा गाल्च मगेब। २राजा २४:१४; मीका ३:१०; लेवी १९:१३; याकूब ५:४

14 मेकोमी 'गो आं कली तला तार शुश ठेयब कोठा पाइशशो खिं का सेल्लुड' देंब। मेकोमी झेलपुकी सेल्लब। मेको कली लेबानोन डा लाइशशो रवा आ शीम क्येप्शा, मेको कली लल रड खेक्ब।

15 मार, गे पिप नवे? मारदे हना गे गारो नेल्ल बोल्यो शीम क्येप्नेवे? इ आफ नु जचा तूचा थोत्रक बाक्त। मेकोमी ठीक निसाफ नु ठीक गेय पाप्तु। मिनु मेको कली रिम्शोन दुम्त।

16 मेकोमी प्रुडग नु मारेइ मथीब आन कली ठीक निसाफ पाप्तु। मिनु मेको कली रिम्शोन दुम्त। मेको आं कली तुइक्ब मुरुम पाइनीम" दे परमप्रभु यावेम देंत।

17 तन्न इ मिक्च नु इ थुंम ठीक पा मचेम्शो क्येट ला बाक्ब। गे दोस मताइब आन हुश शाइक्पाइक्नेवे। गे मुर आन कली दिप्शा हुश ख्राक्श पोक्नेवे। मरिम्शो पचा नु रोइक्चा ला दाक्नेवे।

18 मोपतीके परमप्रभु यावेम "यहूदा डा पिप योसीयाह आ तौ येहो-याकीम आ पर्बम 'आबी, मुरपुकीमी मेको आ पर्बम रोंका पची ना आं लोकब, आबी, आ समी मदेनीम' मेको आ पर्बम मडाक्नीम। मिनु 'आबी, आं प्रभु, आबी, मान ताइब पिप' दे मेको आ पर्बम मडाक्नीमी। २राजा २३:३४

19 मेको कली गधा का थिम्शो खोदेशो पा, कीशा लाइशशा यरूसलेम डा ठेयब लाप्चो आ डोंइती गुंइशा ताइक्नीम" देंत। येरमीया ३६:३०

20 लेबानोनम लशा ठेयब सेंदा पा ग्रीडो। इ सेंदा बाशानम नेंपाइक्मी। अबारीम पहाड रे ठेयब सेंदा पा ग्रीडो। मारदे हना इ दाक्शो मुर नेल्ल बेक्तेक्म।

21 गे रिम्शो पा बाक्डेनु, गो इ कली लोत्र पाता। तन्न गे "गो मेको मनेनुड" देंते। गे ठिटा बाक्डे ना रेन मोदेशो बाक्ते। गे आं देशो मटिवी।

22 इ गोठला नेल्ल आन कली फशेम बेर पाइशशा योल्ब। मिनु इ वारच नेल्ल ग्याइशशा लाइक्चा पुंइसीनीम। मेना गे इ मरिम्शो गेयम पतीके मुने दोक्शा, आमाइ, मेको श्येत नेल्ल परमप्रभु यावे

आ अरेशो मटितीके दुम्शो बाक्ब।

23 लेबानोनम बाक्ब मुर, लेबानोन डा लाइशो रवा आन दातेमी खिं सेल्ब मुरपुकी, श्येत नु सुत्केरी रोइ पशो खोदेशो दुम्तीनी हना, दोपा हुकयी पाइनीनी।

24 परमप्रभु यावेम “गो दोपा ब्रोंइशा बाक्डा, मोपा यहूदा डा पिप येहो-याकीम आ तौ कोन्याह माइशो येहो-याकीम कली ‘गे आं ग्युरा गुइ डा छाप थोक्तीक औठी नवे हना, गो इ कली गुंइशा ताइक्तन वा।कोन्याह कली योयाकीम यो देंनीम।२राजा २४:८-१६; येरमीया २४:१

25 गो इ कली साइक्चा माल्ब मुर आन गुइम गेनन। गे मेको आन कली तशा हिनेवे। गो इ कली मेको बेबीलोन डा पिप नेबुकदरेसर नु कल्दी आन गुइम गेनन।

26 गो गे नु इ कली जरमेब इ ममा इस कली अर्को रागीम ताइक्नन्सी। मिनु गे निम्फा मेकेर बेक्नीसी।

27 तन्न मेको आस लेत्चा माल्शो रागीम, लेत्चा मताइनीस।

28 मार, एको कोन्याह माइशो मुर सुइम मदाक्शो ब्रोल्लो ग्योब खोदेशो बाक्बा डा? मेको मोदेशो ग्योब कली सुइम ममाल्नीम। मोपतीके मेको नु मेको आ आल आन मतुइशो रागीम ताइक्चा पुंइसीनीमी?’ ” देंत। कोन्याह माइशो येहो-याकीम आ तौ कली येकोन्याह यो देंनीम। येरमीया २४:१

29 ए रागी, रागी डा मुर नेल्ल, परमप्रभु यावे आ लोव्र नेनीन।

30 परमप्रभु यावेमी “मेको मुर आ नें क्याम्सीब, दे ब्रेक्शा वोतो। मेको मुर बाक्म सम्म मारेइ पने मचाप्ब। मेको आल मपाइशो मुर दुम्ब। मारदे हना मेको के तेकोइ मुर रिम्शो मदुम्नीम। मेको आ चच युइ दाऊद आ नित्तीकेम नित्चा मताइनीम। मेकोपुकीमी यहूदा आ नित्तीकेम निश्शा हुकुम पचा मताइनीम” देंत। १इतिहास ३:१७-२४

मरिम्शो गोठला आन पर्वम लोव्र

1 परमप्रभु यावेमी “आबी, गे आं भेडा आन कली एर ओंथ ब्रपाइक्ब गोठला” देंत। इजीकीएल १४:-; येरमीया १०:२१; जकरिया ११:५

2 मोपतीके परमप्रभु यावे, इस्राएली आन परमप्रभुमी आ मुर आन कली योव्रब गोठला आन पर्वम “गेपुकीम आं बगाल आन कली फ्राइतीनी। मिनु मेको आन कली खेरतीनी। मेको आन कली मकोव्रनी। मोपतीके गो इन मरिम्शो पशो आ पर्वम कोव्रनुड। इन कली सजाइ गेनुड” दे परमप्रभु यावेमी देंत।

3 परमप्रभु यावेमी “गो आं लीशो बगाल नेल्ल आन कली इन खेरशो रागी रे खुप्शा लेशशा, आन बगालम चाक्नुडमी। मिनु मेकोपुकी मेकेर साशा बोशा शुश दुम्नीम।

4 गो मेको आन कली योव्रब गोठलापुकी वोइक्नुडमी। मिनु मेको आन कली योव्रनीम। मेना भेडा महिनीम। सुर्ता मपाइनीम। मेको आन दाते डा का यो मजाम्नीम” दे परमप्रभु यावेमी देंत। येरमीया ३:१५

5 परमप्रभु यावेम “गो दाऊद आ मुर रे ठीक पाइब राशी का वापाइक्नुड। मेको नाक्त थमा पा जाक्ना जाक्न बाक्ब। पिप कामी आ जोक्तीक तुइक्तीकेम सासन पाइब। मिनु मेकोमी आ रागीमी ठीक निसाफ नु ठीक गेय पाइब। जकरिया ३:८; यसैया ३२:१

6 मेकोम सासन पवा ना यहूदा श्येत रे प्रोंइचा पुंडसीब। मिनु इस्राएल मारेइ मदुमथु बाक्ब। मेको आ नेम मेकोपुकी तुइक्चा पुंडसीनीमी। मेको आ नें ‘परमप्रभु यावे आंइ कली ठीक पाइब बाक्ब’ देंनीम” देंत। ब्यवस्था ३३:२८; येरमीया ३३:१६; यसैया ४५:२४

7 मिनु परमप्रभु यावेमी “परमप्रभु यावे ब्रोंइशा बाक्शो खोदेशो नु मुर आन कली इजीप्त रागी रे गुंडशा एक चाक्शो मदेंतीक नाक्ती थमा पा जाक्नीम।

8 तन्न मार देंनीम देंशा हना, मेकोपुकीमी ‘परमप्रभु यावे ब्रोंइशा बाक्शो खोदेशो नु इस्राएली आन चच युइ आन कली उत्तर डा रागी नु तेको तेको रागी रे चाक्शो’ देंनीम। मारदे हना मेको आन रागीम बाक्चा ताइनीम” देंत। येरमीया १६:१४-१५

दूली लोत्र पाइब

इजीकीएल १३:२-१६

9 परमप्रभु यावेम आ लोत्र पाइब आन पर्बम लोत्र पशो बाक्ब। मेको नेंशा आं थुं जिक्त। आं रुश नेल्ल खिंखि पाइनीम। गो दुक्शो मुर खोदेशो दुम्ती। गो अडगुर शांबु शुश तूशा दुक्शो खोदेशो दुम्ती। गो परमप्रभु यावे आ पर्बम नु आ लोत्र आ पर्बम मोदेशो दुम्ती।

10 मारदे हना एको रागी तेल्लेम पतीकेम ब्रीशो बाक्ब। सराप रतीके, रागीम रोंका पाइब। मुर मबाक्तीके बस्तु योत्रतीके सोत्रतेक्म। परमप्रभु यावे आ लोत्र पाइब आन पतीके काइ मरिम्शो बाक्ब। आन सक्ति दूली पा चलेनीम। येरमीया १२:४

11 परमप्रभु यावेमी “आं लोत्र पाइब नु चढेब नेल्ल आं कली ममानेब दुम्तेक्म। मेकोपुकीमी आं खिंमी यो आं अरेशो लोत्र मटीनीम। येरमीया ५:३१

12 मोपतीके मेको आन लां छिडछिड दुम्शा ग्रेक्ब दुम्ब। मिनु मेकोपुकी मेकेर गाक्मानु, ग्रेक्शा गोल्नीम। मारदे हना गो मेको आन कली सजाइ ततीक बर्सम ठेयब श्येत गेनुड। येरमीया १३:१६; बजन संग्रह ३५:६

13 गो सामरीया डा आं लोत्र पाइब आन दातेमी ग्रांग्रा दिशो गेय ताता। मेकोपुकीमी बाल देवता आ नेम नोले दुम्ब लोत्र पाम्तेक्म। मिनु आं मुर इस्राएली आन कली हेंथे लां खोइक्पाइक्तेक्म। ब्यवस्था १८:२०-२२; यसैया १:१०; इजीकीएल १३:२३

14 तन्न यरूसलेम डा आं लोत्र पाइब आन दातेम सामरीया क्येडा यो ग्रांग्रा दिचा डा गेय ताता। मेकोपुकीमी तेल्लेम पशा जोल ला पाइनीम। मरिम्शो पाइब आन कली बोल्यो सेल्नीम।

मोपतीके सुइ मुर परमप्रभु यावे आ अरेशो मटितीक रे मलेत्नीम। मेको नेल्ल आं कली सोदोम खोदेशो नु यरूसलेम डा मुरपुकी चहिं गोमोररा खोदेशो दुम्तेकम” दे परमप्रभु यावेमी देंत।

15 मोपतीके मुर नेल्ल आन परमप्रभु यावेम आ लोव्र पाइब आन पर्बम “गो मेको आन कली कशो थोव्रक उम्नुडमी। मिनु तूचा कली बीस ब्वाइशो ब्वाक्कु तूचा गेनुडमी। मारदे हना यरूसलेम डा परमप्रभु यावे आ लोव्र पाइब रेन रागी नेल्लेम परमप्रभु यावे कली थमा मसुइशो बाक्नीम” देंत। येरमीया ९:१५

16 मुर नेल्ल आन परमप्रभु यावेम “गेपुकी आं लोव्र पाइब आन लोव्र मनेनीन। मेकोपुकीमी जोल लोव्र पा इन कली हेंथे गाक्पाइक्नीम। परमप्रभु यावे आ लोव्र ममाइ, तन्न आन थुंम मिम्शो लोव्र नु आन डोमु तशो ना डा लोव्र शेंनीम। आन खकटा थुं कली खोइशशा गाक्ब आन कली ‘गे ठेयब श्येत मताइनीनी’ देंनीम। येरमीया ६:१३-१४; येरमीया १४:१४

17 मेकोपुकीम आं लोव्र मदाक्ब आन कली गेना हना यो ‘परमप्रभु यावे इन कली थुं नाइशशा बाक्तीक दुम्ब’ देंनीम। मिनु मेकोपुकीम मटिथु आन थुं डा मिम्शोम गाक्ब आन कली ‘इन कली मारेइ हिंचा डा श्येत मदुम्ब’ देंनीम।

18 तन्न सु परमप्रभु यावे आ लोव्र नेंचा नु रुच्या कली मेको आ अर्ती गेतीकेम बाक्म डा? सुम मेको आ लोव्र शेंचा कली नोफा दाइशशा नेंशो बाक्म डा?

19 कोव्रडीन परमप्रभु यावे आ गाइशशो फश गिवार खोदेशो पा बोक्ब। परमप्रभु यावे आ अरेशो लोव्र मटीब आन पियामी फश गिवार जुक्ब।

20 परमप्रभु यावे आ गाइशशो मलेप्ब। आ मिम्शो नेल्ल पने थुमा नोले ला लेप्ब। नोले डा नाक्ती एको लोव्र रिम्शो पा रुप्नीनी।

21 मेको आं लोव्र पाइब आन कली गो मसोइक्तुमी। मो हना यो मेकोपुकी आन लोव्र कुरशा दोरशा लाम्तेकम। गो मेकोपुकी नु लोव्र

मपड। मो हना यो मेकोपुकीमी लोव्र पांतेक्म। येरमीया १४:१४

22 मेकोपुकी आं अर्ती गेतीकेमी बाक्शो हना, मेकोपुकीमी आं मुर आन कली आं लोव्र नेंचा डा पा देंम वा। मिनु मेको आन कली आन मरिंशो लां नु आन मरिंशो गेय रे लेत्तेक्म वा” देंत।

23 परमप्रभु यावेम “मार, गो नेक्था डा ला परमप्रभु यावे नडा डा? डोन डा चहिं परमप्रभु मनडा डा?

24 मिनु मुर आं डोंइती रे खुइश्शा बाक्ने चाप्नीमी डा? मिनु गो मेको आन कली तने मचाप्नुडमी डा? मार, सरीड नु रागी निम्फा कली गो प्रिंने मचाप्नुडा डा?” दे परमप्रभु यावेमी देंत। बजन संग्रह १३९:७-१६

25 मिनु मेकोमी “गो आं नेंमी जोल पाइब आन लोव्र नेंता। गो डोमु ताता। गो डोमु ताता।

26 गेना सम्म मोदेशो दुम्बा? मेको आं लोव्र पाइब आन थुं गेना आं गे लेप्बा? मेको जोल पाइब आंम थुं डा दूली लोव्र पाइबपुकी गेना आं गे लेत्नीमी।

27 मेकोपुकीमी आन डोमु आन पबर्म लोव्र पा आं नें प्रेंपाइक्चा माल्नीम। आन किकी पिपी खोदेशो पा आं नें आ पा डा बाल आ नें ठेयब सेल्शा, आन डोमु डा लोव्र शेंमुंतेक्म। न्यायाधीस ३:७

28 सुइ आं लोव्र पाइबम डोमु ताप्तु हना, आ डोमु शोव्रडल। तन्न सुइ नु आं लोव्र बाक्त हना, मेकोमी थमा पा आं लोव्र शेंदल। पराल नु चेरब मगारनीस” देंत।

29 परमप्रभु यावेमी “मार, आं लोव्र मी खोदेशो मबाक्बा डा? मेको सेरथे फुल्लु कली प्रोल्ब घन खोदेशो मबाक्बा डा?” दे परमप्रभु यावेमी देंत। हिब्रू ४:१२

30 मिनु परमप्रभु यावेमी “कोव्रडीन, गो मेको आन कली देंशो लोव्र खोदेशो पा, मेकोपुकीमी अरु आन कली देंशो आं लोव्र आंम के सेल्शा, खुइ पा शेंनीम। मोदेशो पा आं लोव्र पाइब आन कली काइ मदाक्नुड।

31 कोव्रडीन, मेकोपुकीमी आंम थुं डा लोव्र पशा “परमप्रभु यावे

आ लोव्र बाक्ब' देंनीम। गो मोदेशो लोव्र पाइब आन कली काइ मदाक्नुड।

32 कोव्रडीन, मेकोपुकी जोल पा डोमु डा लोव्र पाइब बाक्नीम। गो मोदेशो पा आं लोव्र पाइब आन कली काइ मदाक्नुड। मेको आन जोल शेंतीकेमी आं मुर आन कली हेंथे लां खोइक्पाइक्नीम। मेकोपुकी काइ महिंब बाक्नीम। गो मेको आन कली मसोइक्तुमी। गो मेको आन कली मयोव्रडुमी। मोपतीके मेको आन लोव्र मुर आन कली शोर गाक्शो बाक्ब” दे परमप्रभु यावेमी देंत। येरमीया १४:१४

जोल पाइब आन लोव्र

33 मिनु मुर का, आं लोव्र पाइब का कि चढेब काम इ कली “परमप्रभु यावे आ देशो श्येत लोव्र मार बाक्बा?” दे इ कली हिल्लो पाप्तु हना, गे मेको कली “मेको श्येत गे बाक्नीनी” देनो। मिनु परमप्रभु यावेमी “गो इन कली ताइक्नन्नी, देंत, माइक्मी” देंत। २राजा ९:५५; यसैया १३:१

34 परमप्रभु यावेम “तेकोइ आं लोव्र पाइब, तेकोइ चढेब नु अरु सुइमी ‘एको परमप्रभु यावे आ देशो श्येत बाक्ब’ देंतेक्म हना, गो मेको आन कली नु मेको आन खिं डा मुर आन कली सजाइ गेनुडमी” देंत, दे माइक्मी।

35 मिनु इन दातेम अर्को कली “परमप्रभु यावेम मार लोव्र पवा? दे हिल्लो पचा माल्नीनी।

36 तन्न गे लेंशा “परमप्रभु यावे आ देशो श्येत लोव्र बाक्ब’ मदेनीन। मारदे हना मुर नेल्ल आन पशो लोव्र श्येत दुम्ब। मोपा गेपुकीम ब्रोंइशा बाक्ब परमप्रभु, मुर नेल्ल आन परमप्रभु यावे, इं परमप्रभु आ लोव्र दूली सेल्नीनी।

37 मिनु गे आं लोव्र पाइब नेल्ल आन कली “परमप्रभु यावेम इन कली मार, लोव्र लेत्ता? परमप्रभु यावेम मार लोव्र पवा?” दे हिल्लो पचा माल्नेवे।

38 तन्न गेपुकीमी 'एको परमप्रभु यावे आ देशो श्येत डा लोव्र बाक्ब' देंनीनी। मोपतीके परमप्रभु यावेमी 'मारदे हना गे परमप्रभु यावे आ देशो श्येत डा लोव्र बाक्ब' देंतीनी। तन्न गो इन कली 'एको परमप्रभु यावे आ देशो श्येत बाक्ब, मदेनीन' देंती।

39 मोपतीके गो थमा पा इन कली क्युक्शा, आं डोंइती रे ताइक्नुड। इन कली नु इन किकी पिपी आन कली गेशो सहर पोक्शा ताइक्नुड।

40 मिनु गो इन कली गेना हना यो शिशी मपथु, गेना हना यो मुने दोक्पाइक्नन्नी। मेको गेना यो मप्रेंसीब" दे परमप्रभु यावेमी देंत। येरमीया २०:११

24

रिम्शो नु मरिम्शो फोव्रशी गेडा

1 बेबीलोन डा पिप नेबुकदरेसरमी यहूदा डा पिप येहो-याकीम आ तौ येकोन्याह, यहूदा डा पिप आ गेय पाइब, मार मार सेल्स जोक्ब नु तुप्तील आन कली यरूसलेमम ग्याइश्शा बेबीलोन लदा बाक्त। मेको नोले परमप्रभु यावेमी आं कली आ खिं आ डोंइती डालो निक्शी फोव्रशी गेडा कोंइताक्यी।येहो-याकीम आ नें २राजा २४:६ योयाकीन बाक्ब। तन्न येरमीया किताबम २२:२४ आ नें कोन्याह बाक्ब। मिनु येरमीया २४:१ येकोन्याह यो देंनीम।२राजा २४:१४-१६

2 मिनु डालो कामी डोंइती डा थम रिम्शो मीशो फोव्रशी गेडा बाक्तेक्म। तन्न अर्को डालोम काइ मरिम्शो फोव्रशी गेडा बाक्तेक्म। मेको जचा यो मदुम्चा डा थम मरिम्शो बाक्तेक्म।

3 मिनु परमप्रभु यावेम आं कली "येरमीया गे मार, तवी" दे माइक्ती। मिनु गो "फोव्रशी गेडा तातामी। थम रिम्शो फोव्रशी गेडा नु थम मरिम्शो फोव्रशी गेडा बाक्तेक्म। मेको मरिम्शो फोव्रशी गेडा जचा यो मदुम्चा डा बाक्नीम" देंती।

4 मिनु परमप्रभु यावेमी आं कली इजीकीएल ११:१४-२१

5 परमप्रभु यावे, इस्राएली आन परमप्रभुमी “मेको रिम्शो फोव्रशी गेडा खोदेशो पा, गो यहूदा रे बेबीलोन रागीम ग्याइशशा लाइक्चा पुंडसीशो आन कली मिम्नुड। गो मेको आन कली एकेर रे कल्दी आन रागीम सोइक्ताक्ड।

6 गो मेको आन कली रिम्शो दुम्पाइक्चा कली कोव्रनुड। मिनु गो मेको आन कली एको रागीम लेशशा चाक्नुडमी। गो मेको आन थुं बारपाइक्नुडमी। आन थुं लुक्च मलपाइक्नुडमी। गो मेको आन कली खुम्नुडमी। मतुल्लुडमी। येरमीया १:१०; येरमीया ३१:२८

7 मिनु गो मेको आन कली ‘गो परमप्रभु यावे नड’ दे आं कली तुइक्तीक थुं गेनुडमी। मेकोपुकी आं मुर दुम्नीम। मिनु गो मेको आन परमप्रभु दुम्नुड। मारदे हना मेको आन थुं नेल्लेमी आं गे लेत्नीम। येरमीया ३१:३३-३४; येरमीया ७:२३

8 तन्न गो मेको जचान मदुम्चा डा काइ मदारशो फोव्रशी गेडा खोदेशो पा यहूदा डा पिप सिदकीयाह, मेको आ सरकार डा गेय पाइब, यरूसलैम डा लीशो मुरपुकी नु इजीप्त रागीमी बाक्ब आन कली मरिम्शो पाइनुड। २राजा २४:१७-२०; ब्यवस्था २:३१; येरमीया २९:१६-१९

9 गो मेको आन कली रागी डा राज्य नेल्लेमी शुश हिंचा डा नु काइ मरिम्शो सेल्लुड। मेको आन कली शिशी मताइब, शुक्शी लोव्र नु सराप पाइक्चा पुंडसीब सेल्लुडमी। मेको आन कली खेरशो रागी नेल्लेम मोदेशो पाइनुडमी। १राजा ९:७

10 गो मेको आन कली तरवार, अन्काल नु मुर बेक्तीक रोइ सोइक्नुड। मेको आन कली नु आन किकी पिपी आन कली गेशो रागी रे मेको नेल्ल मबेक्मा सम्म मो पाइनुड” दे परमप्रभु यावेमी देंत।

25

ग्याइशशा लाइक्चा पुंडसीब

1 मिनु परमप्रभु यावेमी येरमीया कली यहूदा डा मुर आन पबर्म लोव्र पाप्तु। मेना यहूदा डा पिप योसीयाह आ तौ येहो-याकीमपिप दुम्शो ४ बर्स दुम्मेनु, बेबीलोन डा पिप नेबुकदरेसर पिप दुम्शो बर्स का दुम्शो बाक्त। येरमीया ३६:१

2 मिनु परमप्रभु यावे आ लोव्र पाइब येरमीयामी यहूदा डा मुर नेल्ल नु यरूसलेममी बाक्ब मुर नेल्ल आन कली मेको लोव्र पाप्तु।

3 यहूदा डा पिप आमोन आ तौ योसीयाह पिप दुम्शो १३ बर्स रे मुल २३ बर्स सम्म परमप्रभु यावेमी आं कली लोव्र पना पन बाक्त। मिनु गो मेको लोव्र इन कली शेंस डा शेंस बाक्शो बाक्ती। तन्न गेपुकीम इन नोफा मदाइक्तीनी। येरमीया १:२; येरमीया ३६:२

4 मिनु परमप्रभु यावेम आ लोव्र पाइब आन कली मोदें लोव्र पथ सोइक्स डा सोइक्स पाप्तु हना यो, गेपुकीम मेको आन लोव्र मनेनी। इन नोफा मदाइक्तीनी। येरमीया ७:२५-२६; येरमीया ११:७; येरमीया २६:५; येरमीया २८:८; येरमीया २९:१९; येरमीया ४४:४; २इतिहास ३६:१५-१६

5 मेकोमी “गे नेल्ल इन मरिम्शो पशो नु परमप्रभु यावे आ अरेशो मटितीके रे लेतीन। मिनु परमप्रभु यावेम इन कली नु इन किकी पिपी आन कली गेना हना यो कली गेशो रागीम बाक्चा ताइनीनी। येरमीया ७:३

6 अर्को रागी डा देवी देवता आन कली पूजा पशा, ठेयब सेल्चा कली मेको आन नोले मखोतीन। इन गुइम सेल्शोमी आं कली मगाइक्पाइय्यीनी। मिनु गो इन कली मारेइ श्येत मगेनुड” देंशो बाक्त।

7 परमप्रभु यावेमी “तन्न गेपुकीम आं लोव्रमी नोफा मदाइक्तीनी। इन गुइम सेल्शोमी आं कली गाइक्पाइक्तीनी। मिनु गेपुकी आंमान सजाइ ताइब सेल्सीशो बाक्नीनी” देंत।

8 मोपतीके मुर नेल्ल आन परमप्रभु यावेमी “मारदे हना गेपुकीम आं लोव्र मटिनी।

9 गो उत्तर डा जात नेल्ल नु आं गेय पाइब बेबीलोन डा पिप

नेबुकदरेसर कली ब्रेशशा चाक्नुडमी। गो मेको आन कली एको रागी डा मुर नु एर ओथ डा जात नेल्ल आन पर्बम चाक्नुडमी। मिनु गो मेको नेल्ल आन कली साइक्पाइक्नुडमी। गो मेको आन कली शुश हिँचा डा, शुक्शी पाइक्चा पुंडसीब नु शिशी मताइब सेल्लुडमी। दानीएल ३:३१-३३

10 मिनु गो मेको आन रे थुं नाइशशा बाक्तीके, ग्येरशो सेंदा नु ग्युम्ली ग्युम्ले आन सेंदा क्याम्नुड। यात ग्रीशो नु बत्ती आ हाम्सो नेल्ल योल्नुड। येरमीया ७:३४

11 एको रागी डा खिं नेल्ल ब्रेशशो नु मुर मबाक्शो दुम्नीम। मिनु एको जात डा मुरपुकी ७० बर्स सम्म बेबीलोन डा पिप आ वाइल दुम्नीम। २इतिहास ३६:२१; येरमीया २९:१०; एज्रा १:१-२

12 तन्न ७० बर्स गाम नोले, गो बेबीलोन डा पिप नु कल्दी आन रागी कली मेको आन मरिम्शो पशो डा सजाइ गेनुड। मेको आन रागी गेना हना यो मुर मबाक्तीके सेल्लुडमी” दे परमप्रभु यावेमी देंत।

13 परमप्रभु यावेमी “मेको रागी कली आं देंशो लोत्र नेल्ल, एको किताबम ब्रेक्शो लोत्र नु आं लोत्र पाइब येरमीयामी रागी रागी नेल्ल डा मुर आन कली पशो नोले दुम्ब लोत्र नेल्ल मेको रागीम मोइक्नुड।

14 मिनु रागी रागी डा मुर नु ठेयब पिपमी यहूदा डा मुर आन कली वाइल सेल्लनीम। गो मेको आन पशो नु आन गुडमी सेल्लो कोत्रशा, मेको आन कली क्येक्क लेत्नुडमी” देंत। येरमीया २७:७

परमप्रभु आ गाइशशो कचौरा

15 मिनु परमप्रभु यावे, इस्राएली आन परमप्रभुमी आं कली “आं गुइ रे आं गाइशशोमी ब्रीशो अडगुर शांबु बाक्शो कचौरा ताक्को। मिनु इ कली सोइशशो रागी रागी डा मुर नेल्ल आन कली तूपाइक्मी। येरमीया ५१:७; यसैया ५१:१७; प्रकाश १४:१०

16 मेकोपुकीमी मेको तूशा, दिड दाड गोल्शा, मारेइ मिम्ने मचाप्नीम। मारदे हना गो मेको आन दातेमी तरवार सोइक्नुड” देंत।

17 मोपतीके गो मेको कचौरा परमप्रभु यावे आ गुइ रे ताक्ता। मिनु गो परमप्रभु यावेमी सोइश्शो रागी नेल्ल नु मुर नेल्ल आन कली तूपाइक्तामी।

18 मिनु मुलाक्ती तशो खोदेशो पा यरूसलेम नु यहूदा डा सहर नेल्ल आन कली श्येत्थ नु मुर मबाक्तीके सेलो। मेकेर डा पिप नु आन सरकार आ गेय पाइब मुर खतम दुम्नीम। मेको सहर शुक्शी पाइक्चा नु सराप पाइक्चा पुंइसीब दुम्त।

19 मेको प्रोंइशा यो इजीप्त डा पिप फाराओ, मेको आ गेय पाइब मुर नेल्ले, मेको आ सरकार डा मुरपुकी नु मेको आ मुर नेल्ल आन कली,

20 मेकेर बाक्ब अर्को रागी डा मुर नेल्ले, ऊज रागी डा पिप नेल्ले, पलिस्ती आन पिप नेल्ले, अश्कलोन, गाजा, एक्रोन नु अश्दोद सहरम लीशा बाक्शो मुर नेल्ल आन कली,

21 एदोम, मोआब नु अम्मोन डा मुर नेल्ल आन कली,

22 टायर नु सीदोन डा पिप नेल्ले, समुन्द्र आइक्ची हांबु डा पिप नेल्ल आन कली,

23 देदान, तेमा, बूज नु आन चां एर ओंथ ख्रोइक्ब नेल्ल आन कली, येरमीया ९:२५

24 अराब रागी डा पिप नेल्ल, गोरशो रागीम बाक्ब अर्को रागी डा मुर आन पिप नेल्ल आन कली,

25 जिम्नी डा पिप, एलाम डा पिप नु मादी डा पिप नेल्ल आन कली,

26 मिनु उत्तर गे आ नेक्था नु डोन बाक्ब पिप नेल्ल आन कली का का पा तूपाइक्तामी। मिनु नोले अर्को रागीम बाक्शो राज्य नेल्ल डा मुर आन कली तूपाइक्तामी। मिनु मेको नेल्ल आन नोले शेशाक डा

पिपमी यो मेको तूचा माल्ब। शेशाक बेबीलोन आ अर्को नें बाक्ब।
येरमीया ५१:४१

27 मिनु नोले गे मेको आन कली “मुर नेल्ल आन परमप्रभु यावे,
इस्त्राएली आन परमप्रभुमी मार देंत देंशा हना ‘गे मेको तूशा दुक्शा
मेने। मिनु गेना यो मबोक्चा डा पा गोलीन। गो इन दातेम सोइश्शो
तरवार आ पर्बम मो दुम्ब’ दे माइक्मी।

28 तन्न मेकोपुकीमी इ गुइ रे मेको कचौरा तूने मबिस्साक्म हना,
गे मेको आन कली मुर नेल्ल आन परमप्रभु यावेमी ‘गेपुकीम मेको
तूचान माल्नीनी’ देंशो बाक्ब” दे माइक्मी।

29 मेकोमी “कोव्रडीन, मुल गो आं नेंम वोइश्शो सहर कली श्येत
गेचा चिक्शो बाक्नुड। मिनु मार, गेपुकी चहिं सजाइ मतथु ब्रोंडनीनी
डा? इन कली सजाइ मगेथु मप्रोंडसीब। मारदे हना गो रागीम बाक्ब
मुर नेल्ल आन पर्बम तरवार का ठीक पशो बाक्ती, दे मुर नेल्ल आन
परमप्रभु यावेमी देंत” दे माइक्मी। इजीकीएल ९:६; १पत्रुस ४:१७;
येरमीया ४९:१२

30 परमप्रभु यावेमी “मुल गे मेको नेल्ल आन पर्बम एको आं
लोव्र पावो। मेको आन कली ‘परमप्रभु यावे इर आ बाक्तीक रे
ब्वाक्ब। आ बाक्तीक रे आ सेंदा गुंइब। मिनु आंम रागी आ पर्बम
मेको ठेयब सेंदा पा ब्वाक्ब। रागीम बाक्ब नेल्ल आन पर्बम अडगुर
खाक्ब खोदेंशो पा ग्रीब। होसे ११:१०; योएल ४:१६; आमोस १:२

31 मेको रेयके पा, थोप्ला दाइश्शो, रागी डा सुर सम्म नेंसीब।
मारदे हना परमप्रभु यावेम रागी रागी आन कली दोस गेब। मिनु
मेकोमी मुर नेल्ल आन कली निसाफ पाइब। मिनु दोस ताइब
तरवारम क्योरचा पुंइसीनीम’ दे माइक्मी” देंत।

32 मुर नेल्ल आन परमप्रभु यावेमी “कोव्रडीन शुश श्येत दुम्तीक
रागी का रे अर्को रागी सम्म ब्रना ब्रन लाइब। रागी आ सुर रे हिंचा
डा फश गिवार जाक्ना जाक्न बाक्ब” देंत।

33 मेको नाक्ती परमप्रभु यावे आ साइश्शोपुकी रागी आ सुर का

रे अर्को सुर सम्म बाक्नीम। मेको आन पर्बम सुइ रोंका मपाइनीम। मेको बेक्शो मुर आन कली सुइमी खुप्शा मथिम्नीम। मेको आन कली सुइम मथिम्नीम। मेकोपुकी खपीम मोत्रल खोदेशो दुम्नीम। येरमीया ९:२१

34 गे गोठलापुकी रोंका पने। मिनु वाइ ब्रेशशा डाक्कीन। गे मेको बगाल डा लां कोंइबपुकी पुलुम दिड दाड गोलीन। मारदे हना इन कली क्योरशा साइक्तीक नाक्त जाक्शो बाक्ब। गेपुकी गोल्नीनी। मिनु शुश क्येट लाइब ग्योंब खोदेशो पा प्रोल्चा पुंइसीनीनी। येरमीया २३:१

35 गोठला आन कली प्रोक्तीक तेइ मबाक्ब। बगाल डा लां कोंइब आन ब्रोंइतीक लां तेइ मबाक्ब।

36 गोठला आन डाक्शो नेनीन। बगाल आन कली लां कोंइब आन हिंमा क्येम्स पशो नेनीन। मारदे हना परमप्रभु यावेम मेको आन बस्तु योत्रतीके क्याम्चा चिक्शो बाक्ब।

37 परमप्रभु यावे आ ठेयब पा गाइश्शोम मेको रिम्शो बस्तु योत्रतीके खतम दुम्नीम।

38 गुप्सम खोदेशो पा मेकोमी आ बाक्तीके प्रोंइतु। मारदे हना मेको आन रागी साइक्ब तरवार नु परमप्रभु आ गाइक्तीक आ पर्बम मुर मबाक्तीके दुम्त। येरमीया ४:७

26

येरमीया कली हिंच कोंइशो

येरमीया ७:-

1 यहूदा डा पिप योसीयाह आ तौ येहो-याकीममी सासन पवा आ डोंइती डा बर्सम परमप्रभु यावेमी आं कली लोत्र पाप्तु। २राजा २३:३४-३७

2 परमप्रभु यावेमी मार देंत, देंशा हना “आं खिं डा लाङ्गाम रपो। मिनु आं कली ठेयब सेल्चा कली जाक्ब यहूदा सहर डा मुर नेल्ल आन कली गो इ कली देंशो लोत्र नेल्ल मेको आन कली देनो। लोत्र का यो मफेवो।

3 मिनु मेको नेंशा, मेको नेल्ल आन मरिम्शो लां रे लेत्नीमी, कों? मिनु मेको आन मरिम्शो पशो आ पबर्म मेको आन कली ठेयब श्येत चाक्तीक रे आं थुं फाइक्नुडा, कों? गो मेको आन तार चाक्चशो खतम दुम्तीक मचाक्नुडा, कों? येरमीया १८:८; येरमीया ३६:३

4 गेमी मेको आन कली ‘परमप्रभु यावेम आं लोव्र मार बाक्ब देंशा हना, गे आं लोव्र पशो नोफा दाइशशा मनेंतीनी हना, गो इन डोंइती वोइशशो आं अरेशो मपाइतीनी हना,

5 गो गेना हना यो इन बाक्तीकेम सोइशशो आं गेय पाइब, आं लोव्र पाइब आन लोव्र नोफा दाइशशा मनेंतीनी हना, गेपुकीम मेको रिम्शो पा मनेंशो बाक्तीनी हना, येरमीया २५:४

6 गो मेको खिं कली शिलो खोदेंशो सेल्लुड। मिनु मेको सहर कली रागी नेल्ल डा मुर नेल्ल आन दातेमी सराप राइब सेल्लुड’ देनो” देंत। २राजा २५:९; येरमीया ७:१२

7 मिनु चढेबपुकी, परमप्रभु यावे आ लोव्र पाइबपुकी नु मुर नेल्लेमी परमप्रभु यावे आ खिंम येरमीयामी देंशो लोव्र नेतेक्म।

8 मिनु परमप्रभु यावे आ अरेशो लोव्र नेल्ल, येरमीयाम मुर नेल्ल आन कली नेंपाइक्ने थुमा चोटी चढेबपुकी, परमप्रभु यावे आ लोव्र पाइबपुकी नु मुर नेल्लेम मेको कली ग्याइशशा “गे साइक्चान पुंइसीनेवे।

9 गे मारदे परमप्रभु यावे आ नेम लोव्र पा ‘एको खिं शिलो खोदेंशो दुम्ब। मिनु एको सहर चहिं श्येतथ नु मुर मबाक्तीके दुम्ब’ देने” देंशा, परमप्रभु यावे आ खिंम येरमीया आ एर ओंथ मरिक्थ्री पा मुर देल्लेक्म।

10 मिनु यहूदा डा सरकार आ गेय पाइब मुरपुकीम मेको लोव्र नेंशा, मेकोपुकी पिप आ खिं रे परमप्रभु यावे आ खिंम जाक्तेक्म। मिनु परमप्रभु यावे आ खिं डा नक लाप्चो आ डोंइती बाक्तेक्म।

11 मिनु चढेबपुकी नु परमप्रभु यावे आ लोव्र पाइबपुकीम, सरकार आ गेय पाइब मुरपुकी नु मुर नेल्ल आन कली “एको मुर

कली साइक्वान माल्ब। मारदे हना एकोमी एको सहर आ पर्बम मरिम्शो पा परमप्रभु यावे आ लोत्र पाप्तु। मेको गेपुकीम आंमा यो नेंतीनी” देंतेक्म। प्रेरित ६:१३

12 मिनु येरमीयामी सरकार आ गेय पाइब नु अरु मुर नेल्ल आन कली “परमप्रभु यावेम आं कली एको खिं नु एको सहर आ पर्बम इन नेशो लोत्र पचा कली सोइशो बाक्ब।

13 मुल गेपुकीम इन पतीक नु इन गेय रिम्शो सेलीन। मिनु आंम परमप्रभु यावे, इन परमप्रभु आ अरेशो टिने। मिनु परमप्रभु यावेम इन कली खतम पोक्तीक रे आ थुं लेप्ब। येरमीया ७:३

14 गो इन गुडम बाक्शो बाक्नुड। इन कली मार रिम्शो नु ठीक दुम्बा, मेको पाइय्यीनी।

15 तन्न गे एको तुइक्तीन। गेपुकीम आं कली साइक्तीनी हना, आंम इन तारी, एको सहर तारी नु एकेर बाक्ब आन तारी दोस मताइब मुर का आ हुश शाइक्पाइशो दोस चाक्नीनी। मारदे हना परमप्रभु यावेम इन कली एको लोत्र नेल्ल नेंपाइक्चा कली आं कली सोइशो बाक्त” देंत। प्रस्थान २३:७; मत्ती २७:४, २५

16 मिनु सरकार आ गेय पाइब मुर नु अरु मुर नेल्लेम, चढेबपुकी नु परमप्रभु यावे आ लोत्र पाइब आन कली “एको मुर साइक्चा पुंइसीचा डा मुर ममाइ। एको मुरुम इं कली परमप्रभु यावे, इं परमप्रभु आ नेंम एको लोत्र नेंपाइक्तु” देंतेक्म।

17 मिनु मेको रागी डा शेंब खाल्पा का निक्शी बोक्शा, मेको देल्शा बाक्शो मुर आन कली

18 “यहूदा डा पिप हिज्कीयाह आ पालाम मोरेशेथ डा मीकाहम परमप्रभु यावे आ लोत्र पशो बाक्त। मेकोमी यहूदा डा मुर नेल्ल आन कली ‘मुर नेल्ल आन परमप्रभु यावेम सियोन कली रू खोदेशो पा वाक्सीब। यरूसलेम चहिं फुल्लु तेल्लो खोदेशो दुम्ब। परमप्रभु यावे आ खिं चहिं रवापुकी वाशा सुम्शो डांडा खोदेशो दुम्ब’ देशो बाक्त” देंतेक्म। मीका १:१; मीका ३:१२; येरमीया ९:१०

19 मिनु मेकोपुकीमी “मार, यहूदा डा पिप हिज्कीयाह नु यहूदा डा अरु सुइ मुरुम मेको कली सदमे डा? मिनु मार, परमप्रभु यावे क्येडा हिंशा हिज्कीयाहम मेको आ शिशी ममला डा? मिनु परमप्रभु यावेम मेको आन तार चाक्चशो खतम पोक्तीक रे आ थुं मलेत्ता डा? तन्न गोपुकीम आंम इं तार ठेयब खतम दुम्तीक चाक्चा चिक्चो बाक्तय” देंतेक्म। येरमीया १८:८

20 मेकोपुकी नु अर्को मुर का यो बाक्त। मेकोमी परमप्रभु यावे आ नेंमी लोत्र पाप्तु। मेको किरयथ-यारीमम बाक्ब शेमायाह आ तौ उरीयाह बाक्त। मेकोमी यो मेको रागी नु मेको सहर आस पर्बम येरमीयामी खोदेंशो पा परमप्रभु यावेम मरिम्शो पचशो आ पर्बम लोत्र पाप्तु। यहोसु १:५९

21 मिनु पिप येहो-याकीम नु मेको आ ठेयब मुरपुकी, आ कप्तान नेल्लेम उरीयाह आ पशो लोत्र नेंतेक्म। मिनु पिपम मेको कली साइक्चा माल्तु। तन्न मेको लोत्र नेंशा उरीयाह हित। मिनु प्रोक्शा इजीप्त रागी लत।

22 मो हना यो येहो-याकीममी आकबोर आ तौ एल्लनाथान नु मेको नु अर्को मुरपुकी इजीप्त रागीम सोइक्ताक्व।

23 मिनु मेकोपुकीमी उरीयाह कली इजीप्त रे चाक्तेक्म। मिनु पिप येहो-याकीम आ डोंइती राप्पाइक्तेक्म। मिनु पिपम मेको कली साइक्चा कली तरवार आप्पाइक्तु। मिनु मेको आ बेक्चो रां आइक्च आइक्च मुर आन कली ताइक्तीकेम ताइक्पाइक्तु।

24 तन्न शाफान आ तौ अहीकामम मुल यो येरमीया आ पोन बोक्शा लोत्र पाप्तु। मोपतीके येरमीया साइक्पांइसीचा कली मुर आन गुइम जिम्मा गेचा मपुंइसे। २राजा २२:१२

27

यहूदामी नेबुकदनेसर आ गेय पशो

1 यहूदा डा पिप योसीयाह आ तौ सिदकीयाहम सासन पवा आ डोंइती डा बर्सम परमप्रभु यावेम आं कली लोत्र पाप्तु। २राजा २४:१७-१८

2 परमप्रभु यावेमी मार लोत्र पाप्तु देंशा हना “कुशुल के डोरी नु थरपु डा शी के जुवा का सेलो। मिनु मेको इ शुरम लाम्सो। येरमीया २८:१०

3 मिनु यहूदा डा पिप सिदकीयाह आ बाक्तीके यरूसलेममी जाक्ब लोत्र कुरब आन कली एदोम, मोआब, अम्मोन, टायर नु सीदोन डा पिप आन बाक्तीकेम मेको लोत्र सोइक्तीमी। येरमीया २५:२१-२२

4 मेको आन होत्रप आन कली एको लोत्र पा ‘मुर नेल्ल आन परमप्रभु यावे इस्राएली आन परमप्रभुम गेपुकीम इन होत्रप आन कली

5 एको रागी, एको रागीम बाक्ब मुरपुकी, बस्तु भाव नु जन्तु नेल्ल आन कली आं ठेयब सक्ति नु आं बालम सेल्शो नड। मिनु गो सु कली गेचा दाक्नुड, मेको कली गेनुड। येरमीया १२:१७

6 मुल गेपुकी नु इन रागी नेल्ल आं गेय पाइब बेबीलोन डा पिप नेबुकदनेसर आ गुडम गेता। ब्वाकी डा जन्तु आन कली यो सासन पाइब सेल्ला। येरमीया २५:९; यसैया ४५:१,८; इजीकीएल २६:७; दानीएल २:३८

7 मेको आंम इन रागी आ रिम्शो दुम्ची मजाक्म सम्म रागी रागी नेल्ल डा मुरपुकीम मेको आ तौ नु मेको आ चच आन गेय पचा माल्नीम। मेको नोले शुश रागी नु ठेयब पिपपुकीमी मेको कली आन वाइल सेल्नीम।

8 तन्न तेकोइ रागी तेकोइ राज्य नु पिपम बेबीलोन डा पिप नेबुकदनेसर आ वाइल दुम्चा नु मेको आ जुवा आन शुरम वोइक्ने मबिस्साक्म हना, गो मेको रागी डा मुर आन कली तरवार, अन्काल नु मुर बेक्तीक रोइम सजाइ गेनुडमी। गो मेको आन कली मसाइक्पदुमी सम्म मो पाइनुड’ दे परमप्रभु यावेम देंत।

9 मोपतीके गेपुकी 'बेबीलोन डा पिप आ वाइल दुम्चा माल्नीनी' देंब, इन नोले दुम्ब लोव्र पाइबपुकी, लिंक्यु कोव्रबपुकी, डोमु डा लोव्र शेंबपुकी, टुना मुना नु मन्तर तन्तर पाइक्ब आन लोव्र मनेनीन। येरमीया १४:१३-१४

10 मारदे हना मेकोपुकीमी इन कली देंशो नोले दुम्ब लोव्र जोल बाक्ब। मेको लोव्र पतीके इन रागी रे डोन खेरचा पुंइसीनीनी। गो इन कली खेरनुड। मिनु गेपुकी बेक्नीनी।

11 तन्न तेको रागी आ शुर बेबीलोन डा पिप आ जुवा आगाम वोइक्बा, मेको आ वाइल दुम्बा, मेको रागी डा मुर आन कली गो आन रागीमीन दोचा कोक्चा नु बाक्चा गेनुडमी” दे परमप्रभु यावेम देंत।

12 मिनु गो मेको लोव्र यहूदा डा पिप सिदकीयाह कली देंती। मेको कली “बेबीलोन डा पिप आ जुवा इन शुरम वोतीन। मिनु मेको नु मेको आ मुर आन वाइल दुमीन। मिनु गे ब्रोंइनीनी।

13 परमप्रभु यावेम बेबीलोन डा पिप आ वाइल मदुम्ब, रागी डा मुर आन कली गे तरवार, अन्काल नु मुर बेक्तीक रोइम बेक्चा माल्नीनी। मारदे गे नु इन मुर बेक्चा दाक्नीनी?

14 गेपुकीम 'बेबीलोन डा पिप आ वाइल दुम्चा ममाल्नीनी देंब जोल पा परमप्रभु यावे आ लोव्र पाइब आन लोव्र मनेनीन। मारदे हना मेकोपुकीमी इन कली जोल पना पन बाक्नीम' देंनीनी। येरमीया १४:१४

15 परमप्रभु यावेम 'गो मेको आन कली मसोइक्तुमी। तन्न मेकोपुकीम आं नेंम जोल पा लोव्र पाइनीम। मेको आन लोव्र नेंतीनी हना, गो इन कली एको रागी रे खेरनन्नी। मिनु गे बेक्नीनी। गेपुकी नु इन कली जोल पा लोव्र पाइब मो दुम्नीनी' देंती” देंत।

16 मिनु गो चढेब नु मेको मुर नेल्ल आन कली “परमप्रभु यावेमी 'गेपुकी इन कली जोल पा आं लोव्र पाइब आन लोव्र मनेनीन। मेकोपुकीमी परमप्रभु यावे आ खिं डा ग्योंब नु बोसपुकी रीब पा

बेबीलोन रे चाकसीब' देंनीम। मेकोपुकीमी इन कली जोल पा नोले दुम्ब लोत्र पाइनीम। येरमीया २८:३; २इतिहास ३६:१०

17 मेको आन लोत्र मनेनीन। बेबीलोन डा पिप आ वाइल दुमीने। मिनु गेपुकी ब्रॉइनीनी। मारदे गेपुकीम एको सहर कली मुर मबाक्तीके दुम्पाइक्नीनी?

18 मेकोपुकी थमा पा परमप्रभु यावे आ लोत्र पाइब बाक्तेकम हना नु मेकोपुकी नु परमप्रभु यावे आ लोत्र बाक्त हना, परमप्रभु यावे आ खिंम बाक्शो, यहूदा डा पिप आ खिंम बाक्शो नु यरूसलेममी बाक्शो मार मार बेबीलोन मलदमेक्ल, दे मुर नेल्ल आन परमप्रभु यावे कली पुन्मेक्ल।

19 मारदे हना मुर नेल्ल आन परमप्रभु यावेमी थाम, कांसा के ठेयब चिक्तीके बोस, मेको आ कांसा के नित्तीके नु सहरम लीशो बोस आन पर्बम लोत्र पाप्तु। १राजा ७:१५-३९; २राजा २५:१३-१७

20 मेको बेबीलोन डा पिप नेबुकदनेसरमी यहूदा डा पिप येहो-याकीम आ तौ येकोन्याह माइशो येकोन्याह नु यहूदा नु यरूसलेम डा ठेयब मुर नेल्ल आन कली यरूसलेम रे ग्याइशशा लदमेनु, मेको बोस मलद। येहो-याकीम आ नें २राजा २४:६ योयाकीन बाक्ब। तन्न येरमीया किताबम २२:२४ आ नें कोन्याह बाक्ब। मिनु येरमीया २४:१ येकोन्याह यो देंनीम।

21 मिनु मुर नेल्ल आन परमप्रभु यावे, इस्राएली आन परमप्रभुमी 'आं खिंमी लीशो बोसपुकी, यहूदा डा पिप आ दरवारमी वोइशो बोसपुकी नु यरूसलेममी प्रॉइशो ग्योंबपुकी बाक्नीम।

22 मेको नेल्ल आन कली बेबीलोनम चाक्दीत्नीम। मिनु गो मेको आन पर्बम मकोत्रडु सम्म मेको मेकेर बाक्चा माल्नीम' देंशो बाक्ब। मिनु 'गो मेको आन कली लेंशा लेशशा चाक्नुडमी। मिनु लेंशा आन बाक्तीकेमी वोइक्नुडमी' दे परमप्रभु यावेमी देंत" दे माइक्ती। एज्रा १:१,११

28

हनन्याहम जोल पशो

1 मेको बर्समीन यहूदा डा पिप सिदकीयाहम सासन पशो ४ बर्स ५ महिनाम गिबोनम बाक्ब अज्जुर आ तौ परमप्रभु यावे आ लोव्र पाइब हनान्याहम परमप्रभु यावे आ खिम चढेब नु मुर नेल्ल आन डोंइती लोव्र पा, आं कली २इतिहास १:३, १३

2 “मुर नेल्ल आन परमप्रभु यावे, इस्राएली आन परमप्रभुमी ‘गो बेबीलोन डा पिप आ जुवा जिकता।

3 बेबीलोन डा पिप नेबुकदनेसरमी आं खिम डा मार मार नु ग्योंब एकेर रे बेबीलोनम लाइशो बाक्मे, मेको नेल्ल बर्स निक्शी क्येडा डोंइती गो लेशशा एक चाक्नुडमी। येरमीया २७:१६

4 मिनु गो यहूदा डा पिप येहो-याकीम आ तौ येकोन्याह नु यहूदा रे ग्याइशशा लाइक्चा पुंइसीशो नेल्ल आन कली बेबीलोन रे चाक्नुडमी। मारदे हना गो बेबीलोन डा पिप आ जुवा जिकशा गेनुड’ ” दे परमप्रभु यावेमी देंत। येरमीया २७:२०

5 मिनु नोले परमप्रभु यावे आ लोव्र पाइब येरमीयाम परमप्रभु यावे आ खिम राप्शा बाक्शो चढेब नु मुर नेल्ल आन डोंइती मेको परमप्रभु यावे आ लोव्र पाइब हनान्याह कली

6 “आमेन, परमप्रभु यावेम मो पवल। परमप्रभु यावेमी इ पशो लोव्र खबल। परमप्रभु यावे आ खिम डा मार मार ग्योंबपुकी नु ग्याइशशा लाइक्चा पुंइसीशो नेल्ल आन कली बेबीलोन रे लेशशा चाक्गल।

7 तन्न इ डोंइती नु मुर नेल्ल आन डोंइती नेंचा डा पा आं देंशो लोव्र नेनो।

8 गे नु गो इस डोंइती जाक्ब साइ डा परमप्रभु यावे आ लोव्र पाइबपुकीमी शुश रागी नु ठेयब राज्य आन पर्बम लडाइ, अन्काल नु मुर बेक्तीक रोइ आन पर्बम लोव्र पामे बाक्त।

9 तेको परमप्रभु यावे आ लोव्र पाइबम थुं नाइश्शा बाक्तीक आ पबर्म लोव्र पवा, मेको आ लोव्र गाप्त हना ला, मेको थमा पा परमप्रभु यावेम सोइश्शो आ लोव्र पाइब बाक्ब, दे तुंडसीब” दे माइक्तु। ब्यवस्था १८:२१-२२

10 मिनु नोले परमप्रभु यावे आ लोव्र पाइब हनान्याहम परमप्रभु यावे आ लोव्र पाइब येरमीया आ शुर रे मेको जुवा शोलशा जिक्तु।

11 मिनु हनान्याहम मुर नेल्ल आन डोंइती “परमप्रभु यावेमी मार देंत देंशा हना ‘गो मोपा बर्स निकशी क्येडा डोंइती रागी रागी डा मुर नेल्ल आन शुर रे बेबीलोन डा पिप नेबुकदनेसर आ जुवा जिकशा गेनुड’ ” देंत। मेना परमप्रभु यावे आ लोव्र पाइब येरमीया आ लां खोइक्तु। येरमीया २९:१०

12 मिनु परमप्रभु यावे आ लोव्र पाइब हनान्याहम, परमप्रभु यावे आ लोव्र पाइब येरमीया आ शुर डा जुवा जिकशा गेवा आ इच्का नोले परमप्रभु यावेम येरमीया कली लोव्र पाप्तु।

13 मार लोव्र पाप्तु देंशा हना “लशा, हनान्याह कली परमप्रभु यावेमी इ कली मार देंत देंशा हना ‘गे शी के जुवा जिकतीवी। तन्न गो मेको आ पा डा फलाम के जुवा चाक्नुड’ देशो बाक्ब मतो” देंत।

14 मिनु मुर नेल्ल आन परमप्रभु यावे, इस्राएली आन परमप्रभुमी “बेबीलोन डा पिप नेबुकदनेसर आ वाइलीम वाइल दुम्पाइक्चा कली गो रागी नेल्ल डा मुर नेल्ल आन शुरम फलाम के जुवा लाप्नुडमी। थमा पा, मेको आ वाइलीम वाइल दुम्नीम। गो ब्वाकी डा जन्तु आन कली यो आ सासनमी गेतामी, देशो बाक्ब, देनो” देंत। ब्यवस्था २८:४८; येरमीया २७:६

15 मिनु परमप्रभु यावे आ लोव्र पाइब येरमीयाम, परमप्रभु यावे आ लोव्र पाइब हनान्याह कली “ए हनान्याह, नेनो। परमप्रभु यावेमी इ कली मसोइक्त। मिनु गे एको मुर आन कली जोल लोव्र पा थमा सुइक्पाइश्शो बाक्नेवे।

16 मोपतीके परमप्रभु यावेम ‘गो इ कली एको रागी रे तिल्या

चिकशो बाक्नुड। गे एको बर्सम बेक्नेवे। मारदे हना गे परमप्रभु यावे कली काइ मटिथु जोल लोत्र पाप्तीवी' देंत" देंत।

17 मिनु मेको बर्स डा ७ महिनाम जोल पा परमप्रभु यावे आ लोत्र पाइब हनान्याह बेक्त।

29

येरमीया आ ब्रेक्स

1 परमप्रभु यावे आ लोत्र पाइब येरमीयामी, यरूसलेम डा ग्याइशशा लाइक्चा पुंडसीशो आन दाते डा ब्रोंइशा लीशो खाल्पा आन कली एको चिठी ब्रेक्शा सोइक्ताक्व। बेबीलोन डा पिप नेबुकदनेसरम यरूसलेम रे चढेब, परमप्रभु यावे आ लोत्र पाइब नु मुर नेल्ल आन कली ग्याइशशा बेबीलोन लाइशो बाक्त।

2 पिप येकोन्याह आ ममा, दरवार डा ठेयब मुरपुकी, यहूदा नु यरूसलेम डा सरकार आ गेय पाइब, रिम्शो पा मारेइ मारेइ सेल्स जोल्ब मुर नु तुप्तीलपुकी यरूसलेम रे ग्याइशशा लाइक्चा पुंडसीमा नोले मेको चिठी ब्रेक्शो बाक्ब। येहो-याकीम आ नें २राजा २४:६ योयाकीन बाक्ब। तन्न येरमीया २२:२४ आ नें कोन्याह बाक्ब। मिनु येरमीया २४:१ येकोन्याह यो देंनीम। २राजा २४:१४-१५

3 मेकोमी मेको चिठी शाफान आ तौ एलासाह नु हिल्कीयाह आ तौ गेमारायाह आस गुडम सोइक्ताक्व। मेको यहूदा डा पिप सिदकीयाहम पिप नेबुकदनेसर कली गेन, दे बेबीलोनम सोइशो बाक्त। मेको चिठीम मार ब्रेक्शो बाक्त देंशा हना,

4 मुर नेल्ल आन परमप्रभु यावे, इस्राएली आन परमप्रभुमी मार ब्रेक्पाइशशा बाक्त, देंशा हना “यरूसलेम रे बेबीलोनम ग्याइशशा लाइक्चा पुंडसीशो नेल्ल आन कली

5 गेपुकी मेकेर ख्वं सेल्शा बाक्कीन। रूम मार मार शोक्शा जने।

6 ग्युंबे पा, तमी तौ थिने। इन तौ आन कली चाइमी चाक्कीन। इन तमी आन कली ग्युंबे पा गेने। मिनु मेकोपुकीमी तमी तौ थीमेक्ल। मेकेर गेपुकी सोशा बोशा शुश दुमीन। जाम्शा मलने।

7 गो इन कली ग्याइशशा लाइक्पाइशशो सहर कली रिम्शो मिम्तीन। मिनु मेको आ पर्वम परमप्रभु यावे कली पुनीन। मारदे हना मेको कली रिम्शो दुम्चा इन कली यो रिम्शो दुम्चा बाक्ब” देंशो बाक्त।

8 मुर नेल्ल आन परमप्रभु यावे, इस्राएली आन परमप्रभुमी “इन दातेम बाक्ब परमप्रभु यावे आ लोत्र पाइबपुकी नु लिंक्यु कोत्रबपुकीम इन कली जोल पा थमा मसुइक्पदमेक्ल। आन डोमु डा लोत्र मनेनीन। येरमीया १४:१४

9 मेकोपुकीमी जोल पा आं नेमी नोले दुम्ब लोत्र पाइनीम। मेको आन कली गो मसोइक्तुमी” दे परमप्रभु यावेम देंशो बाक्ब।

10 परमप्रभु यावेमी “बेबीलोनम मो पशो ७० बर्स गाम नोले गो इन बाक्तीक जाक्नुड। मिनु इन कली एको रागीम लेशशा चाक्नुड, दे आं शिशी पा देंशो लोत्र खाप्नुड। येरमीया २५:११-१३

11 मारदे हना गो इन पर्वम शुश मिम्शो बाक्नुड। गो मेको मिम्शो तुइक्नुड। आं मिम्शो इन कली रिम्शो दुम्चा कली बाक्ब। मरिम्शो दुम्पाइक्चा कली ममाइ।

12 गेपुकीम आं नेक्था जाक्शा पुंडनीनु, गो इन पुंडशो नेंनुड।

13 गेपुकीम इन थुं नेल्लेमी आं कली माल्तीनी हना, थित्नीनी। येरमीया ३०:३; ब्यवस्था ४:२९; यसैया ५५:६

14 मिनु गो इन कली थिप्पांडसीनुड। इन जाम्शो शोप इन कली गेनुड। गो इन कली ग्याइशशा लाइक्पाइशशो रागी नेल्ल रे खुप्नुड। तेको रागी रे इन कली ग्याइक्पदु, मेको रागीमी लेशशा चाक्नन्नी” देंत। येरमीया ३०:३; येरमीया ३३:२६

15 गेपुकीम “परमप्रभु यावेम आंइ पर्वम बेबीलोनमी आ लोत्र पाइबपुकी योत्रतु” देंतीनी।

16 परमप्रभु यावेमी दाऊद आ नित्तीकेम निप्ब पिप नु एको सहरम बाक्ब मुर नेल्ल, इन नेक्था डा मुरपुकी नु ग्याइशशा लाइक्चा मपुंडसीशो आन पर्वम मार देंत देंशा हना,

17 मुर नेल्ल आन परमप्रभु यावेमी “गो मेको आन पर्बम तरवार, अन्काल नु मुर बेक्तीक रोइ सोइक्नुड। मिनु गो मेको आन कली राक्शो फोव्रशी गेडा खोदेशो सेल्लुडमी। मिनु मेको थाम्पा राक्शा ब्वचा मदुम्चा डा बाक्नीम। येरमीया २४:८-१०

18 गो मेको आन कली तरवार, अन्काल नु बेक्चा डा रोइमी खेदा पाइनुडमी। मिनु गो मेको आन कली राज्य नेल्लेमी शुश हिंचा डा सेल्लुडमी। मेकोपुकी आं खेरशो रागी नेल्ल आन दातेमी, सराप पाइक्तीके, शुश हिंतीके, शुक्शी पाइक्तीके नु मुने तोक्तीके सेल्लुडमी। ब्यवस्था २८:३७

19 मारदे हना मेकोपुकीमी आं लोव्र मनेनेम। गो आं गेय नु आं लोव्र पाइब आन कली सोइक्ना सोइक्न बाक्ती हना यो मेको आन लोव्र मनेनेम” दे परमप्रभु यावेमी देंत। येरमीया २५:४

20 मोपतीके गे यरूसलेम रे बेबीलोनम सोइश्शो ग्याइश्शा लाइक्चा पुंइसीशो मुल परमप्रभु यावे आ लोव्र नेनीन।

21 मुर नेल्ल आन परमप्रभु यावे, इस्राएली आन परमप्रभुमी “कोलायाह आ तौ आहाब नु मासेयाह आ तौ सिदकीयाहम आं नेंमी जोल पाम्ताक्स। ‘गो मेको आस कली बेबीलोन डा पिप नेबुकदरेसर आ गुइमी गेनुडसी। मिनु मेकोमी इन डोंइती मेको आस कली साइक्ब।

22 मेको आस पतीकेन यहूदा रे बेबीलोनम ग्याइश्शा लाइक्चा पुंइसीशो आन दातेमी सराप पाइनीम। परमप्रभु यावेम इ कली सिदकीयाह नु आहाब आस कली खोदेशो सेलल। बेबीलोन डा पिप नेबुकदनेसरमी मेको आस कली मीम हुम्शो बाक्त’ देंनीम।

23 मारदे हना मेको निक्शीमी इस्राएलम थम ग्रांग्रा दिशो गेय पशो बाक्ताक्स। मेको निक्शी आस नेक्था डा मुर आन मीश नु इप्शो बाक्ताक्स। मिनु मेकोम आं मअरेशो लोव्र पाम्ताक्स। गो मेको नेल्ल तुइक्नुड। मिनु गो मेको आ सांकछी बाक्नुड” दे परमप्रभु यावेम देंत।

शेमायाह कली लोव्र सोइश्शो

24 मिनु गे नेहेलाम डा शेमायाह कली

25 “मुर नेल्ल आन परमप्रभु यावे, इस्राएली आन परमप्रभुमी ‘गे इ नेमी यरूसलेम डा मुर नेल्ल आन कली, मासेयाह, चढेब आ तौ सेफन्याह नु अरु चढेब नेल्ल आन कली चिठी ब्रेक्ताक्वी। गे सेफन्याह कली येरमीया २१:१

26 परमप्रभु यावेम इ कली चढेब येहो-यादा आ पा डा चढेब सेल्लु’ मोपतीके गे परमप्रभु यावे आ खिं डा ठेयब मुर दुम्शा, मेको जिम्मा ताक्नेवे। गे मेकेर आन निप्स ग्राइश्शो नु जोल पा परमप्रभु यावे आ लोव्र पखु पाइब आन कली ठेंडरो थोक्शा, आन शुरम फलाम क्युक्शा वोतो। येहो-यादा कली यो-यादा यो ब्रेक्शो बाक्ब। इजीकीएल ९:७; येरमीया २०:२

27 मिनु गे ‘इन दाते डा परमप्रभु यावे आ लोव्र पखु पाइब अनाथोथ डा येरमीया कली मारदे महुइक्तीनी?’

28 मेकोमी बेबीलोनम आंइ कली ओदेशो लोव्र सोइक्ताक्व। गे शुश बर्स मेकेर बाक्चा माल्नीनी। मोपतीके खिं सेल्ला बाक्कीन। मिनु रूम मार मार शोक्शा जने” दे ब्रेक्शो बाक्त।

29 मिनु चढेब सेफन्याहम मेको चिठी पढेशा परमप्रभु यावे आ लोव्र पाइब येरमीया कली नेंपाइक्तु।

30 मिनु मेना परमप्रभु यावेम येरमीया कली लोव्र पाप्तु।

31 नेहेलाम डा शेमायाह आ पबर्म मार लोव्र पाप्तु देशा हना “ग्याइश्शा लाइक्चा पुंइसीशो नेल्ल आन कली एको लोव्र सोइक्तो। शेमायाहम इन कली नोले दुम्ब लोव्र पाप्तु। तन्न गो मेको कली मसोइक्तु। मेकोमी आं लोव्र पा, इन कली जोल लोव्रमी थमा सुइक्पाइक्तु।

32 मोपतीके गो नेहेलाम डा शेमायाह नु मेको आ चच युइ आन कली सजाइ गेनुडमी। मेको आ मुर सुइमी आं मुर रिम्शो दुम्शो तचा मताइनीम। मारदे हना मेकोमी आं कली मटिथु आं पबर्म दूली लोव्र

पाप्तु” दे परमप्रभु यावेमी येरमीया कली देंत।

30

इस्त्राएल कली लेंशा सेल्शो

1 मिनु परमप्रभु यावेम येरमीया कली लोव्र पाप्तु।

2 परमप्रभु यावे, इस्त्राएली आन परमप्रभुमी येरमीया कली मार लोव्र पाप्तु देंशा हना “गो इ कली देंशो लोव्र नेल्ल किताबमी ब्रेक्तो।

3 आं मुर इस्त्राएली नु यहूदा डा मुर आन थुं लेशशा नाइक्चा गेतीक नाक्त थमा पा जाक्ब। मिनु गो मेको आन किकी पिपी आन कली गेशो रागीम लेंशा लाइक्नुडमी। मिनु मेकोपुकीमी मेको रागी आंम के सेल्नीम” देंत। येरमीया २९:१४

4 इस्त्राएल नु यहूदा आस पर्वम परमप्रभु यावे आ लोव्र मार बाक्त देंशा हना

5 “शुश हिंब नु ग्रीब आन सेंदा नेंसीब। थुं नाइश्शा बाक्तीक जाम्त।

6 मार, वोंइश मुरुम आल थिने चाप्नीमी डा? दे हिल्लो पने। मारदे वोंइश मुर नेल्ल सुत्केरी रोइ पशो खोदेंशो पा आन गुइम आन क्रातो दिप्शो ताइनुडमी? मारदे मुर नेल्ल आन कुल बुश दुम्शो बाक्नीमी?

7 आबी, मेको नाक्त दोदेंशो हिंचा डा नाक्त दुम्बा। मेको नाक्ती खोदेंशो अर्को तेकोइ नाक्ती मदुम्नीम। मेको नाक्ती याक्ब कली शुश हिंचा डा श्येत जतीक नाक्ती दुम्ब। तन्न मेको श्येत रे प्रोंइचा पुंडसीब” देंत। योएल २:११; सेफन्याह १:१४-१५

8 मुर नेल्ल आन परमप्रभु यावेमी “गो मेको नाक्ती मेको आन बला रे जुवा जिक्नुड। मिनु गो मेको आन कली फ्रेंशो रे प्रोंइनुडमी। मिनु अर्को रागी डा मुरपुकीम मेको आन कली गेनायो वाइल मसेल्नीम। येरमीया २३:५; येरमीया २७:१२; इजीकीएल ३४:२३; होसे ३:५

9 तन्न मेकोपुकीम परमप्रभु यावे, आन परमप्रभु, आं कली नु आं सेल्लो पिप दाऊद आ गेय पाइनीम।

10 गे आं गेय पाइब याकूब महिनो। गे इस्राएल सुर्ता मपावो। गो इ कली डोन रागी रे चाक्नुड। इ आल आन कली ग्याइशशा लाइशशा रागी रे प्रोंइशा चाक्नुड। याकूब कली लेंशा थुं नाइशशा, हेम्मा पा बाक्तीक दुम्ब। मेको कली सुइम हिंच कोंइने मचाप्नीम। येरमीया ४६:२७; यसैया ४३:५-६

11 मारदे हना गो इ कली प्रोंइचा कली गे नु बाक्नुड। इन कली फ्रशा वोइशशा रागी रागी डा मुर नेल्ल आन कली साइक्नुडमी। तन्न गो इ कली गेनायो मक्याम्नुड। गो इ कली ठीक सजाइ गेनुड। गो इ कली थमा पा सजाइ मगेशु, मप्रोंइनुड” दे परमप्रभु यावेमी देंत। येरमीया १०:२४; ब्यवस्था ८:५

12 मिनु परमप्रभु यावेम “इ गार मसाब। मेको मरिम्शो बाक्ब। येरमीया १५:१८

13 सुइ इ पोन मबोक्ब। इ गार सापाइक्तीक ओरुत्ती मबाक्ब। इ कली सापाइक्तीक मारेइ मबाक्ब।

14 इ वारच नेल्लेम इ कली प्रेने थुम्तेकम। मेकोपुकीमी इ कली गेनायो ममिम्नीम। गो इ ठेयब दोस तशो नु इ शुश पाप आ पर्बम पतीके जोरी सत्रुम खोदेंशो पा तुप्तन। मिनु शिशी मपाइक्बम खोदेंशो पा गो इ कली सजाइ गेतन।

15 मारदे गे इ मसाब गार आ पर्बम वाइ ब्रेशशा डाक्नेवे? इ खाइशशा मसाब। मारदे हना इ दोस तशो नु इ शुश पाप पशो आ पर्बम गो इ कली मो पाइशशा बाक्नुड।

16 मोपतीके गे इ कली दाक्ब नेल्ल दाक्चा पुंइसीनीम। इ जोरी सत्रु नेल्ल ग्याइशशा लाइक्चा पुंइसीनीम। इ कली रोइक्बपुकी रोइक्चा पुंइसीनीम। इ कली खतम पोक्ब आन कली गो खतम पोक्नुडमी। यसैया ३३:१; इजीकीएल ३९:१०

17 गो इ कली लेंशा डोंइती डा खोदेंशो मारेइ मदुम्शो सेल्लुड। मिनु इ गारपुकी सापाइक्नुडमी। मारदे हना इ कली ‘प्रोंइचा

पुंइसीशो नु सुइम मिम्चा मपुंइसीशो सियोन' देंनीम" दे परमप्रभु यावेमी देंत। येरमीया ३३:६; यसैया ५७:१८-१९

18 परमप्रभु यावेमी "गो याकूब आ ताम्बु डा शोंप लेंशा गेनुड। मिनु मेको आ बाक्तीक रागी कली शिशी पाइनुड। मेको सहर डा ब्रेशो नेल्ल आ डांडामी लेंशा सेल्सीब। मिनु आ दरवार लेंशा डोंइती डा आ बाक्तीकेमी सेल्सीब।

19 मेकेर 'गे रिम्शो पाइब बाक्नीनी' दे कुम्सो पशो नु थुं नाइशशा बाक्शो ग्येशो सेंदा नेंसीब। गो मेको आन कली शुश सेल्लुडमी। मिनु मेकोपुकी इच्का का ला मदुम्नीम। गो मेको आन कली मान ताइब सेल्लुडमी। मिनु मेको आन कली सुइम शुक्शी मपाइनीम।

20 मेको आन आलपुकी डोंइती डा खोदेशोन दुम्नीम। मिनु मेको आन गुम्तीके आं डोंइती बाक्ब। मेको आन कली दिप्ब नेल्ल आन कली गो सजाइ गेनुडमी।

21 मेको आन कली हुकुम पाइब मेको आन दाते डा का दुम्ब। मेको आन कली सासन पाइब आंम आन मुर बाक्ब। गो मेको कली आं नेक्था चाक्नुड। मिनु मेको आं नेक्था जाक्ब। मारदे हना आं नेक्था आंमा सु जाक्बा डा?" दे परमप्रभु यावेमी देंत। येरमीया ३०:९

22 परमप्रभु यावेम "गे आं मुर दुम्नीनी। मिनु गो इन परमप्रभु दुम्नुड" देंत। येरमीया ७:२३

23 नेनीन, परमप्रभु यावे आ गाइशशोम फश गिवार बोक्ब। मेको आ अरेशो मटीब आन पियाम जुक्ब। येरमीया २३:१९-२०

24 परमप्रभु यावे आ थुंम मिम्शो मगाम्म सम्म मेको आ चुरशो मनांइसीब। गेपुकीमी नोले डा नाक्ती मेको रुपनीनी।

31

परमप्रभुम इस्राएल कली दाक्शो

1 परमप्रभु यावेमी “गो इस्राएली आन खिं नेल्ल डा मुर आन परमप्रभु दुम्नुड। मिनु मेकोपुकी आं मुर दुम्नीम” देशो बाक्ब। येरमीया ७:२३

2 परमप्रभु यावेमी “तरवार रे ब्रोंइशो मुरपुकीम गोरशो रागीम शिशी ताम्तेक्म। इस्राएल कली नाइक्पाइक्चा दाक्ताक्व हना,

3 परमप्रभु यावे डोन आ बाक्तीके रे जाक्ब। मिनु मेकोमी ‘गो इ कली गेना हना यो लीब दाक्तीकेम दाक्ताक्न। मोपतीके गो इ कली दाक्चा मप्रोंइनुड।

4 गो इ कली लेंशा सेल्लुड। गे लेंशा सेल्चा पुंडसीनेवे। मिनु गे कन्ने मीश आल, इस्राएल, गे लेंशा इ खैजडी शेशा, ग्येरसीशोपुकी नु सिल पथ लाइनेवे।

5 गे सामरीया डा डांडा मेर लेंशा अडगुर खुम्नेवे। मेको रू डा गेय पाइबपुकीम खुम्नीम। मिनु मेको आ फल जशा ग्येरसीनीम।

6 मेना एफ्राइम पहाड डा खाल पाइबपुकीम जाक्कीन, गोपुकी सियोनम बाक्ब परमप्रभु यावे, इं परमप्रभु आ बाक्तीक लय’ दे ब्रेत्तीक नाक्त जाक्ब” दैत।

7 परमप्रभु यावेमी “याकूब आ पर्बम ग्येरशा ठेयब सेंदा पा कुम्सो पने। मिनु रागी रागी डा नेल्ल क्येडा ठेयब रागी आ पर्बम ठेयब सेंदा पा ग्रीडीन। मिनु परमप्रभु यावेम आ मुर आन कली श्येत रे प्रोंइतु। इस्राएल डा लीशो आन कली प्रोंइतु।

8 नेनीन, गो मेको आन कली उत्तर डा रागी रे चाक्नुडमी। मिनु गो मेको आन कली रागी डा सुर रे खुप्नुडमी। मेकोपुकी आन दातेमी मिक्च मताइब, गुइ खोइल मदुक्ब, कोव्रज कुरशो मीश मुर नु सुत्केरी रोइ पशो मीश मुर यो बाक्नीम। मेको आन ठेयब हुल लेशशा एकेर जाक्चा माल्नीम। यसैया ३५:८-१०; इजीकीएल ३४:१६

9 मेकोपुकी डाक्ना डाक्न जाक्नीम। गो मेको आन कली शिशी पा लेशशा चाक्नुडमी। गो मेको आन कली खोला आ नेक्था गाक्पाइक्नुडमी। दाइल मपांडसीचा डा पित्थ लांम खुल्लुडमी।

मारदे हना गो इस्राएल आ आफ दुम्शो बाक्नुड। मिनु एफ्राइम आं डोंइती जरमेशो तौ बाक्ब।

10 गे रागी रागी डा मुरपुकी, परमप्रभु यावे आ लोव्र नेनीन। डोन डा समुन्द्र आ नेक्था डा रागी नेल्ल आन कली नेंपतीन। मेको आन कली 'इस्राएल कली ब्रपाइक्बम मेको आन कली गुम्पाइक्ब। मिनु गोठलाम आन बगाल आन कली खाल पशो खोदेशो पा, मेकोमी इस्राएली आन कली कोव्रब' देंत।

11 मारदे हना परमप्रभु यावेम याकूब आ मुर आन कली प्रोंइतु। मिनु मेकोम आन कली आन क्येडा बोल्यो मुर आन गुइ रे प्रोंइतु।

12 मेकोपुकी जाक्शा इर सियोनम ठेयब सेंदा पा कुम्सो पाइनीम। मेकोपुकीम परमप्रभु यावे आ रिम्शो पशो आ पर्बम ग्येरनीम। अन्न, अडगुर शांबु नु तेल तशा, क्यारश भेडा आन पाठा नु बी ब्यफ आन कली तशा ग्येरनीम। मेको ब्वाक्कुम जिश्शो फल फुल रू खोदेशो दुम्नीम। मेकोपुकी लेंशा गेनायो सुर्ता मपाइनीम। येरमीया ५८:१

13 मेना ठिटी मीश मुर ग्येरशा सिल पाइनीम। ठिटा नु खाल्पा ग्येरनीम। गो मेको आन रोंका पतीके ग्येरतीकेम फाइक्नुड। गो मेको आन थुं बार पाइश्शा, सुर्ता पतीक आ पा डा ग्येरतीक थुं गेनुडमी।

14 गो चढेब आन कली शुश गेशा रूपाइक्नुडमी। मिनु आं मुरपुकी आं शुश गेशोम रूशा ग्येरनीम” दे परमप्रभु यावेम देंत।

15 परमप्रभु यावेम “रामाम सेंदा का नेंसाक्व। मेको रोंका पशो नु हिशेक पा डाक्शो बाक्ब। राहेल आ आल आन पर्बम डाक्ब। मेको लेम्शोनु, मबिस्से। मारदे हना मेको आ आल बेक्तेक्म” देंत। उत्पत्ती ३५:१६-२०; १सामुएल १०:२; मत्ती २:१८

16 परमप्रभु यावेमी “डाक्चा नाइक्तीन। इन मिक्च रे प्रेक्कु मतोककीन। मारदे हना इन गेय डा इनाम ताइनीनी। मेको आन जोरी सत्रु आन रागी रे लेशशा जाक्नीम।

17 नोले इन रिम्शो दुम्तीक लां कोवनीनी। इन तमी तौ आंम आन रागीम लेशशा जाक्नीम” देंत।

18 परमप्रभु यावेम “गो एफ्राइम आ डाक्शा पुंइशो नेंता” देंत। मिनु एफ्राइममी “गे आं कली शेंताक्यीनी। गो इन शेंशो रुप्ता। गो मटीब बोहोर खोदेंशो बाक्ती। आं कली लेत्चा गेयीनी। गो लेत्चा ताइनुड। मारदे हना गे परमप्रभु यावे, गे आं परमप्रभु बाक्नीनी।

19 गो नोले शोंइसीशा, इन गे लेत्ती। आं हेंथे पशो तुइक्तु नोले आं कुचु तुप्ता। गो मुने दोक्ती। मारदे हना गो आं ठिटा ना डा पाप कुरशो बाक्ती” दे डाक्शा देंत।

20 मिनु “मार, एफ्राइम आं दाक्शो तौ ममाइ डा? मेको आ पर्बम गो मग्येरनुडा? गो मेको कली हुइक्ताक्ड हना यो, मेको कली मिम्ना मिम्न बाक्ती। मोपतीके गो मेको कली मुल सम्म दाक्नुड। गो मेको कली थमा पा शिशी पाइक्नुड” दे परमप्रभु यावेम देंत। यसैया ४९:१५; होसे ११:८

21 लां तुइक्तीक चिन्ड वोतो। लां कोंइतीक थाम खुक्को। गे तेको ठेयब लां रे लाइनेवे, मेको लां रिम्शो पा मिम्तो। गे कन्ने मीश आल इस्राएल, लेतो। इ सहरम लेतो।

22 गे काइ मटीब तमी, गे गेना सम्म रिम्नेवे? मारदे हना परमप्रभु यावेम मेको रागी डा मुर आन पशो नक सेल्लु। मेको मीश मुरुम वोंइश मुर कली दाक्ब।

23 मुर नेल्ल आन परमप्रभु यावे, इस्राएली आन परमप्रभुमी “गो मेको आन शोंप लेशशा गेता हना, मेकोपुकीमी लेंशा यहूदा रागी नु मेको आ सहरपुकीम ‘गे ठीक पाइब नु परमप्रभु यावे आ डांडा, परमप्रभु यावेमी इ कली आसीक गेवल’ देंनीम। जकरिया ८:३

24 यहूदा नु मेको आ सहर नेल्ले काथा बाक्नीम। रू डा गेय पाइब नु आन बगाल नु हिरब गोठला नेल्ल काथा बाक्नीम।

25 गो दशो आन कली लेंशा बोल्यो सेल्लुडमी। मिनु थशो आन कली लेंशा बोल गेनुडमी” देंत।

26 गो ओशोमीन सेंसाकयी। मिनु एर ओंथ कोव्रशा, गो रिम्शो पा इप्ती, दे तुइक्ताकड।

27 मिनु परमप्रभु यावेमी “गो इस्राएल आ खिं डा मुर, यहूदा आ खिं डा मुर नु क्यारश भेडा, बी ब्यफ आन कली सोशा बोशा दुम्पाइक्तीक नाक्त थमा पा चाक्नुड।

28 गो दोपा मेको आन कली तुल्चा, प्रेत्या, ताइक्चा नु खतम पोक्चा कली मरिम्शो पडा, मोपा गो मेको आन कली सेल्चा नु खुम्चा कली कोव्रनुड। येरमीया १:१०

29 मेको नाक्ती मुरपुकीम लेंशा ‘आम आफोम ग्युरशो अडगुर ब्वाम्तेक्म। मिनु आन आल आन खुइ ग्रिम्तेक्म’ मदेनीम। इजीकीएल १८:२; प्रस्थान २०:५; बिलाना ५:७

30 तन्न मुर नेल्ल आन पाप आ पर्बम बेक्नीम। सुम ग्युरशो अडगुर ब्वाइबा, मेको आ खुइ ग्रिम्ब” देंत।

31 परमप्रभु यावेमी “गो इस्राएल आ खिं डा मुर नु यहूदा आ खिं डा मुर नु नक कबल का पाइनुड। मेको नाक्ती थमा पा जाक्ना जाक्न बाक्नीम। हिब्रू ८:८-१२

32 मेको कबल मेको आन किकी पिपी आन कली इजीप्त रे गुंडची ना पशो कबल खोदेशो ममाइ। गो मेको आन वोंइश खोदेशो बाक्ती हना यो, मेकोपुकीमी मेको कबल मखबेम।

33 तन्न इस्राएल आ खिं डा मुर नोले डा नाक्ती डा कबल मार बाक्त देंशा हना, गो आं अरेशो मेको आन थुंम वोइक्नुड। मिनु आन थुंम मेको ब्रेक्शा गेनुडमी। मिनु गो मेको आन परमप्रभु दुम्नुड। मिनु मेकोपुकी आं मुर दुम्नीम। इजीकीएल ११:१९; हिब्रू १०:१६-१७; येरमीया ७:२३

34 मेना रे परमप्रभु यावे कली तुइक्तीन, दे मुर कामी अर्को कली मशेंनीम। मारदे हना आइक्च रे ठेयब नेल्लेम आं कली तुइक्नीम। गो मेको आन मरिम्शो पशो माफ गेनुडमी। मिनु लेंशा गेनायो मेको आन पाप ममिम्नुड” दे परमप्रभु यावेमी देंत। येरमीया ३३:८; यसैया

४३:२५; रोमी ११:२६-२७

35 मेको परमप्रभु यावेम नाक्ती हाम्सो सेल्चा कली नां वोइक्तु। मिनु तास्ला आ लां कोंइताक्व। नाक्दो हाम्सो सेल्चा कली सोरुल वोइक्तु। मेकोमी समुन्द्र आ छाल पोक्चा कली शाक्तु। मेको आ नें मुर नेल्ल आन परमप्रभु यावे बाक्ब।

36 मिनु परमप्रभु यावेमी “आं डोंइती नां, तास्ला नु सोरुल जाम्तेक्म हना ला, इस्राएली यो आं डोंइती रागी का मदुम्नीम” देंत। येरमीया ३३:२५; रोमी ११:१

37 परमप्रभु यावेमी “सरीड कली पुक्ने जाप्त हना, रागी आ जग माल्शा गुंइने चाम्साक्व हना, ला गो इस्राएल आ आल आन कली तिल्लुडमी” देंत।

38 परमप्रभु यावेम “हानानेल आ लाइशो खिं रे सुर डा ठेयब लाप्चो सम्म आं नेंम लेंशा सहर सेल्ल्तीक नाक्ती थमा पा जाक्ना जाक्न बाक्नीम।

39 पुक्तीक डोरी मेको रे पा गारेब डा डांडा सम्म जाक्दीप्ब। मिनु मेको रे हिरशा गोआह सम्म जाक्दीप्ब।

40 बेक्शो मुर आन बेंसी नेल्ल पुलु ताइक्तीक दिंम नु किद्रोन कोल्सा सम्म डा रू नेल्ल नु शारा लाप्चो डा कुना सम्म परमप्रभु यावे के दुम्ब। मिनु मेको गेनायो तुल्शा खतम मपोक्सीब” देंत।

32

येरमीयामी रू ग्याप्शो

1 परमप्रभु यावेम येरमीया कली लोव्र पाप्तु। मेना यहूदा डा पिप सिदकीयाहम सासन पशो १० बर्स दुम्मेनु, नेबुकदरेसर आ सासन पशो १८ बर्स दुम्शो बाक्त।

2 मेना बेबीलोन डा पिप आ लडाइ पाइबपुकीम यरूसलेम पुम्ताक्म। परमप्रभु यावे आ लोव्र पाइब येरमीया चहिं यहूदा डा पिप आ दरवार खाल पाइब मुर आ जेल्खानम बाक्त। मेको यहूदा डा पिप आ लाडगाम बाक्त। २राजा २५:१-२

3 यहूदा डा पिप सिदकीयाहम मेको कली मेकेर चोक्शो बाक्त। मिनु मेकोमी “गे मारदे मोदेशो पा परमप्रभु यावे आ लोत्र पाइनेवे? परमप्रभु यावेमी ‘गो एको सहर बेबीलोन डा पिप आ गुइम गेचशो बाक्नुड। मिनु मेकोमी एको आंम के सेल्ब। येरमीया २१:७; येरमीया ३४:२

4 यहूदा डा पिप सिदकीयाह कल्दी आन गुइ रे मब्रोंइब। मेको थमा पा बेबीलोन डा पिप आ गुइम गेचा पुंडसीब। मिनु मेको नु कोत्रमुशा, लोत्र पाइब।

5 मेकोमी सिदकीयाह कली बेबीलोन लाइक्ब। मिनु गो मेको कली मकोत्रडु सम्म मेकेर बाक्ब। गे कल्दी नु लडाइ पाप्तीवी हना मग्रानेवे’ दे परमप्रभु यावे आ लोत्र पवी” देशा चोक्शो बाक्त। येरमीया ५२:११

6 मिनु येरमीयामी परमप्रभु यावेम आं कली लोत्र पाप्तु। मार लोत्र पाप्तु देशा हना,

7 “इ बकान्छा शाल्लुम आ तौ हनामेल इ बाक्तीक जाक्शा, इ कली ‘अनाथोथम बाक्शो आं रू ग्यापीन। मारदे हना ग्याप्चा अधिकार इन के बाक्ब’ देंब” देंत। लेवी २५:२५; रूथ ४:३-४

8 मिनु नोले परमप्रभु यावेम देशो खोदेशो पा आं बकान्छा आ तौ हनामेल पिप आ खिं खाल पाइब आन लाडगा जाक्शा, मेकोमी “बेन्यामीन आ रागी अनाथोथम बाक्शो आं रू ग्यापीन। मेको ग्याप्चा अधिकार इन केन बाक्ब। मोपतीके गे मेको ग्याप्सीन” देंत। मिनु गो एको परमप्रभु यावे आ लोत्र बाक्माक्त, दे तुइक्ताक्ड।

9 मोपतीके गो आं बकान्छा आ तौ हनामेल आ अनाथोथम बाक्शो रू ग्याप्ता। मिनु गो मेको कली चांदी के १७ शेकेल नाक्शा गेता। शेकेल का ११.५ ग्राम डा चांदी के क्येट बाक्ब।

10 मिनु गो कागज ब्रेक्शा, छाप थोक्शा सांकछीपुकी वोइश्शा चांदी के शेकेल नाक्शा गेता।

11 मिनु गो आं रू ग्याप्शो ब्रेक्शो छाप थोक्शो कागज ताक्ता।
छाप थोक्शो नु छाप मथोक्शो कागज यो ताक्ता।

12 मिनु गो मेको रू ग्याप्शो ब्रेक्शो कागज आं बकान्छा आ
तौ हनामेलम आ डोंइती, सांकछी नु पिप कली खाल पाइब आ
लाडगाम बाक्शो यहूदी आन डोंइती माहसेयाह आ चच, नेरीयाह
आ तौ बारुक कली गेता। मेको सांकछी नेल्ल आन नें यो कागजम
ब्रेक्शो बाक्तेकम।

13 गो मेको नेल्ल आन डोंइती बारुक कली

14 “मुर नेल्ल आन परमप्रभु यावे, इस्राएली आन परमप्रभुमी मार
देंत देंशा हना, मेको शुश नाक्त सम्म लील, दे मेको रू ग्याप्शो
कागज, छाप थोक्शो नु मथोक्शो, निम्फा खप के ग्योंब कामी कुर
पावो” देंत।

15 मारदे हना मुर नेल्ल आन परमप्रभु यावे, इस्राएली आन
परमप्रभुमी “मेको रागीमी खिं, रू नु अडगुर रू ग्याप्नीम” देंत।
येरमीया ३२:१५

16 मिनु गो नेरीयाह आ तौ बारुक कली मेको रू ग्याप्शो कागज
गेडा नोले, गो परमप्रभु यावे कली एको लोत्र पा

17 “परमप्रभु, परमप्रभु यावे, इन ठेयब सक्ति नु दिंशो गुइम गे
सरीड नु रागी सेलतीनी। इन कली मारेइ गेय मचाप्चा डा मबाक्ब।
येरमीया २७:५; उत्पत्ती १८:१४; लूका १:३७

18 हजार हजार पाला सम्म इन गेना हना यो दाक्तीक कोंइनीनी।
तन्न आम आफ आन हेंथे पशो आन नोले जाक्ब आन आल आन
कली रपाइकनीनी। गे ठेयब नु सक्ति पाइशो परमप्रभु बाक्नीनी।
इन नें मुर नेल्ल आन परमप्रभु यावे बाक्ब। प्रस्थान २०:५-६

19 इन अर्ती ठेयब नु इन गेय नेल्ल क्येडा सक्ति पाइशो
बाक्नीम। मुर आन पशो मारेइ मारेइ इन डोंइती तचा डा पा
बाक्नीम। गे मुर नेल्ल आन कली कोन्ननीनी। गे नेल्ल आन लां नु
आन पशो तशा इनाम गेनीनी। रोमी २:६

20 गे इजीप्त रागीमी चिन्ड नु छक लाक्चा डा गेय कोंइताक्नी।

मिनु मुल सम्म इस्राएल नु मुर नेल्ल आन दातेमी इन नें ठेयब सेल्लतीनी।

21 गे इन मुर इस्राएली आन कली इजीप्त रे चिन्ड नु छक लाक्चा डा गेय इन सक्ति नु बोल नु शुश हिंचा डा श्येत कोंइशा गुंडताक्नी।

22 मिनु गे मेको आन किकी पिपी आन कली कसम जशो, मेको दूध नु खुदो शुश बाक्शो रागी गेतीनी।

23 मिनु मेकोपुकी ओव्रशा, मेको रागी आन के सेल्लेक्म। तन्न मेकोपुकीमी इन देशो, इन अरेशो नु मार पचा माल्बा शेंशो मबिस्सम। गे मेको आन कली पन देशा शेंशो लोव्र मेकोपुकीमी मटीमे। मोपतीके गे एको ठेयब श्येत नेल्ल मेको आन तार चाक्तीनी।

24 कोव्रडीन, एको सहर आन के सेल्ला कली नु गारो डोइक्चा कली लां सेल्ला कली मार मार तेल्लेक्म। मेको सहर कली तरवार, अन्काल नु मुर बेक्तीक रोइम पतीके, मेको लडाइ तोइब कल्दी आन गुइम दुम्त। गे मार देंनी, मेको दुम्त। गे आंमा ताइनीनी।

25 मो हना यो परमप्रभु, परमप्रभु यावे, गे आं कली ‘एको सहर कल्दी आन गुइम दुम्त हना यो, क्येट गेशा, सांकछी आन कली ब्रेशा, रू ग्यापो’ देंतीनी” दे येरमीया देंत।

26 मिनु परमप्रभु यावेम येरमीया कली लोव्र पाप्तु।

27 मार, लोव्र पाप्तु देशा हना “गो परमप्रभु यावे, ब्रोंइशो नेल्ल आन परमप्रभु नड। मार, तेकोइ गेय आं पने मचाप्चा डा बाक्बा डा?” देंत। गन्ती १६:२२; येरमीया ३२:१७

28 मोपतीके परमप्रभु यावेमी “गो एको सहर कल्दी आन गुइ नु बेबीलोन डा पिप नेबुकदरेसर आ गुइम गेचा चिक्ताक्ड। मिनु मेकोमी एको सहर ग्राब।

29 एको सहर कली लडाइ तोइब कल्दी जाक्शा मी सुइक्नीम। तेको खिं तारी आं कली गाइक्पाइक्चा कली बाल देवता कली चढेमे नु देवी देवता आन कली तूचा थोव्रक चढेशा लुक्तमे, मेको नेल्ल क्रोइक्नीम। येरमीया १७:१३

30 मारदे हना इस्राएल डा मुर नु यहूदा डा मुरुम आन ठिटा रेन आं डोंइती मरिम्शो गेय डा लाक्शा अरु मारेइ मपामे। थमा पा इस्राएल डा मुरपुकीम आन गुइ डा गेयम आं कली गाइक्पाइक्चा डा लाक्शा, अरु मारेइ मपामे।

31 एको सहर सेल्मे नाक्त रे मुल सम्म आं कली गाइक्पाइक्शा, चुरपाइक्शा पतीमी। मोपा गो एको कली आं डोंइती रे तिल्लुड।

32 मेको इस्राएल नु यहूदा डा मुरपुकीमी आं कली गाइक्पाइक्चा कली आन मरिम्शो पशो आन पर्बम पाइनुड। मेको आन पिप, आन सरकार डा गेय पाइब, आन चढेब, आं लोत्र पाइबपुकी, यहूदा डा मुरपुकी नु यरूसलेममी बाक्बपुकी नेल्लेम मोदेशो पांमतेक्म।

33 मेकोपुकीमी आं कली आन ची हिरशा कोइंशो बाक्नीम। आन कुल ममाइ। गो मेको आन कली शेंना शेंन बाक्ती हना यो, मनेनेम रिम्शो पचा कली ममिंतेम। येरमीया २:२७

34 मेकोपुकीमी आं नें वोइक्शो खिंम आन ग्रांग्रा दिशो देवी देवता वोइक्तेक्म। मिनु आं खिं कली ग्रांग्रा दिशो सेल्लेक्म।

35 मेकोपुकीम हिन्नोम आ तौ आ बेंसीम बाल देवता आन थान सेल्लेक्म। मिनु मेकोपुकीमी मेकेर आन तमी तौ आन कली मोलेक कली चोशा चढेक्तेक्म। गो मेको आन कली मेको मअरेडमी। गो मेको गेनायो ममिंत्तु। मोदेशो ग्रांग्रा दिशो गेय पशा, यहूदा डा मुर आन कली पाप पपाइक्तेक्म” देंत। येरमीया ७:३१; येरमीया १९:५; इजीकीएल २०:२५-२६

36 मोपतीके परमप्रभु यावे, इस्राएली आन परमप्रभुमी “गेपुकीमी एको सहर आ पर्बम ‘तरवार, अन्काल नु मुर बेक्तीक रोइम बेबीलोन डा पिप आ गुइम गेशो बाक्ब’ देंनीनी।

37 कोत्रडीन, गो मेको आन कली आं गाइक्शो, चुरशो नु ठेयब ग्युश्रा बोक्तीकेमी तेको रागीम खेरुमी, मेको रागी नेल्ल रे गुम्पाइक्नुडमी। गो मेको आन कली लेंशा एको रागीम लेशशा चाक्नुडमी। मिनु मेको आन कली रिम्शो पा मारेइ मदुम्थु

बाक्पाइक्नुडमी। ब्यवस्था ३०:३

38 मिनु मेकोपुकी आं मुर दुम्नीम। मिनु गो मेको आन परमप्रभु दुम्नुड। येरमीया ७:२३

39 गो मेको आन कली थुं का दुम्तीक नु गाक्तीक लां का गेनुडमी। मेकोपुकी गेना हना यो आं कली मान पा हिंनीम। मेको आंम आन कली नु आन आल आन कली रिम्शो दुम्ब। इजीकीएल ३६:२७

40 गो मेकोपुकी नु गेना हना यो लीब कबल का पाइनुड। गो मेको आन कली रिम्शो पचा कली गेनायो मप्रोंडनुड। मिनु गो मेको आन थुंमी आं कली मान पा हिंतीके वोइक्नुड। मोपा मेकोपुकीम आं कली मप्रोंडनीम। येरमीया ३१:३१-३४

41 गो मेको आन कली रिम्शो पना पन ग्येरसीनुड। मिनु थमा पा गो आं थुं नु आं सोक्त नेल्लेम मेको आन कली एको रागीम वोइक्नुडमी” देत। ब्यवस्था २८:६३; आमोस ९:१५

42 परमप्रभु यावेमी “दोपा गो एको मुर आन कली ओं पा शुश श्येत गेडा, मोपा गो मुल आं देशो रिम्शो पतीक नेल्लेम, मेको आन कली रिम्शो पाइक्नुडमी।

43 एको रागीम रू ग्याप्नीम। मेको आ पबर्म गेपुकीम ‘एको मुर नु बस्तु भाव मारेइ मबाक्शो रागी बाक्ब। मारदे हना एको कल्दी आन गुइम गेशो बाक्ब’ देंनीनी।

44 मेकोपुकीम क्येटीम रू ग्याप्नीम। मेको आन नें ब्रेक्शो ग्याप्शो कागज, सांकछी वोइश्शा, छाप थोक्नीम। मोदेशो बेन्यामीन आ रागी, यरूसलेम आ एर ओंथ, यहूदा डा सहरम, पहाडीम, शेफेलाहम नु नेगेबम मोदेशो पाइनीम। मारदे हना गो मेको आन शोंप लेशशा गेनुड” दे परमप्रभु यावेम देंत। येरमीया ३२:१५; येरमीया २९:१४, ३०

“यरूसलेम लेंशा सेल्लुड” देशो

1 परमप्रभु यावेमी येरमीया कली पिप आ दरवार खाल पाइब मुर आ जेल्लखानम बाक्मेनु निक्शी खेयप लोत्र पाप्तु। येरमीया ३२:२

2 मिनु रागी सेल्लब परमप्रभु यावेमी लोत्र पाप्तु। मेको रागी बोल्यो सेल्लब आं नें यावे बाक्ब।

3 मेकोमी “आं कली ब्रेत्ती। मिनु गो इ कली लोत्र लेत्नुड। मिनु गो इ मतुइश्शो ठेयब नु खुइश्शो थोत्रक शेनुड” देंत।

4 इस्राएली आन परमप्रभु यावेमी “एको सहर डा खिं नु यहूदा डा पिप आन खिं प्रेशशा, कल्दी नु लडाइ पचा कली सहर आगा रे यो गारो डोइक्तीक लां सेल्लनीम। यसैया २२:१०

5 कल्दी सहर ओत्रशा लडाइ पाइनीम। मेकोपुकीमी मेको खिं कली बेक्शो मुर आन रांमी प्रिनीम। गो आं गाइश्शो नु चुरशोम साइश्शो मुर आन बेक्शो रांम प्रिनीम। मारदे हना आं अरेशो लोत्र मटीब आन पतीके एको सहर रे आं कुल खुइक्ताक्ड।

6 गो आं मुर आन कली सापाइक्नुडमी। मिनु गो मेको आन कली सापाइश्शा, आन माल्लशो गेशा मारेइ मदुमथु रिम्लो पा बाक्चा गेनुडमी। येरमीया ३०:१७

7 गो यहूदा नु इस्राएल डा मुर आन शोप लेशशा गेनुडमी। मिनु मेको आन कली डोंइती डा खोदेशो सेल्लुडमी। येरमीया २९:१४; येरमीया २४:६

8 गो आं पर्बम पशो आन हेंथे पतीके नु पाप नेल्ल रे मेको आन कली ठीक सेल्लुडमी। मिनु गो मेको आन हेंथे पशो नु पाप पशो माफ गेनुडमी। येरमीया ३१:३४; येरमीया ५०:२०

9 मिनु एको सहर आं डोंइती ग्येरपाइक्तीक, ठेयब सेल्लतीके नु आं कली मान पतीके दुम्ब। मिनु रागी रागी डा मुरुम गो इस्राएली आन कली मार मार रिम्लो पशो नेंनीम। मिनु मेको आन कली रिम्लो नु आन माल्लशो क्येडा शुश गेशो तशा आं पर्बम हिंशा खिंखि पाइनीम” देंत।

10 परमप्रभु यावेमी “मेको सहर आ पर्बम गेपुकीम ‘एको मुर नु बस्तु भाव मारेइ मबाक्शो रागी बाक्ब। यहूदा डा सहर नु यरूसलेम डा लां गाक्ब मुर नु बस्तु भाव, जन्तु मबाक्थु, श्येतथ दुम्शो बाक्ब। मेको मारेइ मबाक्शो सहरम लेंशा, येरमीया ३२:४३

11 थुं नाइश्शा बाक्तीक, ग्येरशो सेंदा, ग्युम्ली ग्युम्ले आन सेंदा, कुम्सो पशो सेंदा नु परमप्रभु यावे आ खिंम, गे रिम्शो पाइब बाक्नीनी’ देंशा सेंदा लेंशा नेंसीब। मुर नेल्ल आन परमप्रभु यावे कली ‘परमप्रभु यावे, गे शिशी पाइब बाक्नीनी’ देनीन। मारदे हना मेको रिम्शो पाइब बाक्ब। मेको आ दाक्तीक गेना हना यो बाक्ब। गो रागी डा मुर आन कली डोंइती डा खोदेशो पा थुं नाइक्चा गेनुड” दे परमप्रभु यावेम देंत। येरमीया ७:३४; एजा ३:११; बजन संग्रह १०६:१

12 मुर नेल्ल आन परमप्रभु यावेमी “मुर नु क्यारश भेडा, बी ब्यफ मबाक्शो रागीम लेंशा सहर नेल्लेमी गोठला आन क्यारश भेडा नाइक्तीक नु योव्रतीक दुम्ब।

13 मिनु पहाड डा सहर, शेफेलाह, नेगेब बेन्यामीन आ रागी यरूसलेम आ एर ओंथ नु यहूदा डा सहरम गोठलापुकीमी क्यारश भेडा लेंशा हिक्शा ओइनीम” दे परमप्रभु यावेम देंत। येरमीया ३२:४४

दाऊद नु लेवी कली पशो कबल

14 परमप्रभु यावेम “इस्त्राएल आ खिं डा मुर नु यहूदा आ खिं डा मुर आन कली आं थोक्शा पशो लोव्र खाप्तीक नाक्त थमा पा जाक्ना जाक्न बाक्नीम। येरमीया २३:५-६; जकरिया ३:८

15 मेको नाक्ती, मेना गो दाऊद आ खिं रे ठीक पाइब राशी का दाप्पाइक्नुड। मिनु मेकोमी रागीम ठीक निसाफ नु ठीक गेय पाइब।

16 मेको नाक्ती यहूदा श्येत रे प्रोंइचा पुंइसीब। मिनु यरूसलेम मारेइ मद्दुम्थु बाक्ब। मिनु मेको आ नें आंइ कली ठीक सेल्ब परमप्रभु यावे” देंनीम। ब्यवस्था ३३:२८

17 मारदे हना परमप्रभु यावेम “गेना हना यो दाऊद आ खिं डा मुर का इस्राएलमी पिप दुम्ब। २सामुएल ७:१२-१३; १राजा ९:५; भजन संग्रह ८९:३०

18 गेना हना यो लेवी आ थर डा चढेब का आं डोंइती चोशा चढेचा कली, अन्न चढेचा कली नु क्योरशा चढेचा कली बाक्ब” देंत। गन्ती २५:१२-१३; नेहेम्याह १३:२९

19 परमप्रभु यावेम येरमीया कली लोव्र पाप्तु।

20 मार, लोव्र पाप्तु देशा हना “गेपुकीमी गो नु नाक्टो पशो कबल नु नाक्त पशो कबल क्याम्ने चाप्तीनी हना, नाक्टो नु नाक्ती आं देशो ना मदुम्तेक्म हना, येरमीया ३१:३५-३६; उत्पत्ती ८:२२

21 ला आं गेय पाइब दाऊद नु आ तौ का पिप दुम्ब, देशो कबल क्याम्ने चाप्तीनी। मिनु गो आं लेवी थर डा मुर चढेब नु पशो कबल यो क्याम्ने चाप्तीनी। गन्ती २५:१२-१३; हिब्रू ९:११-१४

22 दोपा सरीड डा सोरुल हिक्ने मचाप्चा डा बाक्नीमी नु समुन्द्र डा बाल्वा पुक्ने मचाप्चा डा बाक्बा, मोपा गो आं गेय पाइब दाऊद आ चच युइ नु आं कली गेय पाइब लेवी आ थर डा मुर आन कली सोपाइश्शा बोपाइश्शा शुश सेल्लुडमी” देंत। उत्पत्ती १५:५

23 परमप्रभु यावेम येरमीया कली लोव्र पाप्तु।

24 मार लोव्र पाप्तु देशा हना “मेको मुरपुकी मार, देना देन बाक्मा, मार, गे मनेनी? मेकोपुकीमी ‘परमप्रभु यावे आ योव्रशो खिं निक्शी डा मुर आन कली प्रोंइशा तिल्शो बाक्ब’ देंतेक्म। मो देंतीके मेको मुरपुकीमी आं मुर आन कली आइक्च सेल्शा, मुल रे रागी का यो मनम, दे मिन्मीम” देंत।

25 परमप्रभु यावेमी “गो नाक्टो नु नाक्त नु आं कबल मपाता हना, सरीड, रागीम आं देशो मपाम्तेक्म हना,

26 गो याकूब आ आल नु आं गेय पाइब दाऊद आ चच युइ आन कली तिल्लुडमी। मोपा मेको अब्राहाम, इसहाक नु याकूब आन मुर आन कली पिप दुम्चा कली मयोव्रनुडमी। तन्न गो मेको डोंइती

खोदेंशो पा, मेको आन थुं नाइक्चा गेनुडमी। मिनु मेको आन कली शिशी पाइनुडमी” देंत।

34

सिदकीयाह कली हिंच कोंइशो

1 परमप्रभु यावेम येरमीया कली बेबीलोन डा पिप नेबुकदरेसर, मेको आ लडाइ पाइब नेल्ल, रागी डा राज्य नेल्ल नु मेको आ सासन पशो रागी डा मुर नेल्लेम यरूसलेम नु आ एर ओथ डा सहर नेल्ल आन कली लडाइ तोम्तेक्म। मेना इस्राएली आन परमप्रभु यावेमी येरमीया आं कली लोत्र पाप्तु। येरमीया ५२:४; २राजा २५:१-२

2 मिनु परमप्रभु यावे, इस्राएली आन परमप्रभुमी आं कली “यहूदा डा पिप सिदकीयाह आ बाक्तीक लावो। मिनु मेको कली परमप्रभु यावेमी ‘गो एको सहर बेबीलोन डा पिप आ गुइम गेनुड। मिनु मेकोमी एको सहर कली मीम क्रोइक्ब। येरमीया २१:१०

3 गे मेको आ गुइ रे ब्रोंइचा मताइनेवे। गे थमा पा ग्याइक्चा पुंडसीशा मेको आ गुइम दुम्नेवे। गे बेबीलोन डा पिप कली तशा, मेको नु कोत्रमुशा लोत्र पाइनेवे’ दे बेबीलोन लचा माल्नेवे” देंत। येरमीया ३२:४

4 मो हना यो ए यहूदा डा पिप सिदकीयाह, परमप्रभु यावे आ लोत्र नेनीन “गे तरवारम साइक्चा मपुंडसीनीनी। येरमीया ५२:११

5 गे इन थुं नाइश्शा बेक्नीनी। मिनु दोपा इन किकी पिपी इन डोंइती डा पिप आन कली मुरपुकीमी ब्रोंइशो रिना पाइब थोत्रक् चोशा थिम्मे, मोपा मेकोपुकीमी इन कली यो थिम्नीम। इन पर्बम ‘आइ प्रभु’ दे रोंका पाइनीम। गो मेको लोत्र पाता, दे नेल्लेम नेंचा डा पा देनो” दे परमप्रभु यावेमी देंत। २इतिहास १६:१४; येरमीया २२:१८

6 मिनु येरमीयामी मेको लोत्र नेल्ल यरूसलेममी यहूदा डा पिप सिदकीयाह कली देंत।

7 बेबीलोन डा पिप आ लडाइ पाइब मुरपुकी यरूसलेम नु यहूदा डा अरु सहर नु लडाइ पना पन बाक्शो बाक्तेक्म। लाकीश नु आजेका नु यो मेकोपुकीमी लडाइ पचा मप्रोंइशो बाक्तेक्म। मेको यहूदा डा गारो हिरशो सहर निक्शी ला लीशो बाक्ताक्स।

वाइल आन कली प्रोंइतीक बर्स

8 मेना परमप्रभु यावेम येरमीया कली लोत्र पाप्तु। मेना यहूदा डा पिप सिदकीयाहम यरूसलेम डा मुर नेल्ल नु वाइलीम वाइल नेल्ल आन कली प्रोंइचा माल्नीम, दे कबल पशो बाक्त। येरमीया ३४:१४

9 मेना मुर नेल्लेम आंम हिब्रू वाइलीम वाइल आन कली प्रोंइचा माल्तेक्म। सुइम यो आंम हिब्रू लोकब आन कली वाइलीम वाइल सेल्चा मदुम।

10 मिनु मेको लोत्र टीब ठेयब मुर नु कबल टीब मुर नेल्लेमी आंम आन वाइलीम वाइल आन कली प्रोंइचा नु लेंशा अर्को वाइलीम वाइल मवोइक्चा नम, देंशो बिस्साक्म। मिनु मेकोपुकी गारशा, मेको आन कली प्रोंइतेक्म।

11 मिनु नोले लेंशा मेकोपुकीमी आन थुं लेशशा आन प्रोंइशो वाइलीम वाइल आन कली लेंशा चाक्शा वाइलीम वाइल सेल्तेक्म।

12 मिनु परमप्रभु यावेम येरमीया कली लोत्र पाप्तु।

13 मार, लोत्र पाप्तु देंशा हना “परमप्रभु यावे, इस्राएली आन परमप्रभुमी ‘गो मेको आन किकी पिपी आन कली इजीप्त रागी डा वाइलीम वाइल दुम्तीक खिं रे प्रोंइशा चाक्तामी। मिनु गो मेकोपुकी नु कबल पाता।

14 तेकोइ ७ बर्सम इन कली लेयसीशो मुर इन हिब्रू लोकबम इन कली ६ बर्स गेय पवा नोले, ७ बर्सम मेको कली प्रोंइचा माल्ब’ देंती। तन्न इन किकी पिपीम आं लोत्र मटीम। आन नोफान मदाइक्तेम। प्रस्थान २१:२; लेवी २५:३९-४१; ब्यवस्था १५:१२

15 गेपुकीम चहिं नक माफ पुंइशा आं डोंइती नेल्ल आन कली प्रोंइचा नम, देशो लोत्र ठीक पाइतीनी। मिनु गेपुकीमी आं नें बाक्तीक खिंम आं डोंइती कबल का पाइतीनी। लेवी २५:१०

16 तन्न नोले इन थुं फाइशशा आं नें ग्रांग्रा दिशो सेल्लतीनी। गे नेल्लेम इन डोंइती प्रोंइशो वाइलीम वाइल आन कली लेशशा चाक्तीनी, देशो बाक्ब” देंत।

17 मोपतीके परमप्रभु यावेमी “गेपुकीम आं देशो मटिनी। मिनु आंम रागी डा आंम नेक्था डा मुर नु आंम वारच आन कली वाइलीम वाइल दुम्तीक रे मप्रोंइनी। मोपतीके गो मुल इन कली प्रोंइनन्नी। गो इन कली तरवार, मुर बेक्तीक रोइ नु अन्कालम साइक्पाइक्चा कली प्रोंइनन्नी। गो इन कली राज्य नेल्लेम शुश हिंचा डा सेल्लन्नी।

18 आं कबल क्याम्ब नु आं डोंइती पशो कबल डा पतीके मपाइब मुर आन कली बाछा खोदेशो सेल्लुडमी। मेको कली फेके निक्शी सेल्लेक्म। मिनु मेको आ दाते रे गाक्तेक्म।

19 मिनु मेको बाछा आ फेके निक्शी आस दाते रे गाक्ब यहूदा नु यरूसलेम डा सरकार आ गेय पाइब, दरवार डा ठेयब मुरपुकी, चढेबपुकी नु रागी डा मुर नेल्ल

20 आन जोरी सत्रु आन गुइम नु आन कली साइक्चा माल्ब आन गुइम गेचा पुंइसीनीम। मेको आन बेक्शो रां सरीड डा चिक्ब नु रागी डा जन्तु आन ब्वतीक दुम्ब। येरमीया ७:३३

21 यहूदा डा पिप सिदकीयाह नु मेको आ सरकार डा गेय पाइब आन कली साइक्चा माल्ब, आन जोरी सत्रु आन गुइम नु बेबीलोन डा पिप आ लडाइ पाइब आन गुइम गेनुडमी। मेको लडाइ पाइबपुकी इन रे लेशशा लशो बाक्तेक्म” देंत। येरमीया ३७:५

22 परमप्रभु यावेमी “गो मेको आन कली अरेनुडमी। मिनु गो मेको आन कली एको सहरमी लेशशा चाक्नुडमी। मेकोपुकीमी एको सहर नु लडाइ पा ग्रानीम। मिनु एको कली क्रोइक्नीम। मिनु गो यहूदा डा सहर कली मुर मबाक्शो सेल्लुड” देंत। येरमीया ३७:८

35

येरमीया नु रेकाबी

1 यहूदा डा पिप योसीयाह आ तौ येहो-याकीमम सासन पवा ना परमप्रभु यावेम येरमीया कली लोत्र पाप्तु। २राजा २३:३४

2 मार, लोत्र पाप्तु देशा हना “गे रेकाबी आन खिं लशा, मेकोपुकी नु लोत्र पावो। मेको आन कली परमप्रभु यावे आ खिं डा कोठा कामी ओंइदीमी। मिनु मेको आन कली अडगुर शांबु ख्रेत्तीमी” देंत। १इतिहास २:५५

3 मोपतीके गो हाबासीन्याह आ तौ येरमीया, आ तौ याजन्याह नु मेको आ लोक्बपुकी, मेको आ तौ नेल्ल नु रेकाबी आन खिं डा मुर नेल्ल आन कली लाइक्तामी।

4 मिनु गो मेको आन कली परमप्रभु यावे आ खिंम परमप्रभु आ मुर हानान आ तौ आन कोठाम चाक्तामी। हानान परमप्रभु आ मुर यिग्दाल्याह आ तौ बाक्त। मेको कोठा चहिं ठेयब मुर आन कोठा आ नेक्था बाक्त। मेको शाल्लुम आ तौ लाप्चो खाल पाइब, मासेयाह आ कोठा आ तार बाक्त।

5 मेको नोले गो अडगुर शांबु आ गर नु बोटकोपुकी रेकाबी आन डोंइती वोइक्ता। मिनु मेको आन कली “अडगुर शांबु तूडीन” दे माइक्तामी।

6 तन्न मेकोपुकीमी “गो अडगुर शांबु मतूनीकी। मारदे हना रेकाब आ तौ आंइ किकी योनादाबम आंइ कली ‘गेपुकी नु इन आलपुकीम गेनायो अडगुर शांबु मतूडीन। २राजा १०:१५

7 मेको प्रोंइशा यो गेपुकीम गेनायो खिं मसेलीन। वांचेर मशोक्कीन। अडगुर मखुमीन। गेपुकीम मोदेशो गेय गेनायो मपने। तन्न इन बाक्शो रागीम शुश सम्म ब्रोंइमल, दे गेना हना यो ताम्बुपुकीम बाक्शा हिरशा गाक्कीन’ दे शेंशो बाक्त।

8 मिनु गो आंइ किकी रेकाब आ तौ योनादाब आ शेंशो नेल्ल पाइतक। गोपुकी आंमा नु आंइ मीशपुकी नु आंइ तमी तौ नेल्लेम गेनायो अडगुर शांबु मतूक।

9 गो बाक्चा कली खिं यो मसेल्नीकी। अडगुर रू, अरु रू नु वांचेर गोपुकी नु मबाक्ब।

10 गो ताम्बुम बाक्शा, आंइ किकी योनादाबम शेंशो नेल्ल पाइतक।

11 तन्न बेबीलोन डा पिप नेबुकदरेसरमी एको रागी कली लडाइ तोपुतु। मिनु गोपुकीम ‘कल्दी नु अरामी आन लडाइ पाइबपुकी रे प्रोक्चा कली यरूसलेम लय’ देंतक। मोपतीके गो यरूसलेममी बाक्शो बाक्नीकी” देंतेक्म।

12 मिनु नोले परमप्रभु यावेम येरमीया कली लोव्र पापुतु।

13 मुर नेल्ल आन परमप्रभु यावे, इस्राएली आन परमप्रभुमी मार लोव्र पापुतु देंशा हना “गे यहूदा डा मुर नु यरूसलेममी बाक्ब आन कली लशा ‘मार, गे आं देंशो मपाइनीनी? मिनु आं लोव्र मटीनीनी?’ देंत” दे माइक्मी।

14 परमप्रभु यावेमी “मार, रेकाब आ तौ योनादाबम आ चच युइ आन कली ‘गेपुकीम अडगुर शांबु मतूडीन’ दे शेंशो लोव्र मेकोपुकी टीनीमी। मोपतीके मेकोपुकीमी मुल सम्म अडगुर शांबु मतूनीम। मारदे हना मेकोपुकीमी आन किकी पिपीम शेंशो टिशो बाक्नीम। तन्न गो इन कली लोव्र पना पन बाक्ती। मो हना यो गेपुकीम आं लोव्र मटिनी। येरमीया २५:४

15 गो इन कली आं गेय नु आं लोव्र पाइब आन कली सोइक्ना सोइक्न बाक्ती। मेकोपुकीमी इन कली ‘गे नेल्ल इन मरिम्शो लां रे लेतीन। मिनु इन मरिम्शो गेय रिम्शो सेलीन। मिनु देवी देवता आन कली पूजा पचा नु आन नोले खोइक्चा प्रोनीन। मिनु गे इन किकी पिपी आन कली गेशो रागीम बाक्चा ताइनीनी’ देंती। तन्न गेपुकीम आं देंशो लोव्र मनंनी नु मटिनी। मत्ती २३:३७

16 रेकाब आ तौ योनादाब आ चच युइमी आन किकी पिपीमी

अरेशो टीनीम। तन्न एको मुरपुकीम आं देंशो मटिशो बाक्नीम” देंत।

17 मोपतीके मुर नेल्ल आन परमप्रभु यावे, इस्राएली आन परमप्रभुमी “नेनीन, गो यहूदा नु यरूसलेमम बाक्ब मुर आन कली आं देंशो ठेयब श्येत नेल्ल चाक्नुड। मारदे हना गो मेको आन कली लोव्र पाता, तन्न मेकोपुकीमी मनेनेम। गो मेको आन कली ब्रेत्ताक्डमी, तन्न मेकोपुकीमी लोव्र मलेत्तीमी” देंत। येरमीया ७:१३-१५

18 मिनु येरमीयामी रेकाबी आन चच युइ आन कली “मुर नेल्ल आन परमप्रभु यावे, इस्राएली आन परमप्रभुमी गेपुकीम इन किकी योनादाब आ देंशो टिना टिन नु मेको आ शेंशो नेल्ल नु इन कली अरेशो नेल्ल पाइतीनी।

19 मोपतीके रेकाब आ तौ योनादाब आ चच युइ का गोना हना यो आं डोंइती बाक्चा ताइब” दे मुर नेल्ल आन परमप्रभु यावे, इस्राएली आन परमप्रभुम देंत।

36

येहो-याकीमम तोल्शो कागज चोशो

1 यहूदा डा पिप योसीयाह आ तौ येहो-याकीममी सासन पवा आ ४ बर्सम परमप्रभु यावेम येरमीया कली लोव्र पाप्तु। येरमीया २५:१

2 मार लोव्र पाप्तु देंशा हना “गो योसीयाहम सासन पवा रे मुल सम्म इ कली इस्राएल, यहूदा नु रागी नेल्ल डा मुर आन पर्बम देंशो लोव्र नेल्ल कागजम ब्रेक्तो। येरमीया २५:३

3 मो दुम्मेनु, गो मेको आन कली गेचशो ठेयब श्येत दुम्तीके आ पर्बम यहूदा डा मुरपुकीम तुइश्शा, आन मरिम्शो पतीके रे लेत्नीमी कों? मिनु गो मेको आन मरिम्शो पशो नु आन पाप पशो क्याम्शा गेनुडमी” देंत। येरमीया २६:३

4 मिनु येरमीयामी नेरीयाह आ तौ बारुक कली ब्रेप्पाइक्तु। मिनु बारुकम येरमीयामी ब्रेक्पाइश्शो परमप्रभु यावेम देंशो लोव्र नेल्ल कागजम ब्रेक्ताक्व। येरमीया ३२:१२; येरमीया ४५:१

5 मिनु येरमीयामी बारुक कली “गो परमप्रभु यावे आ खिं लने मचाप्नुड।

6 मोपतीके गे तेकोइ माइजा बाक्तीक नाक्त परमप्रभु यावे आ खिं लशा, आं इ कली ब्रेक्पाइश्शो कागजम बाक्शो लोव्र मुरपुकीम नेंचा डा पा पढेशा नेंपाइक्मी। यहूदा डा सहर रे जाक्शो मुर नेल्लेम नेंचा डा पा पढेशा नेंपाइक्मी।

7 मो दुम्मेनु मेकोपुकीमी आन पुंइशो लोव्र परमप्रभु यावे आ नेक्था चाक्नीमी, कों? मिनु मेको नेल्लेम आन मरिम्शो लां प्रोंइनीमी, कों? मारदे हना परमप्रभु यावेम आ मुर आन पर्बम गाइश्शा चुरशा देंशो लोव्र ठेयब बाक्ब” देंत।

8 मिनु नेरीयाह आ तौ बारुकम परमप्रभु यावे आ लोव्र पाइब येरमीया आ देंशो नेल्ल पाप्तु। मेकोमी मेको परमप्रभु यावे आ लोव्र ब्रेक्शो कागज परमप्रभु यावे आ खिंम पढेशा नेंपाइक्तीमी।

9 यहूदा डा पिप योसीयाह आ तौ येहो-याकीम आ सासन पशो ५ बर्स ९ महिनाम यरूसलेममी बाक्शो मुर नेल्ल नु यहूदा डा सहर रे जाक्शो मुर आन कली यरूसलेमम परमप्रभु यावे आ डोंइती नेल्ल आन कली नेंपाइश्शा माइजा बाक्तीक लोव्र पाप्तेक्म।

10 मिनु बारुकमी येरमीया आ ब्रेक्पाइश्शो लोव्र परमप्रभु यावे आ खिंम मुर नेल्लेमी नेंचा डा पा पढेप्तु। मेकोमी मेको लोव्र ब्रेक्ब शाफान आ तौ गेमारयाह आ बाक्तीके परमप्रभु यावे आ खिं डा नक लाप्चो आ नेक्था डा कोठाम बाक्शा, पढेप्तु। २राजा २२:३

11 मिनु गेमारयाह आ तौ शाफान आ चच मीकायामी मेको कागजम ब्रेक्शो परमप्रभु यावे आ लोव्र नेल्ल नेंतु।

12 मिनु मेको तोइश्शा, पिप आ खिंम ब्रेक्ब आ बाक्तीके ओव्रदीत्त। मेकेर ठेयब मुर नेल्ल बाक्तेक्म। मेकेर सु सु

बाक्तेक्म देंशा हना, ब्रेक्ब एली-शामा, शेमायाह आ तौ देलायाह, आकबोर आ तौ एलनाथान, शाफान आ तौ गेमारयाह नु हनान्याह आ तौ सिदकीयाह बाक्तेक्म। येरमीया २६:२२

13 मिनु मीकायामी बारुकम मुर नेल्लेम नेंचा डा पा पढेशो लोव्र नेल्ल नेंतु। मिनु मेको लोव्र नेल्ल मेको आन कली शेंताक्मी।

14 मिनु ठेयब मुर नेल्ल गारशा, नेथन्याह आ तौ शेलेम्याह आ चच कूशी आ युइ येहूदी कली “लशा, नेरीयाह आ तौ बारुक कली मुर आन कली पढेशा नेंपाइश्शो कागज कुरशा एक जाक्को मतो” दे सोइक्ताक्मे। मोपतीके गेदाल्याह आ तौ बारुक मेको कुरशा, आन बाक्तीके जाक्त। २राजा २२:११

15 मिनु मेकोपुकीमी मेको कली “निश्शा, मेको आंइ कली पढेशा नेंपाइक्की” देंतेक्म। मोपतीके बारुकम मेको आन कली, मेको पढेशा नेंपाइक्तीमी।

16 मिनु मेकोपुकीमी मेको पढेशो नेल्ल नेंशा हिंशा आन कुल कोव्रमुम्तेक्म। मिनु मेकोपुकीमी बारुक कली “गोपुकीम एको लोव्र नेल्ल पिप कली नेंपाइक्चा माल्नीकी” देंतेक्म।

17 मिनु मेकोपुकीमी बारुक कली “गे एको लोव्र नेल्ल दोपा ब्रेक्ती? आंइ कली शेंदीकी। येरमीयामी इ कली ब्रेक्पदा?” दे हिल्लो पाम्तेक्म।

18 मिनु बारुकम “मेकोमी आं कली एको लोव्र नेल्ल ब्रेक्पाइक्ती। मिनु गो एको कागज मसीम ब्रेक्ताक्ड” दे माइक्तीमी।

19 मिनु मेको ठेयब मुरपुकीम बारुक कली “गे नु येरमीया निम्फा लशा, खूंइसीस। गे निक्शी ते बाक्सी, दे सुइम मतुइक्तमेक्ल” दे माइक्तेक्म। येरमीया २५:८-११; येरमीया ७:२०; येरमीया ९:९-१०

20 मिनु मेकोपुकीमी मेको कागज ब्रेक्ब एली-शामा आ कोठाम वोइश्शा, पिप आ बाक्तीक लशा, पिप कली मेको लोव्र नेल्ल शेंताक्मे।

21 मिनु पिपमी मेको कली “कागज चाक्को” दे येहूदी कली

सोइक्ताक्व। मिनु मेकोमी ब्रेक्ब एली-शामा आ कोठा रे ग्रुंडशा चाक्तु। मिनु येहूदीम पिप नु पिप आ नेक्था बाक्ब ठेयब मुर आन कली मेको पढेशा नेंपाइक्तु।

22 मेना मेको बर्स डा ९ महिना बाक्तीके, पिप हिंडदम बाक्तीके, खिंम बाक्शो बाक्त। मेको आ डोंइती मी ब्रशो बाक्त।

23 मिनु येहूदीम सां नु ४ हरप पढेने थुमानु, पिपम कागज खोइक्तीकेम खोइश्शा, मीम हुम्ताक्व। मेको तोल्शो कागज नेल्ल मनुम्म सम्म पिपम मो पना पन बाक्त।

24 पिप नु मेको आ गेय पाइबपुकी मेको लोव्र नेंशा महिम। मेकोपुकीमी आन वा यो मखाक्गेम।

25 एल्नाथान, देलायाह नु गेमारयाहम पिप कली “मेको कागज मचोने” दे पुन्मेनु यो, पिपमी मेको आन लोव्र मनेन।

26 मेको आ पा डा पिपमी आ तौ येराहमेल, अज्रीएल आ तौ सेरायाह नु अब्देल आ तौ शेलेम्याह आन कली मेको ब्रेक्ब बारुक नु परमप्रभु यावे आ लोव्र पाइब येरमीया कली फ्रेंशा चाक्चा नस, दे हुकुम गेम्तीमी। तन्न परमप्रभु यावेम मेको आस कली खुइक्ने थुम्शो बाक्त।

27 मिनु येरमीयामी ब्रेक्पाइश्शो बारुकम ब्रेक्शो मेको तोल्शो कागज पिपम चोने थुमा नोले, परमप्रभु यावेमी येरमीया कली

28 “अर्को कागज काम यहूदा डा पिप येहो-याकीममी चोशो डोंइती डा कागजम बाक्शो लोव्र नेल्ल लेंशा ब्रेक्तो” देंत।

29 मिनु गे यहूदा डा पिप येहो-याकीम आ पर्बम परमप्रभु यावेम “गे मेको तोल्शो कागज चोप्तीवी। मिनु गे बारुक कली गे मारदे बेबीलोन डा पिप थमा पा जाक्शा, एको रागी श्येतथ पोक्ब। मिनु मेकोमी मुर नु बस्तु भाव नेल्ल आन कली साइक्ब, दे कागजम ब्रेक्ती?” देंते।

30 मोपतीके परमप्रभु यावेमी यहूदा डा पिप येहो-याकीम आ पर्बम “मुल रे दाऊद आ नित्तीकेम मेको आ चच युइ तेकोइ

मनिन्तीम। मेको पिप आ बेक्शो रां नाक्त नांम नु नाक्दो फुरशेम जिप्पाइक्चा डा पा तांडसीब। येरमीया २२:३०; येरमीया २२:१९

31 गो मेको कली, मेको आ आल आन कली नु आ गेय पाइब आन कली आन मरिम्शो पशो आ पर्बम सजाइ गेनुडमी। गो मेको आन कली, यरूसलेममी बाक्ब आन कली नु यहूदामी बाक्ब नेल्ल आन कली आं देशो ठेयब श्येत नेल्ल गेनुड। मारदे हना मेकोपुकीमी आं देशो लोव्र मनेनेम” देत।

32 मिनु येरमीयामी अर्को कागज का चाक्शा नेरीयाह आ तौ ब्रेक्ब बारुक कली गोप्तु। मिनु मेकोमी येरमीयाम देशो खोदेशो पा यहूदा डा पिप येहो-याकीममी मीम चोशो कागज डा लोव्र नेल्ल मेको कागजम ब्रेक्ताक्व। मिनु येरमीयामी अरु शुश लोव्र यो मेकेर तेम्ताक्व।

37

येरमीया कली चोक्शो

1 बेबीलोन डा पिप नेबुकदरेसरमी योसीयाह आ तौ सिदकीयाह कली यहूदा डा पिप सेल्शो बाक्त। मिनु येहो-याकीम आ तौ कोन्याह आ पा डा मेकोमी सासन पचा गोप्तु। येहो-याकीम आ अर्को नें कोन्याह बाक्ब। २राजा २४:१७

2 मिनु मेको, मेको आ गेय पाइबपुकी नु मेको रागी डा मुर नेल्लेम परमप्रभु यावे आ लोव्र पाइब येरमीया आ देशो परमप्रभु यावे आ लोव्र मनेनेम।

3 मो हना यो पिप सिदकीयाहम शेलेम्याह आ तौ येहुकल नु मासेयाह आ तौ चढेब सेफन्याह आस कली परमप्रभु यावे आ लोव्र पाइब येरमीया आ बाक्तीकेम “आंइ पर्बम इं परमप्रभु यावे नु पुंइशा गेने” देथ, मुर सोइक्ताक्व। येरमीया ७:१६; येरमीया ४२:२

4 मेना सम्म येरमीया मुर आन दातेमी एर ओंथ गाक्ना गाक्न बाक्त। मारदे हना मेना सम्म मचोक्सीशो बाक्त।

5 मेना फाराओ आ लडाइ पाइबपुकी इजीप्त रे जाक्शो बाक्तेक्म। मिनु कल्दी डा मुरपुकीमी यरूसलेम कली एर ओंथ नेल्ल रे पुम्शो लोत्र नेतेक्म। मिनु मेकोपुकी यरूसलेम रे नोले शोंइसाक्म।

6 मिनु परमप्रभु यावेम येरमीया कली लोत्र पाप्तु।

7 मार लोत्र पाप्तु देंशा हना “परमप्रभु यावे, इस्राएली आन परमप्रभुमी ‘यहूदा डा पिपम आं कली हिल्लो पथ इ बाक्तीक सोइक्ताक्व। मेको कली इ कली वारच पाइक्थ जाक्ब फाराओ आ लडाइ पाइब आन रागी इजीप्त लेशशा लाइनीम, दे मतो।

8 मिनु कल्दी लेशशा जाक्नीम। मिनु एको सहर कली लडाइ तोइनीम। मिनु मेकोपुकीमी एको सहर ग्राशा, मीम क्रोइक्नीम’ देंशो बाक्ब, देंत, मतो” देंत। येरमीया ३४:२२

9 परमप्रभु यावेमी “गेपुकीमी कल्दीम थमा पा आंइ कली लडाइ तोइनीम, दे मिम्तीन। मारदे हना मो पाइनीम।

10 गेपुकी नु लडाइ पाइब कल्दी नेल्ल आन कली गे ग्रातीनी हना, मेको आन गार दुम्शोपुकी ला आन ताम्बुम लीतेक्म हना यो, मेकोपुकी जाक्शा एको सहर कली मी सुइक्नीम” देंत।

11 फाराओ आ लडाइ पाइबपुकीम पतीके कल्दी यरूसलेम रे नोले शोंइसीची ना

12 येरमीया आं रू डा भाग ताक्चा कली यरूसलेम रे गूशा बेन्यामीन आ रागी गे लचा गोप्तु। येरमीया ३२:८-९

13 मिनु मेको बेन्यामीन लाप्चोमी जाक्दीम्मेनु, हनान्याह आ चच शेलेम्याह आ तौ खाल पाइब आन ठेयब मुर इरीयाहम येरमीया कली ग्याइश्शा “गे प्रोक्शा कल्दी आन बाक्तीकेम लशो बाक्नेवे” देंत।

14 मिनु येरमीयामी “एको लोत्र थमा ममाइ। गो कल्दी आन बाक्तीके प्रोक्शा लशो मनड” देंत। तन्न इरीयाहम मेको आ लोत्र मनन। मिनु मेकोमी येरमीया कली ग्याइश्शा ठेयब मुर आन बाक्तीके चाक्तु।

15 मिनु मेकोपुकी येरमीया तशा गाइक्ताकम। मिनु मेको कली तुप्शा, ब्रेक्ब योनाथन आ खिंम चोक्शा वोइक्तेकम। मारदे हना मेको खिं जेल्खान सेल्शो बाक्तेकम। येरमीया २०:२

16 मेकोपुकीमी येरमीया कली जेल्खानम चोक्तेकम। मिनु येरमीया थम छिडछिडम शुश नाक्त सम्म बाक्त।

17 मिनु पिप सिदकीयाहम मेको कली गुंडथ सोइक्ताकव। मिनु मेको कली दरवारम चाक्शा सुइम मतुइक्चा डा पा “मार, परमप्रभु यावे रे पा मारेइ लोत्र बाक्मे?” दे हिल्लो पाप्तु। मिनु येरमीयामी “ओं, बाक्ब। गे बेबीलोन डा पिप आ गुइम गेचा पुंडसीनीनी, देशो बाक्ब” देंत।

18 मिनु येरमीयामी पिप सिदकीयाह कली “गो इन कली, इन गेय पाइब ठेयब मुर आन कली नु एको मुर आन कली मार पडा डा? गे मारदे आं कली जेल्खानम चोक्यीनी?”

19 इन कली नु एको रागी कली लडाइ तोचा कली बेबीलोन डा पिप मजाक्ब, दे इन कली देंब, परमप्रभु यावे आ लोत्र पाइबपुकी ते बाक्मा?

20 तन्न मुल आं प्रभु, पिप गो इन कली पुंडनुड। आं पुंडशो लोत्र नेनीन। आं देंचा माल्शो लोत्र इन डोंइती देंचा तडल। गो आं कली ब्रेक्ब योनाथन आ खिंम मसोइक्तीनी। मो दुम्त हना, गो मेकेर बेक्नुड” देंत।

21 मिनु पिप सिदकीयाह आ हुकुममी येरमीया पिप आ दरवार खाल पाइब मुर आ जेल्खानम वोइक्चा पुंडसाकव। मिनु सहर डा शोब्ले चोतीक रे मनुम्म सम्म, नाक्त किंत किंत मेको कली शोब्ले चाक्शा गेम्तेकम। मोपा येरमीया पिप आ दरवार खाल पाइब आ जेल्खान डा लाडगाम बाक्त। येरमीया ३२:२

38

येरमीया कली इनारमी तोक्शो

1 मिनु मत्तान आ तौ शेफत्याह, पशहुर आ तौ गेदाल्याह, शेलेम्याह आ तौ युक्ल नु माल्कीयाह आ तौ पशहुरमी येरमीयामी मुर नेल्ल आन कली देंशो लोव्र नेंतेक्म। मेको आ लोव्र मार बाक्त देंशा हना, येरमीया २१:१

2 परमप्रभु यावेम “सु सु एको सहरमी बाक्नीमी, मेकोपुकी तरवार, अन्काल नु मुर बेक्तीक रोइम बेक्नीम। तन्न सु सु गुइ पोक्शा, कल्दी आन बाक्तीके जाक्दीत्नीमी, मेकोपुकी चहिं ब्रोंइनीम। मेको आन गिंम प्रोंइशा लडाइ रे ब्रोंइनीम” देंशो बाक्त। येरमीया २१:९

3 मिनु परमप्रभु यावेमी “एको सहर थमा पा बेबीलोन डा पिप आ लडाइ पाइब आन गुइम दुम्ब। मिनु मेकोपुकीमी एको सहर आन के सेल्नीम” देंत, दे येरमीयाम देंशो बाक्त।

4 मिनु ठेयब मुरपुकीम पिप कली “एको मुर कली साइक्चा माल्ब। मारदे हना एकोमी ओदेंशो लोव्र पा, एको सहरमी लीशो लडाइ पाइब नु मुर नेल्ल आन थुं लुक्च लपाइशो बाक्ब। एको मुरुम मुर आन कली रिम्शो ममाइ मरिम्शो पचा दाक्ब” देंतेक्म।

5 मिनु पिप सिदकीयाहम “मेको इन गुइमीन बाक्ब। गो इन कली मारेइ पने मचाप्नुड” दे माइक्तीमी।

6 मोपतीके मेकोपुकीमी येरमीया कली लाइशशा, पिप आ तौ माल्कीयाह आ इनारम तोक्तेक्म। मेको इनार पिप आ दरवार खाल पाइब आ लाडगाम बाक्त। मिनु मेकेर डोरिम फ्रेंशा इनारम तोक्तेक्म। मेको इनारमी ब्वाक्कु मबाक्माक्त। हिलो ला बाक्माक्त। मिनु येरमीया मेको हिलोम ग्रुम्त।

7 मेकेर पिप आ खिंम गेय पाइब एबेद-मेलेक नें पाइशो मुर का बाक्त। मेको एथीयोपीया डा बाक्त। मेकोमी येरमीया कली इनारम तोक्शो नेंतु। मेना पिप बेन्यामीन लाप्चोमी बाक्शो बाक्त। येरमीया ३९:१५-१८

8 मिनु एबेद-मेलेक पिप आ खिं रे लशा पिप कली

9 “आं प्रभु, आं पिप, एको मुरपुकीम परमप्रभु यावे आ लोव्र

पाइब येरमीया कली इनारम तोक्शा मरिम्शो पाम्तेक्म। सहरम शोब्ले नुम नोले मेको मेकेर शोत्रलुम बेक्ब” देंत।

10 मिनु पिपम कूशी, एथीयोपीया डा एबेद-मेलेक कली “एक रे मुर सां आन कली लाइश्शा, मेको परमप्रभु यावे आ लोत्र पाइब येरमीया कली बेक्चा क्येडा डोंइती इनार रे गुंडदीन” दे अरेप्टु। का निक्शी मुरुमी ३० जना मुर ब्रेशो बाक्ब।

11 मोपतीके एबेद-मेलेकम मेको मुर आन कली लाइक्तु। मिनु पिप आ खिं डा मार मार वोइक्तीक आगा डा कोठाम लत। मिनु मेकेर रे माइत जेक्शो वासी गुंडताक्व। मिनु मेकोमी येरमीया कली मेको वासी डोरीम फ्रेंशा तोक्तु।

12 मिनु एथीयोपीया डा एबेद-मेलेकमी येरमीया कली “इ बला आगा नु डोरी आन दातेमी एको माइत जेक्शो वासी वोतो” देंत। मिनु येरमीयामी मो पाप्टु।

13 मिनु मेकोपुकीमी डोरीम येरमीया कली इनार रे गुंडताक्मे। मेको नोले येरमीया पिप आ दरवार खाल पाइब मुर आ जेल्खान डा लाङगाम बाक्त।

सिदकीयाहम लेंशा हिल्लो पशो

14 मिनु पिप सिदकीयाहम परमप्रभु यावे आ लोत्र पाइब येरमीया कली ब्रेत्थ सोइक्ताक्व। मिनु परमप्रभु यावे आ खिं डा निक्शी लाप्यो नोले डा ठेयब लाप्यो आ डोंइती चाक्पाइक्तीमी। मिनु पिपम येरमीया कली “गो इ कली लोत्र का निक्शी हिल्लो पाइनुड। आं डोंइती गे मारेइ लोत्र मखुइक्तो” दे माइक्तु।

15 मिनु येरमीयामी सिदकीयाह कली “गो इन कली लोत्र पाता हना, गे आं कली साइक्नीनी। गो इन कली अर्ती गेतन्नी हना, गे मेको मनेनीनी” देंत।

16 मिनु पिप सिदकीयाहम सुइ आन मतुइक्चा डा पा, येरमीया नु कसम जशा “परमप्रभु यावे ब्रोंइशा बाक्शो खोदेशो पा, गो इ कली सोक्त गेप्टु। गो मेको आ नेमी कसम जशा देंनुड। गो इ कली

मसाइक्नुड। गो इ कली साइक्चा माल्ब मुर आन गुइम मगेनन”
देंत। येरमीया ३८:४-५

17 मिनु येरमीयामी सिदकीयाह कली “मुर नेल्ल आन परमप्रभु यावे, इस्राएली आन परमप्रभुमी ‘गे बेबीलोन डा पिप आ ठेयब मुर आन कली आंमान जिम्मा गेसाक्नी हना, इन सोक्त ब्रोंडब। मिनु एको सहर क्रोइक्चा मपुंडसीब। मिनु इन खिं डा मुरपुकी यो ब्रोंडनीमी।

18 तन्न गे आंमान बेबीलोन डा पिप आ ठेयब मुर आन गुइम जिम्मा मगेसाक्नी हना, एको सहर कल्दी आन गुइम गेंसीब। मिनु मेकोपुकीमी एको कली क्रोइक्नीम। मिनु गे मेको आन गुइ रे मब्रोंडनीनी’ देशो बाक्ब” देंत।

19 मिनु पिप सिदकीयाहम येरमीया कली “कल्दी आन बाक्तीकेम प्रोक्शा लशो यहूदीपुकी तशा, गो हिंशो बाक्नुड। मारदे हना कल्दीपुकीम आं कली मेको आन गुइम जिम्मा गेतीमी हना, मेकोपुकीमी आं कली मरिम्शो पाइक्नीम” देंत।

20 मिनु येरमीयामी “मेकोपुकीमी इन कली मेको आन गुइम जिम्मा मगेनीम। गो इन कली देशो परमप्रभु यावे आ लोव्र टिने। मिनु इन कली रिम्शो दुम्ब। इन सोक्ती यो ब्रोंडब।

21 तन्न गे मेको आन गुइम जिम्मा गेंसीने मबिस्साक्नी हना, परमप्रभु यावेम आं कली कोंडशो एकोन बाक्ब।

22 यहूदा डा पिप आ दरवारम प्रोंडसीशो मीश मुर नेल्ल बेबीलोन डा पिप आ ठेयब मुर आन बाक्तीके लाइक्नीम। मिनु मेको मीश मुरपुकीम इन कली ‘इन थमा सुइश्शो इन वारचपुकीम इन कली जोल पाम्तेक्म। मुल इन खोइली हिलोम गुम्शो बाक्ब। इन वारचपुकीम इन कली प्रोंडशो बाक्नीम’ देंनीम।

23 इन मीशपुकी नु इन आल नेल्ल कल्दी आन बाक्तीके चाक्दीत्नीम। गे आंमा यो कल्दी आन गुइ रे ब्रोंडचा मताइनीनी। बेबीलोन डा पिपम इन कली ग्याइक्ब। मिनु एको सहर चहिं

क्रोइक्नीम, देशो बाक्ब” देंत। येरमीया ३२:४; येरमीया ३४:३

24 मिनु सिदकीयाहम येरमीया कली “एको लोव्रसी पशो सुइम मतुइक्तमेक्ल। मो मदुम्त हना, गे साइक्चा पुंडसीनेवे।

25 गो गे नु लोव्र पशो ठेयब मुरपुकीम तुइक्ताक्म हना, मिनु इ बाक्तीक जाक्शा ‘पिप कली मार, देंनी? मिनु पिपम मार, देंमे? आंइ रे मारेइ लोव्र मखुइक्तीन। मो पाइतीनी हना गो इन कली साइक्नीकी, दे इ कली हिल्लो पाम्तेक्म हना,

26 गेमी मेको आन कली “गो आं कली साइक्चा कली योनाथन आ ख्वंम मसोइक्तीनी” दे गो पिप नु लोव्र का ला पाता’ देनो” दे माइक्तु।

27 मिनु ठेयब मुर नेल्ल येरमीया आ बाक्तीक जाक्शा, हिल्लो पाम्तेक्म। मिनु मेकोमी पिपम देशो खोदेशो पा, मेको आन कली माइक्तीमी। मोपतीके मेकोपुकीमी मेको कली अरु मारेइ हिल्लो मपामे। मारदे हना पिप नु येरमीया आस दातेम पशो लोव्र सुइम मतुइक्तेम।

28 मिनु यरूसलेम ग्रातीक नाक्त सम्म येरमीया पिप आ दरवार खाल पाइब मुर आ लाङगा डा जेल्खानम बाक्शो बाक्त। येरमीया ३७:२१

39

यरूसलेम क्याम्चा पुंडसीशो

1 यहूदा डा पिप सिदकीयाहम सासन पवा आ ९ बर्स १० महिनाम बेबीलोन डा पिप नेबुकदरेसर नु मेको आ लडाइ पाइब नेल्ल जाक्शा, यरूसलेम कली लडाइ तोशा एर ओंथ नेल्ल रे पुम्ताक्म। येरमीया ५२:४-१६; २राजा २५:१-१२

2 मिनु सिदकीयाहम सासन पशो ११ बर्स ४ महिना ९ नाक्ती मेको सहर डा गारो प्रेशा ओव्रतेक्म।

3 मिनु यरूसलेम ग्राशा, बेबीलोन डा पिप आ ठेयब मुर नेल्ल जाक्शा दाते डा लाप्चोमी बाक्तेक्म। नेरगल-शरेसेर, साम्गार-नेबो, सारसेकीम नेल्ल क्येडा ठेयब निसाफ पाइब नेरगल-शरेसेर नु बेबीलोन डा पिप आ ठेयब गेय पाइब मुर नेल्ल जाक्शा बाक्तेक्म।

4 मिनु यहूदा डा पिप सिदकीयाह नु आ लडाइ पाइब नेल्लेम मेको आन कली ताम्तेक्म। मिनु मेकोपुकी गारो निक्शी आस दातेम बाक्शो लाप्चो, पिप आ फल फुल रू रे पा नाक्दोन सहर रे प्रोक्शा, अराबाह गे लाम्तेक्म।

5 तन्न कल्दी आन लडाइ पाइबपुकीम मेको आन कली खेदा पाम्तेक्म। मिनु सिदकीयाह कली यरीको डा दिंम थित्तेक्म। मिनु मेकोपुकीमी मेको कली ग्याइश्शा, हमाथ रागी डा रिब्ला देशो सहरमी बेबीलोन डा पिप नेबुकदरेसर आ बाक्तीके चाक्दीत्तेक्म। मिनु मेकोमी सिदकीयाह कली सजाइ गेतीक देंत।

6 मेको रिब्लामी बेबीलोन डा पिपम सिदकीयाह आ तौ आन कली आ डोंइतीन साइक्तीमी। मिनु यहूदा डा ठेयब मुर आन कली यो साइक्तीमी।

7 मेकोमी सिदकीयाह आ मिक्ची फेत्ताक्व। मिनु बेबीलोन लाइक्चा कली साडलोमी फ्रेंपाइक्तु।

8 कल्दीपुकीम पिप आ दरवार नु मुर आन खिंम मी सुइक्ताक्मे। मिनु यरूसलेम डा गारो प्रेत्तेक्म।

9 मिनु पिप कली कोत्रब आन कप्तानम नेबुजरादानमी सहरमी प्रोंइचा पुंइसीशो लीशो मुरपुकी, मेको आन बाक्तीक प्रोक्शा जाक्ब नु अरु लीशो मुर आन कली फ्रेंशा बेबीलोन लाइक्तीमी।

10 तन्न पिप कली कोत्रब आन कप्तान नेबुजरादानमी मारेइ मपाइश्शो प्रुडग आन कली यहूदा रागीमी प्रोंइशा वोइक्तीमी। मिनु मेको आन कली मेकोमी अडगुर रू नु अरु रूपुकी गेम्तीमी।

11 मिनु बेबीलोन डा पिप नेबुकदरेसरमी आ कली कोत्रब आन कप्तान नेबुजरादान कली येरमीया आ पर्बम

12 “मेको कली लाइशशा, रिम्शो पा कोव्रशा वोतीन। मेको कली मारेइ मरिम्शो मपावो। मेकोमी इ कली देंशो खोदेंशो पा, गे मेको कली पावो” दे माइक्तु। येरमीया ४०:४

13 मोपतीके पिप कली कोव्रब आन कप्तान नेबुजरादान, नेल्ल क्येडा ठेयब मुर नेबुशाज्बान, निसाफ पाइब ठेयब मुर नेरगल-शरेसेर नु बेबीलोन डा पिप आ अरु ठेयब मुरपुकीम

14 मुर सोइशशा, येरमीया कली जेल्खान डा लाडगा रे चाकपाइक्तेकम। मेको कली आ खिंम लाइक्तीक जिम्मा शाफान आ चच अहीकाम आ तौ गेदाल्याह कली गेम्तेकम। मोपा येरमीया आ मुरपुकी नु बाक्त। येरमीया ३८:२८; येरमीया ४०:५-६, १४-१६

15 मिनु येरमीया जेल्खान डा लाडगाम बाक्मेनु, परमप्रभु यावेम येरमीया ३८:७

16 मार, लोव्र पशो बाक्त देंशा हना “लशा, कूशी एथीयोपीया डा मुर एबेद-मेलेक कली ‘मुर नेल्ल आन परमप्रभु यावे, इस्राएली आन परमप्रभुमी रिम्शो पा ममाइ, तन्न श्येत गेशा, एको सहर आ पर्बम गो मार पाइनुड देंशो बाक्डा, मेको खाप्चा चिक्शो बाक्नुड। मेको इ डोंइतीन मेको नाक्ती दुम्ब।

17 तन्न गो इ कली मेको नाक्ती प्रोंइनन। मिनु गे तेको मुर आन क्येडा हिंनेवे मेको आन गुइम मदुम्नेवे’ देंत मतो।

18 परमप्रभु यावेमी ‘गो इ कली थमा पा प्रोंइनन। गे तरवारम साइक्चा मपुंडसीनेवे। गे लडाइ रे इ गिम प्रोंइशा प्रोक्नेवे। मारदे हना गे आं कली थमा सुइशशा बाक्नेवे देंशो बाक्ब’ दे मतो” दे परमप्रभु यावेमी देंत।

40

येरमीया कली प्रोंइशो

1 मिनु पिप कली कोव्रब आन कप्तान नेबुजरादानमी, येरमीया कली साडलोमी फ्रेंशा यरूसलेम नु यहूदा डा फ्रेंशो मुरपुकी नु बेबीलोन लाइक्चा चिक्शो थिदा बाक्त। मिनु येरमीयामी रामाह

प्रोना नोले परमप्रभु यावेमी मेको कली लोव्र पाप्तु। येरमीया ३९:११-१४

2 मिनु पिप कली कोव्रब आन कप्तानमी येरमीया कली थिश्शा, मेको कली “परमप्रभु यावे, इ परमप्रभुम एको रागीम ठेयब श्येत गेतीक आ पर्वम लोव्र पशो बाक्त।

3 मुल परमप्रभु यावेम एको रागी क्याम्ताक्व। मिनु मेकोमी आ देशो खोदेशो पाप्तु। मारदे हना गेपुकीम परमप्रभु यावे कली पाप पाइतीनी। मिनु मेको आ देशो मटिनी। मोपतीके इन कली ओदेशो दुम्त।

4 तन्न मुलाक्ती गो इ गुइ डा साडलो पुइक्ताक्न। गे गो नु बेबीलोन लचा दाक्नेवे हना, गाक्को। गो इ कली रिम्शो पा कोव्रनुड। तन्न गे गो नु बेबीलोन लल मदाक्ते हना, बाक्को। कोव्रडो, एको रागी नेल्ल इ डोंइती बाक्ब। गे ते लल दाक्नेवे, मेक लने चाप्नेवे” दे माइक्तु। येरमीया ३९:१२

5 मो हना यो येरमीया लचा चिक्तानु नेबुजरादानमी लेशशा कोव्रशा “शाफान आ तौ अहीकाम आ चच गेदाल्याह आ बाक्तीक लावो। मेको कली बेबीलोन डा पिपम यहूदा राज्य डा हुकुम पाइब सेल्शो बाक्ब। मेकेर मेको नु अरु मुरपुकी नु बाक्को। गे ते लत दाक्डे, मेक लावो” माइक्तु। मिनु मेको पिप कली कोव्रब कप्तानमी मेको कली जचा थोव्रक नु अरु कोसेलीपुकी गेप्तु। मिनु मेको कली प्रोंइतु। येरमीया ३९:१४

6 मोपतीके येरमीया अहीकाम आ तौ गेदाल्याह आ बाक्तीके मिस्पा सहर लत। मिनु मेको नु रागीम प्रोंइशा वोइश्शो मुरपुकी नु बाक्त।

गेदाल्याह यहूदाम हुकुम पशो

7 मिनु लडाइ पाइब आन ठेयब मुर नेल्ल नु आन मुरपुकीमी “बेबीलोन डा पिपमी अहीकाम आ तौ गेदाल्याह कली मेको रागी डा हुकुम पाइब सेल्लु। मिनु मेको रागी डा नेल्ल आन क्येडा पुडग

मीश मुर, आल नु प्रुडग मुर आन कली फ्रेंशा बेबीलोन मलाइशशो मेको गेदाल्याह नु बाक्नीम” देशो नेंतेक्म। २राजा २५:२२-२४

8 मिनु मेको नेल्ल मिस्पा सहरम गेदाल्याह आ बाक्तीकेम लाम्तेक्म। नेथन्याह आ तौ इश्माएल, कारेआह आ तौ योहानान नु योनाथन, तन्हुमेथ आ तौ सेरायाह, नेतोफाह आ मुर एफाइ आ तौपुकी, माकाथी आ तौ येजन्त्याह नु मेको आन मुर नेल्ल लाम्तेक्म। येरमीया ४१:१,११

9 मिनु शाफान आ चच अहीकाम आ तौ गेदाल्याहम मेकोपुकी नु मेको आन मुर नु कसम जशा “कल्दी आन गेय पचा कली महिनीन। रागीम बाक्शा बेबीलोन डा पिप आ गेय पने। मिनु इन कली रिम्शो दुम्ब।

10 गो इं बाक्तीक जाक्ब कल्दी आन डोंइती इन ठेयब मुर दुम्शा लोत्र पचा कली मिस्पा सहरमी बाक्नुड। गेपुकीम चहिं अडगुर, बर्खाम सिप्ब फल फुल नु तेल इन ग्योंबुम वोतीन। मिनु इन योत्रशो सहरमी बाक्कीन” दे माइक्तीमी।

11 मिनु मोआब, अम्मोन, एदोम नु अर्को रागीपुकीम बाक्ब यहूदी नेल्लेम मेको लोत्र नेंतेक्म। बेबीलोन डा पिपम का निक्शी मुर आन कली यहूदामी प्रोंइशा वोइशशो बाक्ब, दे नेंतेक्म। मिनु शाफान आ चच अहीकाम आ तौ गेदाल्याह कली मेकेर डा हुकुम पाइब सेल्शा वोइशशो बाक्ब, दे यो नेंतेक्म।

12 मिनु नोले यहूदी नेल्ल ते ते ब्रशो बाक्मा, मेक मेक रे लेशशा, यहूदा रागी मिस्पाम गेदाल्याह आ बाक्तीकेम जाक्तेक्म। मिनु मेकोपुकीम शुश फल फुल नु अडगुर नु पोत्रशी खुप्ताक्मे।

13 मिनु कारेआह आ तौ योहानान नु गाउं गाउंम बाक्शो लडाइ पाइब मुर आन ठेयब मुर गेदाल्याह आ बाक्तीके मिस्पाम जाक्तेक्म।

14 मिनु मेको कली “अम्मोनी आन पिप बालीसमी नेथन्याह आ तौ इश्माएल कली इन कली साइक्चा कली सोइशशो बाक्ब, दे

तुइक्नीनी?” देतेक्म। तन्न अहीकाम आ तौ गेदाल्याहम मेको आन लोव्र थमा मसुद।

15 मिनु कारेआह आ तौ योहानानम मिस्पाम गेदाल्याह कली “सुइम मतुइक्चा डा पा नेथन्याह आ तौ इश्माएल कली साइक्चा कली आं कली हुकुम गेयीनी। एको लोव्र सुइम मतुइक्नीम। इन एर ओंथ नेल्ल देल्शो यहूदी आन कली ब्रपाइक्चा कली नु यहूदामी लीशो आन कली साइक्चा कली मेकोमी मारदे इन कली साइक्चा मला?” देंत।

16 तन्न अहीकाम आ तौ गेदाल्याहम कारेआह आ तौ योहानान कली “गे मोदेशो गेय मपावो। मारदे हना इश्माएल आ पर्बम इ पशो लोव्र थमा ममाइ” दे माइक्तु।

41

गेदाल्याह कली साइश्शो
२राजा २५:२५

1 मिनु मेको ७ महिनाम पिप आ खिं डा मुर एली-शामा आ चच नेथन्याह आ तौ इश्माएल नु पिप आ नेल्ल क्येडा ठेयब गेय पाइब अरु १० जना मुर मिस्पा सहरम अहीकाम आ तौ गेदाल्याह आ बाक्तीके जाक्तेक्म। मेको नेल्ल मेकेर काथा शोब्ले जन जन बाक्तेक्म। येरमीया ४०:८

2 मेना नेथन्याह आ तौ इश्माएल नु मेको १० जना मुर बोक्शा, बेबीलोन डा पिपम हुकुम पाइब सेल्शा वोइश्शो शाफान आ चच अहीकाम आ तौ गेदाल्याह कली तरवारम क्योरशा साइक्तेक्म। येरमीया ४०:५

3 मिनु इश्माएलमी मिस्पाम गेदाल्याह नु बाक्शो यहूदी नेल्ल नु मेकेर बाक्शो लडाइ पाइब कल्दी आन कली यो साइक्तीमी।

4 मिनु मुरपुकीमी गेदाल्याह साइश्शो लोव्र तुइक्चा क्येडा डोंइती आ दीसा सुनी,

5 शेकेम, शिलो नु सामरीया रे आन गाल शोक्ने प्रेक्शो, आन वा खाक्शो नु आन रां चेशशो ८० जना मुरपुकी परमप्रभु यावे आ ख्विम अन्न चढेचा कली नु धूप चोचा कली जाक्तेक्म। येरमीया १६:६

6 नेथन्याह आ तौ इश्माएल मिस्पा रे डाक्ना डाक्न, मेको आन कली ग्रुमथ जाक्त। मिनु मेको आन कली ग्रुमशा मेकोमी “अहीकाम आ तौ गेदाल्याह आ बाक्तीक जाक्कीन” देंत।

7 मिनु मेकोपुकी सहर आ आगा ओव्रतेक्म। मिनु नेथन्याह आ तौ इश्माएल नु मेको आ मुरपुकीम मेको आन कली साइक्तेक्म। मिनु मेको आन बेक्शो रां इनार काम ताइक्ताक्म।

8 तन्न मेको आन दाते डा १० जना मुरपुकीम इश्माएल कली “आंइ कली मसाइक्की। गोपुकी नु रू कामी खुइश्शा, वोइश्शो चेरब क्योव्रजी तेल नु खुदो बाक्नीम” देंतेक्म। मोपतीके मेकोमी मेको आन कली प्रोंइतीमी। मेको आन कली अरु नु मसद।

9 मेको इनारम इश्माएलमी मुर आन कली साइश्शा ताइश्शो बाक्त। मेको इनार पिप आसाम इस्राएल डा पिप बाशा क्येडा हिंशा ब्रोंइचा कली दोशो बाक्त। नेथन्याह आ तौ इश्माएलमी मेको इनार आ साइश्शो मुरपुकीम प्रिंताक्व। १राजा १५:१६-२४

10 मेको नोले इश्माएलमी, मिस्पाम बाक्शो लीशो मुर नेल्ल, पिप आ तमीपुकी नु अरु मुर नेल्ल आन कली ग्याइक्ताक्मी। मेको आन कली पिप कली कोव्रब आन कप्तान नेबुजरादानमी अहीकाम आ तौ गेदाल्याह आ गुइम गेशो बाक्त। मिनु नेथन्याह आ तौ इश्माएलम मेको नेल्ल आन कली ग्याइश्शा खोला आइक्ची हांबु अम्मोनी आन रागीम लाइक्चा कली गाक्त।

11 मिनु कारेआह आ तौ योहानान नु मेको नु बाक्शो लडाइ पाइब आन ठेयब मुर नेल्लेम नेथन्याह आ तौ इश्माएलमी मरिम्शो पशो नेल्ल नेंतेक्म। येरमीया ४०:८, १३-१६

12 मिनु मेको नेल्लेम आन मुर नेल्ल आन कली लाइश्शा नेथन्याह आ तौ इश्माएल नु लडाइ पथ गाक्तेक्म। मिनु मेकोपुकीमी मेको

कली गिबोन डा ठेयब दोम्ली आ नेक्था थित्तेक्म। २सामुएल २:१३

13 मिनु इश्माएलम ग्याइश्शा लाइश्शो मेको नु बाक्शो मुरपुकीम, कारेआह आ तौ योहानान नु मेको नु बाक्शो लडाइ पाइब आन ठेयब मुर नेल्ल आन कली तशा, ग्येरसाक्म।

14 मिनु इश्माएलमी मिस्पा रे ग्याइश्शा लाइश्शो मुर नेल्ल कारेआह आ तौ योहानान आ बाक्तीके लेशशा जाक्तेक्म।

15 तन्न नेथन्याह आ तौ इश्माएल नु ८ जना अरु मुर योहानान रे प्रोक्शा अम्मोनी आन रागी लाम्तेक्म।

16 मिनु अहीकाम आ तौ गेदाल्याह कली सदमे नोले, नेथन्याह आ तौ इश्माएलमी गिबोन रे चाक्शो ब्रोंइशो आन कली लडाइ पाइबपुकी, मीश मुरपुकी, आलपुकी नु दरवारम गेय पाइब मुर आन कली, कारेआह आ तौ योहानान नु मेको नु बाक्शो लडाइ पाइब आन ठेयब मुरपुकीम गिबोन रे लेत्ताक्म।

17 मिनु मेकोपुकी इजीप्त लचा कली मिम्शा बेथलेहेम डा गेरुथ-किम्हामम बास बाक्तेक्म। २सामुएल १९:३८; येरमीया ४३:७

18 मेकोपुकी कल्दी आन क्येडा हिंशो बाक्तेक्म। मारदे हना बेबीलोन डा पिपमी मेको रागी कली योव्रशा वोइश्शो हुकुम पाइब अहीकाम आ तौ गेदाल्याह कली नेथन्याह आ तौ इश्माएलमी साइश्शो बाक्त।

42

इजीप्त लशो

1 मिनु लडाइ पाइब आन ठेयब मुर नेल्ले, कारेआह आ तौ योहानान, होशयाह आ तौ येजन्याह नु आइक्च ठेयब मुर नेल्ले येजन्याह कली अजारयाह यो ब्रेक्नीम।

2 परमप्रभु यावे आ लोव्र पाइब येरमीया आ बाक्तीके जाक्तेक्म। मिनु मेको कली “गो आंइ पुंइशो नेनीन। मिनु परमप्रभु यावे, इन परमप्रभु कली आंइ पर्बम नु लीशो मुर नेल्ल आन पर्बम पुनीन। मारदे

हना शुश मुर रे का निक्शी ला लीतक। मेको गे आंमा ताइतीनी।
येरमीया ३७:३

3 मिनु परमप्रभु यावे, इन परमप्रभुम गो ते लचा माल्नीकी, मार पचा माल्नीकी, मेको कोइदल, दे पुनीन” देंतेकम।

4 मिनु परमप्रभु यावे आ लोव्र पाइब येरमीयामी मेको आन कली “दुम्ब। गो इन पर्बम इन देशो खोदेशो पा परमप्रभु यावे इन परमप्रभु कली पुंइनुड। मिनु परमप्रभु यावेम मार देंमे, मेको नेल्ल इन कली शेनुड। गो इन डोंइती मारेइ लोव्र मखुइक्नुड” देंत।

5 मिनु मेकोपुकीमी येरमीया कली “परमप्रभु यावे, इन परमप्रभुमी कोइशो नु आंइ कली देशो लोव्र गोपुकीम मपाइतक हना, परमप्रभु यावे आंइ पर्बम थमा नु ठीक लोव्र पाइब सांकछी दुम्ल।

6 मेको रिम्शो दुम्ल कि मरिम्शो दुम्ल। गो परमप्रभु यावे, इं परमप्रभु आ बाक्तीक इन कली सोइक्ताक्क। गोपुकीम मेको आ अरेशो टीनीकी। मिनु परमप्रभु यावे, इं परमप्रभु आ लोव्र टितीके, गो आंइ कली रिम्शो दुम्ल” देंतेकम।

7 मिनु १० नाक्त नोले परमप्रभु यावेम येरमीया कली लोव्र पाप्तु।

8 मिनु येरमीयामी कारेआह आ तौ योहानान नु मेको नु बाक्शो लडाइ पाइब आन ठेयब मुर नेल्ल, आइक्ची नु ठेयब मुर नेल्ल आन कली ब्रेत्ताक्मी।

9 मिनु येरमीयामी मेको आन कली “गे आं कली परमप्रभु यावे, इस्त्राएली आन परमप्रभु आ डोंइती पुंइथ सोइक्ताक्यीनी।

10 मिनु परमप्रभु यावेमी इन कली ‘एको रागीमीन बाक्तीनी हना, गो इन कली रिम्शो सेलनन्नी, मप्रेत्नन्नी। गो इन कली खुम्नन्नी, मतुलनन्नी। मारदे हना गो इन कली खतम पोक्शो आ पर्बम आं थुं खाइश्शो बाक्नुड। येरमीया १:१०

11 मुल गे बेबीलोन डा पिप क्येडा महिनीन। मारदे हना गो इन कली मेको आ गुइ रे प्रोंइचा नु श्येत मगेपाइक्चा कली गेपुकी नु बाक्शो बाक्नुड।

12 गो इन कली शिशी पाइक्नन्नी। मिनु मेकोमी इन कली शिशी पा इन बाक्शो रागीमीन वोइक्ब' देशो बाक्ब।

13 तन्न गेपुकीम परमप्रभु यावे, इन परमप्रभु आ लोव्र मटीतीनी हना 'गेपुकी एको रागीम मबाक्नीकी' देंतीनी हना, येरमीया २९:१७-१८

14 गोपुकी इजीप्त लशा बाक्नीकी। मारदे हना मेकेर लडाइ मतांडसीब, तुराही ताप्शो सेंदा मनेंसीब, शोब्ले जचा मतथु शोव्रलुम मबेक्सीब। गो मेकेन बाक्नीकी देंतीनी हना,

15 यहूदा डा लीशोपुकी, परमप्रभु यावे आ लोव्र नेनीन। मुर नेल्ल आन परमप्रभु यावे, इस्राएली आन परमप्रभुम 'गेपुकी इजीप्त लशा मेकेर बाक्चा कली थमा पा मिम्शो बाक्तीनी हना,

16 तेको तरवार रे पा गे हिंशा प्रोक्शो बाक्नी, मेको तरवारमी इन कली इजीप्तमी साइक्ब। मिनु तेको अन्काल रे पा, गे हिंशो बाक्नी, मेको इजीप्तमी इन नोनोले जाक्ब। मिनु गे मेकेर बेक्नीनी।

17 सु सु इजीप्त लशा बाक्नीमी, मेको नेल्ल तरवार, अन्काल नु मुर बेक्ती रोइम बेक्नीम। गो इन कली खतम पोक्तीक रे का यो मब्रोंइनीनी' देशो बाक्ब" देंत।

18 मुर नेल्ल आन परमप्रभु यावे, इस्राएली आन परमप्रभुम "दोपा आं गाइश्शो नु चुरशो यरूसलेमम बाक्ब मुर आन तार मोंइसे, मोपान गेपुकी इजीप्त लाइतीनी हना, आं चुरतीके इन तार मोंइसीब। इन श्येत जशो तशा मुर हिंनीम। गेपुकी सराप राइब नु शुक्शी पाइक्चा पुंडसीब दुम्नीनी। गेपुकीम लेंशा एको रागी गेनायो कोव्रचा मताइनीनी" देशो बाक्ब। येरमीया २५:९; येरमीया ४४:१२

19 ए यहूदा डा लीशोपुकी, परमप्रभु यावेमी इन कली "गेपुकी इजीप्त मलने, देशो लोव्र तुइश्शा वोतीन। मुलाक्ती गो इन कली हिंच कोंइशा लोव्र पाता।

20 गेपुकीम ठेयब मरिम्शो का पाइतीनी। गेपुकीम आं कली परमप्रभु यावे, इन परमप्रभु आ डोंइती परमप्रभु यावेम, आंइ परमप्रभु मार देंबा, मेको नेल्ल आंइ कली शेंदीकी। मिनु गो मेको नेल्ल

पाइनीकी देंतीनी।

21 मुलाक्ती गो मेको नेल्ल इन कली शेंताक्नी। परमप्रभु यावे, इन परमप्रभुम मार देंचा, दे सोइक्ती, मेको लोव्र इन कली देंती, तन्न मुल सम्म मटिशो बाक्नीनी।

22 मोपतीके मुल एको लोव्र थमा पा तुइश्शा वोतीन। इन बाक्चा कली लचा दाक्शो रागीमीन गेपुकी तरवार, अन्काल नु मुर बेक्तीक रोइम बेक्नीनी देंशो बाक्ब” देंत।

43

येरमीया इजीप्त लाइक्चा पुंइसीशो

1 मिनु येरमीयामी परमप्रभु यावे, आन परमप्रभु आ पशो लोव्र नेल्ल मेको आन कली देंने थुम्तु। परमप्रभु यावे, आन परमप्रभुमी येरमीया कली मेको आन कली मेको लोव्र पथ सोइश्शो बाक्त।

2 मिनु होशयाह आ तौ अजारयाह कारेआह आ तौ योहानान नु मटीब मुर नेल्लेम येरमीया कली “गे जोल पाइतीनी। गेपुकी इजीप्तम बाक्थ लचा मदुम्नीनी देंचा कली परमप्रभु यावे, आंइ परमप्रभुमी इन कली सोइश्शो ममाइ। येरमीया ४२:१९

3 तन्न कल्दीपुकीम आंइ कली सदमेक्ल कि ग्याइश्शा बेबीलोनमी लदमेक्ल, दे मिम्शा, नेरीयाह आ तौ बारुकमी इन कली आंइ पर्बम मरिम्शो पचा कली क्युक्शो बाक्ब” देंतेक्म। येरमीया ३६:३२

4 मोपतीके कारेआह आ तौ योहानान, लडाइ पाइब आन ठेयब मुर नेल्ले नु अरु मुर नेल्लेम यहूदामी बाक्चा माल्ब, देंशो परमप्रभु यावे आ लोव्र मटीम।

5 मेको आ पा डा कारेआह आ तौ योहानान नु लडाइ पाइब आन ठेयब मुर नेल्लेम यहूदामी बाक्शो मुर नेल्ल आन कली, जात जात डा मुर आन दातेम ब्रशा लेंशा यहूदामी बाक्थ जाक्शो मुर नेल्ल आन कली खुप्शा लाइक्तेक्म।

6 मेकोपुकीम पिप कली कोव्रब आन कप्तान नेबुजरादानमी शाफान आ चच अहीकाम आ तौ गेदाल्याह आ गुडम गेशो, मीश मुरपुकी, वोंइश मुरपुकी, आल ब्रेचपुकी, पिप आ तमीपुकी, येरमीया नु नेरीयाह आ तौ बारुक कली यो लाइक्तेकम।

7 मोपा परमप्रभु यावे आ अरेशो मटिथु, मेकोपुकी इजीप्त लाम्तेकम। मिनु ताहपनेसम जाक्दीत्तेकम। येरमीया ४२:१४-१७; २राजा २५:२६

8 मिनु परमप्रभु यावेम ताहपनेसम येरमीया कली लोव्र पाप्तु।

9 मार लोव्र पाप्तु देंशा हना “इ गुडमी ठेयब ठेयब फुल्लु क्युक्को। मिनु यहूदीपुकीम कोव्रना कोव्रन बाक्मानु, ताहपनेसम बाक्शो फाराओ, आ दरवार डा आगा ओव्रतीक लांमी खुइशशा थिम्शा वोतो।

10 मिनु मेको आन कली मुर नेल्ल आन परमप्रभु यावे, इस्राएली आन परमप्रभुमी ‘गो आं गेय पाइब बेबीलोन डा पिप नेबुकदरेसर कली ब्रेत्नुड। मिनु आं खुइशशा वोइशशो एको फुल्लु तार गो मेको आ नित्तीके सेल्लुड। मेकोमी मेको तार आ बाक्तीक ताम्बु कीब। येरमीया २५:९

11 मेको जाक्शा इजीप्त कली लडाइ तोइब। मिनु बेक्तीक रोइम बेक्चा ब्रेक्शो, बेक्तीक रोइ पा बेक्नीम। ग्याइशशा लाइक्चा पुंइसीचा ब्रेक्शो, ग्याइशशा लाइक्चा पुंइसीनीम। मिनु तरवारम साइक्चा पुंइसीचा ब्रेक्शो, तरवार साइक्चा पुंइसीनीम। येरमीया १५:२

12 मेकोमी इजीप्त डा मूर्ति आन खिंम मी सुइक्ब। मेकोमी मेको आन खिं आन कली क्रोइक्ब। मिनु मेको देवी देवता आन कली लाइक्ब। मिनु गोठलापुकीम दोपा आन वा रे नेक्स गुप्नीमी, मोपा मेकोमी इजीप्त रागी डा मूर्ति आन कली गुप्शा ताइब। मिनु मारेइ मदुम्थु आ रागी लेप्ब। येरमीया ४६:२५

13 मेकोमी इजीप्त डा हेल्योपोलीस सहरम बाक्शो नां आ मूर्ति बाक्शो थामपुकी प्रेप्ब। मिनु इजीप्त डा देवी देवता आन खिंम मी

सुइक्ब' देशो बाक्ब" देंत।

44

मूर्ति पूजा पतीके जाम्शो

1 परमप्रभु यावेमी येरमीया कली इजीप्त मिग्दोल, ताहपनेस, मेम्फीस नु पथ्रोस रागीम बाक्ब यहूदी नेल्ल आन पर्बम लोव्र पाप्तु। येरमीया ४३:७

2 मुर नेल्ल आन परमप्रभु यावे, इस्राएली आन परमप्रभुमी मार लोव्र पाप्तु देशा हना "गो यरूसलेम नु यहूदा डा सहर नेल्ल आन कली शुश श्येत गेता। गेपुकीमी मेको आंमा ताइतीनी। मेको सहर कोव्रडीन। मुर मबाक्तीके श्येत्थ दुम्शो बाक्नीम।

3 मारदे मोदेशो दुम्त देशा हना, मेकेर डा मुरुमी आं अरेशो मटिथु, गाइक्पाइक्तीमी। मेकोपुकीमी देवी देवता आन कली चढेशा मेको आन नोले खोइक्तेक्म। डोंइती मेकोपुकी, गेपुकी नु इन किकी पिपीमी यो मेको आन कली मतुइश्शो बाक्तेक्म।

4 मो हना यो गो आं गेय पाइब आं लोव्र पाइब आन कली मेको आन बाक्तीके सोइक्ना सोइक्न 'गो इन कली मेको आं काइ मदाक्शो ग्रान्रा दिशो गेय मपन' देंपाइक्तामी। येरमीया २५:४

5 तन्न मेकोपुकीमी मनेनेम। आन नोफान मदाइक्तेम। मेको आं अरेशो मटितीक रे मलेम्म। मेकोपुकीमी देवी देवता आन कली चढेचा मप्रोनेम।

6 मोपतीके गो यहूदा डा सहर नु यरूसलेम डा लांम आं शुश गाइश्शो नु चुरशो मोइक्ता। मिनु मेको सहर ब्रेशो नु मुर मबाक्तीके दुम्तेक्म। मुलाक्ती मोदेशो बाक्ब" देंत।

7 मिनु मुल मुर नेल्ल आन परमप्रभु यावे, इस्राएली आन परमप्रभुमी "मारदे गेपुकीम आंम इन कली मोदेशो श्येत गेनीनी? यहूदा आ दाते रे मीश मुर, वोंइश मुर, आल नु दूध तूब आल नेल्ल

आन कली तिल्पाइशशा, सुइ इन कली मलीपाइक्नी। येरमीया ४२:२२

८ मारदे गेपुकीमी इन गेयमी आं कली गाइक्पाइक्नीनी? मारदे गे इजीप्तमी बाक्शा, देवी देवता आन कली चढेशा आं कली गाइक्पाइक्नीनी? गेपुकी क्याम्चा पुंडसीशा, रागी डा मुर नेल्ल आन दातेमी सराप चीले राइब नु शुक्शी पाइक्चा पुंडसीब दुम्नीनी।

९ गे इन किकी पिपी आन मरिम्शो पशो प्रेंदीनी? यहूदा डा पिप नु आन पिपीम आन मरिम्शो पशो, इन आंम मरिम्शो पशो, इन मीशेमी यहूदा रागीम नु यरूसलेम डा लांमी मरिम्शो पशो प्रेंदीनी? येरमीया ७:१७-१८

१० मुल सम्म मेकोपुकीमी आंम कली ब्रेम्शो मसेल्सम। आं कली मान पा महिम। गो आं अरेशो नु आं फुल्लुम मुशा ब्रेक्शो लोव इन डोंइती नु इन किकी पिपी आन डोंइती वोइक्ता। मिनु मेको, गेपुकी नु इन किकी पिपीमी मटिनी” देंत।

११ मोपतीके मुर नेल्ल आन परमप्रभु यावे, इस्राएली आन परमप्रभुमी “गो इन कली ठेयब श्येत गेशा, यहूदा डा मुर नेल्ल आन कली क्याम्नुड। आमोस ९:४

१२ इजीप्त लशा बाक्चा कली मिम्ब यहूदा डा लीशो मुर नेल्ल थमा पा जाम्शा लाइनीम। मेको नेल्ल इजीप्तमी साइक्चा पुंडसीनीमी। तरवार नु अन्कालमी बेक्नीम। ठेयब नु आइक्च नेल्ल तरवार नु अन्कालमी बेक्नीम। इन श्येत जशो तशा मुर हिंनीम। गेपुकी सराप राइब नु शुक्शी पाइक्चा पुंडसीब दुम्नीनी। येरमीया ४२:१४-१७

१३ गो दोपा यरूसलेम कली तरवार, अन्काल नु मुर बेक्तीक रोइम सजाइ गेडा, मोपा इजीप्तम बाक्ब आन कली यो सजाइ गेनुडमी।

१४ मोपा इजीप्तम बाक्शो यहूदा डा लीशो मुर सुइ प्रोक्चा मताइनीम। सुइ मब्रोंइनीम। मिनु सुइ यहूदा रागी लेत्वा मताइनीम। मो हना यो मेकेर बाक्चा कली लचा दाक्नीम। डोंइती प्रोक्शा

लशो का निक्शी ला लेत्चा ताइनीमी” देंत।

15 मिनु आन मीशेम देवी देवता आन कली चढ़ेशो तुइक्ब वोंइश मुर नेल्ल, ठेयब हुल मीश मुर नु इजीप्त रागी डा पथ्रोस रागीमी बाक्ब नेल्लेमी येरमीया कली यसैया ११:१

16 “गे परमप्रभु यावे आ नेमी आंइ कली पशो लोव्र गो मनेनीकी।

17 मेको आ पा डा आंइ कसम जशो खाप्नीकी। गोपुकी सरीड डा पिपीम कली चढ़ेशा, मेको कली तूचा थोव्रक लुक्नीकी। गोपुकी, आंइ किकी पिपी, आंइ पिपीपुकी नु आंइ ठेयब मुरपुकीम यहूदा डा सहर नु यरूसलेम डा लांम मोदेशो पांतेक्म। मेना गोपुकी शुश जचा ताइतक। मिनु आंइ माल्शो क्येडा शुश तशा, श्येत मजक। येरमीया ७:१७-१८; होसे २:७

18 तन्न गोपुकीम सरीड डा पिपीम कली चढ़ेचा प्रोंइशो रे नु तूचा थोव्रक लुक्चा प्रोंइशो रे मारेइ मतक। तरवार नु अन्कालम जाम्ना जाम्न लाइतक” देंतेक्म।

19 मिनु मीश मुरपुकीम “गो थमा पा सरीड डा पिपीम कली चढ़ेना ढेन बाक्नीकी। मिनु मेको कली तूचा थोव्रक लुक्नीकी। आंइ वोंइशेम वारच मपथु, मेको कली बटुक चोका नु तूचा थोव्रक लुक्तका डा?” दे लोव्र पांतेक्म। गन्ती ११-१३

20 मिनु येरमीयामी आ कली लोव्र लेप्ब वोंइश मुर नु मीश मुर नेल्ल आन कली

21 “गेपुकी, इन किकी पिपी, इन पिप, इन ठेयब मुर नु एको रागी डा मुरपुकीम यहूदा डा सहर नु यरूसलेम डा लांम चढ़ेशो परमप्रभु यावेम मतुइक्बा डा? मार, मेकोमी ममिंता डा?

22 परमप्रभु यावेम इन मरिंशो पशो नु इन पशो ग्रांग्रा दिशो गेय तशा फाल्ने मचब। मोपतीके इन रागी श्येत्थ नु मुर मबाक्तीके दुंम्त। सराप चीले रशा, मुर मबाक्शो रागी दुंम्त। मेको मुल सम्म मोदेशोन बाक्ब।

23 इन चोशा चढ़ेतीके, इन परमप्रभु यावे कली पाप पशो, आ देशो मटिशो नु आ अरेशो, आ फुल्लुम मुशा ब्रेक्शो लोव्र नु आ

शेंशो मटितीके इन कली ठेयब श्येत दुम्त। मेको आ पर्बम श्येत जाइनीनी” दे माइक्तीमी।

24 मिनु येरमीयामी मेको मुर नेल्ल नु मीश मुर नेल्ल आन कली “गे इजीप्तम बाक्ब यहूदा डा मुर नेल्ल परमप्रभु यावे आ लोव्र नेनीन।

25 मुर नेल्ल आन परमप्रभु यावे, इस्राएली आन परमप्रभुमी ‘गे नु इन मीश, इन देंशो, गोपुकीमी आंइ कसम जशो खाप्नीकी। गो सरीड डा पिपीम कली धूप चदेशा, मेको कली तूचा थोव्रक लुकनीकी’ दे इन कसम जशो थमा पा खपीन।

26 मोपतीके गे इजीप्तम बाक्ब यहूदी नेल्ल परमप्रभु यावे आ लोव्र नेनीन। परमप्रभु यावेमी गो आं ठेयब नेमी कसम जाइनुड। मुल मेको इजीप्त रागीम बाक्ब यहूदा डा मुर आन शोव्र रे ‘परमप्रभु, परमप्रभु यावे ब्रोंइशा बाक्बो खोदेशो पा’ दे देंतीकेमी आं नें गेनायो मदेंनीम।

27 मारदे हना गो मेको आन कली रिम्शो पचा कली ममाइ, मरिम्शो पचा कली कोव्रना कोव्रन बाक्नुड। इजीप्तम बाक्ब यहूदी नेल्ल मनुम्मा सम्म तरवार नु अन्कालम बेक्नीम। आमोस ९:४

28 तरवार रे ब्रोंइशोपुकी इजीप्त रे यहूदा रागीमी का निक्शी ला लेत्चा ताइनीम। मिनु इजीप्तम बाक्ब यहूदा डा मुर नेल्लेमी ‘आं देंशो थमा बाक्म देय मेको आन लोव्र थमा बाक्ब’ दे नोले तुइक्नीम” देंत।

29 मिनु परमप्रभु यावेम “आं देंशो थमा पा पाइनुड। मेको आ चिन्ड मार बाक्ब देंशा हना, गो इन कली मेको रागीमी सजाइ गेनुड। मेको नोले गो आ देंशो पाइनुड, दे इन कली तुइक्तीके बाक्ब” देंत।

30 परमप्रभु यावेम “गो इजीप्त डा पिप फाराओ होफ्रा कली आ जोरी सत्रु नु मेको कली साइक्चा माल्ब आन गुइमी गेनुड। दोपा गो यहूदा डा पिप सिदकीयाह कली आ जोरी सत्रु बेबीलोन डा पिप नेबुकदरेसर आ गुइमी गेडा, मोपा इजीप्त डा पिप कली साइक्ब

आन गुडमी गेनुड” दे परमप्रभु यावेमी देंत। इजीकीएल २९:१९

45

बारुक कली अरेशो

1 यहूदा डा पिप योसीयाह आ तौ येहो-याकीममी सासन पवा आ ४ बर्सम नेरीयाह आ तौ बारुकमी परमप्रभु यावे आ लोत्र पाइब येरमीया आ ब्रेक्पाइशो लोत्र कागजम ब्रेक्ना ब्रेक्न बाक्मेनु, येरमीयामी बारुक कली येरमीया ३६:४

2 परमप्रभु यावे, इस्राएली आन परमप्रभुमी इ कली मार देंब देंशा हना,

3 गे “आबी, आबी, आं कली मार दुम्बा। परमप्रभु यावेमी आं श्येतम सुर्ता पतीक तेम्ताक्व। गो हुकयी पना पन दती। गो तेइ नाइक्चा मतड” देंते।

4 गे मेको कली “परमप्रभु यावेमी ‘आं डोंइती सेल्शो मुल प्रेतनुड। गो मार खुमु मेको नेल्ल तुल्शा ताइक्नुड। मेको रागी नेल्ल कली दुम्ब।

5 मिनु गे आंम इ कली मारेइ मारेइ ठेयब थोत्रक माल्नेवे? गे मेको ममालो। मारदे हना गो मुर नेल्ल आन कली ठेयब श्येत जपाइक्नुडमी। तन्न गे ते लाइनेवे, मेके गो इ कली लडाइ रे ब्रोंइचा गेनुड’ ” दे परमप्रभु यावेमी बारुक आ पर्बम देंत। येरमीया ३९:१८; येरमीया ४३:४-६

46

इजीप्त रागी आ पर्बम शेंशो

येरमीया ४६:-; येरमीया ५१:-; यसैया १९:-; इजीकीएल २९:- ३२:-

1 परमप्रभु यावेम रागी रागी आन पर्बम आ लोत्र पाइब येरमीया कली लोत्र पाप्तु।

2 मार लोत्र पाप्तु देंशा हना “इजीप्त रागी आ पर्बम, इजीप्त डा पिप फाराओ नेको आ लडाइ पाइबपुकी युफ्रेटीस खोला आ नेक्था

कारकेमीश सहरमी बाक्शो बाक्तेक्म। यहूदा डा पिप योसीयाह आ तौ येहो-याकीममी सासन पवा आ ४ बर्सम बेबीलोन डा पिप नेबुकदनेसरमी लडाइ तोशा ग्रात। २राजा २३:२९

3 आइक्च नु ठेयब तेक्तीक ठीक पने। लडाइ पचा कली डोंइती बारीन।

4 शाराम लगम पाइक्तीन। शारा डोंइसीन। कांसा के ताकी गुक्शा इन तूतीक शेप्पीन। इन कांसा के फेक्तीक फेक्सीन।

5 गो मारदे मेको आन कली हिंशो तडमी? मेकोपुकी नोले शोंइसीशो बाक्नीम। मेको आन लडाइ पाइबपुकी आन थुं लुक्च लत। मेकोपुकी रीब पा प्रोक्तेक्म। मेकोपुकीमी नोले लेशशा मकोव्रनीम। तेइ तेइ हिंतीकेइ हिंतीके बाक्ब” दे परमप्रभु यावेम देंत। येरमीया २०:३

6 परमप्रभु यावेमी “रीब पा प्रोक्ब यो प्रोक्ने मचाप्नीम। लडाइ पाइबपुकी यो ब्रोंइचा मताइनीम। मेकोपुकी उत्तर गे डा युफ्रेटीस खोलाम दाइल पांइसीशा गोल्नीम।

7 एको नील खोला खोदेशो पा बारशा जाक्ब, अरु ठेयब खोला बोक्शा कुशो खोदेशो पा जाक्ब, सु बाक्मे?

8 इजीप्त रागी नील खोला खोदेशो पा बारशा जाक्ब। ठेयब खोला बोक्शा कुशो खोदेशो पा जाक्ब। मेकोमी ‘आं कली बारशा रागी कली सुम्चा गेने। सहर नु मेकेर डा मुर आन कली साइक्चा गेयीनी।

9 शारापुकी दोरशा डोंइती लने। बग्गी खुल्बपुकी थाम्पा दोरपतीन। लडाइ पाइबपुकी बारीने। कूश एथीयोपीया नु पूत डा मुरपुकीमी तेक्तीक कुरनीम। लूद डा मुरपुकीमी लिब्रा आप्नीम।

10 मेको नाक्ती परमप्रभु, मुर नेल्ल आन परमप्रभु यावे आ नाक्त बाक्ब। मेको क्येक्क लेत्तीक नाक्ती बाक्ब। आंम जोरी सत्रु आन कली क्येक्क लेत्तीक नाक्ती बाक्ब। मुरुम तरवारम साइक्नीम। तरवार हुश तूशा, आ तूतू दाक्शो रूब। मारदे हना मुर नेल्ल आन परमप्रभु यावेमी उत्तर गे डा रागीमी, युफ्रेटीस खोला आ

नेकथा क्योरशा चढेब। यसैया २:१२; ब्यवस्था ३२:४१-४२

11 गे कन्ने मीश आल इजीप्त, इर गिलादम लशा खेक्तीके चाक्को। गे शोर गाक्शो शुश खाल डा ओरुत्ती खेक्साक्वे। तन्न गे मसानेवे। येरमीया ८:२२

12 रागी रागी डा मुरपुकीम इ मुने दोक्शो लोव्र नेंतेक्म। इ वाइ ब्रेशशोम रागी नेल्ल ब्रीब। मारदे हना लडाइ पाइब, लडाइ पाइब नु थोक्मुइनीम। मिनु मेको नेल्ल कालेमी गोल्नीम’ ” दे परमप्रभु यावेमी देंत।

13 परमप्रभु यावेम बेबीलोन डा पिप नेबुकदरेसरम इजीप्त कली लडाइ तोथ जाक्चा आ पर्वम येरमीया कली लोव्र पाप्तु।

14 मार लोव्र पाप्तु देंशा हना “इजीप्तमी एको लोव्र नेंपतो। मिगदोलमी एको लोव्र नेंपतो। मेम्फीस नु ताहपनेसमी यो एको लोव्र नेंपतो। गे नेल्ल ठीक दुम्शा आंम आंम राप्तीकेम रपीन। मारदे हना तरवारम इन एर ओंथ नेल्ल साइक्तु।

15 मारदे इ बोल्यो लडाइ पाइब प्रोक्नीमी। मारदे बोक्शा मराप्नीमी? मारदे हना परमप्रभु यावेम मेको आन कली साइक्तु।

16 इ लडाइ पाइबपुकी थोक्मुशा गोल्नीम। मिनु मेकोपुकीमी ‘लो, इं मुर आन बाक्तीक लय। इं जरमेशो रागी लेशशा लय’ दे साइक्ब तरवार आ पर्वम मो देंमुइनीम।

17 इजीप्त डा पिप फाराओ कली फश लोव्र पाइब, दे नें वोतीन। मेकोम आ गेय पतीक नाक्ती साम्तु” देंत।

18 परमप्रभु, पिपमी “आं ब्रोंइशा बाक्शो खोदेशो पा” देंत। मेको पिप आ नें मुर नेल्ल आन परमप्रभु यावे बाक्ब। पहाड आन दाते डा ताबोर पहाड खोदेशो पा का जाक्ब। मेको समुन्द्र आ नेक्था डा कारमेल खोदेशो पा जाक्ब।

19 गे इजीप्त डा दारशो तमी ग्याइशशा लाइक्चा पुंइसीचा कली इ मार मार कुम्लो पावो। मारदे हना मेम्फीस श्येतथ दुम्ब। मेको खिं नेल्ल ब्रेशशा, मुर मबाक्तीके दुम्ब।

20 इजीप्त रागी दारशो मगिक्शो बी का खोदेशो बाक्ब। तन्न उत्तर रे डांस का जाक्ब।

21 मेको आ गाल्च ताक्शा लडाइ पाइबपुकी यो दोम्शो बाछा खोदेशो बाक्नीम। मेको यो नेल्ल हिरशा लशा काथा प्रोक्तेक्म। मेको राप्शा मदिकनीम। मारदे हना मेको आन हिंचा डा श्येत जतीक नाक्ती जाक्शो बाक्ब। मेको आन सजाइ तची ना जाक्त।

22 मेकोमी गेशा गाक्शा, प्रोक्शो बुस्सुम खोदेशो पा रेयके पाइब। मारदे हना आ जोरी सत्रु डोंइती बारशा, खा कुरशा रवा तिम्ब मुर खोदेशो पा जाक्नीम।

23 परमप्रभु यावेमी “मेकोपुकीमी आ ब्वाकी नेल्ल तिम्चा माल्नीम। मारदे हना हिकने मचाप्या डा बाक्नीम। मेकोपुकी सल्हा क्येडा शुश बाक्नीम” देंत।

24 मिनु इजीप्त आ तमी मुने तोक्चा पुंडसीब। मेको उत्तर रे जाक्ब मुर आन गुडम जिम्मा गेचा पुंडसीब।

25 मुर नेल्ल आन परमप्रभु यावे, इस्राएली आन परमप्रभुम “गो थेबेस सहर डा आमोन फाराओ, इजीप्त रागी नु आ देवी देवता नु आ पिप आन कली सजाइ गेनुड। गो फाराओ नु मेको आ सक्ति कली थमा सुइक्ब नेल्ल आन कली सजाइ गेनुड। येरमीया ४३:१२-१३; यसैया २४:२१

26 गो मेको आन कली साइक्चा माल्ब बेबीलोन डा पिप नेबुकदरेसर नु आ लडाइ पाइब आन ठेयब मुर आन गुडमी गेनुडमी। मेको नोले इजीप्त रागी डोंइती डा खोदेशो पा मुर बाक्तीक रागी दुम्ब” दे परमप्रभु यावेम देंत। इजीकीएल २९:१४

27 मेकोमी “आं गेय पाइब याक्ब, गे महिनो। इस्राएल गे सुर्ता मपावो। गो इ कली डोन रागी रे प्रोंइनुड। इ चच युड आन कली ग्याइश्शा लाइश्शा, वोइश्शो रागी रे प्रोंइशा चाक्नुडमी। याक्ब लेंशा श्येत मजथु, थुं नाइश्शा बाक्ब। मिनु मेको कली सुडम हिंच मकोंइनीम। येरमीया ३०:१०

28 आं गेय पाइब याकूब गे महिनो। मारदे हना गो गे नु बाक्शो बाक्नुड। गो इ कली तेको रागी डा मुर आन दातेमी ब्रपदु, मेको रागी डा मुर नेल्ल आन कली क्याम्नुडमी। तन्न गो इ कली मक्याम्नुड। गो इ कली ठीक सजाइ गेनुड। गो इ कली सजाइ मगेथु मप्रोंइनुड” देंत। येरमीया १०:२४; येरमीया ३०:११

47

पलिस्ती आन पर्बम देंशो लोव्र

यसैया १४:२९-३२; इजीकीएल २५:१५-१७

1 फाराओमी गाजा कली लडाइ तोचा क्येडा डोंइती, पलिस्ती आन पर्बम परमप्रभु यावेम आ लोव्र पाइब येरमीया कली लोव्र पाप्तु।

2 परमप्रभु यावेमी मार लोव्र पाप्तु देंशा हना “कोव्रडीन उत्तर रे ब्वाक्कु बारशा यिशो बाक्ब। मेकोमी रागी नु मेकेर बाक्शो मारेइ मारेइ आन कली सुम्ब। सहरपुकी नु मेकेर बाक्शो नेल्ल आन कली खुम्ब। मिनु मुर नेल्ल वाइ ब्रेत्नीम। मेको रागीम बाक्ब मुर नेल्ल डाक्नीम।

3 प्रेक्शा दोरशा गाक्ब शारा आन खोइली आ रेयके नु जोरी सत्रु आन बग्गी आन रेयकेमी आफपुकीम आन आल आन कली वारच पाइक्चा कली मलेत्नीम। मेको आन गुइ तिकने मचापब दुम्शा ग्युक्शो बाक्नीम।

4 मारदे हना पलिस्ती नेल्ल आन कली खतम पोक्शा साइक्तीक नाक्ती जाक्शो बाक्ब। टायर नु सीदीन आस कली वारच पाइक्ने चापब नेल्ल बेक्नीम। मारदे हना परमप्रभु यावेम पलिस्ती आन कली साइक्चा चिक्शो बाक्ब। काफतोर डा टापु आ शुंइचीम रे जाक्शो लीशो नेल्ल आन कली साइक्चा चिक्शो बाक्ब। आमोस १:६-७; सेफन्याह २:४; जकरिया ९:५; यूहन्ना १:२२; येरमीया १६:६; येरमीया ४८:३७; आमोस ९:७

5 गाजाम रोंका पचा कली आ चां प्रेकशो बाकब। अशकलोन खतम दुम्शा, सिक्सी पाइब। गे लीशो अनाकीमपुकी गेना सम्म इन रां चेंडसीनीनी?” देशो बाकब।

6 “परमप्रभु यावे आ तरवार, गे ग्रीचा गेना नाइक्नेवे? इन तरवार खोतम पिप्तीन। गे नाइश्शा सिक्सी पा बाक्कीन।

7 गे दोपा सिक्सी पा बाक्ने चाप्नीनी? मारदे हना परमप्रभु यावेमी मेको कली अरेशो बाकब। मेकोमी मेको कली अशकलोन नु समुन्द्र आ शुंडच डा रागी आन कली गेय पचा कली अरेशो बाकब?” दैत।

48

मोआब आ पर्बम लोत्र

यसैया १५:-; यसैया १६:-; इजीकीएल २५:८-११; आमोस २:१-३; सेफन्याह २:८-११

1 मुर नेल्ल आन परमप्रभु यावे, इस्राएली आन परमप्रभुमी मोआब आ पर्बम मार लोत्र पाप्तु देशा हना “नेबो सहर मुर मबाक्तीके दुम्ब। किरयथ-थाइम मुने दोक्ब। मेको ब्रुत। मेको आ बोल्यो दरवार नेल्ल मुने तोक्शा प्रेशशा ताइक्चा पुंडसाक्म।

2 मुल रे मोआब कली ठेयब मसेल्नीम। मुरपुकीम हेशबोनम लोत्र गारपाइक्तेक्म। मेकोपुकीमी ‘जाक्कीन, गो मेको कली रागी का मदुम्चा डा सेल्य। ए मादमेन सहर, इ कली यो सिक्सी पपाइक्नीम। इ कली तरवार शेशा खेदा पाइनीम’ दैतेक्म।

3 नेनीन, होरोनाइम रे वाइ ब्रेशो नेंसीब। खतम दुम्तीके नु क्याम्तीके आ पर्बम डाक्शो नेंसीब।

4 मोआब आ आलपुकीमी ‘मोआब खतम पोक्चा पुंडसाक्व’ दे वाइ ब्रेशा डाक्नीम।

5 मेकोपुकी लुहीथ डा ग्येत्थ लांमी हिशेक पा डाक्ना डाक्न डोइक्नीम। मारदे हना होरोनाइम डा लुकच लतीक लांमी श्येत जशा डाक्शो नेंसीब।

6 प्रोक्कीन, आंम कली प्रोंडचा कली दोरीन। गोरशो रागी डा गधा खोदेशो दुमीन। येरमीया १७:६

7 गेपुकीम इन गेय नु इन शोंपोम थमा सुइक्तीनी। गेपुकी यो ग्याइश्शा लाइक्चा पुंडसीनीनी। केमोश देवता आ चढेब नु आ नोले खोइक्ब मुरपुकी नु ग्याइश्शा लाइक्चा पुंडसीब। गन्ती २१:२९; न्यायाधीस ११:२४; १राजा ११:७

8 खतम पोक्ब सहर नेल्लेम जाक्ब। मिनु सहर का यो मप्रोंइसीब। बेंसी क्याम्सीब। मिनु दिंम खतम दुम्ब। परमप्रभु यावे आ देंशो मोदेंशो बाक्त।

9 मोआब कली फ्रां गेन। मारदे हना मेको थमा पा ब्रुइब। मेको आ सहर श्येत्थ दुम्शा, मुर मबाक्तीके दुम्नीम” देंत।

10 सु सुमी परमप्रभु यावे आ गेय देश पा पाइनीमी, मेको सराप राइनीम। आंम तरवार कली हुश खाक्श पोक्तीके रे तेक्ब सराप राइनीमी।

11 मोआब आ ठिटा रेन नांडसीशा बाक्शो बाक्ब। मेको गरमी कुर पा वोइश्शो अडगुर शांबु खोदेंशो बाक्ब। मेको ग्योंब का रे अर्को ग्योंबुम मलेशो बाक्ब। मेको ग्याइश्शा लाइक्चा मपुंडसीशो बाक्ब। मोपतीके मेको डोंइती डा खोदेंशोन बाक्ब। मेको आ ब्रोव्रशो रिना मजाम्शो बाक्ब। सेफन्याह १:१२

12 मोपतीके परमप्रभु यावेमी “गो गर रे मोइक्ब आन कली मेको आ बाक्तीके सोइक्नुडमी। मिनु मेकोपुकीमी मेको मोइश्शा, गर श्येत्थ सेल्शा प्रोल्नीम। मेको नाक्त थमा पा जाक्ना जाक्न बाक्ब।

13 दोपा इस्राएल आ मुर आंम थमा सुइश्शो बेथेल रे पा मुने तोक्चा पुंडसमा, मोपा मोआब यो केमोश रे पा मुने तोक्चा पुंडसीब।

14 गेपुकीम ‘गेपुकी बोल्यो नु सक्ति पाइश्शो लडाइ पाइब बाक्नीकी’ दे दोपा देंने चाप्नीनी?

15 मोआब नु आ सहर आन कली खतम पोक्ब जाक्त। मेको आ नेल्ल क्येडा रिम्शो ठिटा मुर नेल्ल साइक्चा पुंडसीचा कली लाम्तेक्म” दे पिपम देंत। मेको आ नें मुर नेल्ल आन परमप्रभु यावे बाक्ब।

16 मेकोमी “हिंचा डा श्येत जतीक नाक्ती मोआब आ नेक्था जाक्शो बाक्ब। मेको आ श्येत जतीके रीब पा जाक्ब।

17 मेको आ एर ओंथ बाक्ब नेल्ल नु मेको आ पशो तुइक्ब नेल्ल मेको आ पर्बम रोंका पने। मिनु 'दोपा सक्ति पाइशशो राज्य क्याम्चा पुंइसे। पिप आ कोक्के दोपा जिक्मे' देनीन।

18 ए दीबोन डा तमी, गे ठेयब नित्तीके रे तोइशशा, सोव्रशो रागीम निस्सो। मारदे हना मोआब कली खतम पोक्ब इ कली लडाइ तोचा कली जाक्त। मेकोमी इ गारो हिरशो सहर नेल्ल खतम पोक्तु।

19 आरोएर सहरम बाक्बपुकी लांमी राप्शा कोव्रडीन। प्रोक्शो वोंइश मुर नु मीश मुर आन कली 'मार, दुम्मे' दे हिल्लो पने।

20 मोआब ब्रुत। मेको मुने दोक्त। रोंका पा डाक्कीन। 'मोआब मुर मबाक्तीक दुम्त' दे अरनोन खोला आ शुंइचीम लशा देनीन।

21 डांडा तार डा दिंमम निसाफ पतीके नाक्ती जाक्शो बाक्ब। होलोन, याहसाह नु मेफा-आथ,

22 दीबोन, नेबो नु बेथ-दिब्लाथाइम आन तारी,

23 किरयथ-थाइम बेथ-गामुल नु बेथ-मेओन,

24 केरयोथ, बोझा नु मोआब आ नेक्था नु डोन डा सहर नेल्ल आन तारी निसाफ पतीके जाक्शो बाक्ब।

25 मोआब आ ग्रीव खोइक्साक्व। मिनु मेको आ गुइ जिक्त" दे परमप्रभु यावेमी देंत।

26 मिनु लेंशा "मेको कली दुक्पतीन। मारदे हना मेको ठेयब लेशशो बाक्ब। मोआब आ मेशोमी दिड दाड गोल्ल। मिनु मेको शुक्शी पाइक्चा पुंइसीब दुम्ल। येरमीया २५:१५

27 मार, गे इस्राएल कली शुक्शी पशो मनवे? मेको खुइ आन दातेमी ग्याइक्चा पुंइसे डा, मेको आ पर्बम लोव्र पामेनु, इ पिया हिकशा शुक्शी पवी?

28 मोआबम बाक्बपुकी, इन सहर प्रोंइशा, फुल्लु मेर लशा बाक्कीन। रोंगु डा ढोडोडगा आ शोव्रम ग्योव्र सेल्ब ढुकुर खोदेशो दुमीन।

29 गो मोआब आ ठेयब लेशशो आ पर्बम लोव्र नेंतक। मेको आ ठेयब दुम्तीके, बोरतीके, ठेयब लेत्तीके नु थुं डा ठेयब दुम्तीके आ

पर्बम नेंतक।

30 गो मेको आ ठेयब लेशशो तुइक्नुड। तन्न मेको आ ठेयब लेशशो मारेइ मबाक्ब। मिनु मेको आ गेय जाम्शा लाइब बाक्ब।

31 मोपतीके गो मोआब आ पर्बम रोंका पाइनुड। गो मोआब नेल्ल आन पर्बम डाक्नुड। गो कीर-हेरेस डा मुर आन पर्बम हिशेक पाइनुड।

32 गो याजेर डाक्शो क्येडा इ पर्बम शुश डाक्नुड। ए सिब्मा डा अडगुर बोटपुकी, इन राशी समुन्द्र आ आइक्ची हांबु जाक्दीत्तेक्म। मेकोपुकी याजेर डा समुन्द्र सम्म जाक्दीत्तेक्म। इ मीशो फल फुल नु इ अडगुर खतम पोक्ब जाक्तेक्म।

33 मोआब डा फल फुल रू रे ग्येरतीक नु थुं नाइश्शा बाक्तीके जाम्ने थुम्तु। गो अडगुर खाक्तीक तेक्ता। सुइमी ग्येरशा ग्रीशा, मखाक्नीम। मेको आन वाइ ब्रेशशो ग्येरशा वाइ ब्रेशशो ममाइ।

34 हेशबोन नु एलेआले वाइ ब्रेत्नीस। मेको याहास सम्म नेंसीब। सोआर रे होरोनाइम, एग्लथ-शेलीशीया सम्म वाइ ब्रेशशो नेंसीब। मारदे हना निम्रीम डा ब्वाक्कु यो सोवने थुम्शो बाक्ब।

35 गो मोआब कली खतम सेल्लुड। डांडा डा थानम चढेब नु देवी देवता आन कली धूप चोइब आन कली खतम सेल्लुडमी” दे परमप्रभु यावेमी देंत।

36 मिनु परमप्रभु यावेमी “मोपतीके आं थुं बांसुरीम खोदेंशो पा मोआब आ पर्बम रोंका पाइब। आं थुं कीर-हेरेस डा मुर आन पर्बम बांसुरीम खोदेंशो पा रोंका पाइब। मेको आन चेम्शो शोंप नेल्ल जाम्त। यसैया १५:७

37 मेको नेल्लेम आन चां प्रेक्शो बाक्नीम। मिनु आन गल शोक्ने यो खोइश्शो बाक्नीम। मेको नेल्ल आन गुड चेशशो बाक्नीम। मिनु आन क्रातो भाङ्ग्रामी गिल्सीशो बाक्नीम। येरमीया १६:६

38 मोआबी आन खिं तारी नु लां मेर रोंका पशो डा लाक्शा अर्को मारेइ मनेंसीब। मारदे हना गो मोआब कली सुइम ममाल्चा डा ग्योब खोदेंशो पा प्रोल्ला” दे परमप्रभु यावेमी देंत।

39 मेको दोपा ब्रोल्मे, मोपा रोंका पाइनीम। मोआब दोपा मुने दोक्शा आ कुल खुइक्ता, मोपा मोआब आ एर ओंथ बाक्ब नेल्लेम मेको आन पर्बम शुक्शी पा हिंशा कोत्रचा डा दुम्शो बाक्ब।

40 मिनु परमप्रभु यावेमी “कोवडीन, मेको ककाकुली खोदेशो पा जुक्ब। मेको आ फ्रां हाम्शा, मोआब तारी जुक्ब। येरमीया ४९:२२

41 केरयोथ नु अरु सहर बुइनीम। आन जोरी सत्रुमी मेको आन हिरशो सहर आन के सेल्नीम। मेको नाक्ती मोआब डा लडाइ पाइब आन थुं सुत्केरी रोइ पशो मीश मुर आन थुं खोदेशो दुम्नीम।

42 मोआब रागी का दुम्शा मलीचा डा पा खतम दुम्त। मारदे हना मेको परमप्रभु यावे आ डोंइती ठेयब लेशशो बाक्त।

43 मोआबम बाक्बपुकी इन डोंइती हिंचा डा बिक्तीके नु ब्वारद बाक्नीम। यसैया २४:१७-१८

44 हिंचा डा श्येत रे प्रोक्ब बिक्तीकेम बिक्नीम। मिनु बिक्तीके रे डोइश्शा ग्रूब ब्वारदम रेत्चा पुंडसीनीम। मारदे हना गो मोआब कली आ सजाइ गेतीक बर्सम मोदेशो पाइनुड” दे परमप्रभु यावेमी देंत।

45 परमप्रभु यावेमी “प्रोक्बपुकी हेशबोन आ वांकुमी दिक्नीम। मारदे हना हेशबोन रे मी का ग्रूत। सीहोन आ खिं रे मी ग्रूत। मेकोमी मोआब आ कुप्फ नु जीब नु मरिम्शो पाइब आन पिया जेप्ब। गन्ती २१:२८-२९

46 आबी, आबी, मोआब, केमोश देवता आ मुर बेक्तेक्म। इ तौपुकी ग्याइश्शा लाइक्चा पुंडसाक्म। इ तमी ग्याइश्शा लाइक्चा पुंडसाक्म।

47 मो हना यो गो नोले डा नाक्ती मोआब आ शोंप लेशशा गेनुड। मोपा मोआब आ निसाफ नुप्त” दे परमप्रभु यावेमी देंत।

49

अम्मोन आ पर्बम लोत्र

इजीकीएल २५:३-७; आमोस १:१३-१५; सेफन्याह २:८-११

1 अम्मोनी आन पर्बम परमप्रभु यावेमी “मार, इस्राएल आ तौपुकी मबाक्नीमी? मार, मेको आ हक ताइब सुइ मबाक्नीमी? मारदे मिल्लोम देवता आ मुरपुकीमी गाद आ बाक्तीके आन के सेल्ले? मिनु मारदे मिल्लोम आ मुर सहरम बाक्थ लमा?” देंत। मिल्लोम देवता मोलेक यो देंनीम। १राजा ११:५

2 मोपतीके परमप्रभु यावेमी “गो अम्मोनी आन रब्बाह कली लडाइ डा तुराही ताप्शो नेंपाइक्नुड। मेको श्येत्थ डांडा खोदेंशो दुम्ब। मिनु मेको आ एर ओंथ डा गाउं मीम क्रोइक्चा पुंइसीनीम। मेना इस्राएलमी आ कली रोइक्ब आन कली रोइक्ब” दे परमप्रभु यावेमी देंत।

3 परमप्रभु यावेमी “हेश्बोन रोंका पावो। मारदे हना ऐ सहर खतम पोक्शो बाक्ब। गे रब्बाह डा तमी, वाइ ब्रेशशा डाक्कीन। भाडग्रा फेंसीशा रोंका पने। वाम ग्याम दुम्शा एर ओंथ दोरीन। मारदे हना मिल्लोम, आ चढेबपुकी नु आ नोले खोइक्ब ग्याइशशा लाइक्चा पुंइसाक्म।

4 गे मारदे इ सक्तिम ठेयब लेशशा बाक्नेवे? इ सक्ति ग्युम्ब। गे हेंथे गाक्ब तमी, गे इ शोंप कली थमा सुइशशा ‘सुमी आं कली लडाइ तोइबा डा’ देंनेवे।

5 गो परमप्रभु, मुर नेल्ल आन परमप्रभु यावे नड। गो इ नेक्था बाक्ब मुर रे हिंतीक श्येत गेपाइक्नुड। गे नेल्ल एर ओंथ फ्रचा पुंइसीनीनी। मिनु प्रोक्शो आन कली खुप्ब सुइ मबाक्नीम।

6 मो हना यो गो नोले अम्मोनी आन शोंप लेशशा गेनुड” दे परमप्रभु यावेमी देंत। येरमीया ४८:४७

एदोम आ पर्बम लोव्र

यसैया २१:११; यसैया ३४:५-१५; इजीकीएल २५:१२-१४;
आमोस १:११-१२

7 मुर नेल्ल आन परमप्रभु यावेमी एदोम आ पर्बम “मुल तेमान सहरम तुइक्तीक मबाक्बा डा? मार, रुप्व मुर आन अर्ती जाम्शा

लमे? मार, मेको आन रुप्तीक योल्मे?

8 ए देदानम बाक्बपुकी, लेशशा प्रोक्कीन। लुक्च लने। मारदे हना गो एसाव कली सजाइ गेची ना मेको कली हिंचा डा श्येत गेनुड।

9 अडगुर सेक्बपुकी इ बाक्तीके जाक्तेक्म हना, मार, मेकोपुकीम अरु सीला गुप्तीके मप्रोंइनीमी डा? मार, नाक्दो खुइ जाक्शो नम हना, मेकोपुकीमी आन कली माल्शो थोव्रक ला मलाइक्नीमी डा?

10 तन्न गो एसाव कली शिश्रा सेल्ता। गो मेको आ खुइक्तीक नेल्ल तांडसीतीके सेल्ता। मिनु मेको खुइक्चा मताइब। मेको आ आल, आ खिं डा मुर, आ नेक्था बाक्ब नु आंमा यो मली।

11 इ रोम रोइक्च आन कली प्रोंइशा वोतो। गो मेको आन कली कोव्रनुडमी। मिनु वोंइश बेक्शो मीश मुरपुकीमी यो आं कली थमा सुइक्चा तामेक्ल” देंत।

12 परमप्रभु यावेमी “श्येत डा कचौरा तूचा ममाल्शोमी यो मेको तूचा माल्ताक्व हना, मार, गे सजाइ मतथु ब्रोंइचा ताइनेवे? गे सजाइ तचा माल्नेवे। गे मेको तूचा माल्नेवे। येरमीया २५:१५, २८, २९; भजन संग्रह १३७:७

13 मारदे हना बोज्रा ब्रेशशा हिंचा डा, शुक्शी पाइक्चा पुंडसीब, श्येतथ नु सराप पाइक्तीके दुम्ब, दे आं नेंम कसम जाता। मिनु आ सहर नेल्ले गेना हना यो कली ब्रेशशा लीनीम” देंत।

14 गो परमप्रभु यावे आ लोव्र कुरब रे पा लोव्र का नेंता। लोव्र कुरब का रागी रागी डा मुर आन पर्बम सोइश्शो बाक्ब। मेकोमी “लडाइ तोचा कली बुक्कीन। लडाइ पचा कली सासीन” देंत।

15 परमप्रभु यावेम “मुल गो इ कली रागी रागी आन दाते डा नेल्ल क्येडा आइक्च सेल्लन। मुरपुकीमी इ कली महिक्नीम।

16 गे सेरथे फुल्लु आ पुक्खीम बाक्नेवे। इ हिंच कोइतीके नु इ थुं डा ठेयब लेत्तीकेमी इ कली जोल पाम्ताक्स। गे डांडा डा बाक्तीक आंम के सेल्ल्तीवी। गेमी इ बाक्तीक ककाकुली आ ग्योव्र खोदेशो पा इर सेल्ल्तीवी हना यो, गो इ कली मेकेर रे उइ तोक्नन” दे परमप्रभु

यावेम देशो बाक्ब।

17 परमप्रभु यावेम “एदोम थम हिंचा डा दुम्ब। सु सु मेकेर लाइनीमी, मेको एदोम आ शुश श्येत तशा हिंनीमी। मिनु शुक्शी पाइनीम।

18 दोपा सोदोम, गोमोररा नु मेको आस एर ओंथ डा सहर नेल्ल श्येतथ दुम्मा, मोपा मेकेर सुइ मलीनीम। सुइ मबाक्नीम। येरमीया ५०:४०; यसैया १:९

19 यर्दन आ नेक्था डा ठेयब ब्वाकी रे बस्तु भाव योव्रतीकेम गुप्स जाक्शो खोदेशो पा गो एदोम कली याम कामी मेको आ रागी रे गुंइनुड। गो सु कली सासन पचा कली योव्रडु, मेको कली गेनुड। आं खोदेशो सु बाक्बा? आं कली सुम अरेने चाप्बा डा? तेको गोठला आं डोंइती राप्ने चाप्बा डा?” दे परमप्रभु यावेमी देंत येरमीया ५०:४४-४६

20 मोपतीके परमप्रभु यावेम एदोम आ पर्बम पचा चिक्शो गेय नु तेमान सहरम बाक्ब आन पर्बम मेको आ मिम्शो दोदेशो बाक्बा, मेको नेनीन। थमा पा बगाल डा आइक्च कीशा लाइक्चा पुंइसीनीम। मेको आन पतीके आन योव्रतीक खतम दुम्ब।

21 मेको आन गोल्लशो रेयकेमी रागी खिंखि पाइब। मेको आन वाइ ब्रेशो लल समुन्द्र सम्म नेंसीब।

22 कोव्रडीन, मेको ककाकुली खोदेशो पा बेरशा जाक्ब। मिनु मेको जुक्शा बोज्रा तार मेको आ फ्रां हाम्ब। मेको नाक्ती एदोम डा लडाइ पाइब आन थुं सुत्केरी रोइ पशो मीश मुर आन थुं खोदेशो दुम्ब। येरमीया ४८:४०

दमस्कस आ पर्बम लोव्र

यसैया १७:१-३; आमोस १:३-५

23 परमप्रभु यावेमी दमस्कस आ पर्बम “हमाथ नु अरपाद वाम ग्याम दुम्शो बाक्नीस। मारदे हना मेको निक्शीमी मरिम्शो लोव्र

नेंताक्स। मेको हिंशा आस थुं ग्येत्थ लुकच दुम्शो बाक्नीस। मिनु समुन्द्र खोदेशो पा सिक्सी पा बाक्ने मचाप्नीस।

24 दमस्कस मचाप्ब दुम्शो बाक्ब। मेको प्रोक्त। मेको शुश हिंब। मेको सुत्केरी रोइ पशो मीश मुर खोदेशो पा सुर्ता पा हिंब।

25 दोपा मेको नें चलेशो सहर प्रोंइचा पुंडसे? मेको सहर डा मुर शुश ग्येरसाक्म।

26 मुल मेको आ ठिटा मुरपुकी लां मेर गोल्नीम। मिनु मेको नाक्ती मेको आ लडाइ पाइब नेल्ल खतम दुम्नीम।

27 गो दमस्कस डा गारोपुकीम मी सुइक्नुडमी। मेकोमी बेन-हादाद आ गारो हिरशो सहर खतम सेल्ब” दे मुर नेल्ल आन परमप्रभु यावेम देंत।

केदार नु हासोर आस पर्वम लोत्र

28 बेबीलोन डा पिप नेबुकदरेसरम केदार नु हासोर आस कली ग्रात। एको केदार नु हासोर आस पर्वम पशो लोत्र बाक्ब। मिनु परमप्रभु यावेमी “बोक्कीन। केदार मेर लने। पूर्व डा मुर आन कली खतम पोक्कीन। यसैया २१:१६-१७; यहोसु ११:१०

29 मेको आन ताम्बु, मेको आन क्यारश भेडा, मेको आन वासी नु आन मारेइ मारेइ लतीन। आन दलओंठ रोइशशा आंम के सेल्सीन। मिनु मुरपुकीम ‘एर ओंथ नेल्ल हिंचा डा श्येत बाक्ब’ दे ग्रीचा माल्नीम। येरमीया २०:३

30 ए, हासोरम बाक्बपुकी, रीब पा प्रोक्कीन। लुकच लशा खुइशशा बाक्कीन। बेबीलोन डा पिप नेबुकदरेसरमी इन कली मरिम्शो पचा मिम्शो बाक्ब। मेकोम इन कली मरिम्शो पचा कली गेय का पशो बाक्ब” दे परमप्रभु यावेमी देंत।

31 मिनु “बेबीलोन डा पिप नेबुकदनेसरमी इन कली श्येत गेचा मिम्ब। इन कली मरिम्शो पचा मिम्ताक्व। बोक्कीन, थुं नाइशशा रिम्शो पा बाक्ब मुर गे बारीन। मेको रागी डा मुर आन के ठेयब

लाप्यो नु चोक्तीके मबाक्नीम। मेको रागी डा मुर अरु क्येडा डोन बाक्नीम।

32 मेको आन दलओंठ रोइक्चा पुंइसीनीम। आन बी ब्यफ यो रोइक्चा पुंइसीनीम। मेको चां प्रेक्शो मुर आन कली तेइ तेइ ब्रपाइक्नुडमी। मिनु मेको आन कली हिंचा डा श्येत गेनुड। येरमीया २५:२३

33 हासोर सिवार आन बाक्तीके दुम्ब। मेको गेना हना यो कली मुर मबाक्तीक रागी दुम्ब। मेकेर सुइ मबाक्नीम, मेकेर सुइ मुर बाक्थ मलाइनीम” दे परमप्रभु यावेम देंत। येरमीया ४९:१३

एलाम आ पर्वम लोत्र

34 यहूदा डा पिप सिदकीयाहम सासन पचा गोवा ना परमप्रभु यावेम आ लोत्र पाइब येरमीया कली एलाम आ पर्वम लोत्र पाप्तु। येरमीया २५:२५

35 मुर नेल्ल आन परमप्रभु यावेम मार लोत्र पाप्तु देंशा हना “गो एलाम आ लिब्रा जिक्नुड। मेको आन लिब्रा आन ठेयब सक्ति बाक्ब। यसैया २२:६

36 गो एलाम डा मुर आन कली सरीड आ एर ओंथ नेल्ल रे फश गिवार पपाइश्शा एर ओंथ ब्रपाइक्नुडमी। एलाम डा ग्याइश्शा लाइक्चा पुंइसीशो नेल्ल रागी रागीम ब्राइनीम।

37 मेको एलाम डा मुर आन कली, आन जोरी सत्रु नु मेको आन कली साइक्चा माल्ब आन डोंइती शुश हिंब सेल्लुडमी। गो मेको आन कली ठेयब श्येत गेनुड। गो मेको आन कली साइक्ने मथुमु सम्म मेको आन नोले तरवार सोइक्नुड। इजीकीएल ३२:२४

38 गो आं नित्तीके एलामम सेल्लुड। मिनु मेकेर डा पिपी नु मेको आन ठेयब मुर आन कली साइक्नुडमी” दे परमप्रभु यावेमी देंत।

39 परमप्रभु यावेमी “मो हना यो गो मुल नोले डा नाक्ती एलाम डा मुर आन शोंप लेशशा गेनुडमी” दे परमप्रभु यावेमी देंत।

50

बेबीलोन आ पबर्म लोत्र
यसैया १३:-; यसैया १४:-

1 परमप्रभु यावेम बेबीलोन नु कल्दी आन रागी आ पबर्म येरमीया कली लोत्र पाप्तु। यसैया ४६:१

2 मार लोत्र पाप्तु देशा हना “रागी रागी डा मुर आन दातेमी एको लोत्र नेंपतो। छेदर पोक्शा नेल्ल आन कली नेंपाइश्शा ठेयब सेंदा पा देनो। लोत्र का यो मखुइक्तो। बेबीलोन ब्रुत। बेल देवता मुने दोक्त। मेरोदक देवता सुर्ता पाइब। मेको आन मूर्ति मुने दोक्नीम। मेको सुर्ता पाइनीम। बेल बेबीलोन सहर डा देवता बाक्ब।

3 उत्तर रे रागी का डा मुरपुकीम मेको कली लडाइ तोइनीम। मिनु मेको आ रागी श्येत्थ सेल्नीम। मेकेर सुइ मबाक्नीम। मुर नु जन्तु नेल्ल प्रोक्नीम।

4 मेको नाक्ती इस्राएल डा मुरपुकी नु यहूदा डा मुरपुकी काथा डाक्ना डाक्न परमप्रभु यावे, आन परमप्रभु कली माल्थ गाक्नीम। येरमीया ३१:९

5 मेकोपुकीमी ‘सियोन गे लतीक लां ते बाक्बा?’ दे हिल्लो पाइनीम। मिनु ‘इन गाक्शो लांन बाक्ब’ देंनीम। मेकोपुकीमी गेना हना यो लीब मप्रेंतीके कबल पा परमप्रभु यावे कली जिम्मा गेंसीनीम। येरमीया ३२:४०

6 आं मुरपुकी जाम्शो भेडा खोदेशो बाक्तेक्म। मेको आन गोठलापुकीम मेको आन कली हेंथे गाक्पाइश्शो बाक्तेक्म। मिनु मेको आन कली डांडा मेर हिरपाइश्शो बाक्तेक्म। मेकोपुकी डांडा पहाड सम्म हिरसाक्म। मिनु आन गोठ प्रेंताक्मे। येरमीया २३:१

7 मेको आन कली थिप्बपुकीम मेको आन कली नेक्तेक्म। मिनु मेको आन जोरी सत्रुमी ‘गो दोसी मनकी। मारदे हना मेकोपुकीमी परमप्रभु यावे कली पाप पाम्तेक्म। मेको आन ठीक पा जोतीके नु आन किकी पिपी आन आस पशो, परमप्रभु यावे बाक्त’ देंतेक्म।

8 बेबीलोन रे प्रोक्कीन। कल्दी आन रागी प्रोनीन। मिनु क्यारश भेडा आन कली लां कोइब बोका खोदेशो दुमीन। येरमीया ५१:६; यसैया ४८:२०

9 मारदे हना गो उत्तर रे ठेयब रागी रागी डा लडाइ पाइब आन कली बेबीलोन आ पर्वम क्युकशो बाक्नुड। मेकोपुकी लडाइ पचा कली सासीनीम। मिनु मेको कली लडाइ तोइनीम। मेको आन ब्रा थाम्पा लडाइ पस जोक्ब मुर खोदेशो बाक्नीम। मेकोपुकी मोशा मलेत्नीम।

10 मोपा कल्दी रागी रोइक्चा पुंइसीब। मिनु मेको कली रोइक्ब नेल्ल रूनीम” दे परमप्रभु यावेम देंत।

11 परमप्रभु यावेम “गे ग्येरसीनीनी। शुश ग्येरसीने। गे आं शोंप रोइक्ब बाक्नीनी। दांइ पाइब मगिक्शो बी खोदेशो पा प्रेनीनी। गे शारा खोदेशो पा ग्रीनीनी।

12 इन ममा थाम्पा मुने दोक्ब। इन कली जरमेब शिशी मताइब। मेको इन रागी रागी आन दातेमी नेल्ल क्येडा आइक्च दुम्ब। मेको मुर मबाक्तीके सोत्रशो रागी नु गोरशो रागी दुम्ब।

13 परमप्रभु यावे आ चुरतीकेमी मेकेर सुइ मबाक्नीम। मेको थम श्येत्थ रागी दुम्ब। बेबीलोन रे पा गाक्ब मेको तशा हिंनीम। मिनु मेको आ श्येत तशा शुक्शी पाइनीम। येरमीया ५१:३७

14 गे लिब्रा आप्बपुकी, बेबीलोन आ एर ओंथ इन बाक्तीकेम राप्शा बाक्कीन। ब्रा कली का यो महेक्थु आप्पीन। मारदे हना मेकोमी परमप्रभु यावे कली पाप पाप्तु।

15 मेको आ एर ओंथ नेल्ल बाक्शा, ठेयब सेंदा पा ग्रीडीन। मेको इन कली जिम्मा गेंसीब। मेको आ बोल्यो दरवार एत्तेक्म। मेको आ गारो प्रेत्वा पुंइसीशा दोक्तेक्म। मारदे हना मेको परमप्रभु यावे आ क्येक्क लेशो बाक्ब। मेको कली क्येक्क लेत्तीन। मेकोमी अरु आन कली पाइशो खोदेशो पा मेको कली यो पतीन। प्रकाश १८:६

16 गे बेबीलोनम वांचेर शोक्ब आन कली खेरीन। मीशो अन्न रिक्ब आन कली खेरीन। खतम पोक्ब तरवारम पतीके नेल्ल आन

कली आन आन खिं डा मुर आन बाक्तीके लेशशा लचा गेने। मेको नेल्ल आन आन रागी प्रोक्चा माल्नीम।

17 इस्राएल गुप्सपुकीम खेदा पा एर ओंथ ब्रपाइश्शो भेडा खोदेशो दुम्शो बाक्ब। मेको कली डोंइती अस्सुर डा पिपम दाक्तु। मिनु नेल्ल क्येडा नोले बेबीलोन डा पिप नेबुकदरेसरमी मेको आ रुश नेल्ल नेक्तु” देंत।

18 मोपतीके मुर नेल्ल आन परमप्रभु यावे, इस्राएली आन परमप्रभुमी “गो बेबीलोन डा पिप नु मेको आ रागी कली अस्सुर डा पिप कली सजाइ गेशो खोदेशो पा, सजाइ गेनुड। २राजा १९:३५

19 गो इस्राएल कली आं कली योव्रतीकेम लेशशा चाक्नुड। मिनु मेको कारमेल नु बाशान मेर जोइब। एफ्राइम नु गिलाद डा पहाड मेर मेको आ शोव्रलु बेक्शो रूब।

20 मेको नाक्ती इस्राएल आ मरिम्शो पशो माल्शा कोव्रशा हना यो, मथिंसीब। यहूदा आ पाप माल्शा हना यो, मथिंसीब। मारदे हना गो आं प्रोंइशा वोइश्शो लीशो आन कली आन पाप माफ गेतामी। येरमीया ३३:७-८

21 मेराथाइम रागी कली लडाइ तोने। पेकोद आ मुर आन कली लडाइ तोने। मिनु नेल्ल खतम पोक्कीन। गो इन कली अरेशो खोदेशो पा, नेल्ल पने” दे परमप्रभु यावेमी देंत।

22 लडाइ डा रेयके नु ठेयब खतम दुम्तीके आन नेक्था बाक्ब।

23 दोपा रागी नेल्ल डा घन जिक्शा फस दुम्मे, मोपा बेबीलोन रागी रागी आन दातेमी शुश हिंचा डा दुम्ब। येरमीया ५१:२०

24 बेबीलोन, गो इ कली ब्वारद का दाइक्ताक्ड। गे मतुइक्थु ग्याइक्चा पुंडसीनेवे। मिनु इ कली थिश्शा, ग्याइक्चा ताइतक। मारदे हना गे परमप्रभु यावे कली मरिम्शो पशो बाक्ते।

25 परमप्रभु यावेम आ या वोइक्तीक खिं रोक्तु। मिनु आ चुरशो डा या गुंडताक्व। मारदे हना मुर नेल्ल आन परमप्रभु यावेमी कल्दी आन रागीम गेय का पचा माल्ब।

26 मेको आ एर ओंथ नेल्ल रे लडाइ पथ जाक्कीन। मेको आ अन्न वोइक्तीक खिं रोक्कीन। मेको कली अन्न खोदेशो पा तेलीन। मेको कली मारेइ मलीशो खतम सेलीन। मेको के मारेइ मलील।

27 मेको आ सांढे ब्यफ नेल्ल सतीन। मेको आन कली क्योरचा कली लतीन। आबी, आबी, मेको आन नाक्ती जाक्त। मेको आन कली सजाइ गेतीक नाक्ती जाक्त।

28 मिनु परमप्रभुमी “नेनीन, बेबीलोन रे प्रोक्ब मुर नु मेकेर बाक्ब अर्को रागी रे प्रोक्शो मुरुम सियोनम ‘परमप्रभु यावे, आंइ परमप्रभुमी क्येक्क लेप्ब। आ खिं आ पर्बम क्येक्क लेप्ब’ दे नेल्लेम नेंचा डा पा शेनीम।

29 बेबीलोनी आन कली लिब्रा आप्बपुकी ब्रेत्तीन। लिब्रा आप्ब नेल्ल आन कली ब्रेत्तीन। मेको आ एर ओंथ नेल्ल ताम्बु कीशा मुर आन कली तेक्कीन। मेकेर रे सुइ ब्रोंइचा मतामेक्ल। मेको आ पशो खोदेशो पा मेको कली क्येक्क लेत्तीन। मेकोमी पशो खोदेशो पा, मेको कली यो पतीन। मारदे हना मेकोमी इस्राएली आन का ला बाक्शो परमप्रभु यावे कली शुक्शी पाप्तु। येरमीया ५०:१५

30 मोपतीके मेको आ ठिटा मुरपुकी लां मेर गोल्नीम। मिनु मेको आ लडाइ पाइब नेल्ल खतम दुम्नीम” दे परमप्रभु यावेम देंत।

31 परमप्रभु, मुर नेल्ल आन परमप्रभु यावेमी “गो इ कली ठेयब लेशशो दुम्तीके काइ मदाक्नुड। इ नाक्ती जाक्त। इ कली सजाइ गेतीक नाक्ती जाक्त।

32 ठेयब लेशशो मुर दाइल पा गोल्ब। मेको कली पोक्ब सुइ मबाक्नीम। मिनु गो मेको आ सहरम मी सुइक्नुड। मेको मीम मेको आ एर ओंथ बाक्ब नेल्ल आन कली दाक्ब” देंत।

33 मुर नेल्ल आन परमप्रभु यावेमी “इस्राएल डा मुर नु यहूदा डा मुर श्येत गेचा नु दिप्चा पुंडसीनीम। मेको आन कली ग्याइश्शा लाइक्बपुकीम मेको आन कली लचा मगेनीम।

34 मो हना यो मेको आन कली श्येत रे प्रोंइब सक्ति पाइश्शो बाक्ब। मेको आ नें मुर नेल्ल आन परमप्रभु यावे बाक्ब। मेकोमी मेको आन कली आ सक्तिमी थमा पा वारच पाइब। मिनु रागी कली

रिम्शो दुम्पाइक्ने चाप्व। तन्न बेबीलोनम बाक्ब आन कली चहिं थुं नाइक्चा मगेब” दे परमप्रभु यावेमी देंत।

35 मिनु परमप्रभु यावेमी “कल्दी आन कली तरवार का जाक्त। बेबीलोनम बाक्ब नेल्ल आन कली, आन ठेयब मुर आन कली नु आन जोक्ब तुइक्ब मुर आन कली यो तरवार जाक्त।

36 मेको आ जादू कली यो तरवार का जाक्त। मोपतीके मेकोपुकी मूर्ख दुम्नीम। मेको आ लडाइ पाइब आन कली यो तरवार का जाक्त। मिनु मेको खतम दुम्नीम।

37 मेको आ शारा, आ बग्गी नु मेको आन दातेम बाक्ब अर्को रागी डा लडाइ पाइब आन कली साइक्चा कली तरवार जाक्त। मोपतीके मेकोपुकी मीश मुर खोदेशो दुम्नीम। मेको आ शोंप नेल्ल आन कली तरवार जाक्त। मेको नेल्ल रोइक्तीक दुम्ब। येरमीया ५१:३०

38 मेको आ ब्वाक्कु सोव्रचा कली काइ रेउ मयी। मारदे हना मेको शुश मूर्ति आन रागी बाक्ब। मिनु मेको आ देवी देवता आन पर्बम निप्स ग्राइशो खोदेशो दुम्ब।

39 मोपतीके बेबीलोन सहरम ब्वाकी डा जन्तु नु फरपुकी बाक्नीम। मिनु मेकेर ठेयब चिक्ब बास बाक्नीम। मेकेर मुल लेंशा नेल्ल पाला सम्म मुर मबाक्नीम।

40 मिनु सोदोम, गोमोररा नु मेको आस एर ओंथ डा गाउं आन कली लोक्शो खोदेशो पा बेबीलोन सहरमी सुइ मबाक्नीम। मेकेर मुर मबाक्तीके दुम्ब” दे परमप्रभु यावेमी देंत। येरमीया ४९:१८; उत्पत्ती १९:२४-२५

41 कोव्रडीन, मुरपुकी उत्तर रे जाक्ना जाक्न बाक्नीम। शुश जात डा नु शुश पिप आन जोंब बोक्शा डोन रागी रे जाक्नीम। येरमीया १:१४

42 मेकोपुकी लिब्रा नु तूतीक कुरशो, थम मरिम्शो पाइब नु शिशी मपाइक्ब बाक्नीम। मेको आन रेयके समुन्द्र ग्रीशो खोदेशो बाक्ब।

मेकोपुकी शारा डोइशशा जाक्नीम। मेको लडाइ तोचा कली आन बाक्तीकेम राप्नीम। बेबीलोन आ तमी, इ कली लडाइ तोचा कली जाक्नीम। येरमीया ६:२३

43 मिनु बेबीलोन डा पिपम मेको आन पर्बम लोव्र नेंतु। मिनु आ थुं लुकच लत। मेको सुत्केरी रोइ पशो मीश मुर खोदेशो पा सुर्ता पा हिंत।

44 यर्दन आ नेक्था डा ठेयब ब्वाकी रे बस्तु योव्रतीकेम गुप्स जाक्शो खोदेशो पा गो मेको कली याम कामी मेको आ रागी रे गुंडनुड। गो सु कली सासन पचा कली योव्रडु, मेको कली गेनुड। आं खोदेशो सु बाक्बा? आं कली सुम अरेने चाप्बा डा? तेको गोठला आं डोंइती राप्ने चाप्बा डा? येरमीया ४९:१९

45 मोपतीके परमप्रभु यावेम बेबीलोन आ पर्बम पचा चिक्शो गेय नु कल्दी रागी डा मुर आन पर्बम मिम्शो दोदेशो बाक्बा, मेको नेनीन। थमा पा लाइक्चा पुंडसीनीम। बेबीलोन डा प्रुडग मुर आन कली यो कीशा लाइक्चा पुंडसीनीम। मेको आन बाक्तीक मेको तशा हिंब।

46 बेबीलोन कली ग्रामानु, मेको आन रेयकेम रागी खिंखि पाइब। मेको आन वाइ ब्रेशो रागी रागी डा मुर आन दातेमी नेंसीब।

51

बेबीलोन खतम दुम्शो

1 मिनु परमप्रभु यावेमी “गो बेबीलोन नु लेब-कमाइ डा मुर आन पर्बम खतम सेल्ब फश गिवार कली सोइक्नुड। खतम सेल्ब फश गिवार कली यो खतम सेल्ब सोक्त देंसीब।

2 गो बेबीलोन कली क्राप्ब मुर सोइक्नुडमी। मेकोपुकीम बेबीलोन आ श्येत जतीक नाक्ती आ एर ओथ नेल्ल रे जाक्शा, मेको आ रागी श्येत्थ सेल्नीम। येरमीया १५:७

3 लिब्रा आप्बम आ लिब्रामी ब्रा मचुइक्तल। मिनु लडाइ पाइबमी आ लडाइ डा वा मफेक्सेक्ल। मेको आ ठिटा मुर आन कली मप्रोनीन। मेको आ लडाइ पाइब नेल्ल आन कली सतीन।

4 मेकोपुकी कल्दी आन रागीम साइक्चा पुंइसीनीम। मेकोपुकी आ लां मेर गार दुम्शा गोल्नीम।

5 मिनु इस्राएल नु यहूदा परमप्रभु, मुर नेल्ल आन परमप्रभु यावे रे मप्रोंइसीशो बाक्ब। मेको आन रागी इस्राएली आन का ला बाक्शो परमप्रभु यावे कली पापम ब्रीशो बाक्ब। यसैया ५४:४; येरमीया ५०:२९

6 बेबीलोन आ दाते रे प्रोक्कीन। मुर नेल्ल आंम आंम गिंम प्रोंइचा कली प्रोक्कीन। मेको आ दोसम पतीकेम गे मबेक्कीन। मारदे हना मेको परमप्रभु यावे आ क्येक्क लेत्तीक नाक्ती बाक्ब। मेकोमी मेको कली आ तचा माल्शो सजाइ गेब। येरमीया ५०:८; प्रकाश १८:४

7 बेबीलोन परमप्रभु यावे आ गुइम सुन के कचौरा का बाक्त। मेकोमी रागी नेल्ल डा मुर आन कली दुक्पाइक्तु। रागी रागी डा मुरपुकीम मेको आ अडगुर शांबु तूतेक्म। मोपतीके मेको रागी डा मुर निप्स ग्यशो दुम्तेक्म। प्रकाश १७:४; येरमीया २५:१५; प्रकाश १८:३

8 बेबीलोन याम कामी गोल्त। मिनु टुक्रा टुक्रा सेल्चा पुंइसाक्व। मेको आ पर्बम रोंका पने। मेको आ गारम खेक्चा कली खेक्तीक चाक्कीन। मो पशोनु, मेको साबा कों। यसैया २१:९

9 गोपुकीम बेबीलोन कली सापाइय्य वा। तन्न मेको मसाब। गो मेको कली प्रोंइतक। मिनु आंम आंम रागी लेत्तक। मारदे हना मेको आ निसाफ पशो सजाइ स्वर्ग सम्म जाक्दीशो बाक्ब। मेको सरीड सम्म बोक्शो बाक्ब।

10 परमप्रभु यावेमी आंइ ठीक पतीके कोंइताक्व। जाक्कीन, मिनु इं परमप्रभु यावेमी मार पवा, मेको सियोनमी नेंपाइशशा देंय।

11 इन ब्रा शेप्पीन। मिनु ब्रा कुरतीक प्रिंदीन। परमप्रभु यावेम मादी आन पिप कली लडाइ पपाइक्तु। मारदे हना मेकोमी बेबीलोन कली खतम सेल्चा कली मिम्ताक्व। मेको आ खिं आ पर्बम क्येक्क लेत्तीके बाक्ब। यसैया १३:१७; येरमीया ५०:२८

12 बेबीलोन डा गारो आ डोंइती छेदर खुक्कीन। शुश कोव्रब वोतीन। खाल पाइब वोतीन। बाप्व आन कली ठीक पा वोतीन। परमप्रभु यावेमी बेबीलोन डा मुर आन पर्बम आ मिम्शो पाप्तु।

13 गे शुश व्वाक्कु आ नेक्था बाक्नेवे। इ शोप शुश बाक्नीम। मुल इ नाक्ती जाक्त। इ ब्रोंइतीक नाक्त नुप्त। प्रकाश १७:१

14 मुर नेल्ल आन परमप्रभु यावेम आ नेम कसम जाप्तु। गो थमा पा सल्हा खोदेशो पा लडाइ पाइब मुर जाक्पाइशशा, इ रागी प्रिनुडमी। मिनु मेकोपुकीमी इ क्येडा ग्राशो आ पर्बम ठेयब सेंदा पा रेयके पाइनीम।

15 मेकोमी रागी कली आ सक्तिम सेल्लु। मेकोमी आ तुइक्तीकेम रागी कली वोइक्तु। मेकोमी आ रुप्तीकेम सरीड प्राक्तु। येरमीया १०:१२-१६

16 मेकोमी लोव्र पवानु, सरीडमी रेउ यिशा, गरड गुरुड पाइब। मेकोमी रागी आ सुर रे गोस्स पोक्ब। रेउ नु काथ काथा चिला दाप्पाइक्ब। मिनु फश आ बाक्तीक रे ग्रुंडशा, फश पपाइक्ब। बजन संग्रह १३५:७

17 मुर नेल्ल मूर्ख नु मजोक्ब मतुइक्ब बाक्नीम। सुन चेम्ब नेल्ल आन मूर्तिम पतीके मुने दोक्नीम। मारदे हना मेको आन सेल्लो मूर्ति सोक्त मपाइशो जोल बाक्नीम।

18 मेको शोर गाक्शो बाक्नीम। मेको मुर आन मिम्शो ला बाक्नीम। मेको आन कली सजाइ गेशोनु, मेकोपुकी खतम दुम्नीम।

19 परमप्रभु यावे मेको खोदेशो ममाइ। परमप्रभु यावे याकूब आ भाग बाक्ब। मेको आन खोदेशो ममाइ। मारदे हना परमप्रभु यावे मारेइ मारेइ सेल्ब बाक्ब। मिनु इस्राएली मेको आ मुर बाक्नीम। मेको आ नें मुर नेल्ल आन यावे बाक्ब।

20 बेबीलोन, गे लडाइ पचा कली आं तुप्तीके नु लडाइ पतीक या बाक्नेवे। गो इ रे पा रागी रागी डा मुर आन कली तुप्तामी। गो इ रे पा राज्य आन कली खतम पोक्तामी। येरमीया ५०:२३

21 गो इ रे पा शारा नु शारा डोइक्ब आन कली तुप्तामी। गो इ रे पा बग्गी नु बग्गी चलेब आन कली तुप्तामी।

22 गो इ रे पा वोंइश मुर नु मीश मुर आन कली तुप्तामी। गो इ रे पा खूशो नु ठिटा आन कली तुप्तामी। गो इ रे पा ठिटी नु ठिटा आन कली तुप्तामी।

23 गो इ रे पा गोठला नु मेको आ बगाल कली तुप्तामी। गो इ रे पा रू दोइब नु आन ब्यफ आन कली तुप्तामी। गो इ रे पा सरकार आ गेय पाइब नु हुकुम पाइब आन कली तुप्तामी।

24 गो इ डोंइती बेबीलोन नु कल्दी रागीम बाक्ब मुर नेल्लेम सियोनम मरिम्शो पशो आ पर्बम क्येक्क लेत्नुड” दे परमप्रभु यावेम देंत। येरमीया ५०:२९; अय्युब १:१७

25 परमप्रभु यावेमी “गे मारेइ मारेइ आन कली साइक्ब डांडा, गो इ कली काइ मदाक्नुड। गे रागी नेल्ल खतम सेल्लेवे। गो आं गुइ दिशा, इ कली रोंगुरे उइ तोक्नन। मिनु कोक्त जेशशो डांडा सेल्लन।

26 खिं डा सुर वोइक्चा कली इ रे पा फुल्लु का यो मलाइक्नीम। जग वोइक्चा कली यो इ फुल्लु मलाइक्नीम। तन्न गे गेना हना यो कली श्येत्थ रागी दुम्चा माल्लेवे” दे परमप्रभु यावेम देंत।

27 मिनु परमप्रभु यावेमी “गे रागीम छेदर का खुक्कीन। रागी रागी आन दातेमी तुराही तपीन। मेको नु लडाइ पचा कली रागी रागी डा मुर आन कली ठीक सेलीन। राज्य आन कली बेबीलोन नु लडाइ पचा कली पोक्कीन। आरारात, मिन्नी नु अश्केनजमी बेबीलोन नु लडाइ पाइब आन ठेयब मुर का योवडीन। सल्हा आन हुल खोदेशो पा शुश शारा चाक्कीन। यसैया १३:३ उत्पत्ती १०:३

28 मेको नु लडाइ पचा कली रागी रागी डा मुर आन कली पोक्कीन। मादी आन पिप, मेको आन हुकुम पाइब, मेको आन ठेयब मुर नु मेको आन हुकुम पशो रागी नेल्ल डा मुर आन कली पोक्कीन” देंत।

29 खिनु कुशा रागी खिंखि पाइब। मारदे हना परमप्रभु यावेम बेबीलोन कली श्येतथ नु मुर मबाक्तीके सेल्लुड देशो लोव्र गाव्ब।

30 बेबीलोन डा लडाइ पाइबपुकीम लडाइ पचा प्रोइतेकम। मेको आन बोल्यो दरवारम बाक्नीम। मेको आन सक्ति जाम्त। मेकोपुकी मीश मुर खोदेशो दुम्तेकम। मेको आन खिम मी सुइक्ने थुम्तेकम। मेको आन लाप्यो डा आग्लो जिक्शो बाक्नीम। येरमीया ५०:३७

31 लोव्र कुरबम अर्को लोव्र कुरब आन कली लाम ग्रुम्नीम। मेकोपुकीमी बेबीलोन डा पिप कली “मेको सहर नेल्ल ग्रातेकम।

32 मिनु खोला शोक्तीके ग्रातेकम। जोरी सत्रु आन कली ओव्रचा मगेचा कली सेल्लो तेक्तीक नेल्ल मी सुइक्ताकमे। मिनु लडाइ पाइबपुकी शुश हिंशा वाम ग्याम दुम्तेकम” देशा पिप कली लोव्र नेंपाइक्नीम।

33 मिनु मुर नेल्ल आन परमप्रभु यावे, इस्राएली आन परमप्रभुमी “बेबीलोन आ तमी दांइ पतीक खला का खोदेशो दुम्ब। मेको दिप्या पुंइसीब। इक्का नोले रिक्की नाक्ती रीब पा जाक्ब” देंत।

34 सियोनमी “बेबीलोन डा पिप नेबुकदरेसरमी आं कली दाक्ती। आं कली खतम सेल्लती। आं कली श्येतथ गर खोदेशो सेल्लती। आं कली अजीङगरम खोदेशो पा दाक्ती। मिनु ब्रोव्रशो जचा थोव्रकम खोदेशो पा आ कोव्रज प्रिंताक्व। मिनु नोले आं कली ताइक्ताकयी।

35 आं मुर आन कली साइशो आ पर्वम बेबीलोन क्येक्क लेत्चा पुंइसीब” देंत। सियोन डा यरूसलेममी “कल्दी रागीम बाक्ब मुरपुकीम ‘आं हुश आ क्येक्क लेत्चा पुंइसीनीम’ देंचा माल्नीम” देंत।

36 मोपतीके परमप्रभु यावेमी “गो इ पोन बोक्नुड। गो इ कली गेशो श्येत आ क्येक्क लेत्नुड। गो मेको आ समुन्द्र सोव्रपाइक्नुड। आ ब्वाक्कु बुक्तीके यो सोव्रपाइक्नुड।

37 मिनु बेबीलोन खिं ब्रेशशा देल्लो, सिवार आन बाक्तीके, हिंचा डा नु शुक्शी पाइक्चा पुंइसीतीके नु मुर मबाक्तीक दुम्ब। येरमीया ५०:१३

38 मेकेर डा मुर नेल्ल गुप्स खोदेशो पा ग्रीनीम। मेकोपुकी गुप्स आन चाइक्ब खोदेशो पा डरर डरर पाइनीम।

39 नोले मेकोपुकी बोक्शा, मार मार माल्मेनु, गो मेको आन कली तूतीक खेतनुड। मिनु गो मेको आन कली रिश्शा ग्यारशा मपामे सम्म दुक्पाइक्नुडमी। मिनु गेना हना यो कली इप्नीम। मिनु गेनायो मसेंसीनीम” दे परमप्रभु यावेमी देंत।

40 मिनु परमप्रभु यावेमी “गो मेको आन कली क्योरचा कली कीशा लाइश्शो पाठा, सांड नु क्यारश खोदेशो पा चाक्नुडमी।

41 शेशाक सहर कली दोपा ग्राने चाप्मे? रागी नेल्ल डा ठेयब नु दारशो सहर ब्रुत। बेबीलोन दोपा रागी रागी आन दातेमी शुश हिंचा डा दुम्मे? शेशाक बेबीलोन कली अरु नें का बाक्ब।येरमीया २५:२६

42 समुन्द्र डोइश्शा बेबीलोन कली सुम्तु। समुन्द्र आ ग्रीशो छालम मेको कली सुम्तु।

43 मेको आ सहरपुकी हिंचा डा दुम्तेक्म। सोव्रशो, गोरशो नु मुर मबाक्तीके दुम्तेक्म। मेको रे पा सुइ मगाक्नीम।

44 गो बेबीलोन डा बेल देवता कली सजाइ गेनुड। मिनु आ दाक्शो थोव्रक मेपाइक्नुड। मुल रागी रागी डा मुर मेकेर चोक्थ्री क्राक्थ्री पा मलाइक्नीम। बेबीलोन आ गारो ब्रेत्त। येरमीया ५०:२; यसैया ४६:१

45 आं मुरपुकी मेकेर रे गूशा पिने। गे नेल्ल ब्रोंइचा कली प्रोक्कीन। परमप्रभु यावे आ ठेयब पा गाइश्शो रे प्रोक्कीन।

46 रागीम मारेइ रेयके नेंनीनु, इन थुं ग्येत्य लुकच मदुमीन। महिनीन। एको बर्सम खाल का डा रेयके नु अर्को बर्सम अर्को खाल डा रेयके नेंसीब। मेको रागीम हुश खाक्श पोक्शोनु, सासन पाइब कामी अर्को सासन पाइब कली जिचा तोशो रेयके बाक्ब।

47 गो बेबीलोन डा मूर्ति आन कली सजाइ गेनुडमी। मेको आ रागी नेल्ल मुने दोक्नीम। मिनु मेको आ मुर नेल्ल मेको आ दातेमी साइक्चा पुंइसीनीम। मोदेशो नाक्ती थमा पा जाक्ब।

48 मिनु नोले सरीड, रागी नु मेकेर बाक्ब नेल्लेमी बेबीलोन ब्रुशो आ पर्बम ग्येरशा वाइ ब्रेत्नीम। मारदे हना मेको आन कली क्येक्क लेप्ब उत्तर रे जाक्नीम” दे परमप्रभु यावेम देंत। प्रकाश १८:२०

49 परमप्रभु यावेमी “इस्लाएली आन कली साइक्तीके बेबीलोन ब्रुचा माल्ब। बेबीलोनम रागी डा मुर आन कली साइक्तीके बेबीलोन यो साइक्चा पुंइसीब।

50 गे तरवार रे ब्रोंइशा प्रोक्कीन। देश मपने। डोन रागीम बाक्शा, परमप्रभु यावे कली मिम्तीन। यरूसलेम इन थुंम वोतीन” देंत। भजन संग्रह १३७:५

51 मेकोपुकीमी “आंइ कली शुक्शी पाइश्शो नेंशा, गो मुने दोक्तक। गो आंइ कुल सुम्तक। मारदे हना परमप्रभु यावे आ खिंम अर्को रागी डा मुर जाक्शा ओव्रतेक्म” देंतेक्म।

52 परमप्रभु यावेमी “गो मेको आ रागी नेल्लेमी आन मूर्ति आन कली सजाइ गेनुडमी। मिनु मेकेर गार दुम्शो मुर हुकयी पाइनीम। मेको नाक्ती थमा पा जाक्ब।

53 बेबीलोन इर सरीड सम्म बोक्त हना यो, आ इर डा सहर बोल्यो सेल्लु हना यो, गो मेको कली खतम सेल्बपुकी सोइक्नुडमी” दे परमप्रभु यावेमी देंत। उत्पत्ती ११:४; यसैया १४:१३

54 परमप्रभु यावेम “बेबीलोन रे वाइ ब्रेश्शो सेंदा नेंसीब। कल्दी डा मुर आन रागी रे मारेइ मारेइ प्रेशशो रेयके नेंसीब।

55 परमप्रभु यावेम बेबीलोन कली श्येतथ सेल्ब। मिनु मेको आ ठेयब सेंदा सिक्सी पपाइक्ब। मेको आ छाल समुन्द्र खोदेंशो पा रेयके पाइब।

56 बेबीलोन कली खतम पोक्ब जाक्ब। बेबीलोन डा लडाइ पाइबपुकी ग्याइक्चा पुंइसीनीम। मेको आन लिब्रा जिकनीम। मारदे हना परमप्रभु यावे क्येक्क लेप्ब बाक्ब। मेकोमी आ पशो आ पा डा नेल्ल गेब। ब्यवस्था ३२:३९-४१

57 गो मेको आ सरकार डा गेय पाइब, जोक्ब तुइक्ब, मेको आ हुकुम पाइब, नु आ लडाइ पाइब नेल्ल आन कली दुक्पाइक्नुडमी।

मिनु मेकोपुकी गेना हना यो कली इप्नीम। लेंशा मबोक्नीम” दे पिपम देंत। मेको पिप आ नें मुर नेल्ल आन परमप्रभु यावे बाक्ब।

58 मुर नेल्ल आन परमप्रभु यावेम “बेबीलोन डा ब्रेमशो गारो दिंम दुम्ब। मिनु मेको आ लाइशो ठेयब लाप्चोपुकी मीम नेक्ब। मुरपुकी मोशा गेय पाइनीम। रागी रागी डा मुर आन श्येत पा पशो गेय नेल्ल मी कली ला दुम्ब” दे परमप्रभु यावेमी देंत। हबकुक् २:१३

59 परमप्रभु यावे आ लोव्र पाइब येरमीयामी माहसेयाह आ चच नेरीयाह आ तौ सेरायाह पिप आ गेय पाइब कली अरेप्टु। मिनु मेको यहूदा डा पिप सिदकीयाहम सासन पवा आ ४ बर्सम पिप नु बेबीलोन लशो बाक्त। येरमीया ३६:४

60 येरमीयामी बेबीलोनम जाक्चा चिक्शो श्येत आ पर्बम डा लोव्र कागज काम ब्रेक्ताक्व। बेबीलोन आ पर्बम नेल्ल ब्रेक्ताक्व। येरमीया ५०:१-५०,५८

61 मिनु येरमीयाम सेरायाह कली “गे बेबीलोनम जाक्दीनेनु, एको लोव्र नेल्ल पढेवो।

62 ‘परमप्रभु यावे, गे एको रागी कली खतम पोक्नुड’ देंतीनी। ‘एकेर मुर नु बी ब्यफ, क्यारश भेडा, मारेइ बास मबाक्चा डा पा श्येतथ रागी सेलनुड। एको गेना हना यो मुर मबाक्तीके दुम्ब’ देंतीनी” देनो।

63 मोपा एको कागज पढेने थुम्शा, फुल्लु काम फ्रेंशा युफ्रेटीस खोलाम ताइक्तो। प्रकाश १८:२१

64 मिनु “कागज ब्वाक्कुम गुम्शो खोदेशो पा बेबीलोन आं चाक्शो श्येत आ पर्बम गुम्ब। मेको गेनायो गूने मचाप्ब, देंचा माल्नेवे” देंत। मोपा येरमीया आ लोव्र नुप्त।

52

यरूसलेम खतम दुम्शो

येरमीया ३९:१-१०; २राजा २४:१८-२५-७; २इतिहास ३६:११-२१

1 सिदकीयाह पिप दुम्मेनु, २१ बर्स दुम्शो बाक्त। मिनु मेकोम यरूसलेममी ११ बर्स सासन पाप्तु। मेको आ ममा आ नें हामुतल बाक्त। मेको लिब्ना डा येरमीया आ तमी बाक्त।

2 मिनु मेकोम येहो-याकीममी खोदेशो पा परमप्रभु यावे आ डोंइती मार मरिम्शो बाक्मे, मेको पाप्तु।

3 मिनु यरूसलेम नु यहूदा डा मुरपुकीमी परमप्रभु यावे कली शुश गाइक्पाइक्तेक्म। मोपतीके मेकोमी मेको आन कली आ डोंइती रे तिल्तु। मिनु बेबीलोन डा पिप सिदकीयाहम कली मटीव।

4 सिदकीयाहम सासन पवा आ ९ बर्स, १० महिना, १० नाक्त बेबीलोन डा पिप नेबुकदरेसरमी आ लडाइ पाइब नेल्ल कुरशा, यरूसलेम नु लडाइ पथ जाक्त। मिनु मेकोपुकीमी सहर आ लाडगा रे पुम्ताक्म। सहर डा गारो डोइक्चा कली एर ओंथ डोइक्तीक सेल्लेक्म।

5 मोपा पिप सिदकीयाहम सासन पवा आ ११ बर्सम सहर आ एर ओंथ नेल्ल रे पुम्ताक्म।

6 मिनु ४ महिना डा ९ नाक्ती सहरम थम ठेयब अन्काल दुम्त। मिनु मेको सहर आ आगामी जचा कली मारेइ मबा।

7 मिनु सहर डा गारो प्रेत्तेक्म। मिनु लडाइ पाइब नेल्ल प्रोक्तेक्म। कल्दी डा मुरपुकी सहर आ एर ओंथ बाक्तेक्म। मो हना यो मेकोपुकी पिप आ फल फुल रू डा गारो निक्शी आस दाते डा लाप्चो रे पा ग्रूशा प्रोक्तेक्म। मिनु मेकोपुकी अराबाह रागी गे लाम्तेक्म।

8 तन्न कल्दी डा लडाइ पाइबपुकीम पिप सिदकीयाह कली खेदा पाम्तेक्म। मिनु मेको कली यरीको डा दिंमम थित्तेक्म। मेको आ लडाइ पाइब नेल्ल ब्रशा एर ओंथ दुम्तेक्म।

9 मिनु मेको ग्याइक्चा पुंइसाक्व। मिनु मेकोपुकीमी पिप कली हमाथ रागी डा रिब्लामी बेबीलोन डा पिप आ डोंइती चाक्तेक्म। मिनु मेकेर बेबीलोन डा पिपमी मेको कली आ सजाइ नेंपाइक्तु।

10 मेको रिब्लामी बेबीलोन डा पिपमी सिदकीयाह आ तौ आन

कली मेको आ डोंइतीन साइक्तीमी। मिनु यहूदा डा ठेयब मुर नेल्ल आन कली यो रिब्लाम साइक्तीमी।

11 मिनु मेकोमी पिप सिदकीयाह आ मिक्च फेत्ताक्व। मिनु मेको कली कांसा के साडलोमी पाइक्ताक्म। मिनु मेको कली बेबीलोनमी लाइशशा मबेक्म सम्म चोक्शा वोइक्तु। येरमीया ३२:५

12 बेबीलोन डा पिप नेबुकदरेसरमी सासन पवा आ १९ बर्स ५ महिना १० नाक्ती पिप कली खाल पाइब आन कप्तान नेबुजरादान यरूसलेममी जाक्त।

13 मिनु मेकोमी परमप्रभु यावे आ खिं, पिप आ दरवार नु यरूसलेम डा खिं नेल्लेम मी सुइक्ताक्व। मेकोमी ठेयब खिं नेल्लेम मी सुइक्ताक्व।

14 मिनु पिप कली खाल पाइब आन कप्तान नु बाक्शो कल्दी डा लडाइ पाइब नेल्लेम यरूसलेम आ एर ओंथ बाक्शो गारो नेल्ल प्रेत्तेक्म।

15 मिनु पिप कली खाल पाइब आन कप्तान नेबुजरादानमी नेल्ल आन क्येडा प्रुडग, सहरम प्रोंइशा वोइशशो मुरपुकी बेबीलोन डा पिप आ बाक्तीके प्रोक्शा जाक्दीशशो मुरपुकी नु लीशो मार, मार, सेल्स जोक्ब मुर आन कली ग्याइशशा लाइक्तीमी।

16 तन्न पिप कली खाल पाइब आन कप्तान नेबुजरादानमी रागी डा अडगुर रू नु अरु रूम गेय पचा कली, थम प्रुडग आन कली ला प्रोंइशा वोइक्तीमी।

17 कल्दीपुकीम परमप्रभु यावे आ खिंम बाक्शो कांसा के थामपुकी, कांसा के ठेयब चिक्तीके बोस, मेको आ कांसा के नित्तीके लाइक्तेक्म। कल्दीपुकीमी मेको नेल्ल प्रोल्शा, बेबीलोन लाइक्तेक्म। येरमीया २७:१९-२२; १राजा ७:१५-३९; २राजा २५:१३-१७

18 मेकोपुकीमी बोसपुकी, बेल्लापुकी, सल्दो खोइक्तीक कांइची, अरु बोसपुकी, डाडु नु कांसा के बोस नेल्ल नु चढ़ेचा कली माल्शो मारेइ मारेइ लाइक्तेक्म।

19 पिप कली खाल पाइब आन कप्तानम सुन नु चांदीम सेल्शो आइक्च लोटापुकी, कोइला कुर पतीक, बोसपुकी, बत्ती दातीकपुकी, डाडु, तूचा थोव्रक चदेशोनु माल्तीक बोसपुकी नेल्ल लाइक्तु। १राजा ७:१५-३७

20 पिप सोलोमनम परमप्रभु यावे आ खिं कली सेल्पाइशो ठेयब थाम निक्शी, कांसा के ठेयब चिक्तीके बोस मेको आगाम बाक्शो १२ ओटा कांसा के ब्यफ नु मेको आगाम बाक्शो नित्तीके बाक्तेकम। मेको आन कांसा नाक्ने मचाप्चा डा शुश बाक्त।

21 मेको थाम निम्फा १८, १८ कुबीत लाइशो, १२, १२ कुबीत ब्रेम्शो नु आस थांइशो ४, ४ अडगुल बाक्ताक्स। मिनु आस आगा चहिं श्येत्थ बाक्ताक्स। कुबीत का ०.५ मिटर खोदेशो बाक्ब।

22 मेको आ तार कांसा के पिया पाइशो बाक्त। मेको आ पिया ५ कुबीत लाइशो बाक्त। मेको आ पिया कांसा के जाली नु दारीम आ बुटामी एर ओंथ नेल्ल हिरशो बाक्त। मिनु अर्को थाम यो डोंइती डा खोदेशो पा सेल्शो बाक्त।

23 मेको आस एर ओंथ नेल्ल ९६ ओटा दारीम बाक्तेकम। मेको आस एर ओंथ नेल्ल डा जाली कली हिरशो दारीम सहे का बाक्तेकम।

24 मिनु पिप कली खाल पाइब आन कप्तानमी ठेयब चढेब सेरायाह, मेको आ नोले डा चढेब सेफन्याह नु लाप्चो खाल पाइब सां आन कली ग्याइशशा लाइक्तीमी।

25 मिनु मेकोमी सहरम मेना सम्म लीशो लडाइ पाइब आन कली कोव्रब कप्तान का नु पिप कली अर्ती गेब ७ जना मुर आन कली ग्याइशशा लाइक्तीमी। मेको रागीम लडाइ पाइब आन कली पुक्ब आन कप्तान आ ब्रेक्ब मुर नु सहरमी थिश्शो अरु ६० जना वोंइश मुर आन कली यो ग्याइशशा लाइक्तीमी।

26 मिनु मेको पिप कली खाल पाइब कप्तान नेबुजरादानमी मेको आन कली लाइशशा रिब्लामी बेबीलोन डा पिप आ बाक्तीकेम चाक्तीमी।

27 मिनु बेबीलोन डा पिपम मेको आन कली हमाथ रागी रिब्ला सहरम साइव्तु। मोपा मेकोपुकी यहूदा आ रागी रे ग्याइश्शा लाइक्चा पुंइसाक्म।

28 मिनु नेबुकदरेसरमी सासन पवा आ ७ बर्सम ग्याइश्शा लाइश्शो मुरपुकी हिक्शोनु, हजार सां २३ जना यहूदी बाक्तेक्म।

29 मेकोमी सासन पवा आ १८ बर्सम यरूसलेम रे ८ सहे ३२ जना आन कली ग्याइश्शा लाइव्तु।

30 मेकोम सासन पशो २३ बर्स दुम्मेनु, पिप कली खाल पाइब आन कप्तान नेबुजरादानमी ७ सहे ४५ जना यहूदी आन कली ग्याइश्शा लाइक्तीमी। मिनु मेको मुर नेल्ल पा ४ हजार ६ सहे जना बाक्तेक्म।

येहो-याकीन कली प्रोंइशो

२राजा २५:२७-३०

31 यहूदा डा पिप येहो-याकीन कली ग्याइश्शा लाइश्शो ३७ बर्समी एवील-मेरोदक बेबीलोन डा पिप दुम्त। मेको आ सासन पशो १२ महिना २५ नाक्ती दुम्मेनु, मेकोमी यहूदा डा पिप येहो-याकीन कली चोक्तीक रे प्रोंइपाइव्तु।

32 मेकोमी मेको नु रिम्शो पा लोत्र पा बेबीलोनम आं नु बाक्शो पिप नेल्ल आन क्येडा ठेयब सेल्शा, मेको कली मान गेशा वोइव्तु।

33 मोपा येहो-याकीनमी आ जेल्खानम फेक्तीक वा पुइश्शा, आ लीशो नाक्ती नेल्ल पिप नु जशा बाक्शा पाप्तु।

34 बेबीलोन डा पिपमी येहो-याकीन कली नाक्त किंत किंत मेको मबेक्म सम्म आ माल्शो मारेइ मारेइ गेप्तु।

परमप्रभु यावे आ लोत्र

Bible in Sunwar (NP:suz:Sunwar)

copyright © 2011 Wycliffe Bible Translators, Inc.

Language: Sunwar

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789937101646

The Bible without Deuterocanon

in Sunwar

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

27cd6a1c-0244-5add-a4e8-b4f0e5104473